

清代傳記叢刊·綜錄類⑦
周 駿 富 輯

國朝耆獻類徵初編(三)

卷二五三至
卷二五九

(清)李 桓 輯



明文書局印行

1401/2

國朝耆獻類徵初編卷二百五十三目錄

僚佐五

鮑志周

湯相尹弟相萊
陳力

楊伊邕

金林
黎孝枝

楊晚

陳采

何潛
王原洙

鮑文燦

盛際斯

王繩曾

浦起龍

段海生

劉大樹

韓海

周宣猷

徐梁棟

顧見田
林元炯

余文梓

李觀瀛

張益哲

羅國楫

陳方秩

鍾靈

夏逢葵

胡鈇

張汝霖

金林

國朝文苑英華卷之二

羅升

朱彝尊

焦率祖

杜冠玉

黎榮生

車騰芳

曠敦本

彭仕周
李宗樵

謝晉

范元芳

孟承謨

楊文賜

于公裔

楊瑞
蔡璋

華純曾

鄧愷
王廷範

補錄

孟承謨

國朝耆獻類徵初編卷二百五十三

通奉大夫前署江西巡撫江西布政使司布政使湘陰李祖輯
僚佐五

鮑志周

鮑志周字景濂杭州餘杭縣人性至孝幼喪父泣血苦出後讀書鄉塾常往哭於墓一日晚歸母見曰赤腫疑同塾角戲痛斥之後家人見其哭墓泣曰昨何不言曰恐傷母心也年十九補弟子員旋食餼雍正七年拔貢成均八年冬簡往陝西明年攝邠州涇化縣涇自明季殘於寇今猶未蘇志周極意撫循之宿弊悉除冬饑民謀徙志周親往稽戶口計常社兩倉儲穀足支四月則麥期近

乃屬耆老告以毋轉溝壑爲之泣民亦泣由是無出疆者肅州需軍米檄漕三千石志周發穀屬民領碾不以役督曰差役卽擾民何堪米竟先期交運陝甘兩省多荒地雍正開議令三年墾復十年升科漕前令已申報可墾者千數百頃志周知地瘠見耕者尙多三年一易謂之歇地況久荒乎擇稍可墾者援折算例請於上官入告報可時州牧難之志周堅持竟得請退語人曰我別母之官母訓我愛民如子不愛民是負母訓也治漕未二載前流徙蜀漢閒者咸歸業以內艱歸乾隆四年服闋赴補時河南雨災奉命往協賑務賑考城考城令以君故得上考明年補濬縣治濬如治濬中丞雅爾圖器之調祥符甫受事管河同知移書刻期徵

民夫四百志周以非公檄不應六年江南災明年上命移河南米麥協濟米須碾運府倉七千石縣倉九千石事孔亟會城碾戶盡役於府志周赴朱僊鎮集米商告曰舊例照折起運贏歸官今以官穀照折易爾米贏歸爾眾權諾不日以足麥購於市他邑民皆苦之志周潛以人雜諸商買市糴數足而民不知中丞雅爾圖榜其堂曰循良師表旋擢本府清軍鹽捕同知未而月攝彰德府整率有方中丞益賢之復榜其堂曰治擬龔黃題請知衛輝府部以非題缺議駁中丞仍檄署之會畿南二麥歉收移文河南郡邑備貯衛郡責糴八萬志周置之屬邑數請曰無庸境內商販赴彼日數千石食自足不外需矣一經官購則當截商商截則市價必

昂鄰民未濟我民先病且麥不可久貯勢必借糶易穀不滋累乎已而果不需麥九年得代返汴疾作遂卒年四十有八志周公明清敏坦懷接物出之肫肫其性也在涖化時有重囚周龍穴獄亡法曹掾報入志周亟命掩捕時例禁嚴限滿不獲落職協緝翌日邑民知之恐循吏去各自起丁男四出佐緝有三原民故健步能索叛亡一日過涖村里惟見婦女怪之詢由或告以故其人曰此非涖人所能吾當密偵之婦女聞之圍繞爭脫簪珥賂之致懇未幾果獲其令祥符也有黑衣人自稱尉氏縣捕役子緣張某姦彭某妻因謀死親夫事父捕未獲勒限重比婦見居臬署旁張見充臬署庖人勾公逮之志周卽帶黑衣人往獲訊不諱黑衣人曰有

天矣言訖不見彭係瞽者乾隆四年水災夫婦逃荒往中牟依姪不能存復轉徙道逢張姦其婦以翦股殲瞽者姪證語合獄成移尉氏事猶未發覺黑衣人者鬼爲訴也至今汴人猶傳異云公宦十載貧如故中丞雅公去頎色代聞之太息語僚屬賻之兩河士庶爭哭賻喪得歸子二長斌次宸錦

張庚曰昔孫樵書何易于事數則史官據之入循吏傳其言質爲可信也余與鮑君皆浙人里居阻迴生未之識乾隆己巳來汴士民及官茲土者籍籍稱之近有自關中來者亦述其治行名豈虛附哉餘姚周君燦如僑居大梁次其政績乞余傳書之備史家採擇焉

右傳張庚撰

湯相尹 弟相萊
陳力

湯相尹字聘三湖南零陵人雍正己酉拔貢幼有神童之目能文善書法尤工詩賦著有東軒詩彙族之學業自相尹倡之諸弟皆相尹所成就性剛介言笑不苟同年大學士陳大受夙相契洽屢以書招不赴任嘉禾教諭卒弟相萊乾隆丁卯舉人官益陽教諭有清操崇厲士品歸以壽終子炳笈丁酉拔貢又有陳力字無競新化人少孤事繼母以孝稱理學文譽擅一時雍正中歲貢官石門訓導日聚生徒講學澧人多服其教閩九年歸平居清素嚴峭不妄交一人取與嚴於一介而誨人如春風和藹亦喜吟詠邑人之能文而有行者無不出其門也

右傳李元度撰

楊伊邕 金林 楊琬 黎孝枝

楊伊邕字錫侯湖南安鄉人雍正己酉拔貢麻陽教諭縣苦徭役力請豁除之捐俸建學署在任九月卒官士人祀諸學宮左同邑金林字繼山雍正中歲貢鳳凰廳訓導兼主敬修書院發明正學多所造就遷龍陽教諭以老歸著有書經翼鈔詩講義四書翼注時有楊琬字慕六祁陽人康熙丁酉舉人雍正庚戌進士授衡州府學教授以德望見重當事主講石鼓書院出其門者多一時名雋年七十五致仕歸猶於里門聚徒講學手不釋卷八十四歲卒著有春風堂彙行世又有黎孝枝字卜子華容人居家孝友與兄材植弟模杞相師友咸以文章馳騁一時雍正癸丑舉人官湘

潭教諭著有劬園集

右傳李元度撰

陳采 何潛 鮑文燦 王原洙

陳采江甯人雍正中知城步縣縣西南響水洞積石阻截江流明萬厯中知縣元宗孔開鑿後歲久淤塞至是采卽故道開濬民便之號曰陳公江擢寶慶府同知同時湖湘著聲績者又有何潛秦安人知新甯縣縣塘汎兵時以私役擾民潛至嚴禁革之且紀以石民以爲便尤善折獄囹圄幾空以卓異擢鳳凰營通判鮑文燦貴池人任綏甯典史禽獲逆獯蒲寅山五年復平叛苗以軍功擢新涇巡檢王原洙句容人任武陵縣丞革官役私派每單騎督修隄障均隄畝除積弊定歲修督種樹民皆德之

右傳李元度撰

按陳公雍正七年任城步令

盛際斯

山中以文名天下者天下學者皆知有武甯盛氏而其能皆出於
教授公公少嗜學治經書廢寢食尤深於春秋出入左史秦漢爲
文日奇肆無涯出以示人人不能讀時習尙卑靡學者不知有古
公崛起童子中務爲深實宏博有濟於用卽與時不合益賦詩著
文犖犖自喜旣冠補諸生三年選貢士入太學與義門何焯論史
焯異之退曰天下才也太學生帖帖屈服丁內艱數歲復遊京師
無所合久之選授樂平縣教諭十九年稍遷教授吉安府又四年
致仕方是時仕途多闕茸廣文故冷曹譏彈弗及公獨慨然以師
道自存進諸生於古繕竹房開講席設粟廚食其貧而無資者一

以程度校其能爲上下凡所受後先進退皆有門戶可理有二生者以不友聞公踧踖曰吾師於是而弟子若是何可問召至爲詳述古今孝弟事動以天性復自傷教化不明齋咨太息聽者屏氣斂容二生皆流涕頓首謝遂相友愛終其身當是時清厓盛先生之名播於湖東西閩後生想望丰采者願得一就所聞無何而公歸且告卒矣公既卒公之諸孤傳公所著者曰春秋心傳曰清厓集曰詩藪而公之子及公之存已有名士大夫聞其後季子樂以博學鴻詞徵仲子大謨以經學薦海內士莫不知有所謂武甯盛氏者武甯於江右地稍僻人文闊絕二十年間馳驟風雅後先相望郁郁乎爲豫章名縣蓋武甯風氣自盛氏開而公之德教灌輸

後人者隱然盛氏老泉於戲其可以弗朽矣乾隆辛未諸孤旣得
吉於西郊少白山之陽乃奉狀乞銘於南豐謝鳴謙謙謹按狀公
諱際斯字成十其先浙人明太祖初立以盛文郁爲武甯令因家
焉曾祖準邑學生祖貢處士考德壽邑庠生以公貴 贈修職郎
妣李氏 贈孺人公生於順治庚子八月二十二日年七十爲雍
正己酉以閏月四日終於家取李氏生大業邑庠生繼室鄭氏生
大謨歲貢生鏡隱不試樂拔貢生女三壻陳恭次諸生余魯次陳
瀚孫男九燧燭周郡庠生樵匡牧琴夬瑟曾孫男二崖峯仲子謨
言先君性莊靜寡言笑與人接必以禮端坐竟日元精炯炯然課
謨輩以古人學期於有用不必期於用如是者數十年如一日云

月... 卷之三十三

銘曰

阻岡依許瞻矚億戶有樂斯土鬱蔥哉是為盛氏文章祖

右墓誌銘謝鳴謙撰

王繩曾 浦起龍

王繩曾字武沂江蘇無錫人少受學於舅氏秦道然講主敬之學
墨守繩尺言動必於禮年五十餘以雍正八年成進士官揚州府
教授既歸主講東林書院尤能造就後學及門如顧奎光秦朝鈺
後並以文學品行著同榜進士浦起龍字二田金匱人官蘇州府
教授起龍居邑之前礪肆力於古於書靡不窺丹黃甲乙積數十
年從學者質問經史輒舉某書某卷某葉以告檢之無弗合其爲
文學唐人諸雜家所著讀杜心解 御選唐宋詩醇多采其語官
教授時青浦王昶嘉定錢大昕王鳴盛輩方爲諸生並遊其門

右傳秦瀛撰

--	--	--	--	--	--	--	--	--	--

段海生

余髻髮好結儕輩文豪交邑有段子諱海生字涵川別號直齋者
長余一歲兄事之其先世安邑人十三世禮先公遷於邑南珠田
鄉越七世高祖一貫公生歲貢士貞錫公貞錫公生所 馳贈文
林郎珍袞公珍袞公生所 敕封文林郎昌邑公直齋爲長沙府
教授 贈封祖考如其官家故清貧少欲負笈遠遊無資斧邑先
達異其有聞卽悟或祕之若類叔夜廣陸散之於袁孝尼焉者直
齋笑曰制舉業耳是區區者而不余畀乎益自奮其文日躋於古
雅掩出强者右雍正丙午舉亞魁庚戌捷南宮始信瓊樹天挺固
不藉人力栽培也憶余年十二應郡試兩人初接文戰遂定交及

黜於督學醱飲酒樓直齋以箸擊棧而余拍掌同唱王子安句云
無路請纓等終軍之弱冠有懷投筆慕宗慤之長風時四坐有髯
而文者屬目曰童哉童哉殆將爲翰院才余兩人齊聲應之曰翰
院足重王郎耶明太祖怒諸庶常疏陋而使拽大木亦苦矣直齋
方孩提被災炙其面相者曰當黥而王此子幸而傷他日必以文
章顯旣而逾月不愈母彭孺人夜夢老嫗啖之以藥達旦而瘳歲
己卯奉新例以舉人充同考試官直齋赴西蜀途次荒徼將夕霧
雨迷漫無逆旅空中髣髴簫鼓聲強行轉山麓忽見一媪坐茅簷
下借棲許之窺其家廚隘銚冷媪旋治食具香氣觸人鼻則鹿脯
也詰朝發輿投店向店主稱媪賢主人駭曰昨所經由實無人煙

惟有古觀音廟耳時鄧君士衡赴黔省同此役猶未臨歧也亦適
值其事嘻異哉前之嫗入夢療其殘後之媪止宿援於險是殆所
謂賢豪受命鬼神惜之者歟初爲諸生時邑苦沈令尹婪酷奸徒
敗類高豎德政碑於縣門左方直齋與黃姨父拱北先生沽酌城
南市旣酣語及之遂掇袖偕躍碑所怒聲雷轟拾小石亂擊刊列
姓名胥役不敢訶止一邑稱快余寓衡聞之南望大叫曰昂乎壯
哉限外余余不知其魂魄雄視九原當復何如也任長沙羣官爲
趙大中丞壽入享坐直齋於千把佐雜之席輒趨出中丞怒詰狀
錢太守與直齋善復攜入從容謝曰職忝郡學師獨不能參牧令
筵隅乎中丞甚韙之自是教班得不墜居無何以憂歸質貸營喪

事哀毀日甚成足疾因吟曰一子良其趾連年巽在牀願戶庭聞
有邀惠起家者而候寢卒無一人又吟曰身病熱如火人情冷似
冰然於所惠未嘗悔且恨聊寫其大凡而已其遺令于秀詩云此
後丁甯無別事能爲孝子卽忠臣由斯以觀所學所養豈徒文藻
云爾哉凡立言皆經史精義鐫板行世亦三不朽之一也令子以
丹楹承其宇蚤爲邑佳士前王令尹拔諸童子中嘆喏稱天才達
湘源於陽朔其流將滿洞庭焉乾隆辛巳冬令子以墓誌銘請余
筆嗟乎晨星俱落秋草獨搖返恤頽齡行思逝者安能忍而無感
於言乎韓昌黎多諛墓惟柳子厚碑按其實余雖瑣瑣遜於韓而
與直齋交莫逆猶之乎二子也二子大有功名具而窮復相敵余

兩人夙負萬民志直齋終教授乃雄雞自斷其尾頗不爲世縛余
一官穿鼻數年竟以執法論免是所愧於直齋者然俱不似子厚
失足甯甘轉軻則生死可共質也直齋惡言利館殺官俸逐手散
去幼年偶出塾歎天旱尊公叱之曰苟勤於學粥糜可矣小子慮
早何爲直齋伏拜訓是以其志不在溫飽也余昔以誤競浮名淹
客路及歸直齋已捐館今且幸而後死猶得爲之志其椽槩以報
良友云按狀卒於某年月日享年若干子男一秀邑諸生孫男幾
今卜葬於某地並書石藏諸墓銘曰
瘞若華兮照黃泉散餘輝兮奕葉聯生玩世兮死非仙惟幽宅之
永固兮惟其才也惟其賢

右墓誌銘李繼聖撰

劉大櫨

劉大櫨安徽桐城人貌豐偉而性直諒嗜讀書工爲文章年二十九遊京師時內閣學士同邑方苞以能爲古文詞負重名大櫨以布衣持所業謁苞苞一見驚歎告人曰如苞何足算耶邑子劉生乃國士爾聞者始駭之久乃益信雍正七年十年兩舉副榜貢生乾隆元年苞舉應博學鴻詞科爲大學士張廷玉所黜旣乃知大櫨深惋惜十五年廷玉特舉大櫨經學又報罷乃出爲黟縣教諭數年去官歸四十四年卒年八十有二大櫨雖遊方苞之門所爲文造詣各殊苞益擇取義理於經所得於文者義法大櫨並古人神氣音節得之兼集莊騷左史韓柳歐蘇之長其氣肆其才雄其

波瀾壯闊嘗著觀化篇奇詭似莊其他言義理者又極醇正詩能包括前人鎔諸家爲一體雄豪奧祕揮斥出之著有海峯文集八卷詩集八卷從遊多以詩文鳴者而姚鼐吳定爲最著

右 國史館本傳

先生姓劉氏諱大榘字耕南號海峯桐城人也曾祖日耀明崇禎時以貢士廷試授歙縣訓導祖姓父柱皆縣學生先生狀貌豐偉而性情直諒寬博讀書工辭章之學自古文亡於南宋前明歸太僕震川暨我朝方侍郎靈皋繼作重起其衰至先生大振其才之雄兼集莊騷左史韓柳歐曾蘇王之能瑰奇恣睢鏗鏘絢爛足使震川靈皋驚退改色詩亦孕育百氏供我使令元明以來辭章

之盛未有盛於先生者也年二十九應舉入京師巨公貴人皆驚駭其文而尤見賞於方侍郎暨吳荆山閣學以爲昌黎復出已而兩中副榜貢生以終乾隆之初邵開府余京兆欲薦先生賢良方正辭會舉博學鴻詞方侍郎以先生薦及試爲大學士張文和所黜而文和後大悔洎乾隆十五年 詔舉經學文和獨舉先生而文和旋去位乃出爲教諭於黟黟士至今感誦先生教育之仁不息 國家用經義選天下士而先生以振古之文生於 列聖相承文教累洽之日又有持權者爲之引延而卒淪溺下僚不獲展其才以沒則信乎命之窮也然而富貴之榮沒則寂焉斗筲之功名亦澤竭則亡焉天地之光華一日不掩則先生之文章一日不

磨界先生以曠世不數界之才而特假巖壑寬閒之歲月以成先生千古之榮天之眷佑之者至矣卽使先生數奇屈於生復屈於死卒致泯沒於無聞而先生之可不朽乎此生者自在也其又奚懟焉所著有詩文集已久行世其卒也以乾隆四十四年十月初八日年八十有三娶吳氏生子三人皆早死以兄之孫符琢爲長子介後嘉慶四年十月某日葬先生於梅子嶺先塋之左門人吳定涕泣爲之銘曰

文雄千古遇屯一時一時之屈千古之師豈無公相高筮霆飛百千灰滅公尙巍巍韓歐之側配食攸宜謂予不信請視來茲

右墓誌銘吳定撰

劉海峯先生名大槐字才甫海峰其自號也桐城東鄉濱江地曰陳家洲劉氏數百戶居之爲農業多富饒獨海峰生而好學讀古人文章卽知其意而善效之年二十餘入京師當康熙末方侍郎苞名大重於京師矣見海峰大奇之語人曰如苞何足言耶吾同里劉大槐乃今世韓歐才也自是天下皆聞劉海峰然自康熙至乾隆數十年應順天府試兩登副榜終不得舉乾隆元年舉博學鴻詞乾隆十五年舉經學皆不錄用朝官相知提督學政者率邀之幕中閱文因歷天下佳山水爲歌詩自發其意年逾六十乃得歸縣教諭又數年去官歸樅陽不復出卒年八十三無子以兄之孫某爲後先生少時與蕭伯父蘆陽先生及葉庶子酉最厚稱於

乾隆四十年自京師歸庶子與爾伯父皆喪獨先生存屢見之於
樅陽先生偉軀巨髯能以拳入口嗜酒諧謔與人易良無不盡嘗
謂爾吾與汝再世交矣天下言文章者必首方侍郎方侍郎少時
嘗作詩以視海甯查侍郎慎行查侍郎曰君詩不能佳徒奪爲文
力不如專爲文方侍郎從之終身未嘗作詩至海峰則文與詩並
極其力能包括古人之具體鎔以成其體雄豪奧祕麾斥出之豈
非其才之絕出今古者哉其文與詩皆有雕板爾欲稍刪次之合
爲集未就乃次其傳

右傳姚爾撰

桐城劉才甫先生古文直接望溪爲一代起衰之手不知詩直接

唐人爲一代復古之士如薄雲疎過雨深樹亂鳴蟬日邊雙鳥白
霞外一天青江聲夜雨增悲壯海色朝霞接混茫何減大歷才人
至煙寒漁火稀月落江光白曠野悄無人孤舟獨歸客江村黃葉
飛猶掩蕭齋臥時有捕魚人鵝聲窗外過不自刻畫而自入妙者
未得唐人家法何以能此嗣姬傳先生古文詞類纂一書選擇精
嚴瓣香一氣尤可知文品與詩品同歸高潔也

右寄心盦詩話符葆森撰

VI

VI

韓海

先生少爲鄭給事際泰推許及爲諸生名益著殿撰王世琛中允
王元衡河督周學健來粵皆心折之顧困於衣食恆賣文自給性
孤介嘗授徒富人家以坐位小失卽拂衣歸借鄰米以炊市片糖
下飯怡然無悔色年近五十始領鄉薦又十年成進士會舉鴻博
制軍鄂時齋彌達中丞楊陞山永斌再三徵至今賦夏蓮詞有欲
待移根歸太液須尋十丈藕如船之句遂不復強未幾卒

右嶺海詩鈔凌揚藻撰

按韓公字緯五一字橋村廣東番禺縣人雍正癸丑進士官封川教

論著有東
泉詩文集

國朝書目類考

十一

周宣猷

君諱宣猷字辰遠號雪舫湖南長沙北鄉人也先世自江西之豐城徙居焉父文林郎諱炳字九峰母孺人蔣氏舉子五君行三年十有七以文冠邑士受餼學宮壬子舉於鄉明年成進士選授浙江之桐廬調海鹽尋遷分司嘉松鹽運判官在任十餘年有異政吳越人雖不隸部下者至今猶謳思之桐邑吏民樸厚訟牒稀少君一意噢咻之與之休息唯典妻一節敝俗相沿恬不爲怪凡鄉民無後者得典人妻生子後則歸之年限屆而無子則價贖如其數君痛切出榜示禁數數召耆老申誠曉以廉恥禮義此風竟革大吏才之以爲簡缺不足煩君特調海鹽是邑多奸民猾吏每一

獄起輒陰主其事持官短長攬納愿民租賦朦朧影射無所不至
歷任無滿二歲不望議者君鉤考積弊勝以嚴威先罰後賞滯案
一空以故吏畏民懷循聲大著兩浙轉運分司之缺世所謂美官
也所轄皆富商大賈歲奉有例遇大小掣有例事逸而享厚松所
故事必監政親莅監掣不以屬司獨君在任則兩所悉以委君若
恃其清白無他故也乾隆十有二年秋松江海溢漂沒甯丁居民
三千餘戶口奉文督賑胥役伺隙染鼎者相環也君先期使民自
占戶口揭帖於門家至而戶給之不以勞瘁自惜人人慶更生云
先是桐有虎災旬月中傷七十餘人君爲文牒蘆茨鄉之神三日
獵人報獲虎甚眾其患寢息濱海有流人口被殺先農壇下其妻

以意指所與遊者某畏榜掠將自承君察其意色非是乃詣城隍
祠齋宿致禱夢若揭榜唱名者曰高中狀後竟以蹤跡高姓者一
訊輒服君故不恃神以見才而亦往往有驗如此君於官事無難
易皆健於治辦而公餘以朋友文章爲性命杭之士大夫知名者
皆投分成契好酬唱不倦兩司分校來秀多出其門又不時集諸
生考校手定甲乙上官好文者雅重君檄理會城書院而君固喙
硬是非無所假借遂有以飛語中傷者曰某某黨也竟以是罷去
文林公就祿養有年君旣罷官而貧無以奉甘脆於是就館維揚
吳氏歲一歸省後歷遊吳越燕趙南抵黔陽垂橐而歸凡所遊涉
一寓諸詩晚節杜門不出課其羣從及諸子弟以今古文之學多

所成就卒年六十有一夫人原配陳氏同里太學生崑圃公女素
孝謹隨夫任在浙內政清肅子三克鵬庚寅恩科舉人次克受
前歿次克鯤太學生孫五有琥有璘有璜皆鵬生有毅有玟鯤生
女六繼配萬氏翰林九沙公女承家學能文工隸法克鵬等皆從
受學未滿一歲卒君深悼焉所著有史斷史記難字南北史禪古
文柯椽眠雲集禾中雜詠迎鑿祝嘏詩除已付開雕行世外
餘藏於家

贊曰不知雪舫者以爲作令能感鬼神所策多奇中詫爲稀罕其
知者以爲天性浩落不以宦路升沈芥蒂其胸此其說固然吾獨
惜其負奇才遇昇平之世而未竟其用爲可惜耳跡其治二邑寬

嚴各異並收成效及分領漦運常變隨宜處脂膏不以自潤此其
志量豈不欲大有展布以報 國者而時運不濟中道而蹶何能
無鬱鬱於中而年之不長因之此吾所爲雪舫悲也若乃強顏放
意以問廢爲樂一庸人能勉爲之至於百神列在祀典次亦享耕
氓蠶婦之香火其宜爲 朝廷呵護善良誅鋤殘賊與職官等不
必雪舫而後能感動者也特貞邪視乎其素誠僞視乎其心則有
應有不應耳雪舫有知當亦以予言爲然

右傳陳兆崙撰

雪舫長沙名族詩得大歷十子之遺

右湖海詩傳張維屏錄

--	--	--	--	--	--	--	--	--	--

164-044

徐梁棟 顧見田 林元炯

徐梁棟金匱人乾隆中知湘陰縣會夏饑梁棟籌穀數千石分貯平糶多所全活勸營房新學宮改建仰高書院以縣西文洲圍湖地五百畝撥充書院膏火士民德之巡撫楊錫紱以梁棟與巴陵知縣薛澍列薦得旨嘉獎梁棟後擢辰州府通判時又有顧見田太倉州人任湘陰縣丞清廉自持管理圍田水利奉公履正一以保固隄垸爲事有不喫民間一口水之謠卒於官至無以爲斂士民言之流涕林元炯瑞安人任沅陵縣丞駐界亭驛驛距縣百四十里赴訴者多質之丞元炯至歷年疑獄剖決無遺嘗條陳時事巡撫陳宏謀悉嘉納之在任十年以病乞歸

右傳李元度撰
按徐公雍正
癸丑進士

余文梓

修職郎余公諱文梓字季良號山翁豫甯人明處士諱化之季子處士深於易通焦氏之學錯綜其數周連洞札凡所遇歷虛豁呈露悉如其則十不遺一一日語其配王氏曰吾將有大難病垂死然不竟死死數日復生生且得賢子汝唯謹侍毋棺吾已而果死死七日果復生歲餘乃生公公生而俊邁與羣兒自異稍長知讀書刻苦卓立爲文蕩然復古不爲風變族太學生志明以能文遊京師有重名遇人皆平視無可意者及得公則引服自屈莫與先公故有才深沈通博不屑屑小用自爲諸生食餼僚侘久不遇比餼滿以明經貢公已老遂絕意於世授其子以經閉戶不出丙午

國朝通志卷之三十三
三
以次選袁州萍鄉縣訓導甫期 敕修職郎致仕終方公既冠歲
甲寅白頭兵亂白頭爲江西總鎮楊富軍楊富以事誅餘黨流靖
安哀其軍故用白號白頭兵兵無統屬皆少惡慄悍專意抄掠蹂
躪近縣漫患滋甚時遣使致書秀才余倫使爲先道倫得書惶惑
失措急召公議公從容語曰白頭禍民實甚若見助如生靈何不
如因而擊之倫曰謹唯命公遂陽爲輸誠厚結使者陰與中泮盧
氏諸路聯爲犄角設伏於長墅兩山獨聚精兵隘口使人潛旗鼓
密林閒遠近疑應後數日白頭兵至旣入境盧氏鼓譟於中泮乘
其後白頭無備麾兵疾進及隘公率敢死者百餘人突起掩擊賊
駭且走兩山伏發矢如雨注軍聲震天賊亂自殺相枕藉死斬首

無算得弩戟戈矛之屬千餘具兵遂潰丙申邑大水城壞人溺死
田屋漂沒縣令懷印綬跣且走時潭埠居人會夜半水至急不得
走遽登樓樓溢踞屋上水益張洪濤怒誼屋震駭不可保男婦悲
號其上危若累卵公自山督家僮十數輩編木爲桴繫長綆一人
屬綆一人援引屋上迎縱往來悉出所居人凡三百餘口是歲天
大旱邑旣經水復荒旱人人不自存公傾廩振濟量戶分給無遠
近皆周全活甚眾處士始娶程氏生子三曰榛曰楚曰森程沒繼
娶王氏生公處士固愛公年且老屬王氏曰此子當大吾門唯汝
是成幸毋廢比喪公始十一歲教誨成立皆出母氏公孤苦旣自
立岸然異於人其所施皆天下事能大用然卒不遇公以順治辛

卯正月十六日生卒於雍正壬子二月二十四日甲寅四月葬鐘
林原從先人塋嫡配胡氏生子偉早夭後鄒氏生子二長曰蛟選
貢生次曰螭能文孫男曰荃於謨爲壻葬既四月將立石蛟具述
乞謨銘謨知公久以文爲蛟重不敢辭銘曰

維公之興厥德孔碩逢天俾怒靡所定適蘇我於涸釋我於攀而
復康好於公見全公賦旣亶克凝其休順德之行胡不悠悠位竟
修職曷爲稱施曰繩其武利於後嗣

右墓誌銘盛大謨撰

李觀瀛

先生名觀瀛字湘友十洲其號也萊之膠州人父澤禹城教諭先生以雍正乙卯舉於鄉晚年教諭萊蕪是時州縣以吏治相尙持苛深迎合上官意旨待士無體驅使教官如屬吏縣有富豪與楊姓比居而利有其宅與鹽賈通謀誣以私販沒入之楊姓弱不能理其族人生員某訟於上官上官庇富賈不勝檄學戒飭富賈欲庭辱之以洩忿逮繫某生促召學官至縣庭決獄縣使三反先生不往具稟本府言待士自有體今事屈已甚或致決裂壞士風傷國體遂力求去以歸先生爲人質直義所不可不以利害阻與人言侃諤自遂而出之以誠意人不以爲忤也海陽鞠翰林謙牧善

清談與先生會於京邸推闡陽明氏灑灑不可竭先生抗聲與辨
謙牧心折改容謝先生初爲學同里張進士山民方以理學古文
倡率後進獨心器重先生招與遊處與折衷經史及先儒書學以
大就其教人必宗朱子家言曰孔孟正傳在是烏可舍康莊由曲
徑也年七十有九卒子三人壽鼎壽國壽民先生之歸也膠人果
以城築之役當事者辱士士大闕當事者解綬去人以是服先生
先識云

論曰余嘗至膠過法迂齋海上廬閱迂齋集評點多出先生手歎
其學有本源王君幼藻先生門人也通經學善古文詞爲予言先
生行事甚悉因示以狀略及迂齋所記軼事而屬爲傳余錄著之

如此先生平生不喜著作嘗曰古今事變義理精微先儒論之詳矣深求自得之可耳卽此殆與炫詞華以邀名者異矣

右傳韓夢周撰

張益哲

雍正十二年夏徐州張公卒於里第公子鼎卜吉於十一月十有八日葬公於某地之阡夫人蘇氏祔謀瑒貞珉志隧道緘其後先所爲狀使來請綴詞予於方伯爲同年友知公素稔緝狀蹟胥可信今傳後爰不敢辭按公諱益哲字知損籍徐州曾祖諱洪德植基忠厚祖諱景新年未永父諱國珍殖業貽謀克承克啟公其仲子也幼嶷重奮志自立執經塾師矯異羣從繼而請業聞人下帷銳進漸探奧蹟篤嗜詩古文辭薄帖括弗就試父爲入貲通籍始宰山左肥城遷秩佐浙之溫州府公之爲宰也潔己飭法削冗胥戢奸盜不爲長安朝歌尹虞之嚴刻而神明似之邑故難治自此

帖然槁敝僻左顧疲於般遞公申請移徑道不克乃通計歲費令編戶均輸以時給賃吏不得因緣剋索其佐郡也職專海汛郡接閩瓊無藉輩叢集海洋南北鹿諸島嶼聞布廠成藪暮伺估舶輒肆剽掠盤結深固由利其賂遺者眾公颿舸歷險驅窟焚巢宿害一清上官悉其幹理累檄攝平陽浦江蘭溪淳安諸縣篆公勇於除弊有尹子兄韓長公之風而崇禮教興文學尤大類長公如在肥葺文廟拔寒雋置學舍在浦江拜鄭氏祠以風慕尙在蘭江訪仁山香溪諸儒遺蹟優禮其裔在淳安賞識名輩而於甌郡鑿拔獲雋成名者彌彬彬也又捐糈廓校士舍密營其制令士無所苦所至多歌詠德教有古循吏之風焉公慷慨任事不辭劇易康

熙丙子年 聖祖親征噶爾丹大軍輓運例委州縣官領護畏慎者惴惴規免公獨詣當道請行車徒糗糒駱駝驛繼道總統偉其能并令主十八臺收支糧餉凱旋敘勞晉秩二等 聖祖南巡委辦供具綜練之槩徹於 宸聰先後再 賜御書大僚屬目遂委署郡篆公方欲益加釐剔而曩所糾正遏絕者失利之徒惴畏構毀借所屬逋囚坐公落職繼又猥蠹賊私冀重公罪方公之領運而還也有所判監生某謀娶尹姓已聘女爲妾業定讞歸尹生賄代賈者翻案尹復籲理生迫納金老胥懷令爲緩頰公燭其情立召縣尉抉其懷發白鏹若干貯諸庫行申稭致法羣紳士哀請其保其悔罪改行乃止跡此冰玉烏能澆之公亦坎險心亨事獲漸白

去甌時父老扶攜進厄車不得行壬辰歸里踰年侍太翁入都祝
聖祖萬歲公卿欲竟其用援 恩典列名以進格於年例未符
於是公之才弗克盡展而以報 國之志屬諸後人雍正四年子
鼎由御史分巡浙右 皇上加恩錫類賜公文綺二端公既拜
賜益勸其子以竭忠圖報又慮使署枹設所需未備乃載粟給之
并觀其措注遠蕃宣漢南恆往來指示蓋公嘗遊歷楚越周悉風
土利弊故託以見諸施行也公之學精於詩而易尤邃治縣公餘
以讀書摹帖并誦詩爲程課內艱讀禮兼讀周易謂此昔聖憂患
之書吾於哀思愁愴研究倍切可以洗心交神明而況吾親乎三
年閒循環反復覺矜心躁氣俱釋因更知損之字去甌後由杭赴

閩質成制府歷覽於富春釣臺武夷九曲諸名勝摭懷嘯詠仍和
易春容深得溫柔敦厚之致方伯在楚罹患手書慰諭教以讀易
又云吾唯有詩易二經中作活計蓋所得者深矣公性嚴毅教育
子孫常有矩矱無少假純孝誠篤懇戀瞻依丁丑扈從至夏鎮瀕
回告上官夜馳數百里問寢比解組歸里門日就左右凡所以順
適意旨者備至考壽九十而終猶孺慕哀痛與十餘年前居母憂
無異至於撫孤甥表寡妹卹姻喪妻屬僚之孤胥由親親以及之
遇饑減糶倡義修垣高行厚誼難以枚舉考終時神氣凝定享年
七十有一夫人姓蘇氏同里文學錦章之女歸公時逮事重闈潔
滄澹具甘旨自齊至越板輿奉養所爲樂其心不違其志者夫人

有助焉及公以蜚言待理於浙夫人營寄資斧遣子省視且誠以
努力勉學勿以憂患少輟每歲時虔奉蘋蘩就寢前夕猶縮酌毫
魚親治祭具先公四年卒享年六十有五子三長卽鼎康熙癸巳
科進士原任湖北布政使司布政使次奇康熙戊戌科武會試進
士次言早卒孫男四子與方伯交見其恂恂循謹若不勝衣而遇
所不可殺然莫能奪以此知公之教戊申秋余奉使安南還次漢
江方伯適莅楚相見得起居公無恙已而方伯坐累罷官數年事
始雪今夏楚當事移牒至部余爲心喜謂繼見有期不數日遽得
公赴今乃執筆以銘公藏也其能無愴然於懷也銘曰
雲龍呂梁氣磅礴彭城胙土命氏爰合厥名蘊積凝謚傑偉挺生山

巖海溼利剖盤根幕南漠北追逐鼓鉦鯨波鼉島剔抉孽萌羣溫
齷齪曖昧昭明厥施未究宣諸後昆內德蕙蘭助以璜珩潔饋虔
奠終始愨誠宅茲蔥鬱息老甯神永詒爾有穀子子孫孫

右墓誌銘任蘭枝撰

羅國楫 陳方秩

羅國楫字濟川湖南酃縣人父驥早歿國楫謂非報國無以顯親於是效力滇粵雍正十三年任西安府水利通判操守嚴謹寬猛相濟時府屬冬盡民憂不雪國楫虔齋步禱不數日雪深三尺士民歡舞頌其署曰至誠格天前令動帑修龍洞渠工久未成國楫講督修絕胥役派累之弊工以速成又有陳方秩字惺莊衡山人雍正乙卯舉人官易州州同多善政捐廉設義冢圍塚植樹禁民樵採生童月課親加評騭增膏火村有連氏者姑與媳訟方秩曲爲開導遂爲姑媳如初在易州數年僅積百餘金遣子攜歸以百金捐入祖祠五十金給寡嫂劉氏爲撫孤養老之資自奉儉約蓋

猶鄉村老學究云

右傳李元度撰

鍾靈

鍾靈字仙吟平江人雍正十三年舉人分發南河知縣擢泰州同知

湖南舊通志靈以縣令分發南河乾隆十六年 聖駕南巡獻詩百韻擢泰州同知所在多善政著有易學啟蒙補義易學卮言河防紀要理學質疑人譜述餘內外篇諸子粹言

右湖南文徵羅汝懷錄

--	--	--	--	--	--	--	--	--	--

164-066

夏逢夔

夏逢夔字典虞湖南益陽人雍正十三年舉人官桃源教諭著有聽齋文集

耆舊傳典虞通經術善古文爲一時儒碩汝懷按典虞爲梅巢居士光洛之姪今止見其文之附於居士者其聽齋集未之見也

右湖南文徵羅汝懷錄

四庫全書

三

胡鈇

秦安胡靜庵以乙卯選拔與余同出交河王夫子之門時貢成均者九十餘人靜庵與三原劉繼貢尤爲夫子所賞皆與余爲莫逆交每寄詩詞相商訂後余奔走四方靜庵居關隴閒相去益遠音問久疎戊子秋余歸自湖南靜庵爲高臺學博始復手書往還繼聞移疾歸急寓書清水家叔學署訊其起居清水爲秦安鄰縣方冀相見有期而靜庵已於五月二十八日捐館舍孤子自秦等覆書乞銘並寄懷余詩成帙家叔附書云閱靜庵見懷詩感其交道之篤不覺涕之盈睫爲黯然久之茫茫斯世交遊中豈復有此人也會余遭繼母之喪遲回未報念數月來卜葬當有期余因揮淚

而銘之靜庵一字鼎臣諱欽始祖鈞自漳縣移居秦安三世祖諱
楹南皮令以孫可泉公貴 贈都察院右副都御史高祖諱多見
東昌通判曾祖諱公澤華陰訓導祖諱景馮國學生壽九十有七
封修職郎考諱之璠增廣生妣張孺人夢海燕入懷而生靜庵
穎悟絕倫早解四聲年十六補博士弟子員益邃於學聞人有異
書輒百計求之晝夜誰誦必精貫而後已發爲辭章龐蔚炳朗必
窮極物態而清新自得不苟爲藻繪至制舉之文則源本先正而
以古文行之交河夫子刻入試牘爲多廷試後例入監讀書以待
養辭歸入阜蘭書院貢生之入書院自靜庵始也山左牛真谷爲
秦安令延爲山長省元王勳舉人李登衡皆出其門屢試棘闈不

遇至有病其文爲不合時宜會友人李杞望中浙江鄉試第一會
試又高第靜庵聞之曰吾之不遇歟也杞望豈趨時蹊者耶杞望
亦交河門下士嘗與靜庵衡文學使署中文名亦相埒故靜庵云
旣而連丁內外艱服闋益羸弱遂絕意仕進以詩酒自娛獎勵後
學爲事著述益富嘗爲黃忠勤公撰年譜及秦州志關隴風俗敦
厚樂道人善靜庵名益重當事鉅公多知之者旣連不得志於有
司而有力者又不聞以他途薦故終不遇往者余與靜庵初入京
師時 國家方舉博學鴻詞科吾鄉僅數人又皆報罷後十餘年
劉繼貢以經學薦又應陽城馬周科卒不遂使靜庵得與其閒亦
未必卽見用况無薦之者耶士君子立身自有本末一時之得失

未可爲定論也靜庵性坦率口無擇言飲人以和然讀書論世之下於古今時變及忠義權奸之起伏未嘗不破肯掩泣也此豈無意於用世者耶而卒止於是何哉今其詩文衰然成集尙多未見者至寄余諸作則性情真摯所謂漸老漸熟天然去雕飾矣靜庵嘗夢繼貢與余取其集評隲付梓裝潢粲然嗚呼此知己之責也歟任高臺凡五年冀逢 覃恩貶贈後卽歸然已不及待矣靜庵生於康熙四十八年九月初八日距今辛卯歿時年六十三歲耳三子自泰自豐自瀉二女皆高孺人出孫男三庶幾能承家學者銘曰

嗚呼我友金天之英西州之秀爍爍文光高連珠斗蹈厲詞壇遑

知誰某慷慨懷人貽我佩
玖鳳凰高岡麒麟郊藪知我非希數
奇不偶仕止儒林年亦中壽彼蒼何心
斯人何咎著作滿家六丁所
守傳之其人以昌厥後嗚呼我友

右墓誌銘楊鸞撰

張汝霖

君諱汝霖字芸墅宣城張氏大父諱宿父諱中聖皆爲縣學生皆
贈中憲大夫君自縣學生雍正十三年爲拔貢生旋以人才保
舉乾隆元年引見命爲知縣分發廣東任河源香山陽春知縣
其至香山者再而攝署之縣又三四焉君初在香山遭母汪太恭
人喪憂居新任令未至奸民賴姓乘隙爲亂君卽起捕倡亂者實
之法而杖校其和從者逮新令至而邑已甯其後至香山免荒埔
報升之稅修城南羅婆陂成灌漑之利而禁豪家爲陡堰之厲民
者海南徐聞縣民惰窳布種後不知糞耨耨車之事而婚姻尤無
禮式君攝其令乃教之如內民時廣東有開鑛採銅者七縣地力

盡而役未止君攝英德縣知其病請於巡撫奏停焉澳門者香山
南境斗入海西洋夷民居之以與中國爲市時設同知官甫二年
上吏以君賢俾攝其職君尤能得夷民情而柔調之故卒授君爲
澳門同知值事吏議降一級上官惜君去奏請畱粵而部議不許
君遂返宣城不復出矣君博學多文尤工駢體文及詩嘗爲澳門
紀略輯宛雅若干卷詩約若干卷自爲詩文集三十卷政牘五十
卷乾隆三十四年七月八日卒於家年六十一配袁恭人生君長
子燾乾隆癸未科進士爲翰林院侍讀得 贈君如其官一女適
附監生梅學側室梁安人生二子廣西布政使經歷倓太學生炯
二女一適諸生劉辛一未嫁死孫男十一孫女七乾隆某年月日

葬君於甯國縣花塢山村之原桐城姚鼐與燾爲進士同年又與
炯相知於君葬後爲君補爲墓銘銘曰

懿維君吏海濱安內民外夷馴爲國勤著有勳未上聞乘歸
輪聚典墳閱厥文子繼振蔚以彬瘞泯泯昭億春吾銘云

右墓誌銘姚鼐撰

金林

先生諱林字縉山號雲峯姓金氏世爲安鄉縣長壽村人明初金潤中洪武乙丑甲科官侍御子孫承世業累膺鄉舉入國朝先生伯父門揖聯捷康熙壬子癸丑科科第之家皆首推金氏先生通敏博學試鄉闈必治五經自場屋沿明季陋習士子惟專心四書藝經文則與同舍生鬪湊完篇名曰文會五經卷尤多懷挾蠅頭小本或先害隱所而竊取錄之先生慨然曰是庸愈於專經乎且進身之始卽爲謏吾何敢入號舍冥心假寐子半得題紙竭全力搆三藝畢乃爲經文篝燈竟夜成二十藝藝各三四百字暢經旨已乃繕卷落筆如飛日未暮必出一時人皆伏其能顧屢薦不

得售舉乙卯明經科嘗語門人曰吾數奇吾子其所運命適合先伯祖是必中已而其所弱冠入縣庠後以歲試楚書曰節題名作受知阮學使刊傳藝林亦屢應鄉闈不遇舉壬辰明經科惟己卯秋闈文孫在煥舉南省先生始稍慰時先生自龍陽諭解組歸己四年年已七十有九矣先生著四書依註書經翼鈔詩經講義綱鑑臆斷教人端師範力回媿阿風習尤嚴課程倣胡翼之經義治事遺規俾於禮樂刑律農田水利地理險塞兵備各究其要及選授鳳凰廳訓導一如教鄉人法異時避徭役者多竄名胥役及樂舞籍學師往往倚爲橐中裝先生獨力卻禁武人毋媒褻廟廡門外觀察廉其賢延主講敬修書院益多成就俸滿升龍陽教諭士

人皆扳轅送登入辰郡名宦志先生孝友性成內行敦篤宗鄉皆
式型之曾祖正甫歲貢生祖斗文庠生善行載邑志父門拱庠生
敕贈修職郎母劉 贈孺人先生康熙辛酉八月十三日卒於
乾隆甲申八月二十日壽八十有四配劉孺人有賢行先生卒
合葬石首麓湖山之天調鐘長卽其所次其政儒士例封文林郎
次其極儒士長孫在簡次卽在煥次某某曾孫傳煥庠生次某某
皆業儒銘曰
取士以一經而五經剌刷有嗣能過庭而亦賦茁軋惟世緒之丁
甯而孫謀貽厥勤宣鐸鈴高標圭臬有冊發馨有年邁耄麓山之
陘實崇墓碣藏以貞銘鎮茲岬嶠

右墓誌銘潘相撰按本卷楊公伊邕傳內金公附見已刊成茲得墓誌全文因按科編列於此

羅升

羅升字聚上號礫洲湖南湘潭人雍正十三年拔貢官澧州石門教諭以孫修源貴累 贈中憲大夫

湘潭舊志洵行傳升初充覺羅官學教習訓課規條如鄉居授徒法後司鐸石門訓士亦如之學宮傾圮祭器不備升捐積俸新之石士悅服以艱歸送者數百人性而介竭誠相與爲謀必忠尤殷殷獎勵後進歸田貧不自存指兩孫示人曰此余之宦囊也晚補江華教諭不赴自課孫修渭修源連掇科第

右湖南文徵羅汝懷錄

三十三

三

朱彝爵

先生朱姓諱彝爵字宁臣秀水人父貴陽守諱茂時年七十有四
生先生少穎異能文年十四爲諸生明年娶揚州守陳公女有壺
行余嘗誅之者也又明年居父喪盡哀弔者涕下魏塘夏季生者
先生師也乃言曰爾亦知孝之有大焉者乎爾兄毫而爾少慮有
乘閒構鬻者苟小有言非孝矣時伯兄年踰七十先生少且慧父
奇愛之人咸意室中之藏之爲所私也乃晝夜號居喪次不一入
室婦方有娠亦如之旣葬聽伯兄撥產析居箱籠了無長物旣而
伯兄檢視珍玩古書遺金具存曰人言妄也欲分之以病篤不果
而先生食貧無片言仲兄爲叔父後產屢耗始終周給之惟謹謀

卷之三
二
祿養生母王以貢謁選司訓杭州有張生者爲其叔所訟理諭之
得解丁生母憂尋走京師思一展所學以友事轉入秦得疾歸先
是爲同里李君剋期馳秦中取官文書還望累事義聲震士林至
是更爲友勞勩遂不起年四十有一德是嵩齡其子也

桑調元曰吾客鶴洲見孝廉嵩齡居母喪何其哀也德是早歿嵩
齡嚴事寡嫂撫兄子如子急友難若己事嗚呼先生教之矣使先
生得所欲爲以教家者教天下俗不歸厚乎哉

右傳桑調元撰

焦率祖

焦履安名率祖世居揚州北湖兄維堂名繹祖維堂工騎射能文章倜儻多才智康熙中遊京師爲馬公齊所知薦於康親王府中王愛其才甚器使之數十年不得歸雍正初乞歸省墓王使四人隨之訖卽促行明年卒於京師王召履安往迎喪履安臨喪卽位而哭極哀不謂王王使人導之來履安叩頭謝曰王之恩沒世不敢忘但率祖今日爲兄來見王則不敬兄持兄喪而敬王爲不敬王請以異日王聞而歎曰南人善謁秀才乃若是耶甚重之賜以金扇扇上有王像諭曰有子弟入京持此扇來履安再拜受卒不見王而歸後以歲貢生選授望江縣訓導卒於官

皇朝詩林卷之三十三

四

右聞見錄吳德旋撰

杜冠玉

皇帝嗣位二十年乙亥春二月 特詔鄉賢祠卽古周禮瞽宗學
崇德象賢典綦鉅戒達官父祖母得驟入有司欽承 上旨十有
餘載弗一舉歲辛卯余宰曲阜舉原任潼關道孔公次年壬辰來
是邦又舉前牧潘君汝誠詳駁之司鐸杜公大中丞徐公學使章
公李公以二公行實彙題於部大宗伯王公蔡公覆奏 允行由
是杜公與孔公皆各得祀於鄉時余方修大成門立太和坊樹石
櫺星作泮池築垣墉建文昌閣復督諸鄉賢後人重建祠宇訊曰
落成請諸神主入廟惟昔西漢主爵都尉汲公黯社稷重臣位第
一亦越李唐時則有若五經指南王元感在趙宋時則有若張忠

定公詠李文定公迪粵若前明及我 皇朝名公鉅人接武胼胝
胥以序升耐而杜公以老博士得從其後厥嗣鏞暨其姪躬沐浴
齋戒倣周尺造木主以甲午八月吉日宿賓友盛牢醴告文廟祀
先進奉主升於龕禮儀既備鐘鼓既戒余偕僚屬紳士耆叟童孺
三獻卒事一時觀者如堵牆皆嘆爲盛舉請立碑爲文紀其實余
按公諱冠玉字美如號冕珍世居濮州景仁里代有隱德公父蘭
汀公以文行著 敕贈修職郎公孝養二親克盡歡侍疾檢古方
藥藥必親嘗不愈則稽顙默禱求以身代執喪六年哀毀盡禮不
食肉飲酒不入內友伯兄冠珮弟冠綬篤甚白髮會食如髫年讀
書嚴存省嘗言顏子不遷怒我輩惟服膺程子忘怒觀理一言充

養純粹觀德者無近遠戚疎皆心醉散財帛周乏絕置善塋瘞暴
骨興義塾聘名賢育秀士化鄉人德修而眾欽學成而名立雍正
十三年由歲貢逢 覃恩准恩貢越明年應 詔舉孝廉方正
賜六品冠服又十年選蒙陰縣訓導課士如慈湖躡荒如紫陽解
組西歸士民皆扳轅泣送迢遙綠野未嘗輕入城府惟拳拳急解
推崇實學一時名士如康景和王鈞皆遵其教公尤憾生不及修
州學遺千金畀鏞與躬捐之嗚呼公之賢之篤於家著於校模於
士範於黨者近代豈易覩用能乎協輿評光膺茂典追配於古鄉
先生豈不偉歟余既樂預觀禮又思公與孔公世之相後百有餘
年其子若孫皆不過縣邑令佐非能身列顯要得相知有氣力者

推輓卒以潛德幽光不終泯滅東邦一百有七屬獨兩公一歲同
升並祀光俎豆式閭里而余以忝竊兩地皆得附名其牘實有幸
焉乃作銘曰

鬱鬱濮陽偉人代作沒爲樂祖祭於殷學長孺孤忠肇歆祠祔復
古復之羣賢繼爍有韙杜公言繩其獲孝泣蒿莪友隆棣萼澤煦
蒙泉仁周鬼壑定性之書傳來伊洛求合於中其情斯約霽月光
風時尋顏樂 褻寵欽承大冠孔碩奕奕東蒙往鳴其鐸鹿洞輝
光用消羣惑周困賑饑普均惠澤公歸自東有書滿閣以保後生
矩規繩削屹屹巒門巨工攸託存順沒甯教思溥博宜庶士大夫
萬民是若陳於闕廷釐茲卣爵 帝重鄉賢特嚴舉錯惟德之潛

令聞攸灼魏水洋洋丹陵粵粵公食於茲公名不忤

右祀鄉賢碑銘潘相撰

--	--	--	--	--	--	--	--	--	--	--

黎榮生

黎榮生字漁洲湖南醴陵人雍正己酉拔貢乾隆丙辰舉人文名
譟甚顧三次明通不第考取咸安宮教習以知縣用改教諭初任
沅江繼任桂東凡士類經其講畫者無不彬彬雅能文弟榮生字西
山乾隆辛酉拔貢中癸酉北闈副榜文名與榮生埒京師有大小
黎之稱初貢成均授縣丞未就繼授宗人府教習以知縣用杏生
字春圃嘉慶戊午由廩生 欽賜舉人辛酉 賜檢討銜年九十
從弟樂生字碧山乾隆癸酉拔貢考取咸安宮教習授岳州府訓
導內擢中書

右傳李元度撰

日本書紀卷之六

六

車騰芳

先生淡名利敦志行嚴取予嗟使龐鹿洲令番邑時卽與交厚未嘗干以私有大商屬請託計可酬數千金先生卻不納嗟使知之益歎服新會何小山霞築室城南將歸江門效古推宅之誼先生固辭之癸丑泊淮清有沈若愚者爲夏醴谷太史護眷入都舟夜漏裝盡溼先生以己裝資之太史感其德及督學來粵再四招邀託故堅不往乾隆丙辰以鴻博薦至京後期卽告終養還粵居恆無疾言遽色羊城推有道德能文章者以先生爲最年逾七十始授海豐教諭說者謂稟氣中和涵養純粹爲騷壇中程伯淳云

右嶺海詩鈔凌揚藻撰

SECRET

BT

--	--	--	--	--	--	--	--	--	--

曠敦本

彭仕周

李宗樾

曠敦本字遜之湖南衡山人乾隆丁巳進士寶慶府學教授主雲峰集賢及瀏陽茶陵書院與兄翰林檢討敏本齊名時有二難之目同邑彭仕周字碧峒雍正壬子舉人乾隆丁巳明通進士官甯遠學教諭有三生素健訟甫下車卽諭令速改否則繩以法其人皆悚懼改行仕周訓諸生以敦品行爲先每月課評定甲乙孜孜不倦自題堂聯云君子安貧一毫恥皆吾有丈夫砥節百爲可對人言長子陸舉人曾孫浚官殿撰李宗樾乾隆戊子舉人品端學邃事親曲盡愛敬教其弟宋樾成諸生宋樾卒宗樾撫孤姪尤竭心力嘗授徒白山義學集賢書院遊其門者多所成就晚官會同

國朝通志卷之三十三
教諭月有課季有考謂廣文無他報效卽此期仰副命官之意著
有亦耕書屋集

右傳李元度撰

謝晉

先生姓謝氏諱晉字日三蘇州常熟人祖爾綱父錫蕃 贈文林
郎康熙十九年大水歲饑先生祖爲粥食餓者時先生年五歲進
曰糜薄恐不飽又不得懷去不若易以餅祖大奇之從其言全活
甚眾年十七補博士弟子試輒高等及入成均屢冠其曹年四十
九中雍正甲辰科順天第五名舉人會試取明通榜歸教授於家
先生爲人和平樂易篤於倫理居家常以孝弟敦厚爲教侍母病
衣不解帶者經歷年載兄毅字心遠邑庠生弟發字叔起丙辰舉
人推肥處瘠發於中誠友于式好至老無閒從弟子景運幼孤露
育於先生提攜成立視均已子少受業同邑陳溥陳歿爲造塋冢

與同學五十餘人執紼送葬其篤於誼如此在場屋三十年經史
古文手自鈔纂研精探索寒暑不輟爲文章精詣充實理法純密
旣魁京兆所試墨義遠近傳誦及歸從學者日進先生指示程準
剖析奧窔誘掖不倦多所成就乙卯丙辰之間舉場文體一變其
舊末學膚受不循其本競構詭異冀以逢世鄙忽先進目爲常譚
先生教人常隨時適變而不失其正執經之士前後百數二十餘
年登科第者相望門牆之盛同時罕及乾隆五年年六十五由丁
巳明通選徐州碭山縣教諭碭之諸生積爲隸役之所魚肉先生
至所以扶樹之甚力時患蝗縣令教諸生各出掩捕一生病不出
隸輒迫辱之先生謁令令方憂蝗甚先生曰隸之害民酷於蝗蝗

易除未足憂也令爲稍戢其隸又于生者納租已畢隸猶索錢不
已大見詬辱反誣生以罪令怒將笞生先生曰徐之且勿盛怒令
志曰師何意罪我以怒先生曰喜怒哀樂情也人所當有苟發而
中節則怒亦和耳令意解乃釋于生方是時隸役橫甚士之富厚
者必以計攫其資貧者或恥爲之下卽立具罪名恣意凌折之薄
物細故皆成瘡疣構飾疑似詞牒旁午先生深不平之後大司成
崔公紀來督學司成素方嚴先生因上謁極論其害乃令諸生嘗
見枉陷者悉以狀自列學政學政下其事教諭先生一一直之以
上司成大怒飭郡守按驗諸奸猾悉伏其罪士氣爲之一振於是
諸生恃先生若慈父母矣先生在碭山八年訓課不倦貧者恆振

給之有汪鳳翥者幼孤黃園文者本農家子此兩人尤貧困以童子來請益先生招致官廨衣食而教誨之三年皆補弟子員先生嘗受郡記與令分道捕蝗當至南鄉禱於猛將廟而往於時羣飛蔽空聲如殷雷乃命召徒眾掘溝塹設置網具竿挺須黎明畢會及且視之蝗盡墮地死數十里無一飛者士人陳鳳卜家有狐崇巫祝禱祀莫能祛祓先生至揖而祭之命虛一室處焉自爾寂然家以獲甯乾隆十二年以老乞歸牘屢上郡守定公長以先生尙強堪任職疑有所齟齬遣教授從容問所以欲去官意先生慨然曰吾年踰七十幸筋力尙健顧我兄弟三人弟以計借得數過此兄耄矣獨不能來念相見無時何能貪顧微祿使白首抱完山分

飛之恨乎郡守爲感動乃許焉先生旣得請以是年六月束裝諸生更畱行復居月餘比發生徒傾邑送於河干服青衿而列拜者三十里不絕初先生出行城南遭子母相毆者停肩輿問之其子傲然曰素非相屬能難我耶先生怒執而撻之令縛送縣令治其罪其人始懼而求免先生爲開示大義反覆訓諭而去縣令聞之晨造先生自以化導無素引咎愧謝後其人感悟更爲善良娶妻成家供養有加聞先生歸母子追送出郊鄭重拜謝縣令者三韓鄔君名承顯嚴猛有吏幹先生與爭諸生曲直數相抗初快然察先生所言公後更見敬信命其子受業於先生之子祖庚遂相與結交先生家故貧居頃之祖庚以舉人選授處州雲和令雲和富

人坐法當抵罪走常熟行錢先生先生正色拒之凡再至卒不納
數敕祖庚宜務廉慎勿散法亦終不言富人事乾隆十六年恭遇
皇太后萬壽推恩中外先生以祖庚官 封文林郎祖庚在雲和
五年以勞次調甯波奉化令未數月有獄囚病死其家請而殮之
坐不檢驗奪職先生聞未嘗戚戚乾隆二十二年 翠華南幸吳
越先生年八十餘父子迎道側進所著 聖諭十六條衍義 詔
賜先生緞一端復祖庚官初先生年十五六多疾患母黃夫人誠
曰汝血氣浸長而羸瘠若此一不慎恐旦夕不自保先生受誡加
意攝護弱冠以後體更充實竟獲遐壽既耄飲嗽日進齒牙未嘗
動搖後進以文字請業者手披口講無厭怠如壯盛時庚午壬申

祖庚連充浙江同考官迎先生至錢塘旣撤闈祖庚率其門生謁見奉觴上壽侍遊六橋先生鬢眉皓然策杖登陟彌日欣暢會無倦色自先生去礪山歸優游家園垂二十年安分忘貧以文自娛壽考康強儀型搢紳四方士友相見必問勉廬無恙爭欲知其起居服食共相傳說以爲稀有勉廬者先生所讀書室也乾隆三十年閏二月初九日無疾卒年九十先生娶姚氏先先生卒 贈孺人側室陳氏以子貴 封孺人子一卽祖庚乾隆戊午舉人浙江奉化縣知縣孫二曾孫四先生以醇德宿齒爲鄉黨之所尊事文章行誼皆可表見於後宜請當代哲匠刻畫碑誌垂耀泉壤及載郡邑志乘使來者有所考信觀法齊巖幼以愚嘽忝侍函丈敢就

聞見所逮參以先生所著年譜撰次梗槩冀備採擇謹狀

右行狀邵齊燾撰

范元芳 孟承謨

范元芳河南虞城人宋文正公裔也性孝謹力行善事由貢生授
遂平教諭以課士最當計偕乃乞終養乾隆二年舉孝廉方正以
母老力辭巡撫都御史尹會一不得強因書額旌其門以風厲之
一時聲價籍甚至比之李令伯陶靖節云他若代輸積逋出粟平
糶修鄉賢祠施義冢置義田捐社穀皆足以助當事澤鄉里有麥
舟之遺風焉同郡孟承謨字丕顯睢州人幼受孝經小學輒有志
躬行父珍奇愛之序當後叔父璞依膝下弗忍離父命就爲後位
營考葬哀禮兼盡母疾一日疾馳四百里以醫歸治得愈侍所生
父母疾數十晝夜與兄承烈親湯藥不少懈宗族稱其孝力學淹

賈尤遼三禮以貢選裕州訓導諸生有見侮豪胥者胥懼君伉直
進百金求曲庇怒麾之白當事直諸生士氣大振丁內艱廬墓泣
血服闋除陝州學正竟不赴闕家塾延名宿成就四方英彥晚構
屋廣貯卷帙顏曰書香課子若孫以娛老焉

右傳查岐昌撰

楊文賜

楊文賜字聿修雲南昆明人初任湖北隨州出山鎮巡檢調應山縣平靖關要缺乾隆二年以胞伯永斌巡撫湖北引嫌改澧州嘉山鎮署澧州州判卓薦調永綏廳花園汛苗疆升授安徽安慶府照磨引疾後家湖南之黔陽遂爲黔陽人文賜約己愛民嘗曰末吏倚杖頭取錢吾不爲也平靖關有甲乙屋比鄰各執據爭有年矣文賜勘礙官道諭以久訟徒破家卽捐俸分給平毀利行關民悅服春秋丁祭例供鹿旣以獵者眾久無鹿保長承辦購他所句胥吏暴斂歲增爲民害力白除之垂老宦囊蕭索猶時行推解蓋其性然也在苗疆十九年及去任峒蠻猶感思遺愛歲遣人問起

居寓黔陽多隱德嘗手書格言啟邑後進集經驗方書以應求者
善曉譬人情有爭質者勸云戚鄰朝夕共處胥吏於君何親不忍
一朝忿後悔何及且是非自在吾能爲若剖之宜稍讓鄉里感德
爲之息訟卒年七十有三

右傳易燮堯撰

于公裔 楊瑞 蔡璋

于公裔湖南桃源人乾隆戊午舉人由明通進士任藍山教諭以
理學端士習膺卓薦遠請老不謁選同郡楊瑞字湘崖龍陽人乾
隆癸酉拔貢補安仁教諭署醴陵等學遲回冷署寓長沙最久與
諸名士相唱和初居郡東郭從朱景英受詩久乃自關畦徑嘗論
詩示子弟曰冥搜經子史總括天地人可以觀其自命不凡矣著
風帆小草淥江吟草湘巖詩鈔小盤谷詩集蔡璋字禮南亦龍陽
人以歲貢選安化訓導循循禮法士習一變有殷士端者家貧廢
學爲出資課讀躬自教之後得膺選拔璋後以老乞歸杜門養性

右傳李元度撰

國朝文獻通考卷之三十三

三十三

華純曾 鄧愷 王廷範

華純曾字敬思江蘇無錫人乾隆三年舉人授常熟縣教諭學問淹貫主講黔南文風丕變安州陳方伯當秋闈揭曉時於講堂設宴候榜每報一人擊鼓一下及天明計生徒雋者三十三人同邑鄧愷字霽暉副貢生性清至事繼母以孝聞任旌德縣教諭捐俸倡修學宮乾隆二十年邑大祲且疫愷具醫藥棺殮傾貲以濟工詩著有綰秀閣詩鈔集韻藻爲約編學者便之王廷範字斂齋貢生少有異才於性理經史多所發明尤工制藝選東臺訓導奉檄查振足繭荒山中晚歸病瞽從學者咸口授之

右傳楊熙之撰

三十一
月
九
日
三
十
一
日
三
十
一
日

三十一

國朝耆獻類徵初編卷二百五十三補錄

僚佐五

孟承謨

君姓孟名承謨字丕顯睢州人幼穎敏受孝經小學輒志躬行本
生考鄉飲賓珍奇愛之序當後叔父璞依膝下兒嘯弗忍離本生
考命之曰先王制禮不敢廢也且汝出爲後吾子汝汝父吾天親
豈有閒哉乃泣受命就爲後位營考葬哀禮兼盡母疾一日疾馳
四百里以醫歸治得愈宗族稱其孝侍所生父母疾數十晝夜與
兄承烈親湯藥不少懈喪葬必誠必信罔有悔兄體先志推與家
財之半君固辭戚黨鑒其忱與酌分而初志各得白首和樂且孺

羣以爲難再從弟承志少孤撫養之成立列膠庠而承林以非同
宗弗使之後力學淹貫尤邃於三禮弱冠補博士弟子旋食餼數
困場屋以貢選裕州訓導諸生有見侮豪胥者胥懼君抗直進百
金求曲庇君怒麾之白當事直諸生士氣大振丁內艱廬墓泣血
服闋除陝州學正竟不赴喪偶後獨居開家塾延名宿成就四方
英彥晚葺屋廣貯卷帙顏曰書香課子若孫以自娛州刺史罕識
其面子曦孫永蒞永棻永芳曦永棻從子遊永棻庚午魁其經舉
於鄉

桑調元曰嬰相之圃爲人後者不入惡乎其求爲之也受重者必
以尊服服之全乎其爲之子也同宗則可爲之後否者烏乎可君

戀戀所生於所後也篤特嚴乎弗可爲後者誠深於禮教哉兄弟
怡怡穀詒孫子蓋其流慶長矣

右傳桑調元撰

圖書集成醫部全錄卷之三十三

--	--	--	--	--	--	--	--	--	--

國朝耆獻類徵初編卷二百五十四目錄

僚佐六

梁善長

李蔡

王枚士

汪楷

周廷高

成懷祖

段永雋

譚顯名
姚明性

羅杰
冉永超

劉光燁

李烜

羅沛

李化枏

劉恩寵

黃宜中

鄒致肅

何璘

張鏐

陳德辨

張正笏

張九思

李道一弟道甯

彭焯

周謹

狄寬

魏紹

向濤從子廷柱

榮大順

常鶴周克健

陳宏亮弟宏典張宗耀黃賢寶

陶文彬

潘士極

族弟士樸

楊璋

楊健孫丕復彭舜年

宋鑒

譚垣

鮑鈺

侯嘉緝

任陳晉

補錄

王建中

李化枏

國朝耆獻類徵初編卷二百五十四

通奉大夫前署江西巡撫江西布政使司布政使湘陰李桓輯
僚佐六

梁善長

吾族三世而下支分居倫教材且數百年名輩代出其親支之第
進士者則自公始公卒官又六十年道光通志開局廷枏既上公
事實言於總纂陳觀樓先生昌齊得具專傳苦不盡詳遲之久或
并亡之將無以示後世用廣爲家傳公諱善長字崇一又字雙庵
先世居汴梁入粵初祖宋末來官招討使宋亡挈家隱於今順德
縣之達簡村公祖父以上皆不仕 覃恩贈兩代如公官至公始

讀書穎悟殆出天性少卽馳聲遠近惠鰥門先生來提學補縣學生試輒優食餼薦戊午鄉試明年成進士歸主粵秀書院講旋丁外艱服闋謁選得同州白水縣白水號瘠敝民多逋賦公至較定斗籌一金輕二分有奇米石減耗斗五升民喜躍十餘年積欠全登故事民供官薪鹽歲數百金當商時節遺送亦各百數并申上官裁之士風樸陋不知書公過文廟必步行人始稍稍敬學朝墜集諸生課食之自鄉及他縣至者輒畱宿騎役送歸文風日上縣志舊缺手自纂修體例完善癸酉饑有旨給賑單騎下鄉親點貧戶不以屬往亦不假吏胥既而大吏循行所部他縣貧民多道訴白水無之某巡撫因事臨察諸縣過白水吏請入巡撫曰梁令

君子當不欺我竟去甲戌又饑公自出俸設粥凡數月他縣民多來就食會攝澄城事霖雨山水衝塌民居多溺死亟捐金爲修治民畫象祠焉老民某地爲豪右奪訟久不決公判還之爲責豪者老民月吉必至署門叩首三將去臥轍畱者幾萬人旣又權蒲城居一載民爲之語曰一文不取清如白水錦繡滿腹胸多謝梁公去之日民祠遺愛庚辰調邵陽修復書院日聚諸生講習邵陽俊秀援例爲國子生者必見令必以十二金贄公辭之不可則積助院中膏火費值軍興日供馬畜芻料懼累民必親巡給數月民閒無纖毫擾上官檄稽葭州倉穀道白水父老往來迎送數千人爲駐旬日乃得行甲申薦卓異將入都四縣民合觴爲公壽公勞苦

教誨若子弟蓋視四縣民如一縣也明年六月引見擢建甯府同知又明年二月至閩會城初南海莊滋圃先生有蒸少與公居粵秀書院同寢食連筆硯久分最深既同登鄉會榜作宦各異地然書問無閒也至是莊方撫閩公投刺閩人遽引入至屏後有操土音撫其背者曰老崇來乎別十餘年鬢髮蒼矣蓋莊便服迎曰崇者公字也留撫署談讌數日抵官修舉廢墜一帥初政行之而規模較大始以白水去家遠且道險母老不能迎養衙齋庭桑有巢烏公每念母築烏軒居焉既南遷方欲請養竟以九月某日病卒子適至棺殮無所出以同官賻喪始歸建甯人奉公主祀朱文公廟子瑰玉縣學生長孫之任嘉慶甲子科舉人撰有廣東詩粹

著錄四庫全書總目彭衙編二編禮鵠詩鵠訓俗邇言古詩選鑑
塘子古文選明文粹 國朝墨粹考卷粹白水縣志鑑塘詩集葭
州吟北岸小草文集總若干卷當卒官日先從祖攷亭先生爲撰
次行狀且曰是蓋 聖朝循良吏他日可備 國史採擇不獨爲
地志家乘光廷枏幼習聞其語今著家傳亦按狀爲之除其瑣細
而補所未詳以俟來者而已

右家傳梁廷枏撰

東洋文庫
大正三十四年
三月

三

李綦

李綦字友桃湖南祁陽人乾隆己未肄業成均援例謁選授江南
亳州州同時值水災辦振務戴星出入兩閱月災黎得霑實惠分
理毫事徹革利興毫關北石橋圯捐金成之攝毫口稅局稅中木
較重綦力爲詳減嗣攝蒙城知縣蒙號難治綦守潔才優裕如也
爲忌者所中部議左遷而綦決志歸士民老幼祖道不絕有流涕
者性孝友父良松母季俱以孝旌綦終以未獲祿養爲恨尤篤
於一本捐田以贍族人建義塾以教族子弟他如邑里公事解囊
捐產弗吝也

右傳李元度撰

四
月
庚
辰
不
滿
一
日
三
日

日

主杖士

北臺王先生既卒之十九年其夫人解氏乃卒先生長子詢余外
舅也將以某月日合葬先生及夫人於其先之兆使以幣與書來
筠所發書曰知吾父母之行莫如吾壻而壻故喜爲古文辭銘吾
父母者非壻而誰願乞銘筠既以長者命卽不文不辭而又嘆外
舅之以禮禮於其卑屬蓋重其先事爲能賢也謹對使反幣而爲
之銘曰先生諱杖士字宁占一字北臺順天寶坻人明初以軍功
由小興州來居縣之王甫營成化中有諱翔者舉於鄉後爲令判
有美政始居城北縣人謂之北王曾祖諱兆辰天啟舉人祖乃餘
國初順治甲午舉人以先生貴 贈奉政大夫父諱采歲貢生

教習知縣 封奉政大夫先生早歲入縣學爲諸生有名屢試於鄉輒報罷久之聞同考官某執其卷固爭欲置上第不得先生曰命也請於父循例就選人得鉅鹿訓導三年所指授皆有程度晉常州同知常故劇郡而同知有清軍海防之任先生一治以嚴明斥埃所在猾胥奸民睜眦跼躄不敢縱趾居數月常人頌之曰風何清清公門無塵生時巡撫張公伯行察先生能令視青浦縣事縣有疑獄數十年莫能斷決吏奉牘送案上牘積等人立了不可竟首尾先生到纔逾月盡發得其情吏驚以爲神先生乃徐徐問弊政配刺一切去之名大起而一時嘉定有河患鎮江運道歲淤久當濬及蘇郡督視漕糧若煩劇紛錯之會必以屬先生往嘉定

時中流舟覆從者蒼黃出之先生曰勞苦吾分死生吾命何憚乎其治常也郡俗好譏鬼於城隍祠側爲土偶役夫立於旁民病輒曰土役爲厲禳之愈其閒南蘇北鎮雜巡羣來走盜賊得因緣爲奸利心固恨之會攝府事先生卽大書署之通衢曰城隍有神豈令役夫厲吾民邪取土役笞碎之民俗以革盜賊稍解去其勇直守正有如此自先生之仕奉迎父母官所父意念先生不欲以家口累先生清節自載耕入所餘而南出以佐先生先生益用自刻厲每出反則必以所設施旦晚陳之堂上爲笑樂故常人以先生不入吾民一秉科爲父之教先生之孝也先生強敏才氣百倍遇事以爲無不可刻舉者同官咸服其能亦坐是爲有力者所忌已

當內遷爲郎竟嗾之罷去時先生父母已先歸先生到家父母迎
謂曰汝不阿上官得爲清白吏歸來豈不善哉先生自是終父母
之身不出卒於家夫人解氏天津人候選州同知世澤之女幼諳
女訓於先生有配德先生之官夫人謂曰親老矣子行爲親榮吾
當處代子職其在鉅鹿及常皆然中惟父母就先生於官所則從
反亦與反父母以爲孝自先生卒諸子皆長爲官其誨之必以嚴
待下以慈治家以儉居常危坐內外斬斬有法爲王氏賢母先生
生於康熙十九年十二月二十五日卒於乾隆四年七月二日年
六十 誥授奉政大夫江南常州府清軍海防同知加級內升員
外郎晉授資政大夫夫人生於康熙某年月日卒於乾隆某年月

日年七十 誥封宜人 晉封太夫人子三詢仕爲奉天府經歷
今候補道加四級解夫人生讚仕爲湖北荊州府清軍水利同知
先夫人卒諱候補州同知側室楊太宜人生女子四長適國子監
生劉惟藩次適雍正甲辰舉人山東齊河縣知縣高澤次適順天
府學生張鶴蓀次適乾隆壬申進士刑部廣西司主事張模孫三
人孫女子四人一適筠銘曰
城陰之士渠之陽君與夫人之宮子孫其福昌

右墓誌銘朱筠撰

日本書紀卷之四十四

--	--	--	--	--	--	--	--	--	--

汪楷

孔子傳恆之六五日婦人貞吉從一而終也夫子制義從婦凶也
男帥女女從男夫尊妻卑禮之大經乃一介之士束修自好名湮
沒不章何可勝算獨爲節婦之夫者言行無所表見而史家傳列
女牽連得書以制義之夫子轉賴從一之婦以傳此又理之變也
蕭山汪進士輝祖之繼母王氏生母徐氏以雙節旌門子旣爲銘
刻之石柱矣已乃出其所述先人登仕君事狀讀之悚然曰世安
得此長者乎輝祖賢而有文且誠孝人也其言故可信登仕諱楷
字南有一字皆木先世自婺源遷鄞又遷蕭山之大義村君少從
蔣季眉先生學舉子業試不利棄去習法家言旣而曰刻深者不

祥思損吾福又棄去爲賈以羨置薄田百畝屬弟收租入養父母
而納貲爲官選得河南淇縣典史典史主縣獄故時囚之繫者獄
卒奴使之食常不飽衣垢不得滌有病不及時療官數日一至檢
獄具它弗問君在縣日省囚而問其疾苦獄卒不得苛虐囚無瘐
死者丞簿以下例不受民詞黠者藉事恐獨取其酬上官以其俸
薄而所取少不禁也君自廉俸外無所取常屑蕎麥和米爲飯佐
以豆腐羹妻妾親紉箴以給僚友多嗤之曰我輩佐雜欲入循吏
傳耶家中豈少麥飯豆羹作官如此不如早歸君乾笑而已亦不
與辨在職八年以親老引疾歸歸則弟私鬻所置田垂盡或言受
產者率以博塞句致告之官可復君終不言父歿罄所有營喪葬

又爲弟償所負惡少錢生計大窘乃跳身遊嶺南無所遇益鬱鬱
遂病死番禺年四十有六乾隆五年十二月十五日也輝祖早慧
能讀書君隨事啟牖之嘗問兒讀書何爲曰欲爲官卽正色曰兒
誤矣爲官不如爲人作人好雖不官不失爲人卽得官必不爲人
詬詈一日兩窳器墮地薄者毀乃取完者示其子曰若彼厚如此
則亦完矣君之立心如此蓋幾於古之不言而躬行者昔漢文稱
絳侯東陽侯爲長者周嘉郡功曹耳光武亦稱爲長者行誼是取
尊卑奚分子特表而出之其與曹世叔劉長卿之流僅以妻傳者
異矣

右傳錢大昕撰

故河南淇縣典史蕭山汪君卒後三十有六年其孤輝祖成進士始以狀來涕泣再拜乞傳於余曰某幸當代大君子哀其孤而錫之銘誄矣某辱先生門下顧獨不得先生文垂不朽必某不肖棄某及親某且無以視息於世惟先生閔恤之余感其誠諾之病未有以應也復固以請乃力疾而爲之傳曰

君名楷字皆木子字南有系出唐越國公華居婺源凡一再遷而至浙之蕭山遂世爲蕭山大義村人考之翰生二子長卽君也少師蔣太史棫之通經義以貧不能養棄去治刑名學成念非仁術復棄而服賈久之致田可百畝乃入貲爲淇縣典史君曰是亦學者求仁之地也且向以不忍廢所學今可以不忍行所學矣於是

愛囚如慈母之乳子謹伺其飲食疾病寒暑便旋燥溼日入獄視
必辦不以閒以故獄卒伎剋榜掠非法刑噤不得施用當君時囚
無瘐死者遇獄有冤若蒙狷之爲民病者隱若在己必達其志乃
己有薄某者鄰人私其乳媪匿媪而使其夫誣薄掠死媪薄愿不
能自明顧以不得尸未決君察其冤白令復廉知鄰匿媪密室中
乃名其人窩他縣盜賊直入其舍取媪出而脫薄於獄又有陳生
某以財雄豪橫無狀怨家莫敢訟訟亦不直一日使酒撲平人受
撲者恃君廉彊乃赴愬君立捕繫之陳以白金啖君君怒麾之盡
發其稔惡狀上之令論如法君之在事都類此然未嘗爲家人道
說故不詳後子輝祖得諸淇人之口傳以熟者僅此一二事云淇

之人又曰故事尉歲必祝生尉之父母若妻皆祝歲可得錢百千
其他富室之死喪昏嫁則有慶弔縣符下若鞠訊劫文搜捕鉤稽
一切事則有高下出入是皆名錢而歲入無有常數者吾公惟兩
親生辰受士民祝然於庭以錢壽者則曰是污吾親還之餘皆禁
斷毫釐無所染每飯佐止瓜菜闢廨東隙地課種自給寶至座右
右民輒知之以非是未嘗市酒肉也去之日吾公乘蹇騾一老僕
從夫人公子乘獨輪席帷車蕭然就道送者擁路未嘗不歎息泣
下也君又嘗自言曰吾在官不輕杖人不得已而用之爲不憚終
日人孰無廉恥或受杖而愧悔以死其可贖乎蓋君雖卑官一於
廉仁儻所謂古之遺愛歟在淇八年念親老家有產足供菽水遂

引疾歸歸則田盡逋積旋遭父喪益困無以養其母遊廣州無所
遇竟卒春秋四十有六元配方孺人繼配王孺人後君三十六年
卒副室徐孺人後君二十三年卒乾隆二十三年有司以雙節聞
於朝詔旌其門子輝祖乾隆乙未進士孫四繼坊繼壙繼埒
繼培

論曰君仁人也宜富貴壽考而竟不然且以客死哀君者咸以破
產咎其弟弟誠爲世大侈矣顧君生而安之歿其銜之乎余讀雙
節事實則又歎仁人之澤如是遠且大也詩曰自求多福中庸曰
正己而不求於人余於此竊有悟聖人無怨尤之學焉

右家傳鄭虎文撰

國事考
卷之二十一
三十一

--	--	--	--	--	--	--	--	--	--

周廷高

周廷高字畏庵湖南零陵人乾隆辛酉拔貢考取覺羅教習與修輯經史議敘直隸開州州判改兩淮鹽運司經歷署西安府鹽捕同知謝病歸卒年八十一初廷高膺孝友端方之舉時母蚤沒獨迎養其父勤職愛民河決陽武口廷高冒雨行要害報大吏曰水當至某處其捍禦當於某處大吏如其言隄既修旦日水至如所擬明年蝗廷高爲文禱劉猛將軍廟翌日蝗盡死其官鹽場也有報旱不成災者廷高奉臺檄履勘某官請代爲曲護如所報廷高曰如民困何卒以實告民獲振家居所得廉俸胥均之弟姪時已析產久矣著有詩鈔雜文諸書

右傳李元度撰

Vertical columns of text, likely bleed-through from the reverse side of the page. The text is extremely faint and illegible.

成懷祖

有明賢相大名成文穆公之來孫別駕君今之良民吏也余客河朔君方宦游未得見泊來清苑君之子諱從學於蓮池因得讀君關中橐草詩而爲之序乾隆戊子君已歸田載通音問至辛卯而君凶問至諱且狀授使者請銘余與君神交久銘何容辭按狀君諱懷祖字蘭田號尚義晚節更號北樵我朝少傅保和殿大學士諱克鞏君之高祖也湖南糧驛道諱光君之曾祖也光祿寺署正諱泰清君之祖也光祿公長子候補主事諱文昭世稱過村先生者君之考也君本光祿次子湖口知縣諱文景之仲子而出爲過村先生後侍母魏太孺人於家康熙庚子丁太孺人憂時年十

四哀禮兼至服闋受業於江介龔孝水先生雍正己酉補邑弟子
員旋食餼譽僑一覺而連不得志於鄉舉乾隆辛酉始舉選貢庚
午除邠州直隸州判甫莅任盡革諸陋規而自題其聽事曰佐牧
倡條期其致安民緝盜判邠懷古竊自方強恕求仁其後神君慈
父之交稱已略具此兩言矣邠民耕涇河旁灘地水發則灘徙而
糧存民爭新地訟由此起君親履畝計以新漲準舊沒而糧猶有
浮者請於上豁之民感其惠屬邑涇化獲盜屈錢娃等捕役又妄
牽毆匠張招爲盜黨令以峻刑致誣服獄具招母上控司臬檄君
提訊令畏罪縱招去指爲脫逃而昭乃自投審君遴得其實民以
不冤君雖服習儒行上官以君名家子練習時務十七年中先後

兼判乾州權知三水長武永壽三原諸縣事又入佐賓筵出理屯
戍所至皆有聲其在三水有王三子者以匹布聘司氏女有年矣
生員李珏復謀娶之王來訴而李之媒貢生張以誠代李呈婚書
且以女履爲答禮君知邠俗不用婚書而履褻物故諭司氏宜以
原布還王司氏言布久成衣願償其值君笑曰布卽古之儷皮純
帛也而奈何逐利以壞大倫於是李張皆語塞而王之屈得伸三
原有富商買三水人妻爲妾三原令庇商匿之不令赴審且寓札
於君君卽以札冠文牒力索之商乃至而論如法其在永壽有白
洪村九十老人扶杖奉鷺以獻詰其故曰聞遠近咸頌縣有好官
此五十年來所無也故願得一見最後在三原邑多巨族大賈號

難治君至則包苴杜絕務在法無枉撓而其尤以幹局勞績著者
甲戌乙亥閒準夷之役諸城劉相國爲總督君從事幕府凡需廬
帳馬駝芻糧倉猝立辦復屯田於黑河崑都崙之野豺狼盡出爲
害君禱於神野獸絕迹兵民驚以爲神桐城方恪敏公繼至倚任
一如劉公丁丑將以西師俘獲分賞官兵先期徵車以待君自長
武移永壽念夷眾尙遠盡遣車歸屆期畢集亦無廢事其於軍臺
牙纛往來供頓如法巡撫滿洲鍾公器重之君屢報善最願屢爲
忌者齟齬不克上遷在州修公劉墓建范文正公祠刻文於麗牲
之石又撰邠志續筆以備一方典故已而勞瘁成疾惟寄情吟詠
自適其志逮丙戌遂請長休告竊觀漢之黃霸拜丞相唐崔知溫

晉中書令史傳皆列之循吏而宋史以州縣他日爲名臣則撫字之長不足盡其生平故宋三百餘年循吏惟十二人沿及元明史家援以爲例以君治行卓然有爲有守豈不可嗣武相門而僅僅以循吏見是朝野所共咨嗟也然嘗見世祿之子姓或躋顯秩而以貪鄙機變隕其家聲所在多有君自初束修克樹先門風範歸而主盟泉石羽可爲儀他日傳循良者亦何必以懷黃佩緋爲未竟所用也哉君卒於乾隆三十六年四月二十九日春秋六十有五卽以其年月日葬於某鄉某所配柳孺人大名府學訓導紳之女生子二人長卽廩生謚也次誠國學生女三人磁州諸生張鑑國學生張鎰魏縣壬午舉人崔述其壻也孫四人作肅作乂作哲

作謀孫女三人銘曰

循吏工詩唐宋史未有君詩出塵而與韓蘇友嗜學則專內行逾
厚卻婚於喪禮教是守於叔父族孀暨祖姑元舅衣食死喪睦嫗
矜救不隱贏金於官亦代償逋於友花醉柳吟無易其所守出處
令名年齡中壽詎天道之不可知抑自有其不朽古之人云位不
稱德者有後

右墓誌銘汪師韓撰

段永雋 譚顯名 羅杰 姚明性 冉永超

段永雋字秀南湖南常甯人乾隆辛酉拔貢肄業成均公卿子弟如吳省蘭楊先儀李光寶鄧文泮蔣雲寬皆師之後官永明教諭飭學規如蘇湖故事捐俸置田膳諸生秩滿升襄陽府教授致仕歸構守慎別墅藏書數千卷遠近來學益眾教人以修身正心爲本一日齋戒沐浴正衣冠危坐而終著有四書經引十卷性理要旨得田文集同郡譚顯名字謙庵鄱縣人歲貢生母羅患癩癩朝夕侍側湯藥必親奉後疾愈以壽終兄歿撫諸姪教養兼盡喜刻先正格言初父志倡感范文正義田贍族事欲行未果顯名家不中貲節縮衣食捐田五十畝每青黃不接減直發糶存爲祭祀展

墓及助族中婚喪之用祖祠家乘營輯不辭勞費首捐修文廟又捐田爲修葺學校及諸生鄉試卷燭費邑烈山書院久圯倡議修復身董其事捐田十畝以資膏火官興甯學教諭勸諸生以正心誠意文尙清真俸薪所入悉購祭器務求合古復捐田入漢甯書院歲得穀五十石以充脩脯歸之日以本年所得學穀爲諸生會課資甯士感德立碑卒年八十著有鐸甯事略述古錄雲秋養和錄羅杰字紹豪耒陽人英敏好學力造古人堂奧乾隆戊申由副貢舉鄉試第一海內推爲名元友教四方經其指授者爲文皆有法度任永綏訓導振興文教士林斐然截取知縣到班不赴子錦雲錦成俱歲貢能承其家學時又有姚明性字誠齋沅陵人幼聰

慧熟於五經如夙誦年十三入府庠十四食餼十六中乾隆辛酉
科副榜肄業太學授新甯教諭卒於官明性敏而好學夜蓄雞牀
下聞雞鳴輒起讀故其淹博不可及云同邑冉永超字則田乾隆
癸酉舉人初選充拔貢會覆時巡撫某以其言動疏野黜之同時
凡五人然俱於是科領鄉薦嘗讀書嶽麓院長曠敏本重其學行
日與飲酒論文無閒後選攸縣教諭著錄者皆務爲實行其裁就
甚眾富於著述人多傳誦之

右傳李元度撰

劉光墀 李烜

劉光墀字芳琳湖南醴陵人父翰士安貧樂道嘗拾遺丁姓遺金數百堅不受謝光墀幼失怙奮志力學尤邃於易乾隆丙辰辛酉以五經兩中副榜授新田教諭擢授安陸教授會鍾祥災檄委散振光墀按戶計口民霑實惠司鐸二十餘年風裁峻整士林景仰晚以薦擢知縣未就同邑李烜字曉齋幼孤貧事母以孝聞乾隆甲午舉人永綏廳訓導日與諸生講學士習爲變乙卯正月松桃廳苗變永綏乾州鳳凰苗應之同知彭鳳堯副將伊薩納督兵往剿遇害賊遂薄城城中經歷都司相顧失措烜毅然選兵登陴貸粟給餉率季子鷺元日夜禦守賊爲壁車雲梯等具攻城烜隨機

制勝賊稍卻適乾州失守勢益熾告急使輒被掩殺烜募能爲苗語者齋書夜縋城出得請兵於大帥福康安檄將軍花連布倍道赴援圍始解蓋八十餘日矣事聞賞五品銜未幾賊復伺擊劫掠餉道自四月至七月守疲糧盡至擷草根煮敗革以食烜涕泣諭以大義士無異志城卒完八月大兵進勦九月烜以積勞卒年七十有二 贈知府銜 賜祭葬卹銀祀昭忠祠

右傳李元度撰

羅沛

羅沛字竹溪湖南鄱縣歲貢生乾隆六年任湘潭學訓導寄居衡陽品端行飭爲文古雅樸茂有先正風味學使潘宗洛嘉其才稱爲慧業文人工書法求筆蹟者無虛日今郡城煙雨池前左右石碑郡邑人士珍若鼎彝

右傳李元度撰

圖書集成彙編

17

--	--	--	--	--	--	--	--	--

李化枬

君諱化枬字廷節石亭其號也緜州羅江人 封文林郎文彩長子乾隆七年成進士十七年令餘姚姚邑故瀕海賦重民翫多去而爲盜君以次掩獲構屋二十餘間扁之名曰枉生所擇民技能者爲之師假官錢資令爲業業成其師具狀保之出終其身不復犯值歲禮君預籍輕重待賑賑務爲兩浙冠調秀水復攝平湖前令某在湖七年積訟牘三千有奇君計日定程飲食皆坐堂上早午晚決若干件縱民觀聽民爲之歌曰雲霧七年三月見天而令甲州縣官本任不以繁調繁去之日湖人傾城扳送哭聲震野浙撫今直隸總督楊公以治狀 聞會丁文林君憂服除 特旨以

同知發直隸補用假牧滄州州藪盜各省案提者如蝟君籍戶口
狀貌小字無不實以是隨提隨得曹家莊多回種日殺牛聚會夜
則四散爲奸君忽於夜半挾弓矢率健卒數十人擒其魁餘論如
法盜爲之空假牧涿州補天津府同知以內艱去服除仍赴直隸
候補假牧霸州薊州補宣化府同知遷順天府北路同知督密雲
懷來平谷諸城工懷餅餌以油傘自蔽巡歷風日中一瓦一石毋
有竄濫又兼攝密雲縣事白某寃 行在慮囚甚亟君以獄詞未
定畱不發幾註吏議 上行圍木蘭君迎伏道旁 上笑謂扈駕
諸臣曰是李化柎耶可謂強項矣人謂 上有嚮用意卽大府益
以重君京師奸人翦辮者詞連數省無左證君固請無動已而他

省之周納者多得罪密雲令任某以事被劾君識得實矣有詩訖
君者力持之君憤懣不得申先是令浙時疾嘗錮心至是又患怔
忡祀竈日以事過都門購淺餌自隨越二日入會城命從者瀹茶
忽解所佩刃自剗茶至從者驚相呼君躍然起曰我安得血被手
耶創未深然亦竟不治聞者皆詫嘆有泣下者君讀律成誦凡案
牘皆手自評斷嘗言居官有六字訣眼到身到心到又曰一籤一
票似甚微當之者一家哭矣精九章法儲穀有不能算者一布指
卽知其數其所治率極衝時巡秋獮供頓立辦無浮費無浮派也
通籍廿年祿養備至其銜恤也會葬者千人於雲龍山立家祠置
田贍族少時耕且養據隴上挾書而哦少情文林君投以礫故君

左領有癥羅江入 本朝成進士者蓋自君始云藏書數萬卷皆
自浙載歸他生產不復問所撰族譜八卷治略二卷石亭詩八卷
贊曰君以壬申校浙闈得沈君祖惠爲解首士林多稱之要其獲
上治民不媿古循吏矣疾由心作天若憇之然君之沒未幾而忌
君者旋以他事敗獄亦卒如君所讞天人之理固若斯不爽也抑
可以無憾矣

右傳吳省欽撰

劉恩寵

劉恩寵字綏四號蓮池湖南益陽人乾隆六年舉人壬戌明通進士歷官安福臨湘教諭寶慶教授

耆舊傳先生爲先大父高足弟子性穎敏好學大父甚器之嘗呼爲劉九而不名年未五十卒於官詩文多散佚余幼時猶及見其浮邱山蟄龍泉諸賦不愧沈博絕麗之稱

右湖南文徵羅汝懷錄

傳事... 卷二百五十四

三

黃宜中

先生姓黃諱宜中字揆一號鵠亭又號衡齋學者稱爲揆一先生世居湘鄉代有令德曾祖文瀾明鄉飲賓祖棣開以遺民祀鄉賢父燐縣學生先生性聰穎讀書日十行下八歲能屬文初應學使試卽以冠軍入學時年未冠也旣以高等食餼乾隆丙辰舉人壬戌明通進士官安鄉教諭遷湖北襄陽教授先生孝友敦篤而義聞亦著先是其父著有十三經贍義草搨未完而卒先生恐先德未彰次第編校成帙會 詔采遺書卽以贍義獻備採擇焉又所著之讀史芻言族規諸書并其祖之心莊家訓亦皆刊行其不忘先人之手澤卽其孝思之所凝結與嘗立祠宅左以奉先祀其所

遺衣裳服物藏弃祠中歲時祭祀則陳設率家人拜獻如禮雖老猶未稍懈至若建宗子修族譜捐祀產訓子姓勤勤懇懇誠錫類而推愛矣縣文廟故濱河河岸每爲水所齧先生懼不時傾圮因謀於父老卜地城南而遷學焉遂以舊學爲漣濱書院其閒備祭器置祭田又購書五千餘卷儲之學舍俾肄業者得資講習邇來人文蔚起不得謂無藉於先生也其官安鄉襄陽學官也亦捐器備物而兩地諸生咸沐其教澤不能忘先生幼承庭訓於經術寢饋甚深又與諸兄弟及從弟安齋輩互相師友故所學益粹當時推許有十三黃之稱先生博極羣書著述甚富其於詩古文詞亦卓然自成一家無所依附以先人之贖義芻言益爲推闡衍

其義爲贍義補十三卷芻言述二卷以禮宜從宜也考古證今舉
南參北不悖當代之制爲從宜家禮九卷以 文廟之遷建也考
正其禮儀講明其樂舞指陳其品物爲 文廟遷志十四卷前明
湘中田賦久困浮徵額糧至十萬石有奇 國朝以來屢邀減免
因輯 國初訖乾隆三年 恩減湘賦始末爲疊甦湘賦恭紀四
卷其官襄陽習其風土攷其事跡爲襄陽衛所風土記四卷又生
平誦習心有所得者輒筆之爲鄙學錄十卷至其詩文集署曰蕉
軒蓋皆先生游藝之餘也子崇圖崇國諸生皆足以傳其學
論曰予於先生爲後進雖未克請益函丈猶幸接其言論丰采每
聞當日名卿之稱與未嘗不深景慕也當先生之在襄陽也撫軍

開公有楚南典型竟爲北有之惜而前大學士陳公榕門亦有注
心立達之稱卽歷任學使若阮裴園夏嘯門吳雪巖盧檠齋諸先
生莫不稱爲粹然儒者嗚呼先生之學術明經達務誠純而無疵
矣其譽之者容有阿乎第先生年九十而終諸子皆前卒人無不
有伯道之感云

右傳羅國俊撰

鄒致肅

鄒致肅字怡先號謙山湖南鄒縣人雍正朝歲貢乾隆七年任桂東訓導

鄒志致肅工詩文父病衣不解帶與兄居七十載無閒言

右湖南文徵羅汝懷錄

陽曆三月十八日
陰曆二月廿三日
禮拜一
晴
風和
雲少
氣爽
物榮
人樂
事興
國泰
民安
百業
俱旺
萬壽
無疆
長生
不老
萬古
流芳
萬世
永存

何璘

城綏有苗箝切膚災也苗箝有橫嶺崗節根蟲也治城綏苗箝必先控橫嶺一崗披腹心拔本塞源之方也橫嶺長安坪據城綏九崗之中西南鄰粵界苗箝東北鄰城綏民村苗性最兇頑狡黠恆以焚劫爲事城綏士民無一息得安衽席苗患日稔苗勢彌熾近因大軍將集派夫運糧遠近騷然城綏尤甚當是時非有公忠體國痾瘵民瘼大臣不能排眾議以除害非有誠心憂民不詭勢之父母公祖不能毅然力持不回故自明迄今苗害相尋無已我朝用兵屢勦復叛乾隆三年蒲寅山鳳老一猖獗前縣蔣侯德重通詳請征善後未完五年粟賢宇等復僭李天寶年號僞稱閣老

將軍楚粵句連蜂擁蟻聚殺官戕吏攻壘薄城一時議勦議撫相
持不決幸巡撫都堂馮公光裕斷然主勦檄令縣父母杜侯珣縣
尉朱君文旭躬領鄉民誓死捍衛公守城步甫大捷連營堵禦提
督軍門杜公愷星夜馳驅荷蒙 聖明遠念邊黎弗堪荼毒不惜
數萬帑金 特命貴州總督張公廣泗爲經略是年八月師至於
是分巡辰沅兵備道王公柔參贊軍機驛監長寶道馬公靈阿奉
檄代巡衡永郴桂道劉公應鼎爲監紀經略公英謀神算動中機
宜賞罰公平將士用命傾巢擣穴城綏二縣崗砦千百年積寇一
月之間元凶授首羣醜俘庭兼參贊公多謀善斷委本學教諭吳
君中孚督率勇士計擒竹岔規頭濫溪源白崖腳猺類絕種頑崗

蕩平皆 聖天子知人善任文武和衷克奏膚功而經略公猶念
橫嶺崗之長安坪當粵交衝爲城綏九崗重地會商城步仍歸寶
轄隨建城設協移駐理徭府居中治理畱文武各員領兵防守搜
緝餘黨題請同知寶慶事何公璘總理善後事宜清田安堡城綏
之民衢歌巷舞謂當出水火而登衽席也不意 廟謨已定工匠
雲興六年九月當事計忽中變罷協撤堡棄長安不守惟議安營
毛田眾情疑懼謂毛田實不能控禦橫嶺而下情無由上達賴我
公祖何公目擊時艱深諳地勢重念城綏數萬生靈力陳長安巖
阻特立不移巡撫許公容洞鑒情形七年三月總督孫公嘉淦奉
命親勘虛衷諮訪相視地形謂橫嶺之長安坪決不可棄而毛

田山腰一塘建營無益議定長安設協增兵九百彈壓分立老岩
左右守戎二營以爲首尾仍委我理搖何公辦理善後事宜縣父
母張侯方佳督修新疆工程縣尉朱君之綱分辨襄理又委靖州
協總鎮薛公儒統領協防官兵併委督標遊府謝公壠協參互援
同心一德民苗趨赴息戈奠定八年十月總督阿爾泰公又親臨
省邊公忠爲國洞悉新疆區畫得宜萬年大計一朝底定此又我
城綏邊民久安長治之良策也仰惟 朝廷德威旣張有苗來格
崇墉肇屹文教覃敷各憲議勦擴清於前而理搖何公者日與縣
父母張公勞心瘁力維持調劑於后其爲城綏生靈造福保障南
天之功尤大且遠何可忘也爰相與勒石恭紀昭告來茲庶幾使

我城綏之民獲享救甯之慶永永無極者咸知成功有自也

右遺愛碑記彭儀鳳撰

--	--	--	--	--	--	--	--	--

LII.

張鏐

先生諱鏐字紫磨後改紫峯自號心陽子姓張氏世爲樂陵名族
曾祖大賢歲貢生祖業禮庠生父憲 贈修職郎先生幼穎敏成
童卽善屬文年十九補博士弟子並以一等食餼二十一歲中雍
正丙午鄉試副榜第二十二名不及充貢乾隆辛酉選拔貢成均
甲子舉於鄉年將四十屢上春官未售就教職七十選臨清州學
正踰三歲告休以乾隆壬寅二月十四日卒於家壽七十有七先
生既艱於科場自弱冠後卽殫心著述有志聖賢之學嘗館於惠
民李氏山莊短榻孤檠習靜坐心志漸覺明淨既而曰此未足恃
也惟主一無適一語隨處皆可致力因別號一銘齋居士得朱子

遺書語類或問及性理大全悉心研究因輯朱子四書彙編共二十五卷古訓集彙一卷其自著四書擇中錄十五卷一銘齋擇中錄三卷附錄一卷周易晚學編十六卷春秋大意十七卷中庸九經衍義二卷又取程朱所論定輯張子淵源錄十卷其他詩文纂著尙多先生性孝友修族譜立祖墓碣或自爲文或求賢達文以表彰之操行謹密非禮弗履遇有意外之侮弗與校受學者以及鄉邑遠近莫不欽其德而仰其品其爲廣文也以不肖舉某生優行忤當事者幾獲戾而諸生服其公則所養可知矣子厚郟戊子科舉人湖南新田縣令孫二人伯寅季嶽俱庠生能守其教

賈聲槐曰自陸王之學熾曰靜曰悟曰本體光明認氣爲性以格

物爲格去物欲其徒和之而講程朱之學者愈少矣陸清獻扶持
正學力爲分辨其功甚偉他如陳定齋之明辨錄任東澗之彙編
朱子文集皆有真識者山左鄉前輩劉直齋先生日記一遵洛閩
精確而不乖於中正韓理堂閻懷庭繼之先生與韓閻同時而地
近又在數百里內其講學亦大槩相同可敬也夫

右傳賈聲槐撰

陳德辨 張正笏

陳德辨字一齋湖南湘鄉人少失怙事節母以孝聞爲諸生卽潛心正學雍正己酉拔貢乾隆甲子舉於鄉旣落第以母老家居授徒嘗講求朱子讀書法及胡安定經義治事之學又謂學者必先嚴義利之辨凡寒士受業者卻其贄轉資其膏火截取知縣改澧州學正教士先德行後文藝終任不名一錢歸日諸生泣送之著大易纂要主一齋文集同邑張正笏字書思壯歲兩中副榜益自刻勵會課成均祭酒胡宗緒深器之乾隆壬申舉於鄉官武陵教諭師範肅然有子七初做古七業法各授一經後互相討論諸經皆淹貫嘗評選攸縣陳之駉衡陽王啟邵陽王元復車无咎文合

爲楚南四家湖湘之士翕然從之卒年八十有五著擲虛叢語自
種編文集瓶囊集

右傳李元度撰

張九思 李道一弟道甯

張九思字聿修湖南善化人乾隆甲子優貢任甯遠訓導性方嚴取與不苟所與交皆名宿學使阮學浩夏之蓉皆以國士待之著有蒙泉古文四卷枿芝詩集二卷同邑李道一字南皋父聞知舉人授平江教諭不就性剛介不可犯吳若人者蜀奇士也少所許可一日遇聞知舟次與縱談古今並讀其蓮橋山房詩文彙大歎服道一七歲能爲文祖父天柱取視大驚以詩賜之有神童名年十一補弟子員學使阮學浩奇其文擢第一由選拔官永興教諭平生不妄與人交晚歲推宅與弟同居復分俸以贍之著南皋文集弟道甯號坤亭乾隆甲午舉人淡泊寡營待友直諒而喜爲任

俠有某遠出託以妻孥道甯資其衣食耗數百金邑令聞其賢屏
輿從數訪焉有挾千金託居閒者正色拒之後官會同教諭

右傳李元度撰

彭焯

庭輝名焯世爲長洲人祖諱宗求精醫理父諱應乾爲人修謹自愛庭輝生五歲而孤母陸孺人勤苦治生延師教子讀書庭輝年十六以商籍補仁和諸生乾隆九年納貲謁吏部選得西安府渭南丞居官廉而有幹渭南屯民張緒勲等逋縣官賦捕急而諱糾眾至縣門門闔爭投瓦石頃刻滿縣庭令窘莫知所爲庭輝徐出諭散之而密籍其渠三四人以待翌日縣令白上官請發兵往剿庭輝謁巡撫陳文恭公言爲變者不過三四人得一吏治之足矣其餘率烏合急之恐生亂陳公然之卽令庭輝輕騎往屯所召其老人前語之曰汝等皆良民皆有妻子兄弟奈何以緒勲等故甘

國朝書牘判卷之八 卷一百五十四
受滅門之禍亟出緒勳等餘一切不問不然爾合屯無噍類矣老人哭曰邪活我遂出緒勳等四人具狀上巡撫寘諸法先後攝丞壽商南鎮安渭南諸縣事並有聲績乾隆十六年陳公以卓異薦引 見賜蟒一襲回任尋以母疾乞歸在官十年省冤獄賑貧民民甚德之去之日民間遮道焚香獻衣脫鞵送者以萬數既歸家杜門守約出必徒步事母孝謹晨夕未嘗離母年九十卒庭輝年亦七十矣孺子泣過時而哀族人謀置潤族田庭輝首捐金以倡以其息贖諸孤燧族人賴之卒年七十有二嗣子一材一培

右傳彭啟豐撰

周謹

初從祖有常先生聚鄉之英俊剗文社曰默成一曰會於德光堂
適山陽許念中給事至給事負文章鑒徧閱所爲文無當意者最
後得周先生容村文擊節曰今之方城也得黃君彥卓文曰今之
華亭也是皆速蜚者未幾黃君成進士周先生屢躋場屋爲懷甯
司訓士林惜之然用是文名著於吳越先生諱謹字亦聞號容村
先世自河南鄆陵官吳因家焉至禮部右侍郎默軒公而始大高
祖諱世治曾祖諱家柱太學生祖諱箕 贈文林郎考諱稼投文
林郎候選知縣馳 贈承德郎五子先生其次生長望族聞道漸
訓不扶自直孝悌稱於宗族忠信篤於朋友體用兼備使才臨事

動合物宜寢食未嘗廢書博通羣藝根柢既厚握筆伸紙鯨鏗春
麗藻采煥發而栗密窈眇自入精能既艱遇合慨然曰學不爲人
仕不擇官遂就懷甯司訓懷邑學宮頽壞春秋興秩舍菜明禋趨
跽者負星行事先生捐俸倡修鑿枘枝梧載塗載奠寢廟宏敞齋
室嚴闕望之生敬先生又曰文以闡理道見經濟聖賢義蘊具乎
經政治得失括乎史自好邪者憚正不學嗜淺者鄙奧無稱而文
章日敝於是舉六經三史進諸生講習決釋其有業高訓深者詘
體延之以相表率文風一變當事下其條於屬俾以爲法將薦諸
朝以母老辭旋升教諭引例歸先是文林君溥暑邁疾先生侍湯
藥汗不揮扇蟲不張帷及奉母顧太安人扶持抑搔衣裳器皿漚

滌不假奴婢與同懷蘊高超亭兩君怡怡相友愛撫孤姪若子昔
石建爲郎中令五日洗沐取親中幫廁臉身自澣灑陳元方兄弟
孝養閨門雍和先生殆俱無媿歟教子以誠身始謂愛敬其身而
後能勤學能勤學而後所交皆敬身之士時俗奢佚淺恩薄義救
奢必於儉約拯薄無若敦厚至今兩嗣君凜嚴訓綽有父風嗚呼
充先生秉鐸所設施得民而治次第布之當不讓古之循吏乃良
材寶樸寂寞山阿沈淪巖石誰之咎也歿於乾隆九年七月初七
日得年六十有二元配王安人先三十五年歿繼配張安人均恭
儉慈肅媲美孟桓子懷仁太學生秉義歲貢生並候選州同知女
適候選縣丞徐中定太學生章瑗太學生戈黃泳運判署麗水縣

事程奎點許字太學生章瑄者未嫁卒孫曰潢曰漣曰沆以乾隆十四年十月初十日葬於吳縣二十二都八圖海字圩長洲鄉王安人祔焉孤子懷仁秉義以狀來請銘銘曰

德足砥身行足及人潔己足爲世風分叶教士足令世宗遵叶豫章千尋厥有根河流萬里厥有源松楸鬱鬱安且敦克綏福履貽後昆

右墓誌銘顧詒祿撰

狄寬

乾隆辛丑冬余爲先嚴卜葬歸自大梁溧陽狄景通景曾介姊婿
卞麒奉其尊人行狀頓首於地請曰先君子厝永昌阡二十年矣
銘未具不敢葬惟先生哀而銘之余再拜辭不敢壬寅二月余復
之大梁麒不遠百里來送請益堅余按君狀應得銘且其子負遲
葬之罪不敢死其親求信布衣之言不飾虛美是真欲傳其父者
歟雖不敏不敢卻迺許之按狀 贈布政使參議呈祥生順治己
丑進士陝西按察使副使敬敬生康熙辛未進士翰林院庶吉士
億億生附監生 贈知縣樞配武進楊太宜人諭德大鶴女也生
君諱寬字元博乾隆辛酉舉人乙丑進士用安徽知縣歷任望江

東流巢縣知縣擢鳳陽府清軍同知加九級年五十八歲卒官配
陳宜人安徽婺源縣知縣龔女子景通娶陳景曾監生娶周女一
適陽湖監生卞麒養女一適陳君爲治一本至誠而精察果斷不
畏強禦卒能輿革百姓利害東流民惑形家言訟山漫葬每庭鞠
發其天良三月訟哀多葬者巢俗溺女而娶婦百金乃勸育嬰堂
捐俸經費以律禁之巢始育女焦湖薄大江山田十七苦水令田
主什一出貲佃人作開塘四千三百四十七口溝洫隄閘以百計
而瀦防備焦湖廣四百餘里水達大江東爲三十餘丈勢洶急而
東匯天河南出濡須孔道也土豪陳黃葉三姓假捕魚列椿網中
畱帶水以迫行舟沈者囚取觸者勒償法不及爲盜百餘年不治

會晉賈李恆發舟覆君廉得寶卽盡去之勒石著令鳳陽歲饑從一僕四胥親別戶口以賑不足輒捐俸飛蝗起督吏民捕之夜禱八蜡廟晨興神鴉蔽天蝗委地籍籍半日盡衢達九省驛傳不累民自上官從者迄過客飲馬焉輒去之他若講孝弟頌農桑十則修忠孝節烈祠整書院置蘆溪背忠廟南船及望江城南救生艦設錫類局給醫藥棺服咸盡心竭力故君卒而五邑之民擗踊來祭望縣門哭送郊外奠者數萬人而望江之百歲老人陸公明一慟以死君至性肫篤年十六喪父扶柩都門歸骨立祖及母恐其殉也爲節哀事祖及母盡孝丙辰省試心動馳歸值母病彌留登第後假歸壽其祖是秋祖喪皆毀瘠過禮祭則數日哭兩目腫嘗

宿聽事旁枕席閒多涕洟後奉母合葬見父柩心痛絕遂病君少
穎異志遠大薄章句儒十一歲爲詩曰立天地閒利萬物行聖賢
事非文章識者異之黃成性先生著史學提要始義農迄靖康君
成而疏之方望溪先生稱其有良史才也手編曾祖祖父詩文刻
成嘗與官書共晝夜死之日力起視史學提要乃瞑君死九年卞
麒麟之銘曰

昔望山尹公能知人兮一見君謂非百里才君爲百里兮竭才以
爲之心喪終身兮更耗精於民治臨穴見木兮遂血盡而心摧訣
生女於丹陽之舟兮送臨濠之死惟萊妻死而見夫子兮其民哀
歸永昌之阡兮其所慕思嗚呼循吏純子兮擇其尤以書碑

右墓誌銘呂星垣撰

國朝正統大興史丁編

卷六

AMERICAN UNIVERSITY
LIBRARY

1977

魏紹 向濤 于廷柱

魏紹字念遠湖南沅陵人家貧糞殮不給妻韓氏勤女紅以佐之
苦志潛修足不踰戶雖飢寒交迫而弦讀聲不輟中乾隆辛酉舉
人乙丑成進士任常德府教授以端品崇實造士士爭頌之三載
卒於官囊篋蕭然妻子仍歸而食貧同邑向濤字乘風歲貢生官
藍山訓導乾隆丙寅補長沙府學訓導以姪廷柱爲教授改益陽
課士有方一動一言學者奉爲楷模卒於任士多感涕廷柱字砥
中乾隆壬所進士授長沙府教授再補永州其教法以敦品飭行
爲務諸生作盛德詩頌之三年卒官廷柱性孝友兩弟幼教讀婚
娶皆身任之兩弟卒撫其子如子故人尤稱其內行云

右傳李元度撰

榮大順

常鶴

陳宏亮弟宏典

周克健

張宗耀

黃賢

榮大順湖南長沙人父銓康熙己卯舉人幼孤事叔父如父撫兄
遺孤祖業悉畀之足不履公庭獎勵後進諄諄忘倦有廢儒爲傭
賴銓勸學周乏卒成其名者大順雍正己卯選拔是秋舉於鄉乾
隆乙丑以明通榜授黔陽教諭修學宮建文峰塔及育嬰堂日與
諸生講學不倦士風丕變大順爲諸生時遭父喪哀毀骨立田宅
皆讓其兄諸姪無依者教之成立在黔陽聞繼母訃及諸兄相繼
逝慟悼成疾卒黔陽士人尸祝之同邑常鶴字芝田乾隆庚寅舉
人授新田教諭縣處萬山中少書籍與知縣捐金購買又修理義
學朔望集諸生講明經義士習一新繼補新化亦如之子道沁道

滋道治皆領鄉薦道沁永州訓導陳宏亮字臥南乾隆己亥舉人
與兄宏藩弟宏典齊名有三陳之目宏典尤健於文學政姚頤得
其文歎曰陶庵後無此作者矣乾隆己酉以第一人舉於鄉家貧
兄弟自相師友晏如也宏亮後選臨湘教諭宏典官安鄉教諭宏
藩歲貢生周吉健字剛峰乾隆庚子舉人性廉儉嘗館布政使鄭
任鑰署有君山寺僧因茶山構訟以千金託爲緩頰峻拒之官岳
州教授二十四年卒以身教士皆循規矩卒年八十有四張宗耀
字德臣乾隆丙子副榜官辰谿教諭性剛正有某生與知縣忤其
兄子以命案繫獄知縣欲入生罪索冊擬褫宗耀不可與爭辨學
使前卒脫生於難嘉慶庚辰冬詣郡城值知府生辰僚屬往稱賀

宗耀艷然曰 國卹未及期豈賀壽時耶卒不往所入俸分潤族
黨其貧不能娶代爲授室者六七人黃賢寶字心淦乾隆癸卯舉
人性方嚴毫髮不苟門下多知名士蘄水陳沆及其弟濼會稽宗
績辰邑子劉教五皆其弟子也沆父光詔寧長沙擬首拔賢寶子
賢寶微聞之戒其子弗與試官零陵教諭造士有方卒年八十三
右傳李元度撰

--	--	--	--	--	--	--	--	--	--

164-204

陶文彬

奉政大夫月山陶君考終於乾隆十年十一月十日年八十五矣越三載文孫元藻等將妥魂魄歸宅兆而以元配胡宜人耐先事次其狀走數百里謁余於還瀟山中固以請曰願有志也旣辭不獲命乃敘其崖略而銘之按狀君諱文彬字仲玉月山其號會稽陶壩人也陶於會稽爲甲氏自上世著丹青者窮州綽之枚不能數不紀遠而紀近則有以一諸生理賑事活饑民數千人又著治河明鏡以諗世沒而俎豆於賢人之閒燮庵公諱某者卽君之考也君趨庭聞訓慧解絕人少時把文謁韓大宗伯長洲宗伯以羅儀部一瓣香許之而義門何學士適喜汪編修亦皆欣然襟契每

試輒摧鋒而在舉場廿餘年俛得俛失爲退飛之鷁者六矣則遂
絕口不談經生藝一資爲詩蓋君妣胡太夫人能詩生之膝下口
講指畫早諧宮商至是益肆焉追古人從之閒復治古文人歎君
才全能鉅也然其犖犖大者則尤在吏事始君以助賑及格注牒
令蜀之彭水旣久次乃擢同知漳州彭邑多山而漳州際之海山
莽水鱗獷悍則一君治彭也不浹歲而鷹化爲鳩其於漳州亦然
鄉之龍蛇俯仰間皆赤子也蓋君整齊教導動思利民職事苟有
便於民者勸行之未便則毅然持必雖拔山力莫能移蜀故多鹽
井其在彭水者四曰鶉鳩井曰雞鳴井曰郁井曰飛井沿設自唐
宋以來而居人每患苦之鶉鳩者伏鳩也語譌而然其井在伏牛

山左麓雞鳴井去伏鳩可二里許最險仄石齒齒插谿水中不可
筏則架木爲梁劣可容足而旁緹鐵以縻之延緣得度又六七里
乃及泉郁井以郁水名郁水流徑伏牛山前道爲兩其一與伏鳩
雞鳴二井會其一稍北而繞山以行久之得飛井井尤奇絕望若
匹練懸石罅下有巨石如茵者藉之亦仰而噴泉所謂威沸檻泉
者也土人剝竹爲猿臂吸仰泉復挺小舟至飛石下取泉和煮之
乃成鹽土人云如止汲一水卽鹽不成也其艱也如是而夏秋之
交湖水或怒注往往乘四井漫之淡不可煮額則虧而亭戶以病
君至乃齋戒謀禱於井神神故有祠祠處深林叢竹間斗上斗下
人跡罕交故事有司多望拜無親詣者君之謀禱也吏以故事白

不聽捫蘿遠登顛蹶而請是歲也澗水平井乃大溢明年又大溢
盛浮於額者斤以八萬計自是率爲常父老額手歎未嘗有乃言
於大吏大吏將自以爲功請增課焉君歎曰此天所以哀吾民而
幸之也夫天難諶萬一不哀吾民而井如故澗水復大漲而課一
增卽牢不可破幸者無幾而不幸者無窮期矣誰生厲階姓氏不
萬古爲人咀嚼耶固爭之大吏事得已而邑有馬蹟山相傳舊產
銅大吏檄監司募卅胥取之意銳甚君又爭之曰事有不可者三
民者冥也惟利是視各棄其業次以鶩沒於此則傷農聚徒旣夥
無藉者攘臂其閒鬪詔疏亂以相剽奪痛繩之卽鋌而走險則誨
盜邑有點者且乘閒躡財廢居坐致富羨則獎奸故曰濫利生孽

而監司之檄如火不得已一嘗試之甫月餘所出不足以庚費乃
亟申前請罷之彭民曰微令君吾屬不知死所也郡貳故聞曹君
在漳州獨以吏能委治辦者無虛月凡再攝邑篆內府有作役須
曾青丹斤諸物色檄君督輸之部應期而集緣道無一罷勞怨譴
者公卿聞皆才君所爲方倚以爲郡而君無宦情旋已賦歸去來
矣君之歸也未及懸車者二年而元配胡太君已七十太君者山
陰孝子胡公諱祿安女也居家稱孝旣嫁稱順相月山君稱令妻
君嘗病瀕死刲左股藥之而愈從宦蜀閩助廉成德有力焉而樛
木以逮下葛藟以收族畫荻以督子又稱慈母月山君再遇 覃
恩自文林郎授奉政大夫而太君亦以孺人 晉封宜人晚節鹿

車相對者更十載壽八十一而體逝時乾隆三年十一月二十七日嗚呼可謂君子偕老善始善終者也君筆語繁富夥鉤而強半皆詩刻有摩雲集十卷藏者有金臺集錦江集武夷集古今文不在限也丈夫子二士銘候選州同知士麟邑諸生女子子二蔡啟生戴嘉栗其壻也孫男四章煥貢生元藻縣學生元莢元苞爲儒孫女四一適吳某餘尙幼未字曾孫男四廷珪廷珍廷瓚廷玠余畱越者三年章煥元藻嘗以道藝相講肄從容語家世知月山君早矣故系以銘曰

公家之利知無不爲有知弗爲而利乃逾滋此鹽者井彼銅者山養而不窮者誰邪曷鑄金以事君其閒匪直也泉涌而不已履錯

延平兮蛟宮之水，颶風怒號，危檣折矢，奇布帆之無恙。若有人兮，掀以起，嗚呼！至誠感神，兮神具相止。高岑沈宋，王錢唐薛，囊底智餘，篋中玉屑，銘之。名也先其大者，琢一片石，樹千年檟，詩以貞之。匪今匪且。

右墓誌銘方榮如撰

潘士極 族弟士樸

潘士極湖南黔陽人國學生居家孝友而嗜學康熙五十四年肄業成均考授州判繼遵例請降乾隆十一年授崑山縣丞志行廉潔居官自奉多取給於家時淮徐水災士極奉檄往視安輯居民分別振濟民至今歌思之莅崑六載以母病乞歸族弟士樸廩貢生潛心理學著有先後天圖說心極圖說一中論乾隆乙酉任臨湘訓導教化有方旣因目疾告歸自署其齋約以六則號六不翁有六不齋詩集日率子姪講學吟詠優游十五載以無疾終

右傳易變堯撰

楊璋 楊健孫丕復 彭壽年

楊璋湖南武陵人乾隆丁卯舉人幼穎悟讀書數行俱下淹貫經史尤精於易選湘陰教諭與諸生講學不受脩脯貧者更資助之年七十四卒於官諸生送柩歸執紼者百餘人又有楊健字任庵少個儻有大志甫離經卽慕正學力辨姚江末流心學之非乾隆壬申舉人官石門教諭著學規十則以自勉者勉人引年歸孫曾林立列岸序十有六人五世一堂 詔賜銀幣及耄齡垂裕額壽九十有二孫丕復字愚齋幼穎悟年十三入縣學盡通六經諸子百家之旨其爲學篤自信而不惑於俗視並世人無足北面者舉嘉慶丁卯鄉試官石門訓導說經之書有儀禮春秋及四子書

纂要凡百餘卷輿地沿革表八十卷或請梓以行世不許曰吾豈
爲名哉守此以事吾身心而已彭舜年字百有乾隆中貢生性篤
孝母老病足沍寒時愈劇或言金色鯉烹食可痊舜年敲冰求之
鯉果躍出人比之王祥投甯遠訓導

右傳李元度撰

宋鑒

安邑宋半塘者傳潛邱之學半塘名鑒字元衡世居運城生而穎悟善讀書乾隆甲子舉於鄉戊辰成進士銓授浙江常山縣知縣三年調鄞縣莅鄞七年以廉能升廣東南雄府通判署連州又署澳門同知又署潮陽縣所至有政聲士民立生祠頌遺愛焉以親老告歸囊無長物攜書數千卷而已歸田後弟某爲確山令馳書招之至確山卒於官署半塘湛深經術尤精小學以潛邱古文尙書疏證文詞曼衍而不爾雅重輯尙書攷辨四卷嘗曰經義不明小學不講也小學不講則形聲莫辨而訓詁無據矣說文解字乃小學之祖也取而疏之治經者其有所津逮乎採經史方言釋名

玉篇廣韻水經注諸書爲說文解字疏詳贍辨博又益以埤借備
三門如水部沛字本遼東水名附訓爲澤借訓爲大爲仆此皆見
於經傳者若見於史者如漢書禮樂志神哉沛師古注沛疾也司
馬相如封禪文沛然改容師古注感動又大人賦沛艾起蟻注張
揖曰沛艾駮駮也則謂之備也此乃宋氏一家之學埤者說文無
此訓以經注訓埤益之故曰埤至於借例與埤益無二又非通借
之借意當時必有一說以處之不可得聞矣又有易見尙書彙鈔
漢書地理考詩文集藏於家子葆淳字帥初一字之山乾隆甲午
優貢生癸卯舉人隰州學正以例授國子監助教學問淹通工詩
古文詞性愛金石隸書行楷山水皆入能品傳其家學

右漢學師承記江藩撰

國朝書目考卷之六

七

--	--	--	--	--	--	--	--	--	--	--	--	--	--	--	--	--	--	--	--

WJA

164-220

譚垣

臺灣南路傀儡山生番載在府志共二十七社名曰歸化其實桀
驚頗爲逋逃淵藪乾隆三十五年大穆降奸民黃教謀逆臺灣縣
志紀其大略但稱教遁入番社或云死於軍中獲賊黨鄭純黃芳
寘諸法其陳宗寶石桑二賊志未言其獲否及得讀南豐謝醒菴
鳴盛爲前知鳳山縣事譚桂嶠先生作平傀儡山賊黨記乃知陳
宗寶獲自先生其出力捕宗寶偪迫至死者爲生番加砾社女士
目泠泠可以補縣志之闕矣生番嗜殺居民視爲異類惟漢奸挾
貨以餌得與往來或娶番女爲婦生子稱土生仔往往搆民番釁
并倚番害民甚苦之記稱宗寶生長於番娶番婦生四子殆本

生番之出又爲番贅婿實土生仔中之尤狡者耳先生知鳳山時
潔己恤隱恩信浹於民番宗寶方負固聚匪肆行無忌冷冷實二
十七社之渠以戚好故庇焉先生忽偵知宗寶所在乘夜馳往圍
捕宗寶逸獲其黨三十餘人宗寶懼求冷冷謁告悔罪先生許自
首免死宗寶果率妻子自縛投案幸邀輕典輸徒仙遊之楓亭驛
迨先生受代內渡而宗寶逃歸黨黃教爲亂其負恩甚矣當黃教
之遁也監司旣登白簡守令無不惴惴教已窺入生番不出宗寶
尙出沒無常有近山閩粵匪徒附會爲害未已大府慮其復熾檄
水師李遊擊長明綠營戴副將廷棟來臺勦捕撫軍知先生素得
民心亟令東渡相機行事先是先生受代鳳山民餞送依依幾擁

道不能行聞其重來咸躍然曰賊不足平也公之德洽於吾民今復爲恤民除害來臺千里集糧可無以供朝夕所需乎於是薪米魚肉蔬果之饋接踵於庭凡有指使競爲盡力宗寶聞而泣曰吾不得生矣公不早去吾罪猶不至此今何逃乎先生請於當事招生番而用之泠泠聞招亟率鄰社土目番丁來見先生犒以酒食宣示 朝廷柔遠德意雖在界外亦宜歸懷泠泠稽顙以聽卽日發令捕賊先縛宗寶甥柯求以獻而宗寶逃入毛絲絲社泠泠怒督番丁環討甚急戴李兩將一堵其外一攻其中先生率佳左莊鄉兵繼之宗寶窮蹙曰吾何面目復見譚公遂自刎死事聞大府以平賊撤兵入 告而臺郡得無後患蓋教雖爲渠魁實劫牛賊

耳輔以狡黠之宗寶乃如虎而翼宗寶死教與石桑雖漏網料無能爲不妨以鬪死軍中存疑息事向使非先生東來焉能摧枯拉朽於咄嗟閒益以知善政得民之深而廉吏之果可爲也先生之行有繪圖於冊以旌其功者一時僚采競題政詩文於後傳安早歲侍先大夫在都得見先生承出圖冊相示時年尚幼未解借鈔諸詩文及官閩中得交先生次君福鼎大令掄又未及詢悉原委愁焉如有所負得讀謝君斯記而釋然矣記中譌二十七社爲一十八社又未悉傀儡山之在生番中宗寶當日若據茲山先生不得向導安能夜往界外圍捕不稍區別無以傳信將來故爲之疏證如右先生名垣江西龍南人乾隆戊辰進士官終彰德通守當

時人頌通明之聖至今猶思慕不諼云

右記鄧傳安撰

鮑鈺

乾隆十三年閏七月十有八日子在杭病甚有急足以辛浦書至者展視之則彌留語也其書曰日來一病竟入膏肓從此化爲異物長辭左右可爲歎息一生偃蹇毫無可錄祇操履粗堪自信吟詠聊以自娛而今已矣寂寞身後幸惟先生憐而念之伏枕哀祈泣然絕筆時予方進藥不禁失聲哭連日病爲之劇稍差念友朋垂歿之託不可以疾故令其耿耿猶視於地下乃稍取其大略而次之辛浦姓鮑氏諱鈺字西岡世籍雲中今爲奉天正紅旗人佐命大學士承先之曾孫其三世傳見 國史有列於勳籍辛浦年二十卽知浙江之長興縣幾十年以病去官尋再知長興亦幾十

年其考最者累矣而不得遷最後大府以便宜擢之爲鹽運嘉松
分司通判而部議又格之於是三知長興蓋其筮仕在 聖祖仁
皇帝四十六年歷三世至 今上之七年猶在長興大府至者皆
爲稱屈乃稍移之知嘉興又移之海甯尋擢爲草塘通判草塘在
浙中倅廳之最貧者也以故辛浦竟得之辛浦之爲吏不名一錢
而未嘗皦皦以廉自見其任事尤精密而未嘗以幹力先人其接
物和平無忤而其中有介乎不可奪者所以一官拓落終身不得
有力者之仗庇而辛浦未嘗怨也彭城李敏達公之督浙中也治
尙綜覈百城畏之而辛浦之癖在賦詩每日升堂理訟獄畢諸胥
吏見其搓手注目神采如有所得輒私相語曰老子詩魔至矣須

與取故牘尾題之殆徧故其生平無日無詩彭城一日謂湖守曰
長興今日賦詩吾且列之彈事矣湖守免冠謝董率不謹曰當令
改過而恕之退而戒辛浦曰獨不爲百口計乎於是辛浦甞勉束
筆度硯者三日謂其客曰下官忍不可忍矣惟大吏之所以罪之
賦詩如故然辛浦百事修舉部民雅誦之彭城徐察之而不復怒
也潛使常侍郎履坦改撫浙中問於天門唐內翰赤子曰浙之屬
吏有足語風雅者否曰莫有過於長興令者矣且其人非但辭客
已也故辛浦雖旅見其禮殊絕於羣吏或畱語移日然辛浦落落
穆穆未嘗以此自昵累以才謂不勝繁重爲辭侍郎嘗語之曰少
需之吾當薦君爲方面辛浦終泊然每入謁所言不出於詩文及

侍郎有事於進奉屬吏爭任之以是卒招物議 天子遣大臣莅其獄屬吏坐之株連者累累而辛浦高枕自如始其歎其爲不可及尤好士長興諸生王豫者通經工詩古文詞貧甚辛浦雖刻苦時時周之豫以牽染之禍逮入京辛浦爲之經理其家其卒也又爲之雕其集蓋辛浦雖交遊滿天下然其心知之契甚落落及其投分也則必篤於始終之誼類如此辛浦之詩宗法新城豐贍流麗自然合度隨手脫橐卽自書之以付雕工或曰更無待於論定耶辛浦笑且歎曰吾老矣而無子漫爲之亦漫存之耳或曰是定可以免長吉中表之累者也所著詩集四十卷別有道腴堂文藝亞谷叢書諸集并行於世病作遽上箋乞身於大府不許了然知

必死部署身後事無一不整整卽其貽子訣別之書已槩括生平
子文莫能有所增益也嗚呼昔人清真澹蕩之日如吾辛浦者其
庶乎辛浦以貽子書之次日卽卒享年五十有九安人某氏以其
從子某爲後初辛浦在日欲卜葬於杭之南山曰他日湖社諸君
雅集當酌我墓今緣其雅意寔之靈隱因貯遺集於寺中而子爲
之銘其詞曰

嗟秋來之沈困兮擬冥心以斷文字之緣胡力疾而破戒兮神傷
於息壤之言故人之銘無媿詞兮長護君魂魄以懸懸

右墓誌銘王昶撰

--	--	--	--	--	--	--	--	--	--	--	--	--	--	--	--	--	--	--	--	--	--

16110

侯嘉縉

予自沈移知江甯客賀曰江甯有侯丞榮榮大才佐公公必喜問
其名故予狎也予壬子鄉試見有野而古者危冠高履口後盲目
眈眈斜視如深山怪松礪礪自異識者曰此天台山侯嘉縉也予
竊已奇之與訂交廓落無町畦益相愛號夷門子字元經詩文迅
疾始於筆染終於紙盡揮霍睥睨瞬息百變每裹袖潑墨數十人
環而擁之丞抽思乙乙十指雨下字跡旁行斜上如長河掣水風
裂成文莫知條理而天趣可愛又如成相危詩窮劫野曲可解不
解而俶詭獨絕先受知於督學帥公貢於鄉連試不售出爲主簿
調江甯丞曹進曹退温温無所試旣不得志於時愈自縱一日大

醉登報恩寺殿摩古佛羅漢數百尊各贈詩萬餘言書其頂箕坐
大呶噓外風雨暴至電光燭其手益喜奮筆不能休且吐且書取
殿旁石白戴頭上折旋舞如風眾僧疑爲鬼神異物不敢偪視又
疑病狂易妄笑語昏亂酒旣醒雷雨亦息觀其詩奇字奧句不能
讀也舉其白重千二百斤運餉至京以己所坐輿輦其妻秦氏已
策驢從之妻免乳旅店中丞徒步長吟數千里判事喝咎數輒睨
抱牘吏決當否吏曰是也丞大喜號於眾曰何如鎮江黃太守慕
其才招至署未浹旬早起不見覓之赫然死廁旁年五十二其子
某至自天台以柩歸卜葬畢來問銘於余余旣奇君之才而尤奇
君之死乃亦爲奇語遣抱磨者陷其石以質君銘曰

文星熾熾龍齧其系拗怒墜地無所吐氣以儒爲戲欹崎如是執不律如執鬼中可以極無極窮無窮而卒不聲於崖公一笑去冷然風畱委蛇受機封

右墓誌銘袁枚撰

侯元經嘉縉號夷門台州才士也詞賦敏贍屢困場屋年五十官江左縣丞解餉戶部爲庫吏需索不卽予批迴侯大窘時先文莊公爲侍郎見侯名曰夷門也顧司官曰某尙書祭文諸君謙讓不下筆盍屬之卽傳至戶部堂後授筆札不移晷成駢體極壯麗某司官復進曰此堂官祭文諸曹司尙需一首亦以相浼侯磨墨濡筆復成四言韻文一時堂上下稱訝不已彼筦庫者已袖批文俟

侯出而即付之明日束裝成行矣

右兩般秋雨盦隨筆梁紹壬撰

三

三

任陳晉

興化任先生諱陳晉字似武號後山亦日以齋進士官教授著易象大意存解一卷不載經文惟折衷諸家之說明易象之大意故以爲名左傳韓起聘魯見易象易之主象三代舊法是書卷首標凡例七則多申尙象之旨其論太極五行兼及河洛先天諸圖發揮明簡惟標舉其理所可通凡一切支離推行布算經而繪弈譜者翦除殆盡其凡例有日後之言象數者流入藝術之科其術至精而其理亦更奧澀且偏於一隅反涉形下之器可云篤論其論彖論爻論象不廢互體之說蓋以雜卦傳爲據其論六十四卦各括其大旨亦大抵切人事立言終以繫詞序卦說卦雜卦其文頗

略蓋著書之意在於六十四卦餘皆互相發明耳

右學家康鑑輯

國朝耆獻類徵初編卷二百五十四補錄

僚佐六

王建中

王建中劍川州人乾隆辛酉拔貢由教習出任知縣歷官運同他處運同多與運使同駐惟兩廣分駐潮州其權與運使埒而利亦如之以提銀解司庫忤制帥遂休致歸卒年八十六公之爲令牧於直隸也與周大司馬元理劉大司馬莪梁大司空冒堂皆同爲方慤敏公觀承所賞識大城任內辦振按戶計口毫無侵隱查振者初齟之嗣經方公密訪得實立將委員調回晉省日方公持所著帽加之公首以榮之至審理積案每多平反人皆服其廉幹云

國朝通志卷之二

右演繫小傳師範撰

國朝耆獻類徵初編卷二百五十四補錄

僚佐六

李化枏

李化枏字石亭羅江人乾隆壬戌進士官順天府北路同知保舉知府著有石亭詩集石亭先生學本經史早年以制藝名家壬申分校浙闈得老名士李祖惠爲解首人服其精於鑒衡丙子分校亦多知名士初令餘姚嗣權平湖仁心惠政膾炙人口平湖口碑有七年如雲煙兩月見青天之諺頌大府特疏保薦旋以丁艱去任服闋補順天北路同知勤於治理循聲卓然年五十餘卒於官長才未展當路惜之性孝友樂善教子有方子調元以癸未翰林

官至直隸通永道世其家學其萬善堂彙尤爲帖括家所辨香門
人李祖惠序以行世蜀中以詩文名家者先生爲最著也

右 國朝全蜀詩鈔小傳孫桐生撰

國朝耆獻類徵初編卷二百五十五目錄

僚佐七

余慶長

朱景英

姚其旋
陳熙志

陶世鳳

項士鎡

任秉哲

高辰

高鳳翰

許邁

吳江

王翼

何潭

林文慶

黃體德

羅南英
蔣元縉

楊芳

舒才博

向大杰
黃思洋

向世翼

翟灝

茹敦和

薛田玉

王廷詔

唐伊盛

王先昇
余作毅

嚴先熙

陳朝書

呂轍

陸瓚

國朝詩人姓名錄卷之三十三

程大中

吳寬

黃紹統

張發桃

倪廷模

劉煌甲 馬崧齡

畢光祖

琴遇知
黃鍾才

左逢霖

王立恕從子本灝
駱孔俱

李涌

涂大遠
劉礪

李文藻

蔡璨 蕭智湖子仲信
尹學蘇

查為義

沈世華

補錄

袁文典

文泰運

國朝耆獻類徵初編卷二百五十五

通奉大夫前署江西巡撫江西布政使司布政使湘陰李桓輯
僚佐七

余慶長

士君子之用於世必先觀其器識淵然穆然澄之而不清撓之而
不濁招之而不來麾之而不去然後可以經緯萬端酬酢百變而
有餘然或勿施於用或施於用不克竟其用者比比也可勝歎哉
若是者今於我友余君庚耦見之君名慶長號元亭庚耦其字幼
敏慧沈靜寡欲年十五爲縣諸生乾隆庚午舉於鄉壬申會試未
第揀發雲南以知縣用補通海縣三年調太和又六年卓異升他

郎通判旋以病告歸明年病痊赴滇再補維西通判時緬甸用兵
巡撫檄至永昌在軍需局辦事又三年擢大關同知旋以憂去職
服闋時金川方用兵四川總督富公勒渾廣東巡撫李恭毅公湖
等奏君諳練軍需請旨來川補用補成都府同知尋丁母憂總
督劉公秉恬等復奏請畱局辦事奏銷畢乃請回籍治葬葬畢引
見發廣西以同知用署平樂府知府甫一年因病乞歸歸十五年
而沒君在任必以古循良爲法治事悉做經義而行之在平樂立
諸生爲齋長又嚴保甲之禁以杜姦宄秉性慈良不以苛刻爲能
亦不失於寬縱所歷州縣咸有惠政故上官皆服其才生平不以
趨走爲長亦不與同僚酒食嬉游以取結納往往危坐竟日喜愠

不形於色每事至從容繙閱皆能默識而強記之凡上官遣使問
故令書吏抽卷牘以進首尾咸備無一顛倒錯誤時緬甸負固不
服大兵分道進討經略出西路由猛養副將軍出東路由猛密中
路則造舟數百浮江而下荊州將軍統兵別駐普洱而偏裨營汛
亦數十處又京城八旗兵滿洲索倫鄂倫春兵及吉林福建水師
湖廣工匠駱驛來滇而牛馬糧餉甲仗火藥銅鐵煤炭之屬各以
數萬計相望於道晝夜嘑嚕不絕隨至而隨應之君分路設站按
站設夫凡百所需咄嗟立辦兵役不戢而自甯羽書旁午如棼絲
亂麻觀者心搖目眩君獨不震不驚指揮若定洞中窺要其在四
川亦如之此皆予所親見愧以爲不可及也始祖名瑛明萬麻兵

部尙書居歸德高祖考名成龍妣朱氏曾祖考名國佐妣趙氏祖
考名秉乾妣周氏考名如陵乾隆戊午科舉人妣葉氏三代 誥
贈奉政大夫妣皆 誥贈宜人高祖由商邱遷於湖北遂爲安陸
縣人君配劉氏 誥封宜人子三肇錫選拔貢生歷官長沙府同
知次肇翊乙卯科舉人次肇端監生女三一適福建連江縣知縣
雲夢李萃次適候選庫大使應山洪萬林次適諸生棗陽孫震甲
孫三嗣傅候選鹽大使次尙伊次若僑孫女一未字會孫二葆基
尙幼君生於雍正二年十月三十日辰時卒於嘉慶五年正月十
六日辰時年七十有七卽以六年某月日葬於柴家廟之原君少
無宦情其在他郎歸養時家有大樹綠蔭數十畝遂築室其下扁

曰大樹山房旁爲因岡書屋寶月亭香雲閣學舫濬池累石竹木
蒼然又在京師載書數千卷以歸分置其中俯而讀仰而思賞奇
析疑各據其所見以示來學若將終身焉然則君之出入邊徼羈
縻丞倅豈其志之所樂哉所爲詩文皆誦法古人尤喜崑山顧氏
炎武故所作多有相似者而於宋元經說尤深著有十經攝提易
識五翼義階易義初階易義識疑周書章段春秋比事集訓春秋
大義春秋傳辨禮記通論盤庚淺說月令啟蒙大樹山房文彙王
癸詩鈔登仕一紀錄未信存逸緬舌編略墨池紺珠習園叢談德
貽堂家訓凡二十二種總爲五十一卷藏於家君旣歸一年巡撫
譚公尙忠聘主五華書院明年予爲雲南布政使延致賓館爲予

編次銅政全書八十卷刪繁訂異有條不紊其後君弟慶遠在子
江西幕府周旋日久故知君性情行事爲最詳昔諸葛忠武云才
須學也學須靜也故澹泊以明志甯靜以致遠今君以靜制動以
簡御繁是以器識之深如此而惜不克竟其用也每念及之輒爲
感悼今君子肇翊質樸能文足蹇四千里至錢塘余適主講敷文
書院索余誌其墓予何敢辭銘曰

不皇皇以競進兮不汲汲以求申其用弗竟兮其德彌溥
幽宮兮啟祔雲後有餐風而味道
者庶其考於斯文

右墓誌銘王昶撰

朱景英 姚其旋 陳熙志

朱景英字幼芝湖南武陵人乾隆庚午解元知甯德縣前任有黠賊誣良拘繫多瘐死者景英一訊而服縣東湖濱海前令議築隄鳩民金七萬有奇四載弗成景英歎曰一綫孤隄能與海爭力乎力請罷之擢鹿耳門同知地爲臺灣門戶同知司海口商船出入兼管四縣舊例凡商船來自廈門者分配大小爲六等轉輸廈門已運者免運一次前運有賣放不配運者積三十餘萬景英令如前帶運積壓一次嘗以臺地遼闊南北路兵單汎薄請派兵防衛當事聽其言調北路理番同知署汀州邵武府知府告歸圖書外無餘蓄景英以文學飾吏治書工漢隸纂修沅州府志精覈爲時

國朝詩林卷之三十三
所稱著有海東日札四卷畚經堂文集八卷畚經堂初集六卷續
集四卷三集四卷研北詩餘一卷同邑姚其旋字叔元原名體乾
乾隆丙子舉人知清河縣調清江武進某氏婦殺其族叔前令並
坐其二子其旋覆讞出其罪再調長洲委勘南匯命案平反三十
餘人擢松江府同知告歸著有行廚集陳熙志字百維七歲能文
乾隆癸酉拔貢官永定河南岸州判派修隄防工竣餘貲悉還度
支憂歸起憑詳州判苗獠拒命督運軍糧以勞瘁卒官

右傳李元度撰

陶世鳳

世鳳知新興縣監生趙簡祥合七邑匪徒歆盟爲不軌世鳳飛檄
上聞躬率壯勇猝禽其魁獲逆名簿佯笑曰封官授職是優伶演
劇所爲詎可呈上官耶當眾焚之反側乃安縣民立祠報德

右廣東通志張維屏錄按陶公字威仙號雲門浙江會稽人乾隆十五年舉人官澳門同知

有雲門
贖棗

										L. I.

項士鉉

公姓項氏諱士鉉字欽武別號慈庵先世江南歙人明末北遷今爲直隸南宮人祖文學旭陽公父端生公並砥名行翕然負長者稱兩世教讀所成就生徒最夥以公貴胥 贈如其官公以國子生效力議敘得州司馬揀發粵西歷辦廠務補萬承州土同知未行攝庫大使事調奉議州掌印判官擢四川成都府通判攝府篆者三州篆者一階承德郎乾隆庚午卒於官春秋六十有一卒之日自大吏以至寅僚咸哀悼贈賻士民間之多歎息泣下者公軀幹偉然饒大略質直敢言洞中窾會尤持廉一介不苟取其勤於吏治爲民興除若飢渴之於飲食也以故所至具著聲績旣去彌

復見思奉議地極邊轄三土司無正官以倅行牧事公始至咨民疾苦革供應之派諸里下者遞送役夫之撥及婦女者勒碑永禁民困始甦又念州初改設規模荒陋無以肅觀瞻相厥廢墜次第修舉其大者建文廟立義學置恆產以贍生徒力請附鎮安府試得歲補博士弟子於是彬彬多文學之風矣某土司饋布縛兩如一發之金也亟還之亦不發其私以沽譽田州土官岑富而好禮公結以恩信終任不納一錢餽遺比赴蜀岑奉贐二百金公笑謝曰爾以我爲利爾貨耶果爾何俟今日且何以與爾相安至今日岑大感泣率子弟挈舟送數十里州人亦空邑遠送望塵弗及哭失聲成都省會地五方雜處彈壓爲難公司督捕鋤奸衛良數

年來無鳴吠之警方邪教之熾也禍發滇黔流氛入蜀有潛伏省
城謀劫獄者公密調捕獲渠魁二人置重法餘黨駭散居民安堵
緊公之功而署雅州時寢兵一議有功於蜀人尤鉅是時西南夷
或自相攻擊都統慮爲邊患移檄請兵嚴裝有日矣公密稟撫軍
謂夷與夷爭中國之利卽防其侵軼謹守要害足矣彼未犯順我
出何名邊釁一開後患叵測非但勞師費財已也撫軍然公言寢
兵不發中外帖然及征曲曲烏公仍進安撫之策而制府方銳意
用兵弗聽後亦旋悔卒用撫如公言嗚呼古王者之治夷狄來不
拒去不追而已周得中策漢得下策秦爲無策如公卓識老謀當
求之三代以上詎與貪功樂禍以危事爲僥倖之徒同乎哉卯辰

閒有金川之役民間以夫米故告訐紛紜公四出查勘勸慰百方
事克就緒既而禁旅進討公再署保甯供頓以時兵獲進行而民
用不擾己巳春小醜歸誠公解番民赴闕往返八閱月病始萌
芽訖至不起賢勞鞅掌竟以喪歸可哀也已公內行淳備事繼母
盡孝待族姍有恩同僚客死經紀其喪傾囊助之弗少各行述所
紀頗詳而余撮舉其大者蓋深惜公有經方致遠之才而官止任
別駕年甫逾六旬曾弗克究其用也余前宦蜀嘗受公一日之知
故不揣卑陋而爲之傳

右傳儲掌文撰

任秉哲

先生諱秉哲字庸姿西園其別號也世居河曲縣巡檢司村曾祖滿康熙三年大水產蕩沒移家縣城祖之賓同產四人叔弟之榮生三子而以季子進職爲兄後先生之父也生週歲母周氏卒祖母康鞠之年十九爲邑諸生授徒以養拔萃貢成均肄業國學當是時興縣孫文定公爲大司成倡正學鼓勵多士先生親炙薰陶得其指歸德業益進乾隆丁卯舉於鄉辛未成進士授朔平府教授河曲地近塞垣士鮮知學自有明萬厯丁丑苗京兆登第後垂二百年繼之者惟先生一人初爲諸生時貧甚忍飢寒讀書辛苦刻勵人所不堪十餘年不少輟邑宰張球重之延課其子許爲遠

器獎進甚至而先生亦虛心領益克底於成明府之愛士先生之
好學至今父老猶能言之朔平爲邊郡廟學在城南五十里曰威
遠堡司鐸者寒氈苜蓿師生相視漠然如路人先生甘心淡泊日
與諸生切磨尤加意寒畯以故士親之多所成就已而繼母春秋
高遂乞養歸年六十五卒乾隆二十三年六月也先生教士以孝
弟爲先推誠待人人無不服威遠堡千總同官於朔顧執弟子禮
甚恭居常疏食展卷怡然不以貧窶奪志人有困急則竭力拯之
嘗謂其子曰待有餘而後濟人必無濟人之日待有暇而後讀書
必無讀書之時吾奉此語終身汝曹勉之可以想見其志趨矣配
李孺人勤儉有達識先生學於外以極貧之家仰事俯畜身任其

艱事姑尤孝謹衣藍縷而無戚容啖糟糠而無愠色人以為刑于之化云

贊曰先生四子俱以諸生嗣儒業雖未顯達然至今里中言清門者必推任氏先生為不朽矣鄉前輩為余言先生事繼母極孝母性嚴卞易怒婉愉曲承能得其歡解組歸養視一官如敝屣非至性純篤烏能如是哉

右傳黃宅中撰

日本書紀卷之六十一

二

高辰

高辰字白雲金堂人乾隆辛未進士改翰林院庶吉士改授江蘇清河縣知縣升禮部主事官至安徽鳳陽府同知著有白雲詩文集先生少而穎異博通經史及醫卜星數天文之學尤長兵家言丁卯金川用兵詣軍門陳奇策任攻取當事奇其言而不能用作令江南禽巨盜破積案民賴安集廉介自守在官不名一錢愛才如命獎拔多知名士時論宗之

右 國朝全蜀詩鈔小傳孫桐生撰

高鳳翰

高鳳翰字西園號南阜山東膠州人官縣丞有擊林等集

西園工書畫豪於詩具經濟才則世罕知者

病痺廢右手諸任事以左手更號尙左生

右山左詩鈔張維屏錄

南阜畫山水以氣勝善草書嗜硯著有硯史

右畫徵錄張維屏錄

盧見會云余轉運兩淮西園方以縣丞委管秦壩稱掣歷俸滿應敘升矣會儀徵缺出薦於兩臺制府復書尙稱聞其才名會有構予於制府者乃轉以結黨爲余罪列鳳翰款並參其寓秦州詩云

幾會連茹茅同拔卻爲鋤蘭蕙並傷又云不妨李固終成黨到底
會參未殺人皆實錄也

宋弼云南阜山人少具異才跌宕文酒薄游四方所至傾其豪雋
四十不第舉爲歙縣丞以事牽連罷官歸復舉儀徵丞被劾又病
風痺廢右體垂老歸家食貧以沒山人善書畫畫尤爲世所寶貴
重之如古人

右正雅集符葆森錄

許邁

君諱邁字嘯斗號石村姓許氏安徽桐城人自明贈奉議大夫諱道者始來居桐城之黃華里是爲君始祖凡十一世而至君曾祖民牧民牧生君祖寤口寤口生君父德邑皆以諸生有聲庠序君生卽沈毅資稟過人稍長沈酣經史益自砥礪補弟子員文日有聲學使開公極賞之以拔貢生入成均明年廷試一等居京師數年復考教習得咸安宮三年期滿將爲縣令會聞德邑公訃卽日奔喪友朋賻贈皆不及僉曰許君真孝子也乾隆十七年中順天鄉試第二名屢上禮部不第因就本班出爲江南高郵州學正高郵地形洿下當黃淮之衝黃淮敵則洪澤召伯諸湖之水泛濫

浸溢故災祲連歲君奉檄襄辦振務按冊稽戶口晨夕不遑胥吏
欲上下其手啖以利堅不可饑民賴以全活者無算至於捕蝗以
救麥勘田以免賦皆身親阡陌不辭勞瘁抵任未三年卒於官士
民無不流涕嗚乎賢矣哉古者設官授職有興學之任者卽有親
民之責自校官與有司分途而人始不得越俎而謀有心用世者
往往束縛於無所施而又以嫌疑之見介乎其中此所以趑趄而
不肯前也君獨無形迹見勞民事不自使其身然則雖不大用於
世其亦可以自慰也已娶某孺人子長某次鎮乾隆庚子舉人會
同縣知縣孫炳椿歲貢生丙椿與澈浦舒燾善以狀來請銘銘曰
官不稱才志亦殺師侵吏職爲越界劬勞黎首無蒂芥心力屢試

亦已憊爲後人師宜勉勸

右墓誌銘舒燾撰

漢書卷之九十五

三

吳江

先生諱江字南川號未軒姓吳氏季公子後裔上世累遷明成化
閒由平度徙霑化代有顯人父錫仁 誥贈中憲大夫母朱氏
誥贈恭人以先生伯兄湘給諫貴也贈公四子先生居次性至孝
自幼嗜讀七歲能詩遊庠後每試輒冠曹乾隆壬申 恩科領鄉
薦贈公卒逾期未獲吉卜先生居廬每大風雪必夜起撫摩棺木
徬徨號泣鄰居爲之悽惻母朱太恭人有疾先生侍榻前面黃甚
母曰爾亦病乎曰無病步行屢顛家人謂憂勞所致徐乃知先生
割股事邑宰額先生曰純孝先生泣然曰此非全受全歸之義也
忍以爲名乎藏其額終身不一懸服闋累躋春官乾隆丙戌以大

挑注籍縣令試用滇南都中貴顯以先生伯兄故或以書屬大吏
至滇值用兵緬甸先生解兵糧兵鞍調兵土司皆剋期辦委署臨
安府經歷代郡守治獄書役驚神明不敢取一錢歲終多告退先
生至典衣分恤後改就教官大吏之書猶在囊曰窮達命也亦安
用是暮夜求者尋選汶上縣訓導陽穀王倫叛汶上官半調赴大
營守者一把總一典史當是時王倫營去汶四十里銃礮之聲日
夜相聞諸生或有勸先生暫避者先生大怒曰士爲四民首邑有
難乃先去以爲民望乎且有 國憲在吾與生等與此城俱碎耳
晝夜巡警勉士卒以大義城得不破先生司汶上鐸數年與汶之
士爲一家學宮後手植槐數十株汶人號爲吳公槐勒碑以紀先

生德調曲阜訓導升濟南教授教士一如汶先勵以忠孝節義服則課文每課必自作一二首爲程先生官滇時著有萬里草近體詩十草園課藝歷任廣文著有汶陽課藝曲阜課藝濟南課藝解書有四書管見兩論參一吾邑韓理堂先生古今文詩辭負山左重望館濟南歷邑時數與先生相過從樽酒論文遇賞心獨見輒搥牀叫絕不知世閒何者美好先生旣告歸及門之士經先生指授者悉有名於時卒於嘉慶二十二年九月初九日年九十配勞孺人先卒子四人親來觀稼觀道觀文女二人

論曰余少從韓理堂師知先生名長從壽邑薛萊峯師師數道先生先生聲稱在濟竟閒今越二十年先生及門岳編修以行狀囑

余爲先生傳余旣條列先生義行之大者不具論論先生之文余
鐫山左文鈔首三家竇東臯之文大含細入元氣渾淪如高山大
河包孕無窮韓理堂之文鎔經治史如夏尊商彝三代法物令人
不敢褻視閭懷庭之文古光幽顏如翠柏蒼松四時不改其色如
空谷寒梅孤芳自賞先生之文簡雅刻削氣味別出三家之外其
韓閭之亞乎

右家傳劉鴻翱撰

王翼

君諱翼字佐君東崖其別號也上世自山西遷關中占籍臨潼之零口遂爲零口王氏以孝弟力田世其家故君大父以上俱不顯考諱國柱字廷石始爲縣學生文行稱於鄉有丈夫子二長卽君次日胡嗣君世父國英無子而君以丈夫子巡秦爲之後巡秦由甲戌進士除知山西五寨縣今以 覃恩貤贈君如其官君配張氏 貤贈太孺人君之生也自少力學爲諸生試輒冠其曹得早食餼而困於棘闈識者惜之乾隆壬申膺恩貢乙亥鄉飲舉大賓庚寅選授甯夏縣學教諭年已七旬有七矣就職之明年卽爲遂初計至家才兩月而卒君爲人無所矯飾其文學德行可誌者不

乏而余所獨重者君能教其子巡泰爲循吏耳余主閩中書院講席時巡泰爲書院肄業士余見其殫心程朱之說能身體焉嘗異而問之卽知其本於庭訓者久也及巡泰治五寨七載閒循良之聲洋溢秦晉雖稼書陸公之治嘉定治靈壽當時稱爲第一其廉與慈亦豈必有加於巡泰顧孰知其所自來哉巡泰之初至五寨也君卽手書諭之曰縣令民之父母若視民當如我視若且我但願享若廉名不願享若剝民養親之五鼎供也語意肫切聞者誦之君又嘗因巡泰迎養至署面諭諄諄殆無虛日大要不外潔己愛民則巡泰之廉慈非獨其性然其學然蓋其本於君者不可沒已嗚呼君賢矣哉故世之循吏往往樂有賢父也君生康熙甲戌

八月二十六日卒乾隆辛卯八月十八日男四長巡華早卒次巡
衡太學生次卽巡泰次巡岳亦太學生娶皆士族孫男六長夢徵
早卒次夢祥夢麟夢熊夢鶴夢麒孫女七曾孫男一曾孫女四巡
泰以愛歸將以壬辰九月十四日與昆弟及承重孫夢熊葬君先
塋前期使來請銘遂銘曰

其存也順其沒也甯佳城鬱鬱以庇厥後實惟東崖先生之靈

右墓誌銘孫景烈撰

中庸
卷之六
第廿三

三

何潭 林文殿

何潭字清來湖南桂陽州人年十五衡州府錄送第一學政試再
第一謂諸生曰衡郡十州縣無此才也王步青以通四書講義名
一時得潭文輒錄之乾隆癸酉由副榜登鄉舉第二應禮部試輒
黜以經義教授兩湖開弟子數百人衡山曠楚賢已得舉從潭受
經三年以二甲第一人入翰林自是從學益眾泰和姚頤提學湖
南潭爲鄱縣教諭往謁頤驚起曰何先生猶學官耶頤誦公文熟
矣潭爲學嚴正親黨莫見其惰容教子弟以禮年七十六卒著清
來文彙八卷少後有林文殿字方舉安福人乾隆乙酉舉人宜章
教諭生平內行修飭早歲喪母值年荒竭力營葬家業蕩然父豪

於酒喜賓客文麗藉館穀供膳餼養志無闕友愛同懷弟數以所
居積畀之友教數十年講求根柢之學學者奉爲師範卒年九十
有五曾孫嘉樹由舉人官永甯知縣有賢聲

右傳李元度撰

黃體德 羅南英 蔣元紹

黃體德字芝亭湖南桂東人父清孝友樂施以貴州都勻府經歷
署獨山州苗民從化作歌頌之體德舉乾隆癸酉鄉試由主事出
爲永昌同知攝河西縣事捐置義渡改撥兵穀調襄陽同知秩滿
保薦知府卒時有羅南英桃源人乾隆辛卯舉人知中部縣勸耕
讀助昏嫁訟至立剖遠者就其地讞之擢邵武同知士民泣送者
數千人巡撫秦承恩具奏得旨嘉獎旋因病告歸卒蔣元紹字
公紱永明人以貢授常州通判調保定先是安州與新安縣民爭
地容城楊忠愍祠產十八頃亦被侵占歷官不能決元紹奉檄履
勘盡歸忠愍祠故地並勘出官淤多頃判入蓮花書院以資養士

兩造俱服署同知兼攝容城縣事俱以廉能稱

右傳李元度撰

楊芳

君諱芳字仲箴先世撫州臨川楊氏自臨川遷金谿居鷺塘里累世皆以學行爲儒而率終於諸生曾祖諱遴祖諱曰遷考諱毓洪君生幼而三世皆喪惟曾祖差晚撫教君至十歲而已君於危子孤處之中矯矯能自立一日發父遺書慨然涕泣思究學乃窮日夜治諸經悉通其義遂爲諸生雍正乙卯科乾隆癸酉科再以五經爲鄉試副榜貢生君平生手鈔五經至四五通而纂著述曰士貴於經所云行與副耳若傳注則前儒備矣故其處家盡孝弟之誠雖貧不較於財雖勞不表於眾其持身能極儉約故能介然無求而室家安之於交朋友誨弟子必以誠信士羣推其文行矣而

終屈於有司乃選瀘溪縣教諭君在瀘溪以身訓士尤以敦倫紀
惜廉恥勤職業爲極非公事未嘗謁令亦不輕受人謁士有見枉
則告於令直之其人來謝卒不允文廟敝君勸修於瀘溪瀘溪人
素重君聞君言皆應值積兩竈無薪治廟材者或束木柿以遺君
君拒不許至今瀘溪人言官於彼者曰如楊學官乃君子已君之
瀘溪年七十矣數年遂歸歸五年以乾隆五十二年十二月望卒
於里年八十未歿時以子護貴 封奉直大夫刑部主事加一級
卒後 贈中憲大夫刑部員外郎加三級夫人同縣李氏生庠生
韶繼配同縣聶氏生乾隆甲辰科進士江甯布政使護乾隆辛卯
科舉人龔皆 贈太恭人李太恭人先君卒已別葬聶太恭人君

卒後三年卒年口十口其爲人慈仁恭儉甘貧善承君志愛韶甚
於己出之子嘉慶某年月日葬君於某原聶太恭人附焉銘曰
秉義嚴飭誦經行則內行靡忒善羣而貞不忒而清君子之能德
充仕狹閭無著業光闡嗣葉有配仁厚偕歿老壽同藏茲阜

右墓誌銘姚爾撰

國事紀原卷之二

三

舒才博 向大杰 向世翼 黃思洋

舒才博字約齋湖南澁浦人乾隆癸酉選拔授湘鄉縣教諭十有三年升襄陽府教授時教匪將起言於上官請思患預防不聽及圍郡城躬率諸生助守事平致仕歸襄人士祀張文貞公祠中著有約齋詩文集約齋信手拈同邑向大杰字鯤湖廩貢生肄業國子監乾隆五十年上臨雍講學諸生圍橋觀聽例進詩賦大杰進槐陰壁流賦特邀 睿賞獲采緞白鏹之 賜歸遺其親以爲榮歲滿得宜章訓導年八十四告歸數年卒向世翼字惺庵父嵐進士知太谷縣乞養歸主講虎谿書院教育人才循循有序世翼以廩貢人監肄業報滿署龍陽縣教諭戊戌歲早辦振躬行村

戶按給口糧復勸捐設廠全活甚眾修滄浪書院以母憂去任服
闋署瀏陽訓導時瀏邑科名久歇爲改建文廟門牆及明倫堂
文昌閣由是人文日上旋署鄱縣教諭永順府教授及安福會同
桃源等學值苗匪滋事巡撫姜晟委運軍需以勞染疾歸尋選瀏
陽教諭先後在瀏十四年能得士心俸餘悉以購書年七十六卒
於任黃忠洋號柳村幼隨祖昱官湘陰教諭署有魅人多畏避思
洋獨夜持劍逐之怪遂絕乾隆六十年貴州苗叛入巡撫姜晟幕
參軍事辰沅道傅鼐困危城馳入助守禦閱七晝夜卒解其圍嘉
慶二年從總督福甯平來鳳教匪性蕭散不耐吏事數以功敘知
縣皆辭不就初由廩貢肄業國子監報滿用教職至是授桃源訓

考卒

右傳李元度撰

國朝文獻通考卷之七

三三

國朝書目表卷之二十一

三

翟灝

晴江翟先生名灝字大川後改字晴江翟氏世居汴明處士應隆始遷仁和之臨江鄉三傳至灑舍封公先生其仲子也性簡訥好讀書家素饒裕有賈業於京師封公使先生北去督之因得友當世魁儒傑士以益砥於學先生晝則與賈人子伍操奇贏握籌算凡尺度涓制質劑之屬悉經理焉入夜閉一室一燈熒然讀書不輟漏四下始寢或竟夜不寢已寢客至不得通戶懸小鉦若鈴索然客或勸之於戶外頻擊鉦弗應日禺中起復治賈人事率以爲常作爲詩文閤中肆外京師諸先達漸有知先生者吾杭鄭筠閣金江聲杭堇浦諸先生咸與定交以國學生屢試京兆不利乾隆

癸酉本省鄉試第六人明年成進士名日益起諸先達爭欲羅致出門下而先生性樸直恥以呈身博高第謝不往名列三甲中例選知縣先生曰非吾所能勝也吾木強不能取悅上官卽不以墨敗終當以不稱職罷矣投牒銓部改就教官丙子教授衢州越六年丁封公憂以歸繼丁母太孺人憂服闋需次十年補金華教授又六年以年至乞休又三年歲在戊申而先生沒生平無他嗜好壹意於書自經史外苟可資多識者靡不覽諸子之瓌論百家之瑣語山經地志之異聞荒冢破壁之奇字包孕而貫弗之下至街談巷說亦必考所由來有所得輒劄記之意或齟齬則旁參互訂穿穴以求其合自壯至老手弱翰一管譔述無倦目短視離牘纒

寸客至前不知也教人必以誠有以古書義質者如繅繭絲如決
奔泉反覆數千言不竭所著四書考異爾雅補郭湖山便覽草塘
辨利院志通俗編無不宜齋詩彙已板行於世未刻者家語發覆
周書考證山海經道常說文併經證漢書藝文補志太學石鼓補
考良山雜志龍井記略南澗理安寺志資福院志三衢可談錄玉
屑篋涉獵隨筆平泉小隱詩話桂隱百課箋歷朝著題律選無不
宜齋詩文全彙藏於家先生雖官止學博不顯於時家日落不得
比中人產然著書等身沒而不朽亦可以無憾矣夫

論曰吾杭城東北門曰良山居良山門之外同時以博通稱者有
兩人焉一爲先生其一則西林吳先生吳先生不應舉子業惟古

是耽所著歛幽錄說文理董讀古之士知好之特不若先生譔述
之勤且富耳吳先生奉釋氏教於內典尤精而先生則不信西方
聖人之說嘗自言童子時讀書塾中有僧過其門適塾師外出率
眾童子持楮往擊僧僧踉蹌走避封公見而撻之先生曰吾惡其
禿也故雖甚好書卒不喜瞿曇氏之書其不同如此嗚呼此可以
觀先生矣

右傳梁同書撰

晴江先生居良山門外楊家橋與吳西林先生居隔數里常相從
唱和家塾延吟友爲師若朱古心任石屏先後一二十年間風雅
振興東鄉號爲詩國先生博覽羣書精心攷證著湖山便覽四書

攷異爾雅補郭通俗編俱梓以行世

右碧溪詩話符葆森錄

同身...
...
...
...
...

...

茹敦和

茹敦和浙江會稽人初嗣婦翁李爲子占籍廣東乾隆十九年成進士始歸本宗原籍二十九年選直隸南樂縣知縣初下車謁文廟畢卽諮詢紳士訪求民間疾苦愼庶獄有訴者書片紙呼兩造至立剖曲直罪當笞薄責之民輒感愧自新擇鄉民清白謹愿者充社長里正朔望令畢集密陳其鄉利弊爲籍以記次第施行之南樂地故卑下當豬龍河之衝敦和尋河源委於開州清豐閒審地形高下因勢利導水不爲患以縣地多茅沙鹽鹺教以周禮土化之法廣植雜樹瘠田皆變沃壤邑人以麥稽編笠爲生率荒本業敦和勸令種桑先於縣治後圃種秧春時分給四境勒碑記

國朝名臣列傳卷三十三
以示民民獲其利三十四年調大名縣地濱漳河水患尤劇漳之
旁有梁河敦和謀開渠數百丈以殺其勢議甫定內遷大理寺左
評事不及上請履勘乃手書城門勸民興修剋期集河干親爲指
示形勢至期民具畚鍤來者以萬計敦和爲擘畫講論及旬渠遂
成民至今賴之四十一年授湖北德安府同知尋署宜昌府事弛
商船報驗之禁以便行旅旋緣事降調歸里五十六年卒入祀直
隸名宦祠所著有周易二間記大衍守傳周易證籤周易小義尙
書雜說讀春秋劄記子棻乾隆四十九年一甲一名進士官至兵
部尙書別有傳

右 國史館本傳

薛田玉

薛田玉字鳳翼江蘇無錫人乾隆十七年以大興籍領順天鄉薦
第一十九年成進士選庶吉士散館改知棗陽縣遷保定同知田
玉少有文名擅才藻嘗教授弟子同邑馮培從之游培成進士官
給事中在樞廷最久慎密謙退蕭然若韋布著有鶴半巢詩彙

右傳秦瀛撰

王廷詔

余再掌關中書院時同郡之來學者不乏才而其文俊逸不羣爲諸生所交推者韓城王杰也余因其有進取之志導以正學杰卽信而從之曰杰父教杰兄弟親師取友者意實在此時杰父濂濱君方爲浙江石門縣主簿而杰與從兄煥胞兄澈自浙歸同學於關中余遂得悉君之所以教家與所以勤於官者越數年君罷職又數年杰以選貢授藍田教諭余方謂君志未竟者樂觀其子之克繼也未幾杰匍匐來武功以君卒於乾隆十九年四月廿六日卜是年十二月十六日安葬先塋之次而乞余銘君之墓矣嗚呼惜哉君諱廷詔字鳳銜濂濱其號先世自晉洪洞遷韓爲農家父

象峯公居鄉有盛德生三子君其季也君少就外傳貧不能卒業而所誦四子書終身實得力焉嘗釋耒而歎曰吾不能以文學起家柰何令子姪仍爲農夫乎遂由營田例得任浙之杭州府中務稅課司大使盡子姪八人以行至卽延師教授而君於公務之餘亦理及舊業與其師相質辨迄今子姪八人皆彬彬然功名方盛不可量君之教家已有成效矣其爲大使也每夜分巡城中同官詭與上司遇君獨否上司皆廉知其誠器重之委署無虛日制府坦齋程公方伯楞阿張公尤倚任焉而其勞績卓卓可紀者督運黔餉撫平陽災黎二事爲最方黔之苗民騷動王師芻粟不敷上命浙省運餉二十萬程途修阻督者難其人有言於制府嵇

相國者曰非王大使不可制府遂遣之同行者墮淚別家人君毅
然前往無懼色且曰蠢茲不恭弄兵潢池中聞軍餉至當鼠竄耳
爰飭護兵如期至歷十月乃歸制府薦於朝引見准回原任
候升君之未回任也温郡太饑平陽民尤多散者制府曰此又非
王大使莫濟君歸杭行李未至署卽受檄兼程赴平陽攝縣事宜
布皇恩分廠施粥招逃亡撫之平爭訟祈甘霖禁鬻男女皆肫
肫懇懇如古循吏之用心故平陽人有十政歌君返而平陽人不
遠千餘里爭載斗持旛以送平陽之俗官有德於民者民爲斗
以懸之堂而書其歌頌之詞於旛尋
推升石門縣主簿主簿九年去之日民釀錢以餽君弗受曰吾居
官已不受而賄矣民乃以錢置酒日享君於途錢盡羣泣而別明

道先生曰一命之士存心愛物於人必有所濟其君之謂乎君生
康熙三十五年八月廿七日享年五十有九娶吳氏例封孀人生
子三長濬癸酉武舉娶郭氏次澈縣學生娶文氏次杰娶程氏孫
男三遇時業儒娶梁氏濬出乘時聘郭氏得時幼俱杰出孫女二
長濬出次澈出其後蕃衍矣銘曰

君弗窳於學也而家學之源匪君其誰開君弗顯於仕也而仕獨
殫厥才存順也沒甯也永棲幽宅任古往而今來

右墓誌銘孫景烈撰

唐伊盛 王先昇 嚴先熙 余作綬

唐伊盛字闊田湖南巴陵人乾隆丙子舉人官溆浦訓導教士不拘一格善因材指授故士多景從贊舍爲滿纂輯癸亥縣志簡潔有法並著有遇成詩文草同郡王先昇字穀賓華容人祖祚對令浙之武義多善政先昇乾隆壬午副貢其學以躬行實踐爲歸正己率物接人無少長必致敬雖盛暑不袒危坐匡居檢飭衾影朝夕侍父母旁立無惰容父母同月沒齋素三年晚官興甯教諭卒於任年七十二嚴先熙字文峯亦華容人乾隆癸卯舉人品端學博詩文有捷才居京十六載八試春闈不第挑選桂東教諭掌教濂溪書院訓士先德行後文藝卒祀桂東名宦余作綬字塔峯臨

湘人乾隆王子亞元官桑植教諭惟以實學勉人解組時捐金置
田充學中公費士人勒石明倫堂著有四書講義塔峯文集

右傳李元度撰

陳朝書

蜀地多世族自予來宰方亭卽聞涪州陳氏族大而多賢忠烈節義之槩甲榜賢書之盛尤非他族比繼聞有陳莘畚者乙丑進士今方伯方公聘主講席有陳郁度者予同年己亥舉人挑選知縣分發福建二君子尙未之識也歲辛未予以方亭書院求主講於郡伯曹公公爲言候選學博陳汝山君迨聘至詢爲郁度君之令弟莘畚君之令兄於是晨夕過從相見恨晚愈深金昆玉友之慕汝山君復出其先人 誥授奉政大夫雲南府同知荔圃公行狀示予請爲立傳予雖疏於筆墨而誼關世講不得辭遂按狀而傳之公諱朝書字右文號荔圃以乾隆丙子舉人與辛巳挑選分發

山西題補襄陵縣知縣再充鄉試同考官丁母艱服闋補雲南通
海縣知縣充庚子鄉試同考官再運京銅引 見 特恩升授同
知歷署阿迷州臨安同知充丙午鄉試內監試官丁未卒於雲南
府同知任享年六十有六先世諱友定以平賊功仕元爲平章守
福建延平府明兵入閩朱亮祖等破延平友定死之長子宗海殉
焉次子卿卿三子覺勝仕勝法勝變姓鬱奔豫及楚入蜀居涪州
是爲涪州陳氏之始四世諱常遷長壽縣明成化進士十世諱八
元由進士令江西龍泉縣長子諱新甲仕至兵部尙書次子諱新
芳進士爲江南觀察使是爲公之高祖曾祖諱集仙崇禎庚午舉
人爲湖廣荊州司馬不數月以親老告歸與妻金氏敬養備至甲

申之變土賊蠡起司馬攜家奉父母避居石砭司山中爲賊所劫不從與父俱被害金氏聞難以九歲子託於觀察之妻鄧氏令逃去突詣賊所奪賊刃殺數賊值觀察父子已死賊且眾力竭自刎死事詳長壽邑誌祖諱崑隨鄧氏逃奔成都託居尼院時平鄧氏攜詣長壽尋舊業不可得數訴於縣庭令感其事爲追理復其業以公貴 誥贈奉政大夫雲南府同知祖妣左氏 誥封宜人考諱于銘歲貢生復居於涪於是又爲涪州人 誥贈奉政大夫雲南府同知妣何氏 誥封宜人公兄弟四人兄朝詩乾隆己卯舉人歷任湖南安福縣江西貴溪縣知縣弟朝易乾隆庚午舉人任福建建陽縣知縣季弟朝禮太學生公次居仲性誠篤友愛不樂

嬉戲幼孤與兄弟苦志讀書不稍懈尤寬厚惜人廉恥弱冠應童子試資斧爲同舟人所竊眾共搜索其人窘甚公徐曰我銀乃伯兄由陸路攜去偶忘之耳止勿索眾知其意咸歎服以爲不可及後受知於督學蔣槐堂先生之門相得甚歡令隨棚閱卷由是學問益進又嘗從儲越漁先生游與何公明禮王公清遠敬公華南俱名重一時而公尤爲先生所推許釋褐後令襄陵襄故巨邑官於斯者輒獲厚貲有金襄陵之目公在任六年節儉愛士弭盜安良薄賦復以蘇民困建姑汾書院以課士延名師教之暇則親爲講論士風丕變操行剛介人無敢以私干之者而父母之聲籍籍平陽蒲坂間久而不衰尤嚴於義利從不爲子孫畱田園計居官

日每歲以百金分贍族親之貧者嗷嗷家口僅供麤糲而已初伯兄與公同赴辛巳挑選分發湖南母夫人就近迎養伯兄任所丁亥冬母卒伯兄因公累重公竭貲爲彌補計獨力扶櫬先歸營葬事不足則典質衣物以充之惟義所當爲必力爲之其他不恤也通海夷漢雜處號爲難治公察其積弊設法以除之漦價昂貴爲商少居奇之故公爲招商定值民甚賴之而商亦不困夫役之費舊皆攤派門戶里胥因緣爲奸民甚病之公捐廉設馬以免民勞惟大差徭不能不資於民力爲考定戶籍令輪流供役又設法以給夫價永除攤派里胥之患舊無書院公捐廉倡率建秀麓書院多備膏火以處邑中之秀延師親誨一如官襄陵日其興利除害

之政率類此督運京銅最爲苦差路遙灘險旣患賠累又往返動
經歲年公丙申庚子兩任其役奉委卽行會無難色日此固臣子
之分不容辭也旣而奉 旨以同知升用事出 特恩非公之所
覬望也其署阿迷州也巨盜王之棟聚黨百餘人肆行劫掠官弁
莫能制公陰察其蹤跡知其可取選健役十餘人親率之徑入其
巢之棟錯愕失措執械相持而公以轎尺遽斷其左臂遂就擒餘
黨悉平是役也大吏皆以文武奇才稱之至於馬龍州臨安同知
之任雖爲時不久而除害安良閭民間疾苦必多方撫循之不少
替自公爲雲南同知時已多病而開曹冷署益兢兢以清慎儉約
自持嘗謂諸子曰爲官存自私自利之計非上攘下奪何能如願

然貧變而卒歸貧苦者不少其以贓私敗者無論矣吾惟上可以對君父下可以見百姓示子孫吾願斯慰卒之日囊橐蕭然至回籍營葬後而子孫無以爲家計矣值兄弟皆罷官歸皆清貧無餘貲里人爲之謠曰一門三知縣頓頓喫稀飯更有一二府無錢喫豆腐蓋實錄也嘉慶丙辰公從弟庚子舉人廷璠於陝西鳳縣邸中遇一髯翁偶通姓氏遂娓娓詢公及子若孫狀舉人爲具言其實髯翁泣然大痛言吾山西平陽人未嘗得見陳公而襄邑惠政受恩無窮至今頂祝不忘公沒而子孫貧窘若此吾安得不痛髯翁蓋販賣香阜者遂分所有香阜之半強舉人爲致公之子孫以表其誠是時去公之令襄陵幾三十年何令人感之深且久若

是其至也此可以想見公之爲人矣公有丈夫子六長夔讓署福建羅源縣知縣卽予同年郁度君也次泉颺太學生次益襄以廩貢生候選儒學訓導卽方亭山長汝山君也次伊言嘉慶辛酉選拔解元乙丑進士卽莘畬君也次禹功太學生次稷田附學生皆力學敦行崇實用恪遵公遺法無忝世族焉

右傳紀大奎撰

呂轍

呂君名轍字天衢其先世家汾州祖廷弼始遷澤州之鳳臺廷弼子成章成章子黃鍾萬厯乙丑進士任山東兵備道後以死事事載明史次子應鍾贈儒林郎是爲君高祖君幼喪母年二十三父卒於津門君扶柩歸哀毀盡禮奉養大父能得其歡心與諸弟友愛無閒家事一以付其弟己無所問既壯以入貨選通判江南池州州多火災君爲經理水箕水桶械器備具救火之夫蠲資給食人咸歡躍奮往爭先火止災息清陽石埭大水漂沒民居瀰漫道路君請發粟賑給飢餓孳晝周至民氣以蘇越二年署理五河縣事縣民強暴致婦縊死獄久不決待公而平旋署池州同知明年

署廣德州廣德租稅佃人輸官田主不問故多逋負君曰富者坐擁其貲而貧民受笞督之苦何以吏爲爲陳利弊陋俗用除值皇輿南幸檄治芻餉 恩賜貂皮緞匹越二年遷判潁州多盜黑夜劫人橫行巷陌莫敢撻當君徧視履見街皆石甃下令潑水時值隆冬水凍石滑乃飭役捕樓履往偵有逐號呼盜蹙以顛次第就擒窮其黨徒民得安處明年再署壽州州民吳姓被殺野田莫知敵讐株連逮繫殆數十人君召里民畢會田間熟視一人曰彼殺人者訊之果伏又明年署滁州州有碩鼠旦夜羣行齧傷禾稼君設機法盡捕滅之未幾大水君加賑救一如其在池州乾隆二十一年監修鳳陽城正月三十日卒年四十有九君在潁州時嘗

以事抵通州又往貴州江之南北跋涉幾徧其山川都邑形勝扼
塞與戶口之繁簡風俗之淳漓能一一指陳使聞之者皆如目見
故所至以才能稱而尤爲方伯高公所重及其沒也高公尤痛惜
之君磊落不羈而負性精勤賓友滿座飲酒終日而事皆辦治與
家人書字畫皆楷正好讀書遇古人美言善行手寫成帙君之曾
祖諱大武授儒林郎祖諱端授文林郎父諱寅歲進士 贈承德
郎潁州府通判母梁氏 贈安人繼母袁氏 封安人以乾隆二
十六年三月十三日葬於鳳臺太平里之柳木溝余與君之長子
仁慶交仁慶今爲休甯巡檢爲余道其先君子之治行如此余因
次第其語俾以表其墓

國朝書成類初編

卷三十五

三

右墓表劉大樞撰

陸瓚

將求當代有道能文與顯達之士大夫爲其親誌銘之文則必有東帛之贄而後得焉燿貧不能直自述先人之行事卒葬之年月而已先人孝謹聞於鄉里信義著於朋友家貧不能自存挾策走京師求食年五十餘始以膳錄三禮館議敘補山西保德州吏目居無何又署代州吏目又署曲沃縣典史先後從仕僅八年而遽以老疾辭辭未卒歲而捐館故先人之德業未嘗少施於當世獨隸書流布天下自公卿以逮閭里遠至滇黔楚蜀燕秦三晉之閒莫不有之方先人少時事祖父有至性授室後猶俯受捶撻祖父既歿兩叔並幼先人撫使成立遺產所入悉畱以與兩叔婚娶已

又聽售已分爲資生之本而自授書鄉里給祖母兩叔暨全家朝夕以此益困憊無聊而一發之於書及爲吏又得邊境極寒苦地薪俸無多苞苴之至者峻謝不納長吏廉知其狀往往故爲索書而厚償筆墨之直緣是數年在官幸而無缺還京師後見燿出入禁省需費不支猶日染翰操觚易金錢濟燿蓋先人之於書未嘗一日少輟手摹西岳華山碑至二百餘通自書千字文稱是其他散在縑楮不計其數 本朝書家自顧云美鄭谷口以來未有若先人之勤且多者也先人初諱无咎後更諱瓚字虔實生於康熙三十二年十二月初三日以乾隆二十一年二月二十九日卒於京師邸寓是年七月燿扶柩南還卜地於東顧新阡卽祖遺之分

而爲向所售者用錢一萬六千五百僅歸四分之一十二月先舉
祖父母兩殯明年十月十五日始克葬我先人於穆位前母金朱
兩孺人祔焉而我母陳太孺人生壙亦於是定前後共用十萬錢
有奇嗚呼耀不能遽求當代之文以爲親榮又可不自述焉以流
示子孫耶是爲記

右東顧新阡記陸燿撰

164-322

164-322

程大中

拳時先生殫心稽古讀經讀史俱有發明余從李碧山太守處獲
觀全集四書逸箋 四庫已著錄詩文集外有測言兩卷尤多名
論

右松軒隨筆張維屏錄

程拳時曰史記秦子嬰降之歲書漢元年漢書去漢字殊非正始
之義且使覽者不知元年何屬○劉子駿有漢書百卷班固所作
全取劉書○諸列傳未有及書目錄者獨武侯集二十四篇十萬
四千一百一十二字蜀書詳載之○三國志荀彧傳或以憂薨明
年太祖遂爲魏公使人知操少自安者蓋憚彧而不敢爲孰謂陳

壽非良史哉

右在山堂集張維屏錄

郡縣之法周始之秦因之積漸之勢然爾○患不生於所備而生於所不備弊不生於所不防而生於所防治不壞於變法而壞於用法者膠其法事不敗於庸才而敗於負才者恃其才

右測言張維屏錄

應城程先生諱大中字季時號是庵進士著四書箋說六卷采諸書之文與四書相發明者或集註所已引而語有舛誤或集註所未發而義可參訂皆爲之箋其出處其與集註小異者則爲附錄其他書中所載四子書文與今本異者則爲附記第六卷中則專

考四書人物遺事又雜事數十條別爲雜記援摭頗極詳明其閒雖或間有疎漏以及稍涉泛濫者而大體則爲有據之言矣

右學案唐鑑輯

按程公乾隆二十二年進士官新州學正有在山堂集甲乙存案餘事集

日本書紀卷之二十一

五

吳寬

二匏吳君諱寬字祺芴因與前明匏庵先生同姓名故自號二匏
吳氏爲新安望族二匏家歛之西鄉路口世以文學著稱父早沒
祖蕙邨先生愛之尤篤八九歲時與伯兄松原共讀書卽私相唱
和蕙邨先生或見之曰此吾家中林蘭蕙也二匏性警慧母程太
宜人自稱未亡人後慘戚勞瘁無一日歡二匏方童卯卽曲體親
心恂恂若處子針線筐篋之物一一皆識其處太宜人有所索卽
持以獻太宜人嘗戲謂之曰吾有此得力閨媛尙肯令其遠嫁哉
後與松原先後入庠序著文行名歛人目之爲路口二吳蓋以比
道助附子也乾隆辛未 車駕南巡安徽學使雙公遊八府五州

風雅之士將以獻賦 行在先期麀集於姑孰使院一日課詩一日課賦一日詩賦並課嚴冬短晷筆凍指僵無不瑟縮歎咨而二吳生衣敝緼策蹇驢自新安風雪中捧檄而至一日成數十藝瑰偉奇麗舉坐皆驚雙公得之如獲異寶既獻賦兄弟皆 召試入等 賞賚甚渥雙公喜甚卽拔二匏貢成均後視學至徽郡登黃山憩問政紫霞閣招鄭布衣來方文學儻與二吳生茶話竟日二吳卽席成聯句一百韻紀其事歎人至今以爲美談丁丑春二匏再 召試 賜舉人授中書舍人官十餘年秩滿遷汀州司馬卒遺孤三人初二匏之得中書舍人也畱其妻侍養攜一妾一子一老嫗一短童入京師僦居委巷中以一驢曳破車朝夕入直內閣

歸或不能舉火則入市賃餽與家人分食終不冑有所勾貸俄
妾又生二子家累益重而二匏以思母得疾常中夜不能寐逮曙
卽入 朝迎觚棧曉光作小楷恭錄 絲綸如是累年遂嘗一日
於是請急歸省又留其妾與子侍母側隻身再赴都供職是時
上方留意雅樂頒九宮大成於樂部輔國公瑤華主人延二匏入
咸邸同校宮譜爲新樂府播之管弦一時有李嶠才子之目然二
匏思母益甚每於笙歌鼎沸之時或向隅獨歎中夜卽悲泣不自
勝枕褥盡溼旣得汀州司馬卽日束裝就道曰吾可以常侍吾母
矣造行南歸至家省母兄見妻子約到官三月後卽遣信迎養移
兄嫂妻妾子姪輩全家入閩爲聚首之樂旣至閩到官視事僅半

月而卒閩之仕者無不哀之生平樂易慈厚與人無忤官西清時以文望爲宰輔所重然持議不阿時好有不可者斷斷爭論既伸其說當軸者亦深聽之到汀郡接士民以誠雖莅官僅半月而卒後有聞之流涕者初學爲詩卽能作長短句故生平尤愛倚聲二匏卒後江東人遂無有能作綺語者

金兆燕曰二匏官中書十餘年時以不得養母爲念旣得外任仍不獲盡一日之養二匏其不瞑矣哉古人以祿不逮養爲憾如二匏者抑更可憫矣世有居顯官擁厚貲而終其身未謀一日之養者其於二匏爲何如也

右傳金兆燕撰

黃紹統

黃紹統字燕勳號翼堂廣東香山人乾隆二十四年舉人官瓊州府教授有仰山堂集

燕勳前明祭酒佐七世孫八歲而孤家貧奉母甘旨常充母卒臥靈帷三年不入內室己卯舉於鄉選石城訓導進諸生以聖賢實踐之學在任十八年擢瓊郡教授士民餞送二十餘里供帳三百餘所從來司鐸所未有也瓊有劣生被褫賄以千金求復不許復浼上官關說變色曰吾焉用是不義貲遺子孫乎卒於瓊瓊人弔唁不絕

右香山縣志張維屏錄

翼堂訓導石城學者稱仰山先生嘗自署楹帖云爲倫類中所當
行之事作天地間不可少之人其子培芳以詩名畱心經術兼工
書畫

石嶺南羣雅集張維屏錄

先生闢仰山堂進士人課之如子弟邑之老者敦禮之窮而無告
者周恤之節孝者白於上而旌之故邑人雖野夫孺子皆敬先
生如父師

右聽松廬文鈔張維屏撰

張發桃

張通判諱發桃號晉源乾隆己卯舉於鄉歷官天台黃巖知縣正河廳通判善聽斷錐結椎堅數理疑滯未嘗妄笞人初任天台決鄰縣冤獄民間有古鐵面之歌浙江之黃巖太平俱瀕海盜所出沒通判知黃巖時永嘉商舟劫於太平之洋面莫得主名一日通判忽牒召健役數十人備薪爍期二鼓俱集君坐俟堂皇至則盡率以行請所向曰東既東又命曰南遂由南疾驅七十里至所謂下梁者時蓋乾隆四十七年正月朔旦也令役分叩各賊門問何人曰拜年出則就縛之雞犬不驚而盜十八人一時並擒其一人前出者旋亦被獲乃具獄詞移太平是役也少遼緩焉則十九人

者俱以朔旦之明日落海捕魚莫可蹤跡矣蓋通判素輕重賞役捕爲盡力偵賊故能盡得其實密機事以瀆於成在官政平訟理雖窮奸發伏而尤多縱捨所去民思洗冤錄載骨傷伏匿不見者徧蒸骨而濯之由墨所滲入可證確傷通判云此不可以例胸骨胸骨卽未損獨能食墨嘗言辨一片至誠務求民隱雖積贖盈笥姦究百出善用吾術以濟之烈日嚴霜仍是和風甘雨嘗自敘次所決比爲浙案卽錄今記其二事天台縣民謝某無子有兄弟各一旣已鬪兄于甲復手書一券給弟子乙田八畝及某死甲不全給乙出某立愛手囑謂嗣父給我券後復命于我我所應得者固不止此八畝甲所嗣母舅某助乙證諸官甲益持八畝不與曰俱

僞耳凡歷數令不能決通判反覆故牘指券問乙曰此某親書耶
曰然又指後囑曰此亦某親書耶何字跡不類乃爾乙語塞通判
笑曰前券真則後囑僞矣後囑僞則前券真矣甲乙叩頭引服此
訟歷時五十三年爭繼者年各六七十七云通判莅元氏之前無名
男子見殺於縣西之陳村賊久不得君至則剋期責捕未及期而
賊賊並得通判又聞贊皇之野有舛於挺擊而尸裸者乃覆訊前
賊汝非陳村賊蓋贊皇盜耳汝昨繳陳村人皮襖騷馬乃汝以木
棍撲殺贊皇人而得者彼人之妻名控汝汝尙何說賊惶遽吐實
果如其指蓋役懼不得陳村之賊誠是盜代承通判知其不然者
陳村外者被創十餘處類數人刃棒交下而是盜則一人持一棍

也

右巴陵人物志杜貴墀撰

倪廷模

君倪姓名廷模字帝培別字春巖爲山陰倪文貞公之後遷居杭州昆仲五人君其季也生而聰敏疑疑不凡髫年入泮己卯舉人庚辰進士補安徽潛山令調桐城遷宿州牧因公落職起復補直隸保安州牧又因公落職起復補皖江懷甯令權知六安州又因公降調補黟縣令再署桐城膺卓薦實授江防同知署潁州太守滁州牧委審湖北黃梅事路染疾歸遂不起年六十有四君少時美秀性通脫不受拘閔嘗學小冠杜子夏搖蕉扇簪花游冶方領矩步者動相訾警君夷然不以爲意及作吏精廉強力桴鼓不鳴人驚以爲不可測嘗言理民如理髮也亂髮不除好髮難整孔明

爲政略無醉人故其治一以嚴爲主潛山武舉萬年青虎而冠者也君到一大創之地以甯謚桐城災一時無賴者藉荒爲名糾眾劫奪君知天甯莊梅能哲爲首擒其父子當街杖殺之羣黨解散所到處利必興弊必除潛邑無城君曰城以衛民無城則姦宄出入自如且地形若釜雨久外水灌入民游釜底矣請於大府領帑興工烈日中親執扑以行築者功成而水患除滁州向例銀鞘過境地保糾錢助費君不可曰滁鞘來往不絕地保斂民民何以堪卽發官錢馱送下站餘差盡革宿州辦公蠹役強拉民車與錢則免君乃通計各鄉車數若干編列字號挨次輪直出示曉民當直者自行赴官承應民踴躍稱便君尤長於治獄桐城義津橋有盜

案四參將屈君比捕賊捕役章標賄賊某冒充君疑之略究詰知其冤登時縱之胥吏皆失色幕友尤君君曰吾甯受處分不忍以民命爲兒戲亡何他家羣盜互相投首而此案遂明英山僧廣明姦杜某兒婦值杜撞見遂擊殺之而反誣其兒逆倫縣令不察獄已具矣君爲平反合郡歡呼君槃槃有才而宦塗乖午英山一獄天子嘉其能得正兇 特旨召見正在請咨而忽奉部文降調最後受知於孫補山相公許薦知府薦草成而補山入閣旋爲有力者所奪屢起屢墮欽寄歷落如其爲人若暗中有齟齬之者君雖作達如故而中懷鬱紆年力亦從此衰矣君赤貧初試春官賣屋以行而慷慨好施揮金帛如棄涕唾肩任前官虧項兼助其歸

不一而足桐城饑捐俸倡賑所活數萬人其他歌場酒所亂擲纏頭亦復豪宕自喜以故歷官數十年家徒壁立幸而所莅之地臨去時民皆具殷脯捫載以從嘗入都畱眷奉太夫人僑寓宿州家無旨裔私心憂之比其返也跪膝下問安太夫人扶起笑曰兒去後不料此閒童叟供給較兒菽水之奉尤覺豐盈此皆兒平日作好官之效也兒他日其始終如一哉乾隆二十九年 聖主南巡尹文端公辦攝山供張委君與商人汪楷亭曹學賓委員魏廷會莊經畬朱龍鑑等輩率其事山光水色中輪流置酒招余畱宿說鬼評羹漏盡不休嗚呼才三十年前事耳今文端公久薨諸賢零落殆盡幸存者惟余及君君又溘然先去而余年亦七十有九然

則歐陽修所謂賢豪不常聚而交游之盛爲難再其信然耶恐山
靈有知亦當泣下君善談笑能詩隨園詩話中所采甚多著四巖
備覽一書尙未付梓妻魏氏再娶余氏無子繼兄子本仁爲嗣舉
丁酉孝廉孫三人以某年某月某日葬某銘曰

漢有朱邑葬於桐鄉君能繼之兩臨茲邦善政流風迢迢相望異
世通夢盍祀其旁胡爲後人歸櫬於杭我思疇昔雪涕浪浪未憑
其棺但銘其藏音塵雖遠談諧未忘爲民之爹爲國之良風流人
家宿草亦香

右墓誌銘袁枚撰

劉煌甲 馬崧齡

劉煌甲字炳文湖南清泉人乾隆庚辰舉人選臨湘教諭升寶慶教授煌甲善屬文中歲斂華就實得力於宋儒有經師人師之目學使錢澧號嚴正遇屬吏不輕假詞色獨厚煌甲稱忘分交乞養歸截取知縣未赴選卒同郡馬崧齡字巨巖衡陽人乾隆乙卯舉人官臨武教諭靖州學正選安陸教授靖州荒遠貧士多廢學崧齡置經義齋廩而誘誨之越數年學政錢澧拔列郡優生充貢靖人爲舉首前此未有也有梁生者家貧妻父林翁富而不相能偶餉以酒肉生食之死僉以林父女謀毒之知州訊梁妻崧齡聞其哀號聲蹙然曰冤獄也請於牧以梁生故弟子員移獄先問狀躬

至梁宅周視之見竹筒皮箬中有毒蟲二取箬攪水水墨色挾肉與犬犬斃婦寃乃自截髮誓守節遣其子從學後爲諸生士習苟進多以賄干救令求高等崧齡時以正論聞於提學牧令憚之終其任學校肅然年七十六卒子倚元合浦知縣

右傳李元度撰

畢光祖 琴遇知 黃鍾才

畢光祖湖南安鄉人乾隆庚辰舉人歷醴陵衡陽教諭遷長沙府教授端方鯁直課士以通經立品爲先著禮說存餘行世同州琴遇知字希子永定人爲文奇峭凡律厯識緯方技之學無不研究由選貢授湘潭教諭食常缺乏嘗日亭午市得餽飪數枚分食僅輩晏如也無子及卒家人納其文槩棺中祀名宦時又有黃鍾才字信三靖州人乾隆乙酉拔貢官保靖教諭鎮算苗變時知縣爲某大帥檄赴行營苗眾乘虛來攻城倉卒間鄉男婦老幼數千人奔城下環呼請入營弁司筦鑰者拒之堅不啟門鍾才曰城以衛民也今置不顧雖守胡爲哉乃手啟北門盡納之一時懽聲雷動

眾志激發鍾才因於鄉人中簡獵戶善槍弩者百餘人並他丁壯分門出擊凡三日賊大創解去知縣某歸諱其功僅以輸餉微勞達於上遷黃州府教授

右傳李元度撰

左逢霖

王立恕從子本灝

駱孔侯

左逢霖字霽亭湖南湘陰人父定波和順知縣逢霖乾隆庚辰舉
人有時名以資當得知縣不就改官郴州學正每月課召諸生諭
以忠孝大義議增書院膏火復徭學改建文昌閣修復唐韓愈又
魚亭宋秦觀桃花流水亭官郴十九年擢永順府教授卒於官孫
人睿乾隆己丑舉人又邑人王立恕字方仁與逢霖同鄉舉應禮
部試不遇以經義授徒鄉里館穀稍豐卽以周族之貧乏者兄弟
五人以友愛聞後官會同教諭卒於官從子本灝乾隆辛卯舉人
龍山訓導在官有賢聲時又有駱孔侯字補山甯遠拔貢少以詩
文名任沅江教諭課士有法手輯沅江縣志與安化陶澍交好澍

贈詩有眞鑑眼如秋水淨清言膝接夜鐙多之句致仕歸主講崇
正書院造就多人著有刪餘草覆瓿錄藥山詩文集歸田漫興等
編嘉慶庚辰重游領水道光乙酉重逢拔萃科

右傳李元度撰

李涌 涂大遠 劉劭

李涌湖南瀘溪人乾隆二十五年由歲貢官永定縣教諭詞藻流
贈行有檢格諸生模式之著有蒿邨文集少後有涂大遠字澄園
永順人由選貢授常甯教諭惇厚備於行止勅勵諸生務循規格
學業淹通著作甚富劉劭字振峰辰谿人由歲貢官岳州府訓導
並委管岳陽書院以端謹率士多所造就先是劭將之任檢篋中
券遇貧難者悉焚之戒其子勿責償後劭卒有葉田二姓持金贖
券告之故稱感而去

右傳李元度撰

李文瀾

己卯之秋予奉命主山東鄉試得益都李子南澗天下才也填榜日按察沈公廷芳在座起揖賀予得人越三日南澗投刺請見與語竟日所見益奇於所聞南澗與人交有終始雖交滿天下獨喜就予在京都日相過從其歸里也每越月逾時手書必至得古書碑刻或訪一奇士必以告及出宰劇縣在七千里之外奔走瘴癘簿書填委而書問未嘗輟覩樓千百言從不假手幕客予嘗夢游南澗官齋覺而書至意甚異之殆所謂同氣相求者去歲南澗自粵西貽予書言生癱於尻甚劇自後久不得音問又數感惡夢今冬其弟文濤使來告曰吾兄以去年八月四日病癱終於官舍

遺命不作行狀以自編年譜乞先生銘其墓嗚呼南澗果死矣世
豈復有此才哉南澗諱文藻字素伯一字莛畹晚又號南澗先世
自棗強遷益都之春牛街祖元盛父遠皆以南澗貴 贈如其官
南澗天姿俊朗年十三從父游曹家亭子作一記倣赤壁賦已有
思致十五學爲詩二十一補縣學生好博覽今古不爲世俗之學
所至必交其賢豪長者旣以第二人舉鄉薦明年會試中式又明
年成進士 廷對策博瞻爲進士最以補試例不與進呈之列然
讀卷官交口歎賞無異詞久之謁選得廣東恩平縣知縣到任後
奉檄署新安縣又奏調潮陽縣知縣以海疆三年俸滿保薦擢廣
西桂林府同知未及一年而沒其居官以清白強幹稱嶺南俗多

竊牛牛皮色相似雖獲盜多不承有司無如之何南澗始至今有牛之家各於牛角印烙私記凡赴墟賣牛者身僧以印烙登簿以印付買主如告失牛先以印呈官官遣役持印驗墟簿無得隱者大府善其法下所部行之陽江民劉維邦以母病延道士作法借鄰人刀十柄縛梯上以驅祟吏索錢不遂取刀送縣誣以不軌南澗奉檄往勘廉得其實白於上官釋之未幾陽江令以它事被劾銜南澗甚遣親信僕潛至恩平欲探陰事中傷之居兩月無所得乃已潮陽民好械鬪往往殺傷多人南澗至則懸鉦於堂上有將鬪者令地保馳入城擊鉦以告立往拘治眾則散矣自是械鬪稍息縣故有東山書院延進士鄭安道爲師購經史子集數十種以

教學者潮陽與海陽揭陽俗稱三陽仕其地者多致富南澗去官之日囊橐蕭然還至番禺命工摹光孝寺貫休畫羅漢四軸以歸曰此吾廣南宦橐也性好聚書每入肆見異書輒典衣取債致之又從友朋借鈔藏弄數萬卷皆手自讐校無輓近俚俗之本於金石刻搜羅尤富所過學宮寺觀巖洞崖壁必停驂周覽有僕劉福者善椎拓攜紙墨以從有所得則盡捐之嘗乘舟出迎總督小憩南海廟命僕捐碑秉燭竟夜比曉問總督舟已過矣其詩古文皆自攄所見不傍人門戶視近代樵擬膚淺以爲大家蔑如也然口不道前輩之短以爲非盛德事過嶺後治公事日不暇給而詩益工郵亭僧院信筆畱題雖與隸皆知爲才子也生平樂道人之善

鄉先正詩文可傳者必撰次表章之元和惠定宇婺源江慎修皆素未相識訪其遺書刊行之德州梁鴻翥窮老而篤學月必誦九經一過鄉里咸目爲癡南澗一見奇之爲之延譽遂知名於世其在嶺表士子以文就質無虛日獨稱欽州馮敏昌順德胡亦常張錦芳作嶺南三子歌其獎借後進誠有味乎言之也予嘗戲論南澗有三反長身多髯赳赳如干夫長而胸有萬卷書一也生長於北海官於南海二也湛思著書欲以文學顯而世稱其政事三也嗟乎以南澗居家之孝友當官之廉幹與友之誠信固已加人一等乃其所篤嗜者文章也文人之病恆在驕與吝而南澗獨否使其得志必能使古之文士有以永其傳今之文士不致失其所而

竟不遂此吾所以爲斯世惜也悲夫悲夫南澗娶邢氏先卒繼室周氏生子三人章鄧章棉章姚俱幼女子三人銘曰

偉哉李生文中之雄兮四部七略羅心曾兮名登甲科官至五品不爲不庸兮胡爲不與石渠南臺之選以昌其文乃以能吏終兮昔裴幾原自占死期不過戊戌歲任彥升常恐不過五十果四十九而云逝嗟哉李生年壽適與同兮恆幹不可畱修名永無窮兮廣固之里宰木翳如千秋萬歲過者下馬曰才子之幽宮兮

右墓誌銘錢大昕撰

李南澗者名文藻字素伯一字菑畹先世自棗強遷益都遂爲益都人文藻天資俊朗年十三從父遠游曹家亭作記一篇傲赤壁

賦見者以爲神童二十一補邑庠生乾隆己卯中式本省舉人明年成進士久之謁選廣東恩平縣知縣三年俸滿擢桂林府同知未及一年卒居官有政績粵人至今稱之性好博覽不爲世俗之學聚書數萬卷手自讎校丹鉛不去手又好碑版文字游歷所至學宮寺觀巖崖石壁必停驂搜討有僕劉福者善椎拓攜紙墨以從有所得盡拓之又有一僕忘其名因拓摩巖刻石失足墮巖死文藻哭之慟生平樂道人善表章潛德如濟陽張處士稷若元和惠徵君定宇婺源江君慎修訪其遺書刊行之名曰貸園叢書德州梁鴻壽窮老篤學月必誦九經一過鄉里目爲癡人文藻一見奇之爲之延譽遂知名於世

右漢學師承記江藩撰

素伯窮經志古肆力於漢唐注疏升郡丞引見來京聞余有惠氏易漢學諸書至余寓舍借鈔大暑中漫膚多汗霑漬衣襟不以爲苦也嘗約其友周編修書倉取經史著述未傳於世者刻爲貸園叢書而素伯歿其後遂不能續今所傳者止十二種而已

右湖海詩傳張維屏錄

蔡璨 蕭智湖子仲信 尹學蘇

蔡璨字蘊之湖南益陽人乾隆辛巳進士歷常德衡州府教授有
文名士爭景附璨亦樂爲教育成就甚多內遷翰林院典簿不就
歸主龍溪書院久廢弛璨力爲振興從游稱盛同郡蕭智湖字石
渠湘鄉人乾隆壬午丁酉兩舉副榜第一肄業國子監以親老不
俟報滿而歸初署麻陽教諭前任樞猶在署賴其厚贖始得歸繼
署甯遠訓導作舜陵考學政錢澧極賞之後補慈利教諭解組歸
杜門課子生平篤內行事繼母如所生卒年七十有二著石渠堂
雜著一卷詩草一卷子仲信廩貢生歷官巴陵澁浦鄱縣訓導從
兄某早世撫其子女如己出族有嫠婦頻遭外侮力爲保護而勉

國朝元貞集卷之三十三
其子以正業修葺家祠倡置祭田邑溪口舊有陳烈婦墓濱河日
就圯糾集多金甃石隄以衛之尹學蘇字式三攸縣人乾隆乙卯
舉人居恆言笑不苟道貌巍然主講東山書院以先行後言勸士
得鶩湖鹿洞遺意部選衡山教諭尋解組歸

右傳李元度撰

查爲義

公姓查氏諱爲義字履方集堂其號也先世自撫州遷宛平父慕
岡公諱日乾以叔子湖南巡撫禮官四川按察使時 誥贈通議
大夫嫡母馬氏生母王氏皆 贈淑人生三子公其仲也少倣
八歲卽能作大字長益博綜經史期爲有用之學不屑屑以文藝
求進取會國家有事西陲公投筆轉餉塞上論功授安徽太平府
通判通判雖散官公獨畱心民事利弊無不言同僚莫不嚴憚鄰
郡偏災饑民過境者眾公具粟分贍各以舟護出境所活無算而
郡人亦賴以無擾時兩淮鹽法敝相國制軍尹公鹽院高公欲更
張整飭乃奏設監掣擇廉能吏司其事遂合詞舉公擢淮南儀所

通判在任八年覈虛僞絕苞苴介介然不避利害積弊以清方以治行尤異薦而適以父喪歸歸二年又持馬太淑人喪時王太淑人年亦老公念前既不克歸事父今伯兄蓮坡贈公老且病益不可兄弟二人俱辭母服官乃議儉堂中丞出從仕而自侍養於家承歡膝下凡二十餘年遂不再出問視之暇惟訓課子姪或游心於書畫所作蘭竹得趙子固文衡山意人皆珍之遇良辰美景奉板輿爲山澤之遊意恬如也及王太淑人喪公年已六十有三百首呼搶如孺子自是眠食漸減葬母五月而公逝論者謂公以經濟長才既嘗爲政浸浸通顯矣卒以養母故未竟其用多爲公惜想公之志蓋不以三公之貴易一日菽水之歡也母事終而公亦

終公志酬矣其餘豈公所計哉公生於康熙三十九年七月初二日午時卒於乾隆二十八年九月初十日戌時壽六十有四配江都杜氏繼配天津王氏皆封恭人於乾隆六十年三月十九日卯時合葬於三河縣留水渠卽墓園公塋之南阡里許公志也子三長溶太學生次田候選布政司理問皆王恭人出次杰候選吏目側室扈孺人出女四長適分水廩貢生張汾次適錢塘候選州同知郭與高次適宛平分發廣西州同知徐焯次適柏鄉國學生魏翔孫十長曾印乾隆甲辰進士候選知縣次相維一維敬榮庚棊王維京維勉孫女八曾孫一補勤曾孫女二余與公胞姪善長給事爲同年而公之孫曾印又余所取士故於其乞銘乃約述始

末而爲銘曰

經世之才可騰驤乎雲路而戢迹田園自申孺慕魂魄依棲松楸
相聚萬古青山識君子之墓

右墓誌銘紀昀撰

沈世華

溺女之風西江尤甚天津沈封翁世華官是省巡檢所至有惠政
尤禁溺女剴切申諭澆風爲之一變其後長子嶧中乾隆丙午舉
人座師爲彭文勤公元瑞次子峻乾隆甲午副榜座師爲曹文恪
公秀先孫兆澐嘉慶庚午鄉舉座師爲陳侍郎希曾丁丑進士座
師爲戴大庾相國均元凡封翁孫曾輩掇獲科第無不由江西人
暗中識拔者彰顯如此尙謂非天道歟

右紀聞陳康祺撰

國朝詩林卷之三

三

國朝耆獻類徵初編卷二百五十五補錄

僚佐七

袁文典

袁文典保山縣人乾隆丙子科舉人官廣西州學正弟文揆丁酉科拔貢議敘縣丞分發甘肅以太孺人春秋高同時請養歸搜集滇南詩文略八十餘卷授刊流布真州程雪門見之曰舉數百年之零珠碎璧合而成寶使古今人一片苦心不致埋沒凡吾輩之少知筆墨者皆宜金鑄而絲繡之

右滇繫小傳師範撰

LIBRARY

--	--	--	--	--	--	--	--	--	--

國朝耆獻類徵初編卷二百五十五補錄

僚佐七

文泰運

西浦名泰運字健齋西浦其別號又號陶廬年十九中己卯鄉試
庚辰下第畱京師辛巳再試不利歸故麻城令同邑楊夢舫永芳
工詩主西崑體處士施竹田炯詩格頗與之類夢舫時方下第竹
田游京師亦倦先後歸西浦數從游處肆力歌詠又布衣孫髯故
三原人也詩名著稱尤早記覽亦博夢舫竹田皆輕之西浦不謂
然亦數過從講論丙戌會試復不利辛卯再上又黜寓京師城南
龍泉僧寺今香山令蒙化彭南池翦長樂令丁憂同邑王宜泉運

昌南甯教諭今在告石屏羅有亭慶恩弟安甯學正今在告際叔
會恩暨予六人昕夕砥礪易衣而出故大理寺少卿曾我周立厓
先生雅重西浦折節與交楊夢舫故與立厓同學友善時將次得
官亦至寓立厓聽雨樓每佳勝輒邀西浦予及宜泉有亭亦數數
與俱歡諧沈醉竟夜達旦明年會試復見遺與大挑得二等羅氏
兄弟亦二等或爲惜之西浦怡然曰親老正使我養且得專故業
再上不猶愈於遂廢此事者乎借補南安訓導乙未復不遇戲謂
人曰吾如楊昭五有問之者亦將數馬以對矣楊昭五名啟先晉
甯人今官東川教授 朝廷恩例凡雲貴會試往來皆得乘驛自
邑之滇陽驛至兵部皇華驛凡九十有七楊故屢上不遇爲此言

自嘲也明年丁父艱歸悉以家事任仲弟率餘弟讀書恂恂皆著
時譽服闋補騰越學正丁嫡母艱起復補元江學正母老欲畱侍
不許不得已行聞艱奔歸哀毀骨立尋中喉風一夕卒年四十四
性和雅於交游若泛愛無崖岸然生平稱投分者無幾嘗從二羅
先人隴西令用璞先生受業故與有亭際叔視若同氣其次則予
此外可屈指盡矣所遺詩文若干卷藏於家子岱幼弟鍾運亦與
予善

論曰修短數也然才矣而不竟用生之亦奚益乎予年十八與西
浦同補諸生西浦猶少予一歲學使者則今侍讀學士閩葉毅庵
師也拔同邑二十七人七人入郡庠猶無恙邑庠二十人楊潮最

早死次李枚次陳再馮再馮名琦一字琢齋久困童試邑令嘗拔
置第一仍不遇祖母邑先正王永齋同產家頗有永齋遺書力學
欲追之旁及星經藥方金石篆刻窮年考究嘗教予作詩法度訖
以窮死余作詩哭之西浦取覽未嘗不悲悼竟日也豈料身亦爾
耶西浦死後祿勸教諭錢徵廬汝嘉又死再馮最刻苦徵廬曉曉
不隨人俯仰嗚呼豈易得耶豈易得耶

右小傳錢澧撰

國朝耆獻類徵初編卷二百五十六目錄

僚佐八

徐階平

汪沂

張若瀛

涂錫盛

李隆燠 劉振玉

李如用 胡源深

莫汝瀾 黃易

蔡枝華 黃昌祺 張慧田

王庭筠

張愔

夏大觀

蔡瓏

王增

毛學古

劉世棟

吳嶽 孫起 楊温 杓

姜震

嚴守田

劉台拱

危成景 從子元福

李法

陳登龍

唐永飛 鄧梅傑

俞昌言

楊于果

汪蒼霖

柯輅

高騰

蔣知康

秦鼎雲
朱旭
秦雄濤

王元勳

國朝耆獻類徵初編卷二百五十六

通奉大夫前署江西巡撫江西布政使司布政使湘陰李桓輯
僚佐八

徐階平

黔於天下最貧瘠獨遵義以橡繭利轉致四方財物稱富饒乾隆
中遵義守歷城陳君實經緯之而始其事者正安吏目嘉善徐君
也陳君有祀於遵義矣正安人以徐君始事之功久而不可沒也
相與屢籲於官請祀典今貴州巡撫善化賀公廉其實聞於朝
得旨入祀名宦州人爰相與醵金立專祠置祭田歲以君生日
率州民歌舞上壽如生時於是君之曾孫榮以其事屬新化鄧顯

鶴爲文以紀且曰曾祖官吏自然邀 國恩以從父準官御史
贈如其階願得一言以文麗牲之石按徐氏嘉善巨族世以文學
行義顯有從學平湖陸先生研經績學母沒嘔血數升夢神與藥
而蘇者君之祖也名善建有執親之喪三年不進蔬果免後不衣
裘帛郡縣以孝廉方正應徵不就者君之父也名正誼兩世皆爲
嘉善縣學生皆祀鄉賢君名階平字荀令誠篤有幹才初官江南
泰州吏目懲治里魁某甲許以自新其人感悔卒爲干夫長以才
勇稱丁內艱去服闋補貴州正安州吏目正安隸遵義遠在黔西
民不知蠶織君至物其土宜少桑獨多橡樹可繭慨然曰此百世
利也奈何棄之乃諭令家植橡而自購蠶種教飼如法繭成織紅

盛行利無算迺設肆通商而橡繭遂衣被於天下皆君始事之功也
也槩又言君至正安盜魁趙飛二跪門泣求爲良民間之則曰吾
不忍負好官也與秦州某甲事同州有古鳳書院無生徒餽資君
捐給之今州民分絲市羨金爲君祀歲以什之二入書院成君志
也歷觀古史傳所載循吏如衛颯茨充諸人教民種植桑柘麻苧
養蠶織履及杜絕姦宄修明庠序使邦俗從化而君實兼之後世
吏治不如古專城之尊視小民利害漠然如秦越人視肥瘠簿尉
以下抑無譏焉今君以吏目卑官理恤民事居官如家其惠澤入
人之深能使百餘年後之民以其姓名治蹟達於朝列在名祀
傳於無窮不其賢哉君官正安十四年以老乞休其卒也貧不能

歸喪葬於遵義之鳳凰地因家焉子五人錫圭錫鬯錫錞錫叔錫
疇其後遂分居黔楚浙其占籍遵義者爲錫鬯之子淵乾隆己
酉貴州鄉試舉人準乾隆庚子進士翰林院編修福建道監察御
史準子懋昭昭子長庚於君爲元孫實守墓奉祀事占籍善化者
爲錞湖南道州吏目錞之子濬河南候補知縣濬之子榮江西候
補知縣棠候選縣丞棻改名鳳藻道光癸卯湖南鄉試舉人於君
爲曾孫錫圭錫叔錫疇居淞江原籍圭子汝劉汝劉子大章叔子
渭疇子漢世爲嘉善縣學生類能讀書力行無媿良吏子孫蓋徐
氏之後方大矣謹按今制五品以上得立碑龜趺螭首侈示行路
御史階五品君以孫貴 贈朝議其行又應銘法於碑宜鳳藻故

從余遊以兄命將卜期造黔展墓乃敘次其世系行實俾立石於
隧道而述州人之意以爲銘銘曰

黔西之鄙地塞土瘠民不知蠶百餘年來椽蔭利興富甲西南其
利維何青桐赤榭冰蟲所甘以燠以溫僣僭緣木食數眠三分蔭
稱功繪我纊我衣被遐覃伊誰使之俾我婦子飽煖以酣有倬徐
公碩儒之孫巨孝之男官卑道崇我溫公煦我舖公含摧牙落角
鴟革鷲柄濟濟梗柑惟公之澤施及一隅百族在涵惟公之功式
闢無前於天匪貪我祖我父逮我孫子巷議街談吾儕小人坐享
美利何德以堪井鬼之野牂牁之墟公體實函作朝奕奕叢櫟古
柏高與天參神其宅此利公後嗣福我蒼黔時和歲豐挾纊鼓腹

和樂且湛

右神道碑銘鄧顯鶴撰

按徐公卒於乾隆二十九年

同治甲戌夏焯奉命來牧正安有事於秩祀承兵燹後廟宇傾圮弗完惟城西敕祀名宦前吏目諱善徐公專祠以絲業人重葺粗具堂廡拜瞻遺像肅然其可欽藹然其可親深慰景仰之私焉焯悉公事不自謁像始咸豐丁巳里居公元孫鼎若彝來受學尋相繼入邑庠尊甫瓶山先生榕粹然儒者也手公神道碑見貽碑載公政績甚著而椽蘭尤以偏隅利自公而啟衣被乎天下洎來黔癸酉鄉試徐生培森出余房薦乙亥春培森來謁知爲公守墓來孫焯乃憬然悟與公裔結香火緣薪傳廣續良非偶然遵斯

道也果推行以盡利行見化獷爲醇人勤執業若趙飛二輩稷莩
皆徙善良矣寓教於養捐廉勸士後以絲羨增古風書院餼資人
文彬彬日盛矣且也緣册成因由邇達遠遵義陳太守飭屬廣行
遂有府紉之日安平劉大令輯種橡圖說厥制加詳黔無曠土廢
民矣要莫不溯源於公至今呼徐婆蘭蓋尊之曰徐公信不若親
之曰徐婆公萃十四年心力播種種閭澤徐婆之稱肌髓淪浹於
民殆並椽蘭無終窮矣夫吏日簿尉等耳膺斯職者鮮不自諉無
尺寸之柄不過博升斗以養身家下焉者儕胥役悍然爲民之一
蠹上焉者循分靖其類碌碌無足比數更進而緝捕勤能市魁斂
跡亦復幾人安得有建不世之規興百世之利如王晉溪所謂吏

治之善不必出甲科其食報宜何如踵公後官斯土者其觀感奮發又何如也焯甫下車婺邑鄒逆擾我東境督練勦防請師會於昕夕不遑外患漸除內修是亟凡賓興榮獨志乘壇廟以次興舉爰清釐絲市羨金供祀事津書院外增設義塾祠中卽以公來孫廩庠培森司教事並礮石重鐫公神道碑銘於祠堂而州人周學博南復就志版印布茲事顛末俾後之人無忘公德而益廣其傳例得備書諸務就緒會值公誕辰士女充咽街衢忭舞祠下謳思倍曩昔云

右祠堂記彭焯撰

汪沂

君諱沂字魯濱號少齋世居休甯四都之汪村君生而慧定嶷嶷自立有踐繩之節初攻舉業念贈公錄質還吳閩倮然隻身乃投筆以從凡所料簡操其奇贏駟僧奔赴若魚龍之趨大壑贈公奇之歎曰以汝才移之治民報國不亦善乎援例得九江府同知權臨江府事當是時奉新安義兩縣民爭洲前吏不能決積牒山齊大府檄君辨治君甫往勘奸民虎而冠者糾集千人闐然蜂擁冀以脅君君曰今日往勘未分曲直汝等俯張欲爲亂耶命健役縛渠魁荷校以徇眾陰喝不能聲登時解散君持弓尺親履畝加丈鈇剖窳妄爲之區分無黨無偏兩造馨伏德化縣蘆屯羸雜界

自明... 卷之三十三
五
址不清軍民互控君鉤考欺隱曉以片言案以立定峽江蕭某身
亡族人涎產爭繼獄訟數年不決君爲處分安其遺孤大府聞之
喜曰非盤錯不顯利器我固知數大事非汪某不辦今果然矣具
疏請實授適丁母憂服闋不起有惜君才勸再出者君曰孔子稱
惟孝友于兄弟是亦爲政何必腰金紫搖干旌然後以爲光榮哉
於是里閭之間修廢舉墜凡鄉鄰疾苦田畝區瀦悉引爲己任厚
村有路爲休歎通衢山澗衝齧砂磔堙鬱春夏之交行者踈岌君
贊築石隄百餘丈糜金錢千緡工捷且固邦之氓兩袂高蹶而來
者從從然魚貫而行歎曰微汪大夫之功不及此先是臨江屬之
清江有舊隄護田久而陀陲君捐俸修葺而月告成收皆畝一鍾

君生有至性友愛尤篤諸昆先後凋謝晚年季弟洪又疾篤君在
吳聞信馳歸已不及視含殮悽愴傷懷殄瘼成疾戚誼中有來誣
諉者勿輕諾諾則必踐或有過則隱諷而曲諭之冀其改悔改後
相待如初以故僇子盭夫靡不慄然意下論者之爲東漢獨行傳
中人不是過也歿時神明不亂訓兩子如平時教以行仁履禮詢
明日期呼水盥沐而逝年七十有二 覃恩誥授奉政大夫晉階
通奉大夫三世皆 贈如君官先娶王氏卒再娶吳氏筵室方氏
子三人長曰穀次日穉早卒三日秉孫五人俱饒力學秀出班
行不愧萬石家風云

舊史氏曰南史有言山林之士能伏而不能出功名之人知進而

不知退性各有所偏也惟宏通碩士能審時度己而出處皆宜汪君槃槃大才治民獲上方有無窮之閒乃祿養事終迫然遠引家居二十餘年章聞揚和感孚遠邇明道若昧進道若退若而人者真古豪哉

右傳袁枚撰

張若瀨

張逸園君者諱若瀨字印沙曾祖兵部尙書諱秉貞祖諱茂稷考諱延瑋皆 贈左都御史延瑋三子長若漑仕至左都御史而君其季也都御史爲人端凝樸慎而君慷慨強果自其兄弟少時里人皆異之矣君始以諸生爲書館騰錄敘勞授主簿借補熱河巡檢熱河今爲承德府君仕時未設府縣以巡檢統地餘百里歲爲天子巡駐之所四方民匯居其閒君以嚴能治辦奸蠹屏除留守內監爲僧者曰于文煥君一日行道見其橫肆立呼至杖之於是熱河內府總管怒奏君擅杖近御直隸總督亦劾君一上聞之顧喜君強毅不之罪而以劾君者爲非其後爲良鄉知縣順天府

南路同知有旗民張達祖居首輔傅忠勇公門下始有地數百頃
賣之民矣久而地值數倍達祖以故值取贖搆訟經數官不敢爲
民直君至傅忠勇頗使人示意君也君告之以義必不可卒以田
歸民畿南多回民久聚爲竊盜不可勝詰君多布耳目得其巨魁
或親捕之凡半年獲盜百餘盜畏之甚乃使一回民僞來首云有
某人至其家巨盜也及捕之至卽自首某案已所爲盜有賊在京
師禮拜寺君使兵吏偕之至禮拜寺則反與鬪鬪至刑部訊以某
案事與此人無與以君爲誣良議當革職旣而 上見君名疑部
議不當 召君令軍機處覆問減君罪發甘肅以知縣用是時
上意頗嚮君然卒降黜者大臣固不助君也在甘肅二年嘗爲張

掖復營兵所奪民渠水利又以張掖黑河道屢遷所過之田爲沙
磧數百頃而歲輸糧草未除力請於總督奏除之時甘肅官相習
僞爲災荒請賑而實侵入其財自大吏皆以爲當然君獨不肯爲
其後爲者皆敗於是世益推君君引疾去甘肅里居數年會兄都
御史已進用上數願詢君狀君乃復出補直隸撫甯知縣其勤
幹如昔然君年已六十餘矣以子鴻恩爲兵部郎中受封朝議
大夫例不爲知縣遂去歸里又數年卒君居里爲園時遊之名之
曰逸園言己不得盡力爲國勞而苟逸也故人以逸園稱君
姚鼐曰余家與君世姻好君爲丈人行所謂逸園者負城西山面
郊余先世亦園址也君數飲余於是自述平生爲吏事奮髭抵掌

國朝通志卷之三十一
氣勃然誠充其志所就可量哉君在里建毓秀書院爲族人設藝
局以養貧者親姻昏喪急難每賴其施以濟君亡久矣人方思之
不能忘也然余尤偉君杖內監僧及不爲傳忠勇曲論民田事爲
有古人剛毅之風故爲著傳君能著於世矣才節遇知 天子而
仕抑屈於縣令惜哉命爲之耶抑古之道終不合於今乎君長子
鴻肇爲戶部員外郎先卒次鴻恩爲福建延平府知府次鴻磐

右家傳姚鼎撰

張若瀛文和公之族姪也以吏員任熱河巡檢 純皇帝幸灤陽
有隨侍太監某滋擾民間若瀛撫以善言太監愈咆哮乃命縛之
立加大杖數十方恪敏公時督直省大詫曰張某瘋矣立劾之

上察其情曰非太監恣行不法若瀛安敢杖之其人殊有家風誠可嘉也因游擢爲同知而遣戍其太監眞 聖主大度有異於人也

右錄宗室昭榘撰

國朝考選英在才錄

卷三十三

涂錫盛

宋初參知政事范文正公作秀才時抱先憂後樂之懷通籍貴顯與韓富歐陽齊名稱四傑推第一等人物席少時讀錢思公所爲義田記及宋史本傳未嘗不想見大儒規模宏遠非一手一足一人一家之私圖所可同年而語然迹其捐家基公諸蘇學置義田贍族二事可以窺全豹之一斑矣南昌奉新之涂氏號衣冠世族其篤於孝友睦姻任卹之六行者代不乏人若温州司馬涂公儻亦聞范文正公之風而起者乎從子大任司訓其邑郵寄所呈捐田贍學撥田贍族諸事狀傾耳聽數過歎公之好行其德見義必爲至耄老而樂善不倦有如斯也奉新古新吳地距南昌省垣陸

行百二十里其邑治枕獅山襟帶馮水邑學踞城西南青雲樓俯臨江畔增學校勝槩人文甲江右城鄉士多寒峻皆蹙然出其類非其義一介不受人憐涂公獨慕義勤思所以振拔而作興之出私產租石二百有奇贍學付司鐸者經紀其業每大比士酌贈卷資又念族人士空乏缺膏火費亦捐租百石有奇以佐族大生齒日繁庶撥產四百石有奇付族老經紀備荒歉及青黃不接時一助凡皆聰聽祖考彝訓盡其力之所得爲而不以自居觀其所呈請付託章程井井有條出有餘以繼不足而不以責報爲心且深自抑損以爲非敢效范公之舉此其真能效范公者歟矢此志也以往則以父母祖宗天地之心爲心而天下無不友之兄弟無不

和之族人無不愛之民物皆可憑此一念通之張子西銘之明分
殊而理一卽此意也人之好善誰不如我特書其事以告當代諸
君子能心涂公之心者公名錫盛字際昌號勉齋

右事狀林有席撰

Vertical text on the right side of the page, possibly a page number or title, written in a non-Latin script.

李隆堦 劉振玉

李隆堦字伯望湖南桂陽州人乾隆中入貲爲西陽州判知州以
事出當收漕米委判代監視上倉隆堦以官斗平槩倉吏胥役大
失望知州歸競言判要譽虧賦知州嘆之隆堦聞詣州請復量少
當責判代償多卽散之民知州故先浮收辭不可隆堦固請不得
已定期日開倉民間聞判以平槩取尤奔走相告語壓場觀聽幾
千人唱籌平量量滿斛輒呼譟合聲唱數之計常額外反浮出千
餘石譁笑聲如潮知州面發赤隆堦取糧冊按多少一日散還之
上官奇其才令署縣州知州政聲大起自以清直懼不合時宜尋
告歸州人送之有流涕者隆堦明風角射覆之術按察使失要囚

隆堦進見則延坐設酒手櫻桃問隆堦君知我何所問能占之乎
對曰桃者逃也於文嬰爲繫頸旁倚木重囚逃耳然不出公手五
日得矣已而如其言又有劉振玉永定人有幹才由附生捐州同
乾隆六十年苗叛振玉募鄉勇百五十名自備資糧器械從官軍
征花園累著奇功威勇侯額勒登保奏以五品官用蒙 恩賞白
金三百兩並衣帽銀牌等物嘉慶八年選四川天全州州同居三
年乞休歸

右傳李元度撰

李如用 胡源深

李如用字瑰庵湖南桂東人父敷蕃事其父茂森維謹父卒昆弟析居田宅器用獨取瘠敝者見祖祠傾圮出貲重建集族人立規訓勉以孝弟力田族人化之邑去省遠貧士無資罕與鄉試敷蕃常爲之助又捐地以瘞客死無歸者年八十餘舉鄉飲賓縣令洪鍾高其行比之薛包石奮焉如用初授麻城縣鵝籠巡檢調應山平靖關所至嚴保甲稽肆市閭里有奸無不立發盜入境必獲大府奇之時黃州岐亭多盜檄護同知篆數月捕盜略盡以父老告歸偕兩弟孝養後起廣東石灣巡檢姦宄聞風斂跡數年引疾歸子明廷貢生同邑胡源深字宗海官山東藩庫大使以親老乞歸

備其妻周事父及繼母維謹親沒源深年已六十餘猶號泣四十
九晝夜不絕學使錢澧表其閭于飛熊領鄉薦

右傳李元度撰

莫汝濤 黃易

莫汝濤字南懷號芷厓華亭人爲廷韓先生裔孫吾郡寫生家自葉雪漁童原山瞿又濤鄒春谷諸人後久已絕響芷厓骨秀思沈能合包山白陽兩家法而斟酌出之可稱後來之雋矣芷厓由繪圖館議敘分發廣西候補司首領

右墨香居畫識馮金伯撰

黃易

仁和黃松石哲嗣名易字小松工詩文精篆刻其寫山水亦得北苑巨然正法眼藏非苟作者松石沒後家徒壁立小松念舌耕不足以供事育乃習刑名學一出卽有聲幕府其在清苑也邑號繁

劇又值兵差駱驛文移鞅掌日不暇給小松能以詩筒畫筆與簿
書迭進不廢風雅居停甚器重之欽助援川運例得官山東穀城
主簿

右墨香居畫識馮金伯撰

蔡枝華 黃昌祺 張愨田

蔡枝華字橋村湖南湘潭人乾隆乙酉舉人知封川縣調感恩土
蒙奪黎人地枝華勘還之黎人悅服再補仁化邑科第久不振枝
華作而新之甲科復起遷永甯通判地多盜枝華詰姦除暴盜爲
之戢官終理猺同知子銓嘉慶丁卯舉人同邑黃昌祺字桐亭乾
隆戊子舉人授國子監學正轉助教乙未成進士外用署松桃廳
同知值苗匪不靖殫心保障民恃無恐苗平補歸化通判調魯甸
報最以督運京鉛積勞成疾卒於官張愨田號螺山年十九領乾
隆王子鄉薦初授雲南祿勸知縣時普洱猺夷爲患調署甯洱夷
匪相戒不敢入境巡撫永常稱爲邊域長城攝新興篆有武進士

馮某父子橫於鄉並繩以法臨民務以德化在祿豐諭李氏母子
在建水勸王氏兄弟並如初以平窩泥夷匪功擢中甸同知著有
秋心草吹蘆吟草龍洲述古吟

右傳李元度撰

王庭筠

先生姓王氏諱庭筠字養吾自號無黨世爲常熟人祖慶祥父永錫兩世潛德未曜先生生有異稟讀書目數行下年十八補縣學生時崇川柏太史東臯先生掌教虞山爲文章宗匠見先生文亟賞之遂游門下文益進東臯高弟先生與二山何君稱首焉乾隆三十年膺選貢入都 廷試二等就職州倅入監肄業司成朱春圃以國士目之延之課子兩試京兆不售庚寅以方略館臚錄議敘分發粵西試用委署永康州事郡守劉君檄會審命案先生反覆研鞫得其實一夕上之劉歎曰初任辦案如老吏君眞善讀書人明年春補西隆州州同分駐八達地處邊瘴漢苗雜處獷悍不

馴號稱難治先生以清勤自勵開誠布公興利除害三月苗民無梗化者委署本州事州地互九百里舊分爲六甲凡州牧莅任派甲差六人總甲一人盤踞村砦至土人長跪白事婪索不遂輒用非刑凌虐先生於入達旣革去差頭而甲差非所屬每以爲恨至是始罷去之州官出巡俗有過山錢徵索土產官吏藉以爲奸先生祇從吏役四五人攜襍被糗糧自給土酋以何首烏饋卻之攝州九月苗民懽感詫爲未有州地有馬蚌土人爭山場入達有大砦與萊英砦爭地界連年不決先生馳往皆一勘而定入達東門外有八陽渡渡夫恣爲勒索行旅苦之先生捐俸置船網給工食其弊遂絕嘗州時有吏目危某恃有夤緣貪穢不職戒之不悛

先生揭之上游多爲之地先生徑稟撫軍危褫職去而先生亦病矣明年先生病假旋里杜門七載四十年春以病瘥起復再任西隆州州同州人聞先生復至黃童白叟懽呼來迎接踵於道先生一如前昔年弊政去任後漸復者仍嚴革之先生嘗言凡今牧政令多諱盜顧一已處分而貽地方無窮之害是民賊也會八達所屬八索冷水二砦兩月中疊次報盜先生皆親勘通稟而州官及府交恨之冷水獲盜已審實屬令翻供時藩司瑞某護撫篆將以誣偏爲先生罪已定稟會新撫吳公垣至見之歎曰王倅雖有誤然可報盜是一正人也事得寢明年病又作慨然曰吾少讀陽明先生瘞旅文而悲之今奈何躬爲吏目之續耶且一倅之職惠之

及民者小而又動見齟齬鬱鬱居此甚無謂也遂復告歸不出先
後在西隆六年慈祥而精敏遠宦數千里不挈眷不攜僕從一肩
行李吏民初不知爲官也兩攝州篆不設門丁絕苞苴屏慶宴署
蒼頭一二人司爨火終日堂皇呈狀立判兩造俱近者卽時訊決
訟無淹滯初署州篆曾延幕賓自後一切謝去事出親裁而吏無
所容其奸自奉儉約有寒士所不堪者故能潔己而辦公無緦先
生之廉能當於古人中求之惜乎未竟其用也又嘗言甲差不除
西隆必反聞昔咸未信先生歸後數年西隆果有猱羅亭龍登連
激變滋事致煩征勅先生之言始驗矣先生之論文也以先正爲
宗與及門講解聲理不倦人有寸長譽之不置口有一不善而責

隨之朋儕中行止偶有不檢擯不與通故人多以怪目之先生聞之不屑也先生猶子曰家相伯兄以貧老故思棄儒業先生初任粵西歸識其有造亟命之讀書躬自教誨之越歲卽游於庠後成進士入詞館今官御史先生力也先生生於雍正七年正月某日卒於嘉慶二年七月某日年六十有九著有懷蓼堂詩文七卷制義三卷粵西從宦略一卷藏於家元配凌安人前卒子二長元晉諸生前先生一年卒次元鼎後先生卒以家相次子憲成爲元晉後先生葬踰二十年而誌石未備門人黃廷鑑謹詮次其略而銘之曰

道何以隆直則不汙位不在大誠則自孚安隆一隅昔稱獷悍鋤

奸植善德懷威憚勵之以廉濟之以明執簡御煩政平刑清卓哉
先生含章中美沈淪一倅設施止此虔山之陽琴水之濱風清道
古矯矯千春

右墓誌銘黃廷鑑撰

張俊

張俊字玉軒湖南石門人乾隆乙酉選拔官連州州判絕苞苴弭盜賊開濬溝渠故學官中日用之需止發官價慢革之會歲饑米貴舟運不通俊勸富民出穀以振餘則平價糶民賴以安署連山縣代理州篆皆有惠政連人塑像以祀著有培古閣春譙詩草
右傳李元度撰

阿育王傳卷之六 第二十五

下

夏大觀

夏大觀字繼臨號楓江湖南湘潭人乾隆三十年拔貢歷官衡州訓導岳州教授著述甚富

湘潭舊志大觀訓導衡州勸諸生日士苟廉隅不飭雖才如班馬學富淵雲不尙也在衡十六年士風爲之丕振教授岳陽一如在衡時殫心著述編摩辨證多發前人所未發所著左傳分類賦說左約箋十三經質疑識小類編洞庭湖志治生廣錄異文類摭文集詩集詩餘詞餘凡九十二卷汝懷按教授初以才顯最有時名後益劬心實學而志載九十二卷者惟洞庭湖志經華容萬年滄彈峯刊行於道光初年今說左約箋左傳分類賦二種尙有傳本

其餘未見或言教授任岳州時悉以橐本交郡中李姓而忘其名
無可蹤迹矣

右湖南文徵羅汝懷錄

按夏公又著古樂府百禽言楓江詩文集楓江詩餘楓江詞餘

蔡瓏

先生蔡氏名瓏字文舟世爲江南崇明縣人遷於崑山先生自弱冠則已補蘇州府學廩生從何義門焯張岳未景崧游以是益有聲庠序聞先生居崑山茜墩茜墩東距嘉定之安亭四十里稍北與亭林相接安亭故歸震川太僕所居而亭林者顧處士炎武生於此兩公流風遺行茜墩人往往能傳之故先生之學私淑於兩公爲多先生爲人質慤寡嗜欲教人以盡理敦誠樸躬行實踐讀書好古爲宗其輕儇巧黠者雖敏悟必以夏楚收其威望之色粹然聽其言訥然爲文古澹質實如其人自茜墩遷於青浦之珠街里從游日益眾學官弟子稍知名者皆經其指畫講授然屢試不

遇卒以歲貢生任含山縣學訓導先生在含山益以師道爲己任又聚諸生而講學焉其諄懇深至聞而警服警悟痛自刮磨湔濯者不可勝數嘗與諸生讀後漢書范式傳迴翔循誦聲哀厲至於泣下有諸生魏某在坐忽起而揖曰某與某生夙相好也以田故將訟諸縣官今聞古人行誼如此自媿且悔遽出訟牒於懷壞之其至誠感發人多此類也先生曾祖某祖鈴皆不仕父廷傑某縣學生配孺人張氏子一照新陽縣學生女一適崑山縣學生郁郁文先生在含山五年教大行以年老告歸歸六年乾隆丙戌三月初九日未時病卒於珠街里距生於康熙乙丑某月某日年八十有一蓋自先生歿而東南敦龐耆碩之士盡矣是年十一月照奉

其柩寔於長洲縣之觀音山祖塋南若干步以予受業於先生久知先生行事爲詳使銘以刻諸幽銘曰

伊古勸學必以道俱輦輓其文儒術乃淪維此歸顧百世之模述其微言遏頑訂愚弗耀而窮云何其吁先生之教在誠中孚我作銘辭敢失以誣

右墓誌銘王昶撰

先生臨終爲文以戒其子有云虛文無益末俗不經俱應捐除毋嫌駭聽儻旁觀未喻以爲子道有虧可取遺命示之先生此言實堪取法近時喪禮專尙繁文以侈費相高以美觀爲孝世俗之見難以破除惟賴有德望之君子以身作則爲鄉里先庶幾崇實黜

浮不至流而日甚耳

右松心日錄張維屏撰

王增

先生諱增字儉庵昌平人以歲貢生官天津府訓導年四十有六卒於官其卒也天津之人哭而思之謂先生勞其身以惠我以至於病且死也天津故瀕海潮汐之至畢達於隍城之南爲水門以導其入瀦爲大池環數百丈城內街衢綿互下皆有溝日受汗潦曲折與大池通潮退水落溝之汗潦悉注於池以順流而出其來則清波泛虛人得挹注以爲利歲旣久溝湮池平廢墜莫舉歲丙戌先生請於當事議興工決渠先是先生莅天津謁先師廟視棟宇傾圮卽倡輸工作郡人從之閱歲竣事縣學頽落鳩工葺之復告竣樂舞久廢先生令子家實詣太學傳寫樂章於是修整樂

器招秀民習樂舞請於學政定樂舞籍又請以公儲銀五百兩歲
收其息爲習樂費壬午大水賑饑經理粥廠癸未旱奉檄捕蝗撲
除略盡以故當事夙知先生賢且才其所陳必爲民生計甚便且
任之必克戴事遂如所請行之經始也爲濬溝櫛疏而甯通之費
以甃乃濬大池視舊窪過十幾尺水汨汨來汪洋澹蕩魚鳥翔泳
忽若天造池之外爲閘以司啟閉海水於是出納焉是役也淤泥
糞穢積壅道路熱暑薰灼鬱爲氛厲先生觸熱往來其閒者數月
遂病病猶不自恤勞苦如故遂至不起先生行誼敦茂卓達諸兄
歿婚嫁子女凡二十有三人昌平之有書院也自先生勸之延名
下士爲之長率後進肄業其中旣爲學官訓迪諸生有師法丙戌

舉計典大吏以先生名列薦牘而先生死矣先生七試於鄉不得
舉子家賓與余同年成進士官內閣中書家慶乙酉副榜貢生
史氏曰乾隆丁亥之歲 天子巡幸天津 臨視河澱各隄牘
親授疏濬囊剔之制役作旣興守土之吏逮乎丞倅下僚奔走趨
事以勞得敘進者不可勝紀使先生在必能效其才於是時而可
以受 主知矣惜乎其死也嗚呼孰謂冷官不足以見人之才也
哉

右傳沈初撰

國朝詩人集卷之六

三

毛學古

國家以經藝取士設提督學政歲科兩試拔其尤入府州縣學爲
府州縣學附生又拔其尤予以食餼爲廩膳生三年大比中格者
隨解牒上之禮部不中格者絀焉幸而倣古三舍法餼久而給以
歲貢又久而官以教職早者三四十年遲者五六年又其中天
札疵癘老病窮餓以死者比比其及貢者十無七八得官者十無
二三焉幸而歲貢且得官計其年皆中壽以上偃偻聾瞶涕洟垂
胸爲人所厭棄不者苟且貪戀與生徒較執贄同官爭錐末大府
以不甚愛惜之間曹置之爲糾劾所不及而學校乃大不可爲嗚
呼可哀也已惟故靖州訓導毛府君則不然府君諱學古字經三

號松鄰世爲新化望族新之人能以文學禮法世其家者必稱毛氏祖自成有至性割股療母病雍正間旌表孝子父大鶴康熙辛卯舉人善化教諭舉丈夫子六人府君其五也生而英偉好學爲文思力沈鷲俗流莫能識也是時甯鄉王先生文清以經學名與修三禮爲一時經師府君以通家子從之遊稱高足弟子與長沙郭峻昆甫衡山曠敏本岫嶺齊名湖以南稱能文者率首舉三君府君旣以文名湖湘遇大比典湖南試者思得君以自重卒之十四舉不第乾隆己丑年六十循例歲貢又二十六年乙卯選授靖州訓導至是年且八十有六矣靖州界湖南陞俗鄙儉府君至日與諸生講說經義立課程束脩非禮不以入有武生某以武斷

被訐學正茶陵譚君聲元將出之君請於刺史魯公嚴繩以法魯
公曰繩之且不利於君君厲聲曰官可去法不可散也會其人死
得免始君之至咸謂老病可狎至是羣嚴憚之云居靖州三載乞
歸家居又七載卒年九十六歲寶嘉慶乙丑十一月日卽以其年
月日祔葬於原周嶺之先塋禮也府君至孝父死以鄉試未及視
含終身哀痛歲時生忌號泣不食老而彌篤教諭君遺書滿篋府
君緘鏞甚固每一開讀流涕被面性嚴厲難犯官靖州時冬至朝
賀故事朝罷宴坐主者坐學正於刺史之次而訓導與吏目列坐
於下府君執會典抗爭曰 朝廷以訓導貳學正未聞以訓導貳
吏目今同等別尊非法某不敢坐眾錯愕莫能對刺史起執府君

手曰今而後知毛訓導也其峭直敢爭如此讀書喜博覽尤精岐黃術年九十能鐙下作楷書終日危坐行立不倚府君以故家名德老成碩望自其幼侍教諭君側及見海內耆宿所與遊皆當時名士博聞殫見文章風義爲後進矜式自府君歿鄉賢文獻無復存者士大夫咸悼惜之云配曾孺人先府君八年卒子一人萬翔病癉女四人其季妾某氏出孫太和殤遂無嗣以其弟六府君之孫家煒嗣著有松鄰堂經義刊行府君歿後十年其外孫同邑鄧顯鶴奉母命志其墓未成而顯鶴連遭大喪追悼所出五情屠割大懼哀痛餘生奄忽漸沒無以終先孺人之志又三年己卯新免於喪延及視息乃敘次而系以銘將以遺家煒使刻石而納之壙

中銘曰

設官教士抗顏爲師師實不學何以教之奕奕毛公望崇位卑公
曰匪卑師道在茲有不率教之四夷人亦有言太剛則折哀哉
中郎典型中絕惟余小子實公所出匪惟出之左右提挈內外家
風門祚單子永懷生我哀哀罔極悲風颯號寒泉嗚咽刻此貞珉
以表銜恤高谷深陵茲石不泐

右墓誌銘邗顯鶴撰

劉世棟

君姓劉氏諱世棟字若木始祖汝材爲明僉都御史自南昌遷漢川遂世爲湖北漢川縣人祖之定考岳 贈中憲大夫奉天府治中加二級祖妣左氏張氏妣唐氏恭人君中式乾隆三十五年本省舉人四十六年大挑一等引 見以知縣用分發河南初署息縣事息於光州諸屬縣最稱難治君開誠待之數月無鬪殺劫盜之獄未幾補商水值歲饑君振貸有法全活甚眾凡官商水八年以卓異積俸推升貴州正安知州正安在萬山中苗民雜居不可化導戚族多泥君行君不可則遣妻子歸獨身之官南大呂者方聚眾抄掠至數千人結砦自固聞有兵役過其地輒支解之君既

上事卽求得大呂謀主某諭以禍福某感泣請擒大呂自效數日
得之論治如律羣苗驚疑有神助君乃稍稍因其俗爲定婚嫁喪
祭之儀又日進其耆老秀士從容爲言年穀順成室家相保之樂
而刑罰死喪之可畏使各歸讀法於鄉期年正安大治由正安調
黃平前後十五年再以積俸推升奉天府治中治中秩滿又推升
山東濱樂運同運同事益簡始得讀書屬文招賓客譚讌爲樂而
君年已七十五矣 國家承平日久上自宰執卿貳下逮庶司百
職事操圓循規引方合矩無可自表異而守令之賢者務與民休
息安於久任以躁進爲恥故其中較論資格馴致通顯固不乏人
而位不稱其才才不竟其用者卽亦往往而有如君者假令處方

岳之任其設於。止於此而終身未嘗一膺特擢爲可惜也雖然君惟不盡其才而君之所養乃愈可見矣君在山東四年致仕君孫珊已官江南天長知縣君來就養卒於署舍時嘉慶二十年十二月十八日也春秋七十有八配蒸人陳氏生丈夫子四修章修程修憲修式修程官江南金壇縣丞先君卒女子子一人壻曰陳儒書孫六人長卽珊修程子嘉慶十六年進士今官合肥知縣曾孫一人君生有夙慧五歲背誦王勃滕王閣序終篇不遺一字旣長旁通天文推步。殷之學以至內經本草靡不究心故生平好爲人治疾官事旣畢按脈定方日進百數而君不倦此又前古循吏所未嘗有者也君旣葬之五年繼輅始與珊定交辱以墓石之

國朝文獻通考卷三百三十一
文爲請冊文采治行爲當事所指數宜有開其先者及觀於君乃
益信因掇其事之大者著之篇其他撫字聽斷之勤具於狀者弗
勝書也銘曰

中丞之選十一世逮君之身始祿仕益厚其培植其根昌君門者
君之孫佳城鬱鬱漢水濱五百年後訊此文

右墓碑銘陸繼輅撰

吳嶽 孫起柎 楊溫

吳嶽字喬松湖南新化人乾隆庚寅舉人主司亟稱嶽究心漢學人尤古樸官湘潭教諭不責諸生束脩而遇事無少假借大爲潭人所服學使范鼈將薦諸朝嶽自以剛直難諧且年老固辭年六十九卒於任同邑孫起柎字蘅臯乾隆甲午優貢歷任善化訓導湖北潛江教諭有經訓堂詩集無錫秦滅序之稱其孕古轍今古色斑斕如覩商周鼎彝而沈涵浸灌鏗鏘鼓舞自成一家言所以推許者至矣起柎嘗省其兄起棟於山海關倡和成帙時以方之坡頴楊溫字玉泉乾隆丙午舉人官益陽教諭遷武昌府教授溫有學有守在益陽有因事陷以重金者溫斥之以是爲大吏所

重遷武昌課士如法居三年屢乞歸大府強畱不許歸後七年卒
時道光丁未春也先是丙午秋溫當重赴鹿鳴大府望其來將聞
諸朝而溫以病辭不赴

右傳李元度撰

姜震

君諱震字念劬號野鶴姓姜氏世家萊陽遠祖淮以禦寇功拜懷遠將軍高祖瀉里邑諸生萊陽破守城死幼子暨三子婦一女皆殉節事聞贈光祿寺卿諭祭葬諡忠肅會祖塚禮科給事中建言廷杖謫戍宣州衛國亡流寓吳門遺命葬敬亭山下門人私謚貞毅二子長安節居宣城守邱墓次寶節隱於藝圃卽君祖也居吳守祠虎邱有二姜先生祠吳人以祀貞毅及弟行人塚也父本仔廩貢生以君貴 贈儒林郎君三歲失母哀號擗踊如成人及長力學受業長洲何焯學者稱義門先生者是也親經指授文有家法弱冠占金山衛籍爲博士弟子旋改萊陽繼貞毅不忘故鄉之

志一試卽冠其曹餼其米廩循例入太學應京兆試僂得復失以能書錄入一統志館書成議敘州同非本志也筮仕廣西太平府之思州思州南界銅村爲交人入貢孔道君豐其贍給而徭民無供頓之擾夷情丕變一洗其跳刀走戟之習逮遷秩攀轅泣送走數十里不絕前後攝思陵上思二州事思陵訟案塵積蛇蟠蚓結不可爬梳色聽辭聽君以一月了之上思有客於他省同里某知其金多僞約俱歸戕之於中途投其尸於水子訟於官但云父爲人所殺而不得主名君偵知某故市井無賴歸自遠方驟至千金驗其年月與死者歸時合令人以好語致之旣至君熟視之曰此殺人賊也某目動色變嚴詰之遂吐實竟置於法一境以爲神君

郡守白其事於上官將列薦剡適部推山西朔平府通守遂寢朔平治甯遠鎮旗民雜處繁劇號難治君壹以忠信慈惠臨之不恃几案之才氓庶傾心吏胥斂手學優則仕之效也會裁缺改銓湖北施南檄修江防親行相度帑節而工固心計精詳是時君年已七十餘矣移疾請告大府雅相器重固畱不得遂歸亡何長嗣不祿次子晟官比部迎養京師惓惓先人祠墓不數月卽旋里越明年飾巾待期考終牖下春秋八十有二時乾隆三十五年十二月六日也娶畢氏 封安人有淑行君在京師而贈公棄養附於身者勿之有悔赤手搯拄使君無終天之恨慮姜氏之在吳者嗣續不廣爲君多置妾侍其識大體若此乾隆十有九年二月十九日

疾終上思官廨子三人世昌元和縣附監生晟乾隆丙戌進士刑部江西司郎中世旭則側室王氏出也女三人王友信陸興祖何福綏其壻也孫三人宗發宗達宗魯孫女四人曾孫一人紹烈君天性純摯承貞毅之風篤門內之治贈公歿遺有幼子飲食教誨以至授室視己子有加語畢安人曰吾甯薄於子弟不可不厚也女弟適申文定公元孫隨任雲南而卒不克歸葬募人行萬里遞其棺以歸萊陽有田數十頃貞毅所遺爲君應得之產君歸籍族人以其田來歸君勿受仍推爲祭田宦歸盡出俸金以修祠墓卹族黨之貧乏者居甥館畢氏匱具甚盛外家中落以服珥悉歸之俾外舅適反浙西故里有三喪未舉春秋窀穸之事旣固且安皆

君力也。晟將以某年月日耐葬君夫婦於長洲縣九都制字圩祖塋之次來杭乞銘。安人本錢塘邵氏。父楷。諸生。少鞠於舅氏。愛踰已出。不忍忘也。故氏畢銘曰。

君所承者忠盡丕基。逮君而顯。將大厥施。一經相嬗。仕非華資。操刀使割。疑獄斧斯。優游半刺。迫於崦嵫。嘉偶作述。淑慎爾儀。齊牢合食。同穴奚疑。武邱之陽。松檟蔚而貞石。佺佺埋幽。有辭謂我。惇史言絕。讐欺石有時。泐銘不可移。

右墓誌銘杭世駿撰

明有直諫之臣曰萊陽姜先生。採以言事。指權貴。觸怒瀕死。國亡前一月始謫戍宣州。滯寓吳門。以卒。終葬戍所。子孫或爲宣城人。

或爲吳人先生生實節實節生本仔本仔生贈榮祿公公諱震字
念劬號野鶴少受業何義門之門補金山衛學生員歸籍萊陽食
餼援貢太學與修 大清一統志成議敘得廣西太平府思州同
知在任十年徭人愛之攝思陵上思二州知州事治案牘精勤上
思某甲出賈歸爲人戕於水莫知殺者誰也久不決公下車廉無
賴乙是年自他挾千金歸好語致之一見曰此殺人賊目動色變
遂吐實尋晉遷山西朔平府通判分治甯遠鎮如劇縣事立辦旋
以裁缺再任施南治江防有功年及格致仕歸公女弟適申氏隨
夫任雲南卒公萬里歸其喪萊陽先生遺產在故里公歸族人返
具田公推爲祭產蓋其細行猶急名義輕財如此公生於某年月

日卒於某年月日壽八十有二 贈如子官所著有紅鷺館詩鈔
六松軒制藝若干卷配 贈一品夫人畢氏浙江錢塘縣某人女
生富族器具甚豐及外家落乃悉返之故能佐公爲廉吏以某年
月日卒於思州官舍距生某年月日壽六十有一時子晟方困諸
生洎公卒晟官刑部郎中浸通顯越十有五年晟爲刑部左侍郎
始陳情乞假歸葬荷 上恩允光榮誠信備禮有加以某年月日
奉公及夫人合葬於某山首某趾某子三人長世昌先卒次卽晟
次某孫六人瑞與晟同官二十年讀明史知公先世事屢持吳門
使節裴衷二姜先生祠下故爲之銘曰
方先生以直言繫獄夜半禁中出片紙幾死桎梏父闔門殉難乞

歸葬不得何其酷也公雖未大顯隨地能自表暴及侍郎乃以治
刑爲聖世卿貳保世滋大蓋公慶之篤也易曰天地閉賢人隱
詩曰王國克生惟周之禎夫豈惟一家抑時各有所屬也
帝鑒烏私 允臣贖若堂者阡後致福我作銘詞無溢惡

右墓誌銘彭元瑞撰

跋守田

君諱守田字穀園杭州仁和嚴氏祖諱士奇 贈奉政大夫考諱立功爲虞城主簿 封奉政大夫君少遊濟南寄籍運學爲諸生遂中乾隆辛卯科山東鄉試舉人乾隆四十六年挑發廣東知縣初任陽江縣未至境有迎吏來與君語少習見君囊橐貧甚誘君以利君問何以取利吏曰邑有賣漿者毆人死而多引富室繫數十人矣君至咸脅以罪千金立致也君曰諾至縣日卽坐堂上出所冤繫囚盡縱之去獨畱一囚訊之囚卽服罪賣漿者也迎吏捧牘在側捽下痛杖黜之是時方傾市來觀上新令見君治此吏謹呼動地君名聲一日大起調仁化與巡撫孫公士毅爭獄君詞厲

孫公變色既而卒從君議更以重君遂調之番禺凡獄事多委君以母憂去官服闋再赴廣東補順德知縣治海盜有績屢辨難獄又調南海番禺南海皆大府治所君兩莅之人見其意思如暇然而政無不盡是時孫公擢爲總督率兵出關討安南之亂公故奇君才檄之從軍及市珠江之捷敘功入奏 賜孔雀翎五品頂帶君才益見端緒矣既而與孫公偕返孫公內 召嘉勇公福康安代其任福公亦重君才君議論其前必盡福公常聽其說於事多便乃保題君引見 命記名知府而發江南以同知用在江南三年屢委署未及真授而遭父憂歸其署淮安知府時值旗丁以各縣助之費少爲詞數百人大譟淮上漕使之門君往召眾前使訴

其意君徐曰助費在州縣今爲爾白漕使飭下道道下州縣取費至則汝候久矣不亦病乎眾曰然君曰是誠非吾職然吾當爲公濟汝以私財汝等張驅疾行可矣於是命之次第發而稍資給之竟無事江淮人咸稱頌君有定亂才君既歸數年竟不復仕於嘉慶四年四月十日卒於里年五十有二君文章無不能而奏牘尤善通曉兵事便騎射爲舉人時偕人遊塞上與侍衛武人共譙飲角射君最後發三矢中的如一武人大愕沮屈君從容就坐題詩便面而去其在孫公軍中誠欲盡其謀以其立功於域外不幸值阮氏之變軍潰功不就然古人始敗而卒建大功如孟明之類史冊多有其後孫公猶被眷遇卒收庸蜀桑榆之效而君竟不復

國朝典章考卷之五十三
試千軍旅矣世孰由知其才之異也君在江南時嘗一來訪余與
言果明決異士其後余至杭州又遇君而君無意用世亦旋歿矣
娶莊宜人君在江南時宜人卒生病及兩女側室范氏生煥亦兩
女胡氏生燾吳氏生照某年月日葬君於杭州天馬山祖塋之側
莊宜人耐銘曰

既多文又秉武臨溟海江淮澣鋤黠猾柔強禦意超遠爲國撫萬
里駕中乖阻鬱餘能紀可睹勒堅石慰終古

右墓誌銘姚爾撰

劉台拱

劉先生諱台拱字端臨其先世由江南蘇州遷揚州寶應六世祖永澄萬厯辛丑進士與高忠憲顧端文劉忠端諸公講學東林會祖中從康熙戊子舉人石埭縣教諭祖家昇甲午副貢父世蕃貢生靖江縣訓導靖江君五子先生居長先生幼不好戲六歲母朱安人歿哀毀如成人旣而事繼母鍾安人亦盡孝入家塾終日端坐未嘗離席獨處一室亦必以正九歲作顏子贊十歲心慕理學嘗於其居設宋五子位朝夕禮之出入里閭目不旁睽時有小朱子之日年十五從同里王君雒師學及見王子中朱止泉兩先生書遂篤志程朱之學十六補縣學生二十一中式舉人試禮部大

興朱文正公時以翰林分校得先生經義用古注識爲積學之士
亟呈薦已中式矣以次藝偶疵被放文正惜之終其身是時朝
廷開四庫館海內方聞綴學之士雲集先生所交游自大興朱學
士筠歛程編修晉芳外休甯戴庶常震餘姚邵學士晉涵同郡任
御史大椿王給事念孫並爲昆弟交稽經攷古旦夕講論先生齒
最少每發一議諸老先生莫不折服先生之學自天文律呂六書
九數聲韻等事靡不貫洽諸經中於三禮尤精研之不爲虛詞穿
鑿故能發先儒所未發當世儒者撰書多采其說乾隆五十年授
丹徒縣訓導先生勤於職月必攷課其教以敦行立品爲先而能
以身示之嘗謂校官不常接士子則術業無由聞知故諸生以時

進見者必以廉恥氣節爲敦勉暇則誦習古訓親爲講畫境內饑
大吏以賑事委先生先生慨然曰校官無事可自效於國此我職
也乃親歷窮巷俾胥吏無侵刻一邑感之生平無嗜好唯聚書數
萬卷及金石文字而已齋鹽淡泊晏如也先生慎於接物尤廉於
取交游如段茂堂王懷祖汪容甫諸先生尤莫逆朱學士曰劉君
大賢也豈獨學問過人邵學士曰予游京師交友中淵通靜遠造
次必儒者端臨一人而已汪容甫曰吾心折劉君者劉君欲吾養
德性而無騁乎血氣此吾所以服也靖江君疾先生辭官歸日侍
湯藥晝夜不倦及靖江君鍾安人相繼卒先生水漿不入口出就
外寢蔬食五年之久青浦王侍郎昶以爲有曾閔之孝歲時祭祀

國朝文獻通考卷之三百三十一
齋戒哭泣戚戚者數日居家教諸弟雖嚴然怡怡和悅人皆歎羨
之宗族有少孤不能讀書及困苦不能自振者皆賙給之先生德
盛禮恭人有所長必誘掖之使進若有短則絕口不言但勸勉之
使自媿悔終身無疾言遽色故其爲校官也上官待以殊禮至於
頑夫驕子對之無不抑然自下體素虛疊遭大故益衰弱嘉慶十
年五月二十二日以疾卒距生於乾隆十六年閏五月初二日年
五十有五娶山陽曹氏無子妾夏氏生子二源岷源嶠源岷早卒
女三長適余長子常生二品廕生次字溧陽史氏殤次幼許字同
邑增貢生朱聯奎子仕祿所著文集及論語駢枝荀子補注漢學
拾遺儀禮補注經傳小記惟彙多零落廬輯成七卷淮南子定本

諸書亦未卒業先生葬於寶應某某之原同鄉儒者皆欲列事實請祀鄉賢祠元與先生友學最深且爲姻家乃紀其學行揭於阡

右墓表阮元撰

劉台拱字端臨先世自蘇州遷居寶應父世蕃官靖江縣訓導君生而岐嶷不好弄就塾讀書不離几席九歲作顏子頌斐然成章觀者稱爲神童年十六爲邑庠生二十一中乾隆三十六年辛卯科舉人屢試禮部不第銓授丹徒縣訓導君少失恃事繼母鍾如母丹徒去寶應三百里每年必迎二親至學署奉養無缺得親歡心體夙清羸骨遺大故飯蔬食淡哀毀過情臥病不起卒年五十五有五君六世祖永澄問學於鼓山以躬行實踐爲主子孫世傳其

學至君又習聞王子中朱止泉之緒論深研程朱之學以聖賢之
道自繩然與人游處未嘗一字及道學也君學問淹通尤窳於經
解經專主訓詁一本漢學不雜以宋儒之說著有論語駢枝一卷
荀子補注一卷漢學拾遺一卷經傳小記三卷古文集一卷君勤
於讀書嫻於著述不似今人鹵莽成書動輒盈尺也

右漢學師承記江藩撰

危成景 從子元福

危成景字照樞一字龍洲湖南黔陽人孝子階四世孫乾隆中由廩貢任零陵縣教諭遷湖北黃州府教授歷官二十餘年勤於課士素尙節義前攝黔陽令宋溶有隱惠於民數月去任成景未之晤也既五年宋令祁陽以事繫獄虧帑千金無敢過問者成景聞馳送金五百更約同志一夕足成宋訝所自曰吾以抒黔士民之深愛志去思耳居恆教子弟云爾等居心薄故見有不好人吾居心厚故不見有不好人粹然長者之言卒年七十有七著有沅湘偶得吟不欲行世宋溶爲作義士傳姪元福字用九乾隆庚子舉人主龍標書院十一年教以篤行爲先窮經爲本邑多通儒自此

益盛己酉纂修黔陽縣志及與修郡志皆簡潔有法爲人坦白獎
勵寒畯如不及乙亥投華容教諭尋兼書院從遊如雲及歸邑人
士謳思不忘年七十五終著有浙溪詩文集子有懿增生克讀父
書著有小西山樵詩集

右傳易變堯撰

按危公乾隆三十
七年任零陵教諭

李法

往于未第時蓋肄業關中書院云則制府相國尹文端公撫軍相
國陳文恭公督學洗馬官清溪先生皆名德碩儒相與致敬盡禮
尊師重道故其時主講席者爲我武功太史孫酉峯先生研精覃
思遂入理窟一時受業者計數十百人其最著則大荔李法維則
雒南薛宁廷退思武威孫備仲山華陰李汝榛仲山華州王士棻
蘭圃韓城王杰偉人咸甯邵麟趾仁履臨潼王巡泰岱宗綏德張
崧雄五沔縣嚴慶雲靄如乾州馬友蘭素天楊橋漢升扶風馬用
觀容若姪廷樞安石後又有綏德張秉愚葆靈秉謙益亭榆林葉
蘭湘佩姪玉樹德潤皆一時英儁奇傑之士相與講明經術攻制

義論策詩賦雜文皆有可觀先是丁卯鄉試予與維則俱以載記同受知同考官富平令遷興安州牧李公世垣俱不售至是聚首雅相知也自時厥後退思由庶吉士官編修蘭圃由庶吉士歷官刑部郎中提學貴州偉人由修撰累遷刑部侍郎葆靈由庶吉士官編修轉四川道監察御史湘佩由中正榜爲內閣中書舍人餘皆由進士鄉舉爲州邑牧令官獨維則僅由歲貢生選授狄道州學訓導訓導數年年且七十猶閒關數千里赴西安應布政司試辛卯八月予以外艱除服北上謁銓部晤維則西安逆旅鬢鬢幡然然精力殊健予曰老當益壯固君謂哉維則自以不預科名憾甚輒太息至泣下予期以必售爲慰藉者久之因勾其文表先君

墓道而維則亦屬子序其所刻南槐詩集各皆允諾遂別去乃無
何秋聞報罷又明年維則卒矣生康熙壬午某月日卒乾隆癸巳
某月日其子某以是年月日歸葬大荔維則文學馬遜詩似太白
自餘不屑也爲諸生時清溪先生於眾中獨指目爲天下士願終
老不獲一第至齋志以歿悲夫所著有南槐詩集文集及制義若
干卷其所爲康對山救李空同論擬修杜工部祠堂記等篇激昂
忼慷意興勃發論議層出俯仰情深西峯先生每歎賞不置尤膾
炙人口云

右墓表張洲撰

陳登龍

陳登龍字壽朋號秋坪其先金陵人也明季始遷閩中高祖丹赤舉順治十年鄉試歷官浙江溫處道耿逆變殉難諡忠毅曾祖一夔以難廢授夔州知府登龍七歲而孤母黃氏食貧以剪綵爲生撫登龍與一弟二妹以立登龍勤苦力學博涉典籍爲文宏富尤長於詩古文辭旁及琴棋書畫年二十六補縣諸生乾隆三十九年舉於鄉累上公車未第大挑一等分發四川試用知縣署天全州卽前大金川地也歸化新未立學生徒附雅州登龍捐廉俸請於大府奏准設學每試八名移蘆山縣學訓導改設於此搨文廟建和川書院以訓士子豪奪孀婦田登龍勘斷明確豪不能欺歸

田於婦囚袁某處決子穉無所歸登龍收養之終其身人稱陳青
天立生祠祀之學使歲試文童場弊覺付提調治之登龍歛歛不
忍察其悔也白學使竟釋之既是童科試入學尋登賢書膺民社
矣四川邪教滋事總督勒保雅好文翰或薦登龍登龍慮殺人僥
功卻之嘉慶元年嚴難蔭世襲恩騎尉登龍以從弟登爵未成名
讓之調青神縣委署裏塘同知裏塘本古三危地卽唐之吐蕃也
地甚寒不生五穀人多剽悍設土司以領之歲時來賀性多欲登
龍知其意輒加惠予土司死子幼其妻代攝他族欲爭之登龍訪
於眾廉其情竟立其子人人稱頌調雅安州部推遷安陸府同知
赴任稽遲詣京師候選授建昌捕盜同知差委買鉛丁內艱歸囊

橐蕭然授徒自給杜門守困絕州縣刺謁日與諸生詩畫自娛年
七十四卒著出塞錄一卷襄塘志略二卷蜀水考二卷天全州圖
見記二卷讀禮餘篇二卷詩集十四卷雜著四卷

右傳陳壽祺撰

98-21-10000-10000

10000-10000

10000-10000

10000-10000

唐永飛 鄧梅傑

唐永飛字達翥湖南武岡州人乾隆甲午舉人幼聰警好學詩文操筆立就比長受經於長沙余廷燦湘潭張九鑑攻苦益至凡經史疑義及佶聱難讀皆札記之出門則置懷袖閒遇亭館樓陰少憩卽取札誦之嘗宿某家夜過半忽敲門大呼主人驚起則曰無他適閱某書未終而燦燦垂滅爲乞膏少許俾卒業耳歷官綏甯訓導茶陵學正湘潭教諭同郡鄧梅傑字庾南新甯人乾隆己酉拔貢補甯遠縣教諭歷署沅陵訓導道州學正課士先行而後文時生員欠糧者凡十七人察之皆極貧也不忍遽申革召至勸誡之皆遵納諸生始得脫然

右傳李元度撰

俞昌言

君俞氏名昌言字范甄枏園號也世爲嘉定人父某監生君生而穎異經史過目輒成誦二十一歲補縣學生乾隆二十五年庚辰中順天鄉試明年會試中式以疾歸四十年 殿試成進士以知縣用君請補教職頃之選蘇州府教授居五年以疾卒於學舍君性情蕭澹高簡絕塵少多病因偕修撰秦君大成學導引符籙之術以蘄尊生而繕性及爲教授謝交游掩關卻掃惟與彭君紹咸脩習淨土爲業余嘗過其官舍紙窗木榻清譚相對已而出鮭菜具糲飯寒素甚於諸生然其設教也首勸以道義次甄以文章被其教者率皆名節自勵爲文亦有法度可觀其論文自歐會而溯

源於史記滄古簡潔不煩繩削而自合論詩則抒寫性情刻摹山水得之陶韋爲多君生於雍正七年十一月某日卒於乾隆四十七年八月某日年五十四配趙氏先卒無子以族子廷燭爲嗣某年月日門人莊銓葬君於嘉定之某原撫其行實使來謁銘君余庚辰門下士也乃爲銘曰

大羹不和大圭不琢白賁无咎謂全其樸釋與老兼通而卒以儒終吁嗟乎其莫此幽宮

右墓誌銘王昶撰

楊于果

今皇帝十有七年夏五月朔先師楊審巖仲子照徒行至自秦州持狀伏哭預庭下曰先府君以去冬十一月二旬四日棄養矣照豈敢私其先人顧府君實行高當世幽堂傳信莫宜吾子敢請預哭且曰嗚呼預豈能銘先生也哉惟是先公道義素交師門之恩踰尋常倍倍苟不徵信埋詞俾方來見本朝吏治之醇則預獲戾固不一端遂飲泣序之先生諱于果字碩庭別自號審巖明初自隴西遷秦安曾祖諱某諸生祖諱某歲貢生贈文林郎父諱某諸生贈修職郎晉文林郎贈公丈夫子六先生季也生十四年喜爲莊周沈洋之文學政雁湖楊公拔弟子員已公歎曰生非

獨文士才也異時當以學術經世第骨相不貴恐終於循吏耳乙未第進士王文端欲薦入詞館固辭歸之歲也預隨先公蘭州實受經焉丙午銓湖北長陽令凡宰六邑以久次遷荊州府沙市通判上官第同考官文輒舉首然優於治劇本原經術發於至誠平居儉素自將日給錢不贏二百雖扶擿幽隱與號爲吏能者殊科故所去見思劉洪鐸亂黨雜平民居宜都枝江閒株連宜都者皆前死先生在枝江獨曰事無左證豈無仇陷致此盍拘繫以俟鞠實洪鐸據望佛山去枝江二十里人人懼生變卒廉出三百許人竟亦無應洪鐸者方時軍興羽書狎至他吏懼以乏輿論意不在民先生事悉辦治民不病擾雖羣不逞無不知有先生長陽賊起

奉檄自枝江招撫故治猶念遺愛避軒蓋去官軍餽糧道賊巢眾
莫任行屢身親扞役而賊不犯終始官楚垂三十年大吏皆材之
矣以通判攝南漳也今協辦大學士松公方謫其地與論事歡甚
願挈入都圖進取固辭一日昧爽臥未起有闖其戶發篋環視者
松公也爲歎息曰君真身處脂膏不能自潤者邪乃寒悴若此以
千金贈先生弗之卻公既徵悉以益軍儲然以長吏多守文不能
專教養請於制府吳公願歸沙市焉公問何爲先生曰某已老不
中驅策所未卽罷去者爲軍需事牽率耳誠不自引嫌願縻於彼
事已當營歸計公不懌後竟歸沙市南漳民弗忘也嘗治兄弟析
產事旣去南漳民以他故情不厭復訟之郡郡守曰吾聞楊通判

前爲若斷矣此案若動通判且被議民愕眙曰公豈給民哉曰否
兄弟遽曰若爾誠不樂訟也立索牒去某年預述職過楚就見先
生蓋不獲侍者二十年所而先生老矣爲念先公捐館舍幸不墜
門戶荷 恩叨忝所教督益虔至於先公事故之際感今悼昔先
生雅不自多也因從容言有白金二百可歸置田宅是當累子預
私念仁者壽前年爲治行謂將優游大耋預終有則倣奉職庶寡
過今乃以守官江西不能與執引而任後死之責且言不盡意益
用愧感豈獨師資情所不勝然不敢緣飾單詞以誣惇史世因知
國家治理烝烝而安靜悃悃弗愧古之良政也其尙如先生志年
六十七元配張安人無出將以嘉慶十有八年某月合葬某山繼

配何安人有四子伯曰燾優貢生叔曰煥季曰燮早死孫男四其
仲子曰照國子監生是重蘭五千里來請銘者也銘曰

古三不欺實允蹈之起家儒術爲世吏師惟古之人比德攸宜惟
後之人遠而愈思德行一篇趙承以悲孰勵當官我無愧詞

右墓誌銘王涓代陳預撰

陸朝書局刻得石錄

卷之五十五

五

汪蒼霖

汪蒼霖錢唐人少卽走京師以國子生客甯郡王邸數十年工詩及書王甚重之晚始得官爲江南句容縣縣丞歲乙未縣中大旱赤地數百里縣民無食者研石屑及糜土以食名石屑曰觀音粉後又掘蘆根食適大府勘災入境蒼霖裹數物示大府大府怒命跪行轅外一日晚復召入斥曰汝何官狂惑若此蒼霖伏曰卑吏誠狂惑然實不敢隨諸貪黠者病民欲於中流中作一砥柱耳大府笑曰汝誠砥柱但砥柱太短耳叱出之又嘗奉檄運米賑淮安水災終日立泥淖中分撥已盡賦災民謠三章乃反爲丞氣必凌出令上蒼霖年故長遇本縣令及他令率以弟呼之不拘俗格也

賑災銀有餘吏私分餉之大怒欲舉實令恐并入己者捐置公所
備添賑以勞調江甯縣丞丞廨在雨花臺側余以事至江甯必過
訪之值蒼霖據案決事必命僕先引入內署決事畢始入曰吾不
敢以友故妨民事也惟佞佛余故斥毀之以博笑蒼霖必歷述因
果及毀佛者所得惡報以相懾余亂以他語乃止嘗以公事赴吳
門回舟與汪明經中同載二人者性並傲且其始皆欽產也泛論
世次忽謂中曰余長君兩世中曰君誤矣余實君曾大父行也蒼
霖恚甚欲縛中擲揚子江以救獲免後余官京師聞蒼霖攝本縣
數年甚有聲兒子飴孫歸試因札之得報書極言爲令之難與雪
冤獄數事未幾聞蒼霖死矣以不得大府歡歷四考究不得遷

右書事洪亮吉撰

卷之二

三

UNITED STATES DEPARTMENT OF JUSTICE
FEDERAL BUREAU OF INVESTIGATION

III

柯輅

柯輅號涇庵福建晉江人乾隆四十二年舉人官汀州漳州臺灣邵武訓導

君少孤事母孝自少貧困刻苦自立中式丁酉科舉人大挑二等以教職用所至訓士有方克稱其職君性嗜學既爲閒官益以著述爲事所著有讀經筆記二十卷山川古蹟錄十四卷文海蠡勺八卷詩學摭餘八卷知非得寸錄十卷天文氣候錄二卷閩中文獻八十卷閩中詩話十五卷涇庵詩文集十二卷

右聽松廬文鈔張維屏撰

164-478

164-478

高騰

福鼎學訓導高君卒之次年春其孤內閣中書澍然奔喪自京師
奉妣德孺人柩與君合葬邑北鄉十九都許礫山原先期以狀乞
志銘於君同年友邵武府學教授吳賢湘湘受狀謹考其世德學
行著作科名官階年諡配與子孫而志之遂以銘志曰高世光澤
縣自太宗六傳至例贈儒林郎諱鳳者爲君曾祖太學生 贈
文林郎晉奉直大夫諱仰展者爲君祖郡庠生 敕封文林郎諱
組經者爲君父封公位次早孤母龔孀居獲 旌幼而能讓感祖
妣吳舍長就養諸姪多艱公力護之失在孤悲延師教子擇秀與
偕膳脯惟公後先獲雋光文始盛君內外克好尤義之敦鄉試友

卒護柩舟行聞捷不顧卒與俱歸同年卒官既歸其喪倡捐置產
經紀歷年授孤於狀福鼎貢士失試削籍言於督學賁之補試其
論學主宋儒談經宗漢受制藝詩法於瀘溪黃進士堂受古文法
於建甯朱太史仕琇著漢學咫聞二十卷穀音初集一卷古今文
若干由副榜貢生中式乾隆丁酉科舉人揀選知縣丁未大挑二
等借補福鼎縣學訓導例封文林郎晉儒林郎卒於嘉慶丁卯九
月年五十有九及門士私謚文穆先生配德孺人繼張孺人適黃
氏張氏子某某孫某德孺人先君二十一年卒年二十九孺人之
歿悲其舅嫜乳媪不家願事終身頌恩於歿淚墮聲吞久久不衰
人指爲病例贈孺人晉安人以今戊辰之臘五日葬君諱騰字鶴

年初號九臯晚易海樵銘曰

文不明堂以耀膠庠膠庠之光斯文之傷有道能文昌黎於朝會
是之云中書勛哉垂文采見諸行甸播穫譬之耕

右墓誌銘吳賢湘撰

AT 11:00 AM - 11:15 AM

11/11

164-482

蔣知廉

君諱知廉字用恥翰林院編修鉛山蔣心餘先生士銓之長子也
編修以才稱天下矣君少繼有才名能文工作書乾隆四十二年
爲選拔貢生從編修京師編修大病割臂和藥一進而愈君鄉試
屢不錄以謄錄勞授州同知發山東署臨清州同知吏事甚辨辨
獲盜之不實者執之力卒獲真盜果如君言值水澇君行視救溺
者中溼未幾卒年四十乾隆五十六年也當余在揚州時編修君
赴都過揚州相見君以拔貢將入試與其弟偕從時丹徒王侍讀
有家僮善歌吹笛而編修工爲曲嘗成曲俾以笛歌吾曹相從飲
酒聽歌極樂以君年少不呼使與也第見編修有子英秀侍側其

言其可慶而已後未十年間編修歸里旋沒又數年而君亡余頓
居江甯君之子立中來求爲文紀君其年已逾君始遇余之年矣
人世之速而才者之不可留如此悲夫君才旣足稱沒後其幼子
立萬之生母賈氏卒縊以從今從君葬是亦可紀而余又感思生
平故舊乃書其略俾立中碣君墓上云

右墓碣姚鼐撰

秦鼎雲 朱旭 秦雄濤

秦鼎雲字汾祥江蘇無錫人乾隆四十二年拔貢如皋教諭嘗集課諸生親爲評定講論與邑紳徐觀政等爲詩社提唱風雅城南隅有宋王學士觀墓鄰佛寺僧豪橫占削王氏弱訟不勝鼎雲力言於刺史復其地又得詩人邵潛夫墓碣於他所訪獲其墓率士致祭復之年六十餘卒於官邑人士祀之學宮旁舍鼎雲好古博覽藏書甚富鼎彝書畫無不精審又喜談兵著有慎戰慎守編三十卷見聞隨筆錄八卷同邑朱旭字漱軒乾隆五十四年舉人太平縣教諭在任日有寒賤爲勢力所抑者旭力扶持之俾得直以疾歸諸生建祠祀之與旭同舉有秦雄濤字聲雷授安徽太湖縣

訓導勸修學宮蒐訪邑中貧寒節孝二千餘口彙詳請旌士民
頌之平生好究經義著有五禮輯要

右傳楊熙之撰

王元勳

父執易圃王先生既就養於令子進祖西平官舍之六年也一旦萌歸思西平性最孝亟乞假身候代而屬其兄述祖及婦子輩先奉先生歸以嘉慶丙寅八月至家明年三月無疾而逝於是年八十矣配何顏兩宜人先卒已葬兩令子將以臘月之吉啟生藏而窆焉先期來句廣芸爲志墓之文廣芸未嘗學古文何足以銘先生願西平兄弟不求之朝貴而以屬風塵俗吏者蓋以兩世交誼知之深言之爲可信也則其銘先生也固宜憶乾隆戊子秋廣芸侍先大夫入都始識先生一日過寓舍先大夫以廣芸課文示先生曰孺子何如曰可教也時廣芸才十六歲再逾年而先大夫見

背廣芸備歷艱苦與西平兄弟先後同應童子試後倖忝科第出
爲令十餘年來濫膺郡符而髮白齒落頽然一翁自先生沒後先
大夫之友蓋無一存者矣嗚呼其忍銘吾先生哉先生幼慧九歲
父命賦萬壽菊詩奇之賚以松花石硯硯爲仁廟賜先大父物
也及長遂以詩名大江南北詩人林立皆推先生執牛耳然先生
行誼有古君子之風其居心行事無浮薄之習不當以詩人目之
也往來京師就試者廿年從不以行卷干貴人學日進品日粹名
亦日重衍聖公聘爲子嗣公憲培師在曲阜者四年大學士公阿
文成公亦延以教公孫侍郎尙書兩公是也其餘所成就後進甚
夥年及艾始登一第遂就學職不得以政事表見然每每佐有司

勘災散振捕蝗必盡心力爲之嘗奉檄勘沛縣太行隄戊夜水潰隄入城乃佐令集漁舟以拯居民所活者甚眾後先生就養西平尤以加意矜恤獄囚爲訓先生之經濟於此略見端倪若夫建家廟輯宗譜施藥餌之類猶其小節耳按狀先生諱元勳字叔華初字秀峯號東溟又號冲成子晚號易圃居士以國子生中乾隆丁酉順天舉人戊戌進士任徐州府儒學教授以子進祖官封奉直大夫西平縣知縣加三級先世在宋自北遷南居崑山爲望族有介山公諱芬者始遷嘉定九傳爲貞憲先生諱秦際明崇禎癸未進士入國朝不仕是爲先生之本生高祖考曾祖考諱楫汝順治辛卯舉人祖考諱晦康熙壬辰進士翰林院庶吉士考諱思

渠國子生以先生官 贈文林郎元配何繼配顏均 贈宜人子
男二長述祖監生候選五城兵馬司次進祖乾隆己酉舉人癸丑
進士西平縣知縣女一適隨州州同姚元烺孫男五人女四人所
著易圃詩鈔三十卷彙版行世又古文六卷代撰經進詩文摩金
集四卷樵玉山房詞彙四卷秀華山人詞彙二卷歸田吟彙二卷
藏於家以嘉慶十二年十二月十八日葬於寶山縣甯號三十九
圖譚家灣先塋昭穴銘曰
太原王邑右族百餘年科十六吉士興修撰續公晚遇甘苜藿享
大年食子祿惟有德迺基福後益昌理可卜

右墓誌銘李廢芸撰

國朝耆獻類徵初編卷二百五十七目錄

僚佐九

王永椿

葉光國 陳昭謀

莫元伯

舒采願

錢塘 從弟姑

李岐生

趙懷玉

王家寶

向宗乾 饒自儼印緒

丁杰

彭壽

張性

黃齊雯

翁咸封

周系蔚

馬時芳

顧禮琥

鄭環

蔣勵常

談泰

陳慶

曾日琇

甘運源

皇朝通志卷一百一十五

顧敏恆 侯雲濤族弟防

吳玉搢

補錄

丁杰

國朝耆獻類徵初編卷二百五十七

通奉大夫前署江西巡撫江西布政使司布政使湘陰李桓輯
僚佐九

王永椿

郡縣有學始於宋而學無常官其爲之者皆一時人師有名聲明
始定著以員數員益多而選亦益輕迨其後吏部以舉人貢生注
缺久次迺得率癯老不任事不稱 朝廷所以厲學興才之意

今天子憫其然詔舉人集禮部者以時遣大臣差擇而補其乙等
爲教諭訓導官士不滯於令格感慨自奮什九稱職而能破拘絀
俗毅然獨行其意若婁縣王公非尤古所謂立於師道者歟公初

爲學正於無爲州年才踰壯卽促促爲諸生陳說經義如耆師宿儒諸生翕然服從樸俗以變改國子典簿去旣而復爲教諭於婺源其教益嚴而加勤江先生永以經術教授鄉里於諸經皆有所考證發明旣歿而學者爭傳述之公上記部使者祀之徽國文公祠士用勸勵先聖廟圯剝庠俸金繕完之上丁釋菜案禮圖以供其遵豆之實訖事誠恪無有違怠待諸生若家人子貧而乞者代之償同僚死經紀以歸其轉在官九年它郡縣多取爲法會遭孝聖憲皇后喪朝夕臨縣庭得寒疾弱於行投牒遽歸諸生皆涕泣以送蓋前後爲校官者未有如公能得士也公之考參政公富雍正間以文章經濟名天下公生而育於祖母之兄鳳翔守朱

公琦逮參政公歿而始還其家讀書務窮根柢晝夜研習至繫牒於髮以警其倦久之學成其於古今事理得失之故無所不貫串其著之於文汪洋演迤莫測其津涘中歲入京師鉅公長者皆折節下之然自舉於鄉試春官輒被放或勸公貶節以希進力拒之故卒以老博士終不究於用然小有所試亦可以睹其效矣公事母陸孺人至孝故育公者朱氏之妾吳迎歸奉養以終歲饑且疫養糜以振施藥以療存活亡算此皆人所以稱公者故亦不得而略也平生所爲詩文曰古巢詩知非彙林藪吟若干卷今藏於家公諱永椿字方干出自宋太師魏國文正公後宋末徙家華亭爲虹橋王氏數傳至明萬厯中有河南按察副使諱明時者復徙郡

西白龍潭故今爲婁縣人明時生萬厯己酉副榜諱垣惠者公高祖也工部都水司員外郎明亡殉節京師乾隆四十年蒙 恩賜諡忠節諱鍾彥者公曾祖也 贈中大夫諱玉泐者公祖也考諱葉滋以進士歷官湖南糧儲道布政使司參政公年五十九以乾隆四十三年八月十五日未時卒於里第元配楊孺人吏科掌印給事中諱爾德女婉嫵有操行喜施予遇戚獲有恩姊姒閒無不稱其賢先府君二十三年卒繼配莊孺人子男子六翰分發安徽候補布政司經歷史早卒璋候補吏目俱楊孺人出晉婁縣學生豫恆俱莊孺人出女子子四人曹希燕蔣蟾桂莊心泰許隆璧其壻也孫男四人孫女四人翰等卜以乾隆五十年十二月某日葬

公華亭縣仙山鄉八保二區十二圖之新阡以楊孺人耐而使來
乞銘銘曰

乘馬者期於千里不期於驛驢綠耳鼓琴者期於鳴廉修營不期
於濫脇號鍾嗚呼王公維學之克維德之龔維文之通維教之崇
維命之不融我銘幽宮以哀其終以視後人令名無窮

右墓誌銘陸錫熊撰

										三
--	--	--	--	--	--	--	--	--	--	---

葉光國 陳昭謀

葉光國湖南桂陽人乾隆己亥舉人任衡陽教諭振興學校周卹貧士嘉慶辛酉衡州大水米貴突有饑民數千入姚氏馬氏村大肆掠時盛夏饑民多袒裼光國聞之急請於府白巡道部署兵役各持籬荆遮二村要道見攜賊出者撻其背既散驗背上荆痕盡捕之無枉縱者縣人爲生祠祀之時有陳昭謀字燕詒郴州人祖培運幼孤事母孝好施予有負貸者焚其券遇橫逆不與校尤振恤寒士尊禮師儒昭謀性異敏深於經術乾隆丁酉拔貢歷署江華湘鄉湘陰臨湘嘉禾綏甯乾州廳學篆在湘鄉典史某以聚眾毆官誣某生昭謀白其枉癸卯分修通志是科舉於鄉尋補桂陽

州學正課士有法曹德贊遂與館選前此未有也遷昌邑知縣未
赴以足疾歸主東山書院十年文風爲之一振纂輯州志去取悉
允當性孝友撫弟孤子如所生別建宗祠經理祀田生息至倍莠
又倡修學宮改建文昌廟魁星閣新建東塔及司馬隄義渡卒年
七十餘子振玉嘉慶庚申舉人以父嬰足疾侍養不仕他善行尤
夥卒祀鄉賢振琳癸酉拔貢

右傳李元度撰

莫元伯

雁山胸無畦畛和易近人負笈其門者歲常百餘人廉俸所入營
甘旨以奉九旬老母餘悉以周貧交人品既高詩亦質而不癯淡
而彌永著有柏香齋詩鈔

右嶺南羣雅張維屏錄

鄉先生以學行聞於時而余獲親炙之以友而兼師者有二人焉
一爲欽州馮公敏昌一爲陽山鄭公士超馮公雄豪伉爽近於狂
鄭公清介剛方近於狷馮公主講端溪與高要莫善齋先生唱酬
甚歡歲戊辰先生秉鐸吾邑余歸自都中始相見於省門先生出
舊槩屬點勘余就鄙見爲刪存先生不以爲謬余以詩質先生先

生亦直言無隱其後過從益密乃知先生誠樸無偽凡事皆然而
談藝其一端也先生事母有老萊子風處家和而嚴在官八載多
士樂從之遊旦晚講投環而聽者日益眾尤喜讀史嘗摘其要手
錄之每春秋佳日招友人登臨覽觀銜盃賦詩怡然藹然人或以
非禮干輒毅然拒之蓋先生之清介有類鄭公而詩酒徜徉豪情
逸致抑何其與馮公相似也

右聽松廬文鈔張維屏撰

魚山先生書楹帖贈善齋廣文句云奉母孝經看在手教兒文選
讀從頭

右松軒隨筆張維屏撰

按莫公字台可號雁山廣東高要人乾隆四十四年舉人官訓導

舒采願

舒采願字守中保齋其自號也江西靖安縣人父亮衮字補亭與兄亮襄學生岐疑夙慧同以奇童補邑庠生又同中雍正癸卯江西鄉試舉人補亭仕爲四川永川縣知縣有惠政金溪楊中丞護所爲雙溪兩賢傳者也君爲補亭第五子屢困場屋援例除甘肅渠甯巡檢巡檢固卑官爲之者或降志取安君獨以方耿自飭手書孝弟忠信禮義廉恥八字揭堡城而時與士之知學者吟詠其閒爲勸講田渠水利民大悅之有武舉漁奪鄉民橫爲不法君命健役執之來曉以義不服則按而笞之如律而自檢舉會上官欲兩全其事遂寢偶郡守妻過渠甯境屬吏多拜迎君獨長揖道左

守聞而怒屬令求其短令曰此強項書生忍飢奉職未嘗有過也
守乃檄君送秋審重囚數十人於蘭州而不給長解車役欲因以
誤差失陷爲其罪或謂君曷往謝太守而斬免焉君曰行矣余幸
斬免而改檄他人是余移之禍也吾不爲也於是質衣裘爲囚賃
車行數程賃罄囚皆步行銀鐺躑躅躓血出君不忍乃屬囚而
語之曰吾誠哀若今欲盡釋若等桎梏以載於吾車吾與若皆徒
步徐行可乎若曹有罪我無罪諒不以脫逋累我卽若曹逃而皆
得遂其生殺余而活數十人亦余心所願而不悔於是囚皆感泣
相許誓不敢負旣行囚則左右衛君值津險處扶者掖者敷茵褥
以待憩者蒸松瀹茗以止渴者煙村荒礪中依依若子弟之捍父

兄者然一日日晡行至六盤山崎嶇萬仞麓無居民君與囚喘息
登未及半而颶風作涼西之颶比海颶更暴惡色黑而氣剛作則
正晝如夜陰霾湖涌大輿千鈞遭之輒覆飛石如拳擊人頭面眾
囚值風起皆紛竄君坐樹閒但聞崩崖折木石破雷吼如是者數
十刻風勢漸殺微見星光則車子爲覆車所壓幾折股尋聲往跡
見驟伏草中幸無恙風際遙聞呼嘯聲稍稍相近則數囚埋面土
中風息而起相與追尋而來者也於是囚抱車子置車後扶君坐
車前並駕驟而推挽之且行且歇復見有執炬者遙呼而來則斬
罪某囚也夙夜無行客深山呼嘯聚立而相待者皆死囚也戊夜
至山麓去旅店里許又有鞞蹇驟而來者近之則殺人鉅盜某犯

也君乘之入店按名對簿少一斬梟某眾曰渠罪十惡知不宥是必逃矣君不語第與眾相對啜粥荒雞亂號忽聞剝啄叩關入之則某也君望見泣下囚亦泣曰人誰不願逃死實不忍負我生佛耳先是君見車子時眾囚無一在者車子曰此天假之緣不逃何待行速者將百里矣君曰我實縱之復何尤至是眾囚畢至故君感之而泣下也及至蘭州郭外浮橋下囚皆坐待君後至曰何不先入眾曰省會官兵多見小人等徒行公且得罪於是各向車中認取刑具互相鈎鎖君見之更爲涕泣不禁及君公事畢將歸不謁客先赴監中別囚與囚對泣如母別子囚之知必決而有老親者求君寄聲身後事君皆一一疏於紙歸途迂道往致其家其或

有梟示近地者仍爲之瘞其首焉新疆地多浩壤戍邊之將各以部卒及謫犯開屯田無限制故武職多富其應給軍糧則設糧廳爲收放尖入平出謂之耗羨以供差徭雜費初未設州縣其各屯糧廳必揀調內地之強幹者謂之調口每遇當調不願往者必多方求免至是烏魯木齊呼圖壁糧廳員缺時適有遣犯戍官作亂事人尤畏之郡守方忌君送囚而囚不逃也則僞以強幹有爲薦君調口爲君憂者皆勸以疾辭否則宜送室家歸隻身赴邊君夫人吳恭人謂君是不可辭辭且獲譴且必偕行乃相安死生有命奚懼焉於是渠甯民之送君者哭聲相續君行出關七千里始至屯所巖冬朔風苦寒積雪中人首纍纍逆旅之犬銜之入牀下呼

圍壁城戍兵千餘守備數十員統於一都司屯田徧野例交文倉
收管者若干貯都司屯倉以備徵調者若干餘皆入營員私糶蓋
漠外無運道無蓋藏民食仰屯餘之蓄歲稔麥貴都司往往盡糶
其備徵之糧獲利倍蓰次年則補之有餘亦未嘗有所徵調也故
事凡祭祀拜次文東武西定位也君到官與都司祭武廟都司欲
拜東君與爭儀注舊制都司怒自是事事相掣肘且時命其軍校
尋隙一日有遣犯竊商旅君緝得其人拘繫之都司率弁卒奪去
君申提督提督亦不理於是釁益深都司令其營校邏守文倉雖
遵例支放而耗羨則不許糶應出糶以窘困之閉糶數年賴新疆
雜職養廉厚得不飢寒乾隆□十□年吐爾扈特率眾數十萬來

降奉 旨給糧安插伊犁將軍所部數千里降人咸在羽檄下都
司運屯倉所儲備征糧以供數後期者以乏軍輿論都司得檄憂
怖莫知所出蓋是年麥價涌貴諸屯之儲盡糶積金雖多無市糧
處於是有爲都司謀者是非求舒某不能解都司慮君懷怨將必
不許其人曰吾觀此人輕利尙義心甚慈宜可以誠禮動也於是
都司乃率羣弁造門請謁君方習射後圃釋弓矢出見之則長跪
乞救死君再三掖之起慨然曰蒙君數年爲我守我豈乘人之急
者盡以管鑰付君以成數報我可耳都司竦悅出望外於時金川
用兵 詔許有能運糧餉軍者敘勞授官君長子慶雲應 詔得
議敘同知加二級 封君爲中憲大夫適君兄來視弟道沒於山

丹君遂辭職往護兄喪歸里瀕行念塞外貧交多謫戍而無依可
愍者取橐中糶粟價三千金悉分贈之既而慶雲除廣西慶遠府
同知攝永甯牧迎養君至署己亥終於州廨年五十有一舒固世
族今慶雲仕爲浙江金衢嚴兵備道其羣從子爲牧令者甚衆人
以爲隱德之報云君初至塞外貧甚都統索公憐之以監照百紙
發君備賑君辭不受後十年口內外監照冒賑案發而君獨免君
第三子夢蘭世稱白香先生以才俊名所著天香日記湘舟漫錄
詩文集皆行於世嘗在怡親王邸爲上客甲辰應江南 召試一
時如紀文達公趙文恪公胡文僖公楊中丞護皆與遊好白香子
普卽文僖壻也

方東樹曰余讀史嘗刺取古人縱囚者十餘事皆奇偉而歐陽永叔獨議唐太宗爲好名豈盡然與夫子語或人以德報怨何以報德而又稱伯夷叔齊不念舊惡怨是用希夫言豈一端而已豚魚可格而仁之爲道遠亦義各有當焉耳余未識白香而願嘗辱與之書極相慕悅且願與余談願與連日夕談而不一談嗚呼是可想其風期矣道光十七年余在兩粵制府幕而普仕爲廣東鹽場大使示余以楊中丞所爲保齋逸事記余因點竄爲保齋家傳是年冬十二月白香卒而余遂終不得與相見故並及其梗槩焉

右家傳方東樹撰

國朝文獻通考卷之三百一十一

十一

錢塘 從弟坊

溉亭姓錢氏名塘字學淵一字禹美世居嘉定之望仙橋曾大父
惟亮廩膳生與先奉政公爲從祖昆弟生太學生衡臣有三子彥
昭早卒彥輝永輝皆太學生溉亭爲永輝長子甫在抱而彥輝撫
以爲後始就傳習舉業出語便不凡既補博士弟子與諸澱淪汪
綉青王鶴谿王耿仲唱和爲古今體詩卽爲王西莊光祿王蘭泉
侍郎激賞然溉亭意曠然猶未足不欲以詞人自命及選拔入成
均試 闕下歸益肆力於經史之學乾隆四十四年舉江南鄉試
對策爲通場第一明年成進士需次當得縣宰而溉亭自以不習
吏事呈吏部願就教職選授江甯府學教授公務多暇益刻苦撰

述於聲音文字律呂推步之學尤有神解體素羸弱夏月常畏寒擁絮而攷辨精到議論風生不假公明三斗酒也春秋五十有六終於江甯官廨澆亭著律呂古義六卷自序云古之律傳而尺不傳律法待尺以爲用尺不傳則律不傳矣自荀勖以劉歆銅斛尺爲周尺載於史志莫有知其非者予得慮僂尺知勖所謂周尺之卽漢尺復得周尺知漢尺之非周尺因周尺以求律尺得今車工尺之八寸一分蓋周本八寸尺不可以制律律必用十寸尺卽昔人所云夏尺者然則周不能自用其尺制律後人顧必曰周尺哉古律當無異度周必因乎夏商夏商必因唐虞十寸尺之爲二帝三王時律尺明矣周尺傳而律尺傳而古律已無不傳其

愈於用漢尺也不遠乎然予之爲此書非徒傳古尺而已兼以明律法焉夫累黍尺之千二百不能實八百十分之管也攷律之不必千二百黍也徑三分之積不盈八百十分也周隴之非兼用八寸十寸尺也後周玉律至隋而失其本數也雅樂燕樂之調法不同也中管調器之非律呂元聲也校律之用尺積也今權之用何度也皆律家所當知者也不知實管之宜異黍則容受必不符不知攷律之用方龠則黃鐘必非八百十分不知徑三分之積六百四十分則必以方徑爲員徑不知周隴止用十寸尺則聲不能中黃鐘之宮不知玉律之積數增多則隋志錯誤之故不明不知雅樂燕樂異調則郊廟與房中無別不知中管之非元聲則八音俱

乖本律不知校律用尺再乘方則得數必舛不知今權所應之度則不能審古物之應律與否如是而律不可通矣夫言律必求其實用律之數寓於度量權衡而其聲應乎金石絲竹律本無不通故以是數物爲其用通則有法焉卽黃鐘之律是也故曰爲萬事根本其明算篇曰算莫難於算圓圓周者圓算之本也以方容圓徑同而周異圓周之有圓算若方周之有方算故周異則算亦異倍其徑者四其算則初以爲周者繼以爲算矣以方周除圓周而十之亦卽圓之算也由是定爲方圓之率任所得之爲方爲圓無不可以推知其所未得而術有古今疏密之不同古術方周四則圓周三足算亦方四而圓三也至劉徽注九章推得圓周三一四

有奇而去其餘數故微術算纂亦方四而圓三一四也後人知古術之疏以微術爲密依而用之雖間有修改要不離此率自予觀之亦未見其密也試度取一物之徑命之爲一則周且至三二六以上矣夫古術泥於陽奇陰偶之說其疏固宜微術則本之割圓割圓之術有觚有弧矢其算之也有半徑與弦半徑常爲大弦而迭爲句股以求其小弦半徑爲小弦所截成弧矢有弧矢則半徑不盡半徑不盡則小弦不盡而割圓之以爲弧者卽小弦也弦直而弧曲合之以爲周非其類矣周之爲物如環無端割而爲觚必且無盡而割圓不能無盡也斯則名爲周而實非周也而又不能無所棄始之開方以求大股也可開而至於無盡也旣以其不能

盡而棄之後之開方以求小弦也亦可開而至於無盡也復以其
不能盡而棄之有所棄則非全數矣微之割圓也止於九十六觚
其於股於矢於小弦固皆曰餘分棄之是以二尺爲方之圓周尙
以六分半有奇爲小弦夫以如環之圓而以六分以上之小弦九
十六之以爲周謂其與圓合體也其孰能信之是故求圓周者可
無割圓也度之亦略近矣度法絲毫以下常無象而不可以名則
有一術焉更密於度周而可以相代者曰十倍其徑算以爲周算
而已我蓋得之於方方之徑算卽圓之徑算也方之周算猶圓之
周算也唯以十六爲十是已數皆以十成而權衡獨以十六卽其
理也是故徑算一則方周算十六而圓周算十徑算十則方周算

百六十而圓周冪百是爲周徑之冪異位而同名夫如是則圓冪至十倍卽周爲徑而十倍其徑以爲周矣是反覆不衰之術也舊術周冪不足徑冪之十倍故反覆之則必衰衰不衰何足深論顧如方之容圓有舒促何容圓無舒促則無如此術矣是術也可不用比例而得周徑與方圓不出乎乘除進退以開方而已矣求周徑者徑自乘而十乘之卽周之自乘周自乘而十除之卽徑之自乘求方圍者方自乘而十六除之復十乘之卽圓之自乘圓自乘而十六乘之復十除之卽方之自乘所得皆平方開之也舊唯周徑有冪今則方圓之冪又有冪然皆因數以立術非爲術以設數也然則其數幾何曰術在數可不言也以徑一爲例則徑冪百周

算千而方算之算十萬圓算之算六千二百五十是爲徑一則周
三一六有奇而方百者圓七九零也立圓立方何如曰亦不過三
一六爲圓則六爲方而已矣其較度篇曰晉志列十五等尺以晉
前尺爲主謂之周尺玉海列六等尺以司馬公所摹高若訥漢泉
尺爲主謂之周尺其時漢尺之外實未見周尺也今曲阜孔氏所
藏漢慮僂銅尺建初六年八月造當今工匠尺七寸四分與晉志
云晉前尺卽劉歆鐘律尺建武銅尺者正同卽司馬公家周尺亦
無不同也周尺今藏曲阜顏氏以今匠尺校之長六寸四分八釐
昔人以漢尺爲周尺者非也周有八寸十寸尺以顏氏尺四分加
一得今匠尺之八寸一分是爲古十寸尺昔人謂之夏尺別於周

也商尺蔡邕言長九寸鄭樵言長一尺二寸半按攷工記夏后氏世室度以步殷人重屋度以尋步長六尺十寸尺也尋長八尺八寸尺也沒制用尋明別無殷尺矣蓋二尺三代同用也蔡說出自臆撰鄭然則據三司尺言之三司尺范景仁謂之黃帝時尺雖未可信要非宋始有之以漢尺推算當長一尺三寸五分卽今匠尺也三司尺之八寸一分卽古十寸尺十寸尺制律三代當同愈於用漢尺遠矣又著史記三書釋疑於律厯天官家言皆究其原本而以它書疏通證明之律書上九商八羽七角六宮五徵九數語注家皆不能曉小司馬疑其數錯概亭據淮南子太元經證之始信其確不可易又以淮南天文訓一篇多周官馮相保章遺法高

氏注頗闕略罕所證明作補注三卷以闡其旨晚年讀春秋左氏
經傳精心有得作古義若干卷以補杜氏之闕且糾其謬其所作
古文曰述古編四卷詩曰□□齋吟彙皆刊刻行世澆亭少時執
經於先君子子長於澆亭七歲相與其學子入都以後澆亭與其
弟站及子弟大昭相切磋磋爲實事求是之學漸至於古人而止比
子歸田而澆亭學已大成每相見輒互證其所得吾邑言好學者
稱錢氏而澆亭尤羣從之白眉也惜其未及中壽而撰述或不盡
傳因倣魏晉人別傳之例述其事目如右

右別傳錢大昕撰

錢塘字學淵一字禹美爲諸生時與諸澆淪汪紉青王鶴谿王耿

仲相唱和爲古今體詩爲王光祿西莊王侍郎蘭泉兩公所激賞
塘嗾然不足不欲以詩名及選拔入成均試歸肆力於經史之學
乾隆四十四年舉江南鄉試明年汪如洋榜成進士需次當得知
縣自以不習吏事就教職選授江甯府學教授公務多暇專志撰
述於聲音文字律呂推步之學尤有神解著律呂考文六卷又著
史記三書釋疑於律厯天官家言皆究其原本而以他書疏通證
明之律書上九商八羽七角六宮五徵九數語注家皆不能曉小
司馬疑其數錯塘據淮南子太元經證之始信其確不可易又以
淮南天文訓一篇多周官馮相保章遺法高氏注闕略罕所證明
作補注三卷以闡其旨晚年讀春秋左氏經傳精心有得作古義

若干卷以補杜氏之闕且糾其謬其所作古文曰述古編四卷皆行於世卒年五十有六

右漢學師承記江藩撰

錢坫

君諱坫字獻之姓錢氏江蘇嘉定人錢氏祖吳越武肅王散處江浙多貴盛然以嘉定爲望君季父少詹事大昕通經史百家言爲三吳老宿君沈博不及詹事而精當過之學者所爲稱膠城二錢者也君少孤貧於世事無所通曉獨好讀古書乾隆中士習樸陋率誦四子書本經各一部時文數百首以資弋獲其全讀左氏傳禮記者父兄輒以爲務外廢正業同輩亦相率嘲笑之君年十二

已無力就外傳願閉戶讀書十三年三禮左氏春秋毛詩史記漢書許氏說文解字杜氏通典及馬鄭孔賈之言皆能錯綜其義年廿五乃娶三日卽徹夜讀書如故君故未習宋人經說始就小試以漢說說之有司至不能句讀黜之至再乃補弟子員貧無以自存乃人都就詹事時都中尙爲詩聲酒徵逐以爲名高而君不能韻語詹事以君通許氏書乃命習篆時都中能作篆者惟學士翁方綱遂購李陽冰城隍廟碑晝夜習之三月不能成字忽患痢醫者診之脈無病而手足厥冷目眩視鼻微有息而已如是者七日忽中夜躍起濡墨作篆書乾卦象畢不勝餓而寢翌早詹事來視病君尙未寤見案上篆一紙大驚君病願已解詹事問病狀君荅

日兒故無病兒夢至石室中見唐巾老者指授兒作篆七日夜不得少間作成輒批抹最後書乾卦象老者曰此可矣兒遂覺追憶筆勢中夜作此幅詹事細詢夢中所見蓋卽少温云翁公聞之卽從君索書歎絕以爲神授一日君篆書遂名天下君名旣籍甚試官物色君文輒失之以副榜貢生就職直隸州州判從陝西巡撫畢沅遊述官於陝二十餘年歷署文山縣乾州華州事嘉慶二年教匪擾陝西四川河南湖北而華州爲陝西入河南要道君兼攝州縣事率眾乘城力遏其衝城無弓矢君倣古爲合竹強弓厚背紙爲翎二人共發之達百五十步又以意爲發石之法石重十斤達三百步一發輒斃數賊前後接戰者四次守城者八日未嘗敗

明三年春河南有謀啟賊者眾數萬人招賊渠張添倫取道君部者三卒不能東而河南賊事泄就擒西賊亦折回南山督師以功上部前後得軍功加五級賊勢漸衰而君以積勞偏廢引疾歸囊橐蕭然以左手作篆自給所著書有漢書地理志注許氏說文解字注若干卷皆能駁正前人之誤不爲異說而要歸於是已版行君在陝多得古人金石其文字尤瑰異者繪而版之爲圖說若干卷數十年來三代秦漢之法物多見於世而世之知古者亦漸多君其始事也近世士人爭爲經學小學金石學大抵疏剔字句小節不能旁通其大義又皆矜己屈人莫適於用唯君以書生薄宦安則撫民危則拒敵迹其本末斯可以爲不媿者矣補史記注百

二十卷十六國地理志及詩文集皆藏於家未版行君病歸以嘉慶八年始與余相識於蘇州府署時君已六十餘而余齒方弱又所學不相似然君一見余而深器之曰吾周行天下識人無如包君者又嘗謂人曰南陽有田可耕而猶吟梁父今包君身困至是率口必及民間疾苦絕無怨尤不豫之色是以其所負者大而且遠賢於古人必矣今日包君自給不足異日衣食天下者必包君也又曰包君詩妙接陳思而賦如平子觀其與人書累千言皆率筆無彙草然條鬯雅密近眉山父子吾以專家之學與之言彼略一涉之則數十年沈精所得不過也自古文人少所樹立皆器褊好氣矜不自檢飭今包君可謂純淨無疵者矣然君初至吳當事

仰望丰采結納唯恐不及卒以極推余故見嫉於當事而君境以益困君不悔其稱余益力君以嘉慶十一年十一月某日卒於吳寓年六十有六君長子不慧病後有二子皆幼君嘗自爲墓銘及行述余未及見謹具所聞之確切詳備者著於篇以備史家採擇云

包世臣曰余識君君卽云足下異日論史一國朝當倡經學傳自唐以來治經無盛於本朝者雖純疵不一其可錄者皆從之於史使吾名藉以不朽足矣余謂君經學爲學者宗而駢文亞徐庾篆書自鄧山人外莫與比所謂不假良史之詞者矣余困躓如舊重負良友車過腹痛此言是矣

右傳包世臣撰

錢坫字獻之少而穎敏有過人之資精於小學游京師朱笥河先生延爲上客乾隆甲午中副榜遂至關中在畢巡撫沅幕中與歙方子雲陽湖洪亮吉孫星衍討論訓故輿地之學後就職州判監修陝西城授乾州州判得末疾歸卒於蘇州著有詩音表一卷車制考一卷論語後錄五卷十經文字通正書十四卷新斲注地理志十六卷獻之工於小篆不在李陽冰徐鉉之下晚年右體偏枯左手作篆尤精世人藏弄其書如拱璧云嘗注史記詳於音訓及郡縣沿革山川所在兵部侍郎松筠爲陝甘總督時重其學品親至臥榻問疾索未刊著述獻之以史記注付公泣曰坫疾不起矣

三十年精力盡於此書惟明公憐之勿使蠟以覆車馬是時侍郎有伊犁將軍之命日塞外不能事劄劄當錄一副本原稟必寄子也後江都韋佩金書成爲廣西凌雲縣知縣獲譴謫塞外戍滿南還公知書成與獻之同舉於鄉以原稟囑書成付獻之獻之捧書泣曰我不能復見公矣至公爲兩江總督時獻之先四年死而書成亦化爲異物公皆賙恤其家嗟乎當今士大夫能謙抑下士故舊不遺如公者有幾人哉

右漢學師承記江藩撰

四庫全書

卷一百一十一

十一

李岐生

嗚呼吾文亭之歸櫬京師也貧不克葬於今且十年矣戊午春其孤希沆乃克述其生平爲狀走偃師求武虛谷爲銘辭將以納諸幽並哀所爲詩文屬密縣李元滬爲論次兼乞表墓之文蓋三人者以文章氣誼相契取而文亭之成進士也與虛谷爲同年友子於文亭受姓同且兄事之也其又何以辭願所以遲遲未就者按前人誌表並見往往參互詳略義法各具將俟虛谷之銘先出而後屬彙會虛谷有吳越之行而希沆之請益哀乃爲表歸之文亭諱岐生姓李氏文亭其字先世山東冠縣人元末遷襄城代有顯者家世詳贈翁誌中贈翁諱象巖字六一文亭父也文亭生而穎

國朝通志卷之四十四
三
異年十二三應童子試卽已超其儕州縣並居前茅十四歲受知
於學使者漳浦蔡葛山先生目爲偉器於是益以學問經濟自淬
勉欲赫然有見於世庚辰 恩科舉於鄉壬辰揀發以教職用補
汝州學訓導前後上公車者九與薦者六至庚子 恩科始以第
七人登汪如洋榜進士文出海內爭傳誦焉 殿試歸班回任適
歷俸滿觀察張公有年督學王公大鶴同力保薦而州牧嫉其文
字持異議遂不果又六年歷兩俸大憲卒以堪膺民社列於 朝
選授湖北保康縣知縣未蒞任遽以肺疾卒於京邸時乾隆戊申
三月二十六日也得年五十有五文亭體羸而神清用世之志甚
銳與予談自文史而外論事悉中條理務期有濟於物而止伊陽

令爲奸民秦國棟等狀死撫軍駐兵汝州民多恐懼逃散文亭奉
檄偕往恐累及無辜婉轉白幕府榜諭止列首惡十餘人餘遂安
堵嘗委察禁書有以字句違礙文當事者其人已死于孫咸不知
書大府擬奏治文亭力陳之事得寢在通省志書局同事欲削去
藝文內箸述名目文亭謂事關文獻當分別以存不當刪除移書
數百言爭之眾皆歎服其將膺保舉也布政使江公蘭委辦永城
災賑廉公無私而尤加意道殣惠及白骨永人至今戴之蓋文亭
之可見者止此嗚呼以文亭之早慧多文畱心當世之務謂宜立
陟清華以大其建樹副士林望顧棲遲校官晚乃得第且覘於常
調至一令之擢亦輻輳百端而又靳不使試卒以客死吾不知造

物者之生才何心既已於芸芸萬輩中而材之矣不長養之而摧折之而材之負異於眾者終不敢自苦慮以負乎天之所以予我世亦庶幾於老其材而用之乃忽焉尋之斧斤芟刈蘊崇無少惜焉此其可以太息流涕而爲千古之抑塞磊砢抱奇而不獲所施者悲也自文亭歿後虛谷嘗一出爲縣不一載以抗直投劾去垂老而客食四方而予司訓汲庠十年不調需次待銓髮禿齒豁均頽然無復當時意氣之盛矣然則論次遺文俾文亭之精神猶有存而不滅者其尙可以待耶文亭之配崔孺人孝淑而能惠下後文亭六年卒生子四希沆廩生希平希濟廩生希濂女一適貢生谷芳東孫二孫女二所箸經學授受源流四卷憩園詩文存藁若

干卷藏於家某年月日葬於某原

右墓表李元滄撰

國朝詩林卷之二十一

三十一

趙懷玉

道光三年二月庚申山東青州府海防同知武進趙君卒越三月赴至廬州繼輅旣爲位而哭四月君子哭復以狀來且云葬未定期願吾子預爲銘以待事嗚呼君之終先君執友交遊與其及門弟子於是零零盡矣夫以繼輅失怙之早吾鄉善人君子之多先君從游之眾而及見其盛繼歎其衰終悲其盡則繼輅亦且頽然而將老矣宜旣徵銘之遽也君諱懷玉字億孫太子太保戶部尙書恭毅公四世孫於翰林侍讀熊詔爲曾孫於兩浙鹽驛副使何敷爲孫於刑部福建司郎中繩男爲子母葉宜人君之以所業質先君也齒最後先君旣好劇譚豪飲一日無客卽悵然不自得又

愛偉君每君至輒喜促置酒夜過半始別去以爲常逮乾隆四十五年 純廟南巡君獻賦 行在蒙 召試賜官先君猶及見之而君年已三十有四矣君既得官嘗一入都候補旋以葉宜人喪歸歸十年復出應禮部試下第留內閣行走又一年實授中書舍人當是時誠謀英勇公與襄勤伯同爲大學士而君爲英勇公所知薦充軍機章京不果擢侍讀又不果嘉慶五年俸滿改外六年至官七年署登州知府再署兗州八年刑部君棄養遂不仕凡里居二十一年年七十有七吾鄉自唐襄文以文武幹濟之才效忠前明恭毅繼起首爲 本朝名臣二公所詣不同而同致通顯蓋襄文以通恭毅以介襄文如長江大河無不容納恭毅如高山絕

壁特立干仞然繼輅所見乾隆嘉慶間偉人奇節議論震動一世其始大率以襄文爲宗惟君篤守家法而稍變其嚴峭爲安雅廉讓故於仕恆進怯而退勇嗚乎失時之惜孰與失己以見恭毅於地下抑亦庶無罪悔矣君知名最早弱冠應京兆試卽與諸老輩抗顏爲友雖儀度嫻謹而持論侃侃未嘗以年位自絀其後家居日與里中少年賦詩飲酒亦自忘其爲大父行也繼輅少於君二十五年又與熒及熒從兄學轍學彭交相善不敢與君爲儕而君以先君故弟畜之自君病溼十餘年不良於行繼輅等嘗詣寢室起居或以事數日不至必相召召而不往必大怒旣見卽又大喜繼輅之官廬州君昇蓋輿送別握手唏噓謂將不復得相見也而

今果然其可感也夫君娶於金生四女又娶於張又娶於沈生二子長卽戾次日天丁幼穉戾之子曰蓮祥君生平無所好客來飲酒客去卽讀書所著亦有生齋文集五十九卷續集八卷斂氣就律肖其爲人銘曰

蹟而趨不如行之迂是爲文而儒非才之徒子孫守之慎勿渝

右墓誌銘陸繼輅撰

本朝自汪堯峰姜湛園邵青門諸君子引有明以來數人爲正宗修飭邊幅選言擇貌桐城方靈臯雖高識冠流厚力企古而波瀾鋒鏑未饜聰明於是矜奇務博者起而摧之如褻衣博帶之儒舉動繩尺不能制遊俠之亂禁敵貨殖之多畜而能言之士範於軌

物者益亦鮮矣先生獨不惑於貴勢不牽於友朋硜硜自立不厭不倦故集中所存無有雜言詖義離真反正者可不謂難歟

右大雲山房集張維屏錄

耿湘門先生五十治棺趙味辛先生七十自題木主皆達人也

右松軒隨筆張維屏撰

--	--	--	--	--	--	--	--	--	--

王家賓

王君諱家賓字悅相別號兩巖行六先是由福清遷福鼎後居邑之秦嶼自其父文學敦齋公以上皆不仕其伯兄恪亭以乾隆庚辰舉人補政和訓導今爲福州府學教授君由丁酉拔貢中庚子北闈舉人官國子監學正遷直隸長蘆都轉鹽運薊永分司運判君早失父母依其伯兄以學事之如嚴父所行皆稟命君嘗曰吾同懷六人今存者與伯兄四人吾幼與諸兄弟隨伯兄讀書夜不能各具膏火每一鐙照四人家鮮僮僕賓客至伯兄多委子弟侍茶煙今其敢忘兄訓哉初君以拔萃充四庫館膳錄考職縣丞庚子後例應報滿爲縣其爲國子亦遵其伯兄之命謂縣令難稱效

故改官京職君在太學教諸生多重行義其承示制舉文藝中京
兆捷禮部者甚眾君亦自以官國子屢入會闈君制藝雖法先輩
而音節和雅每文出人多謂其必雋而卒不能成進士君之蒙

恩用通判也眾皆賀余謂君體歲通判閒曹可以養靜兼讀書君
曰通判有捕盜責吾慮不能塞職豈可謂閒曹哉因購得 聖祖

畊織圖四十六幅曰此亦居官教民化盜之源乎君性精勤雖盛
暑流汗無惰容少患咯血近在國子適奉熱河校書之 命君分

得遼金二史中多難字脫舛君旣夙勤職又遭其諸兄弟連歲凶
問君篤至性不勝其悲精勞神傷故舊疾時作生平待人誠信周
愛於同鄉中死喪如甯邑周君應元鼎邑夏君鼎奎王君天錫侯

邑閔君鵬元皆病卒京邸盡賴其經理喪事及運櫬以此亦聞名
見思於人君以癸丑十二月赴官長蘆至天津疾復作遂不起及
次年正月十三日卯時卒享年四十有七妻周夫人在堂男子一
佑孚業儒女子三長適名族次季方許字男孫三代裕代昌代興
皆幼君伯兄子永齡紹言以丙午己酉繼舉於鄉乙卯會京師持
其孤所進行實求余爲君家傳余不敢辭君於余爲南北同年余
於辛丑春始來京師時君未補國子屬余爲其伯兄五十壽言云
將以是秋南歸壽兄余因引韓愈之稱歐陽詹謂詹居京師其父
母之心樂見詹以養志爲孝蓋君父事伯兄余故誦此爲尼其行
君亦以余言爲然後余聞君竟歸省其兄於政和學署嗚呼君之

國朝文獻通考卷一百一十一
學行一歐陽詹乃其年壽亦一歐陽詹而余前日之言竟爲君之
死讖也而君行義見於家庭孝弟信於朋友是亦可以傳矣

右家傳陳從潮撰

向宗乾 饒自儼 印緒

向宗乾字竹溪湖南乾州廳歲貢任咸步縣訓導教法先識量而後詞章門村甚盛以母老告養歸凡十餘年母卒既除服不赴選會辰沅道傅勳均應民田以其行誼爲眾所服從欲接入幕相贊畫辭之築聽 軒於鎮溪上泉 漱瑩古松交蔭終日吟詠其閒年七十八著有聽濤軒詩集同應饒自儼字若翁貢生官新甯教諭壹以獎學譴材爲己任朔望聚諸生誦臥碑講 聖諭時文競務華藻自儼獨繩以義法邑風氣爲之一變捐俸重修 文廟文昌宮新建古山塔編修謝振定爲敘其行實以禔於世卒年八十餘又印緒歲貢生生平溺苦於學不擾世務故城居以性嗜山水

膏結廬於雙江寺側水木明瑟終日眺詠其閒意自適也官常留
訓導教人務爲本原之學見同官索新生費取盈其欲心鄙之
曰道義之交自今始而遽言利則持己待人兩失之矣歸日囊篋
蕭然書籍外無長物

右傳李元度撰

丁杰

教授諱杰字升衢浙江杭州府歸安人自少篤志問學貧不能得書就書肆中讀自早至日稷肆主閔其勞爲具食輒卻之遂肆力經史旁及說文音韻算數咸有所得乾隆辛卯科莊侍郎廷璵主浙江試發策問大戴禮教授所對尤賅貫遂舉鄉薦入都時方開四庫館任事者多延之佐校小學一門往往出其手因與朱學士筠戴編修震盧學士文弼金修撰榜程孝廉瑤田等相講習諸君咸重之在都十年聚書至數千卷手寫者十二三辛丑科成進士當得縣令以親老願改儒官其後十餘年選甯波府教授嘉慶十二年二月卒年七十子二授經傳經教授爲學長於校讐與盧學

士最相似得一書必審定句讀博稽他本同具用小紙反覆細書
孫侍御嘗謂曰君書頗不易讀遇風紙輒四散不可詮次奈何於
大戴禮用功尤深胡處士渭禹貢錐指號爲絕學教授摘其誤甚
多嘗謂緯書移河爲界在齊呂填闕入流以自廣夫河患之棘由
九河湮廢而害始於齊管仲能臣必不自貽伊戚班固敘溝洫志
云商竭周移秦決南涯自茲距漢北亡入支則九河之塞當在秦
楚之際矣又嘗校雅雨堂盧氏所刻書傳謂此乃惠徵君夏輯本
頗疎舛如鮮度作刑以詰四方誤讀困學紀聞此謬之甚者五行
傳文不類讀後漢書注始知誤連皇覽然何以合併爲一亦不可
曉最後讀明黃佐六藝流別則此節全載其中乃知惠氏又因黃

而誤也又校鄭氏易注摘其誤引漢書劉向傳鄭氏注者一事誤引乾鑿度者一事乾鑿度注者二事引文選西征賦注不能定爲鄭者一事皆諦當不易讀論語未知焉得仁謂孔傳邢皇兩疏所解並似經文有關失證之論衡問孔篇中論智行篇均讀知爲智釋文知鄭音智東晉李充集注云子玉之敗子文之舉舉以敗國不可謂智子文之事無可驟稱其亂不如甯子之能愚蘧生之可卷未可謂智也鄭義雖不傳當同於宏度勝孔遠矣由管子內言戒篇我游猶軸轉斛南至琅琊云猶卽由寫者誤重一由字又涉下轉旁遂衍軸字轉斛卽轉斛魚與角付與斗均形近而譌孟子轉附寰宇記引齊都賦晏子春秋並作轉斛趙氏旣以轉附朝儂

爲山名而又言朝水名也則仁山金氏謂海旁之山潮至如舞亦
非臆說也又謂字母三十六字不可增併不可顛倒見端知邦非
精照爲孤清不可增濁聲也疑泥孃明微來日爲孤濁不可併清
聲也非卽邦之輕唇不可併於敷微卽明之輕唇不可併於奉影
爲曉之深喉喻爲匣之深喉曉匣影喻不可顛倒爲影曉喻匣也
教授所著書曰周易鄭氏後定大戴禮記釋小西山房文集其爲
人校定刊行之書曰毛詩草木蟲魚鳥獸疏方言漢隸字原復古
編困學紀聞補箋字林攷逸蘇詩補注

論曰宗彥獲交教授時教授齒已高學引爲忘年之友竊觀其爲
韶韶然信古自愛情厚士也讀書強力鏗而弗舍垂沒前一日猶

誦五行大義以支辰配合之說告其子嗚呼其嗜學弗可及已

右傳許宗彥撰

彭翁

讀書而求致用未有不自治身始也身之不治或有所施於用非
妄卽苟故君子務先治身然孰謂治身之勇且嚴久而不懈如吾
南池者竟至以葬期告也嗚呼南池死蓋逾年矣天下賢人君子
爲 國家惜南池稱南池未絕於口然人之所以惜南池稱南池
皆以其後之建樹而不知其所以致此之由吾交南池垂三十年
每見未嘗不見其益進敢不爲之實紀掩諸幽以壽無窮南池世
爲蒙化人大母趙州蘇氏吾師海門先生堂兒女也先生時以清
修厚德型於鄉里南池實仰止之自失恃後率從大母依止蘇氏
以析義理遏嗜欲爲喫緊事雖半菽不繼不敢一介取非其有日

把一卷從肩終夕凡少年馳騫事絕無所染若性生然趙州人士之有識者靡不引車而益退然若不及其以貧故姍侮之者釋然無所於校也吾與間隔必歷數年始一聚首中間惟自辛卯之春迄明年夏五對牀京邸口或易衣而出凜然清癯驕榮盡落一起處之必時一頷笑之有節覺是時德性已造堅定地矣復不得志於禮部及歲辛丑乃以大挑例分發試知縣粵東補封川令歷五年調任香山每一達書無不以不變寒相助歲在己酉躬出洋梟鉅盜林亞五等以此特受上知授五品服擢同知岳州當事者仍奏請還均檄署同知瓊州專捕餘盜遂歷諸幽險備得情形將見常事而陳之疾卒於陸豐舟次嗚呼吾南池之爲南池豈爲是

區區提民役數艘出洋梟盜畢乃志事耶願不弔於天凡思竭誠
極慮以效於 朝廷者十不展一而遽奪其年使世之知南池者
僅以是事豈吾南池之幸耶且世雖以此一事知南池而不知其
有以定其素幾以爲有天幸則南池何樂有此知矣方其任封川
也前政虧帑幾七千邑小而瘠民困復不一端爲之末期年而民
信嘗與余書言其略以地連粵西盜數來往無時緝治不力必無
以安良已而獲連劫鄰境者數盜上官反欲抑之慮南池欲以此
見功將必形他玩盜者罪而不知其相時之急此以爲切務也及
後之出洋也亦以信之結於民者深能必民之不我貳也其致家
人書曰吾方出洋心知戴 君目遂無賊及其擊賊目知有賊心

遂無洋嗚呼此豈無所挾持而倖於一試者乎凡民之所以信南池者何也信其身之治也夙夜未嘗偷安脂膏不以自潤有必平之喜怒無相市之話言而已猶傳其在瓊州也日惟啖素未嘗進一肉味吾知其爲阿好者稱之之過而要其淡泊自持之素始終不易可見也初娶某氏繼娶趙州龔氏在粵時以尙無子納一妾已皆生而不育臨終力疾啟父請以弟之子書城爲嗣嗚呼孰使之然夫孰使之然夫生卒葬年月日別書於石藏諸幽銘曰民之命兮帝時思以康也分人以政兮孰其以爲良也正人而務自正兮而不延其生也天而呼可應兮願其致與詳也

右墓誌銘錢漕撰

君姓彭諱翥字竹林雲南大理府進士選廣東封川縣知縣調香山乾隆四十九年春余寓端州彭君來見執弟子禮甚謹其人秀羸多能實實然一學子也所著詩甚多頗得唐賢神韻別五年音問亦不時接忽一日見訪山中帽曳孔翠胡襜襜盛服而至余驚問所由方知立功海外裁入 觀歸五十三年海賊倂張有號平波大王者率眾爲寇福敬齋公相總督廣東調水師營兵出海擒捕飭香山令辦軍需半年不獲一盜將弁無以自解反造蜚語誣君供張不周器械朽鈍福公怒召君入厲聲曰汝齷齪不任事雖文官我獨不可以軍法從事乎出諸武弁密揭示之君神色不變但申明香山小邑所辦糧餉業費三萬餘金所以久而無功者緣

武弁退縮不能軍之故公相默然顏稍和公知兵事不可以口舌爭也卽奮曰請願解任親往擒賊公相莞然曰汝孱弱書生果臨陣得不被賊靴尖蹴倒乎曰請非手打賊也乞公相賞精兵二百聽請指揮必有以報公相許之君歸畧捐俸支帑造戰船三隻料簡槍礮火藥賞賚糗糧犁然備具著短後衣率健兒戎服出哨諸武弁以爲迂且妄無不匿笑者君禱天妃廟乞風舟中忘帶鼓卽借廟中鼓聲之以壯軍威次日黎明風果大順君徑出海口公相命諸武弁會勦相遇海島中武弁搖手云風雖順少頃卽轉宜緩行或云今日反支日也不利行師或云海賊出入無定須探明所在巢穴再往君毅然不聽飽餐士卒揚帆竟行行百餘里遇盜船

二隻發礮擊之殺十餘人賊久不見官兵突出不意驚乃遁去君
知數日內賊必聚眾來乃入島約武弁一齊出洋眾武弁亦媚君
之先得功也唯唯聽命翌日君見風順霧消開船出果賊船八九
隻從上游來初猶逡巡欲避繼見官兵少乃持槍直犯發礮擊之
閉君知賊以穢物相厭勝也殺黑犬取血盪礮礮果發適大軍亦
至擊破賊船賊盡落水千百賊頭出沒海面如浮瓜然反向官船
號呼乞命君命以鐵鉤拉起之而以長繩彙縛之累累然魚貫者
七百餘人解督轅請示公相大悅飛章入奏奉 旨彭壽著賞五
品頂帶送部引見授湖南岳州府同知福公奏畱辦善後事宜仍
補瓊州同知權知府事

贊曰古文武無分途然卻毅說禮樂敦詩書左氏以爲美談幾幾乎有欲分之意吾門下文士多武功少彭君亦文士而能立武功以張吾軍覺山林生色終以文弱故染煙瘴亡年裁及艾爲可悲也猶記君在隨園拜別余厚餞之贈幣帛不受贈服脯脰畜不受但乞崑山徐氏九經解及他稗史唐宋人文集載滿船而去嗚呼此鴻覽博物之張茂先所以證壯武哉

右傳袁枚撰

張性

張性字令嘉湖南華容人援例官河南運河司開務方嚴不爲上官屈嘗以私放閘門鞭巡漕侍御家人乾隆四十六年黃河水陡起丈餘漫曹儀之青龍岡性處壩所挂纜合龍催壓土料草稽十一月二十七日夜深埽動人夫熟寢性大驚急鞭夫起不及罅已裂尺許已而埽走五十餘丈性隨陷沒是夜沒水者文武僚屬數十人兵役民夫無算性所著有黃運備覽死事上聞蔭性子克

謙按察司知事

右傳李元度撰

皇朝通志卷二十七

三

黃齊雯

黃齊雯字舜卿號蒼川湖南湘鄉人父崇階監生性最孝齊雯乾隆癸卯舉人早喪母事父亦孝謹至老彌篤友愛諸弟怡怡如也持躬端嚴人莫敢干以私非公不至邑廨官安仁教諭以端士習正風化爲己任諸生以詩文就正者口講指畫如塾師嘗徒建節孝祠於學宮側以符定制有劉某妻馮氏歸甯其父兄鬻爲巫姓妾馮不可巫夜劫之去馮以死自誓巫不敢偏夫鳴諸官方待訊齊雯嘉其義紀以詩一時傳播遂得保全以丁艱歸主講漣濱書院從遊甚眾後截取知縣以年老未赴卒於家著有安仁詩草一卷

卷

右傳黃楷盛撰

翁咸封

君姓翁氏諱咸封字子晉一字紫書晚號潛虛蘇州常熟人順治丁亥進士河南參政諱長庸之五世孫康熙丁丑進士福建上杭縣知縣諱大中之元孫曾祖俸祖汝明父謙 馳贈修職郎君以乾隆癸卯科舉於鄉乙卯揀發二等嘉慶戊午選海州學正在任十二年卒於官嘉慶壬戌之春余自吳遷海州見君貌沈而言簡知其篤行績學君子也海州雖隸江南隔海潮河淮江湖之廣學士大夫罕至地瀉而瘠數被水潦民治生不給故就試於淮安江甯者鮮 國朝以來領鄉薦者僅一二人余思振興之術責在師儒今適得君爲學正殆將興者機乎迺謀建石室書院以君爲主

講是年水旱游臻君進救荒之策請振得行余以引見謝事仍
留督察其分地檢覈按戶注口之密莫君若也君雖跼伏於學僚
乎然其爲人守義不苟通經史明體達用於吏治民生得失利病
無不周悉行其言輒有成效也明年余復任與君圖政所當先者
於是誅吏胥之蠹民甚者兩三人寬州民籌鹽之禁而剪鉏梟販
鉤致掖刀巨盜寘之法自板浦開渠至城東門爲甲子河以通薪
米凡有興除君必愆愆而成之有一言一行之弗協於義弗宜於
民者必規改乃已嗚呼誠良友哉旣數年民頗樂業於是選開敏
子弟納之書院而厚其廩以書院爲試院請學使者親臨併考以
省跋涉之勞修百有餘年未修之州志人謂編輯精詳甄錄嚴慎

蓋經君校正及其門人許生喬林之筆居多州大如斗五年之閒
蓄害不生文獻粗備非夫人之力不及此孰意其遽歸道山也嗚
呼惜哉君至性過人少時舐其曾大母病目而痊割左股以療親
疾季弟疾亟叩頭以禱額爲之腫家貧好讀書蚤有聲名公卿聞
晚歲絕意仕進雖豆羹麥飯不贍怡如也余嘗以秩滿保薦爲令
牒旣具力辭不就豈薄令宰俗吏而不爲耶抑胸中有所不可而
不出耶觀其所以佐余者卽其能爲循良可知矣余移知通州聞
丙寅五月開王營減水壩海州平地水深數丈君被檄渡民保大
伊山諸高阜處撫振紛紜多所全活復還定勞來安集之此豈迂
儒曲學所能爲而老於文學嗚呼惜哉生平著作矜慎有文四卷

詩三卷嘗追念曾祖祖兩世節母懿行蒐輯邑中自明以來列女
事爲虞山壺史未脫彙屬其子心存績成之心存嘗從余游綽有
父風必能繼其志也君生於乾隆十五年四月五日卒於嘉慶十
五年四月十四日年六十有一孺人許氏先君卒後孺人張氏男
二人鏡許出娶曾氏心存諸生張出娶許氏女一適長洲太學生
陸廷弢孫男三俱幼以嘉慶十六年十二月十一日穿許孺人墳
合葬於頂山祖塋之右心存謁余爲志銘因敘次同官之誼及其
行狀而銘曰

輔牧以政規罷勸行迪士以學行修經明政學蘊躬辭榮卻薦道
在潛虛貧同次憲我亡畏友士失明師流庸復業安忍忘之石室

傳經式穀有子幽宅既安昌其後起

右墓誌銘唐仲冕撰

周系蔚

周系蔚字文芑號簡堂湖南湘潭人乾隆四十八年副貢官永綏
廳訓導

耆舊傳簡堂爲石芳侍郎母兄性恬澹鄉居絕跡不入城市家無
儋石儲索逋者日不絕或得侍郎寄金又以分遺知故不計家之
有無也

右湖南文徵羅汝懷錄

按周公著有
春風堂詩草

國朝詩林類考卷之二

--	--	--	--	--	--	--	--	--	--

馬時芳

道光十七年十二月十二日鞏縣教諭馬公卒於鞏之學署門人劉瑞律等治衣衾棺木張鶴年等七十人賻埋骨之費鞏之人士及門弟子皆塗咨巷嗟咸謂公繫鞏人文之重不宜遽至於斯也迨年正月二十四日諸孤重等將以公之喪歸禹鞏之人士皆哭送去城十數里而後返弟子張鶴年等送至汜水而後返劉瑞律獨徒步二百里送至禹畱三日而後返孤子重將以本年四月二十日葬公於祖塋先期徒步百里叩門泣請爲誌銘栗自維學疎識淺不足以傳公之真願念交公深且久不容以固辭公諱時芳字誠之號平泉又號淡翁開封禹州人世居禹之官司園自明太

師端肅公以勳德名世嗣後替纓不絕八傳至公會祖諱熠 封
徵仕郎曾祖妣劉繼趙皆 封孺人祖諱季吳 封徵仕郎祖妣
劉 封孺人父諱興淇以拔貢生選江西直隸州州判妣郭 封
孺人公生而英偉不凡八歲時弟時薰以飲不潔賜僮僕食公卽
訶止之曰爾以爲不潔彼以爲潔耶何不恕乃爾又得省游王先
生以爲師先生嚴甚其母曰吾子有望矣公年十五卽以詩名於
世聽省游先生講學因撰求心錄縣歷五紀文踰十萬反躬切己
艱苦磨勵甫弱冠於宛陵得夏峯所輯理學宗傳潛心默玩奉如
師保卽卓然自命爲古人敦踐履慎取舍博覽經史爲有用之學
二十一歲補博士弟子員明年癸卯中副車屢困棘闈迨嘉慶甲

戊謁選補封邱教諭年已五十四矣公天性凝重危坐終日無倦容所居當足處跡深寸許至是以所學訓諸生首分辨義利略庸脩勤勸課士習翕然興起學職之替也嘗趨奉府縣吏冀檄牒判事因緣苞苴稍穢自肥守令因役使之以行其意公獨修潔自愛飲射讀法外無私謁令或牒事卽卻不受曰吾知訓士而已有兄弟不和懷白金百兩與公求直於令者公粲然曰此豈可污我哉昔人云至難得者兄弟是皆吾教化不明當罰吾未幾以母憂去職道光八年補鞏縣教諭所以教士者無異於封邱公年六十有七志未嘗不立而行不敢苟其箸書辨白聖賢志行多昔人所未發其尤偉者取黠妄之書援引偏說者駁正之流俗下士駭歎詆

謀不知皆公躬行實踐之餘又考之朱陸二子之書而確有可據者也郡邑吏市價減民值之半曰官價公一切從民或以爲矯公曰設官以爲民也而使民多官吾甚鄙之且官卽貧不貧於負販吾見劫者矣加刃於頸主人獻金勢在故也以勢行與劫何異小民合掌頌之曰天心天心待士若慈母務掩惡不忍以不肖聞與人交情厚而禮恭煦煦若易與也義所不可卽萬夫莫回介節自持無世俗猥瑣態嘗自恨曰吾儕世指爲笑柄獨奈何復蹈之輩士有十人來學公作十人來學記一時風動來學者正未有艾乃天不憖遺遽捐賓客豈不惜哉公生平孝友忠信習臆光明磊落有不可一世之槩爲善如不及敬愛賢士眎貴勢蔑如也嘗語學

者曰當爲第一等人俗儒溺詞章希富貴不自計樹立若何此鄙陋之至無足與論卽讀書只作口頭講說以才華自矜不務躬行皆可恥也公生於乾隆壬午六月初八日子時卒於道光十七年十二月十二日辰時年七十有六配王氏江西新安知縣諱辛女繼李氏例授奉直大夫諱宗華女王氏諱應聘女側室饒氏子男二人真配張氏曉配劉氏俱饒氏出曉出繼時薰女二長適登封戊辰進士奉天府錦州知州傅鍾瑑王氏出次適新鄭業儒劉英烈饒氏出孫男一阿遲幼孫女二俱未字注傳信錄箸垂香樓詩彙挑鐙詩話行於世風燭學鈔馬氏心書樸麗子諸書並藏於家爰爲之銘銘曰

人惜公豐於學齋於遇何爲晚運方通而遽遭此閔凶余羨公樂
乎天安乎人命義是守不爲窮銘君之行瘞幽宮木夔遠遁兮山
隨潛蹤更何物兮敢青天白日之下而過公馬鬣之封

右墓誌銘陳栗撰

顧禮琥

君諱禮琥字西金蘇州府吳縣人系出吳醴陵侯雍其自虞山遷之府治者曰文莊公某明有以御史養親歸朝命免其宅徵因名其地曰天賜莊者君之高伯祖宗孟也顧於吾吳得姓縣遠中間代緒再絕而紹遞相爲後君所後祖考曰榮世考曰泰來妣曰吳曰嚴皆 贈如君官本生祖考本立妣張 贈如制君生立秋前一日贈大夫君感夢徵故以名三歲問所好曰好讀書益奇之十八補縣學生每試輒冠軍名譟甚乾隆四十五年舉於鄉又五年成進士當得知縣未及而以河臣薦爲山東東平州州同遷泉河通判再遷河南上北河同知以病自免不能歸卒河南年五十

六娶陸 贈宜人繼程 封宜人皆有婦順先卒一子穗林一女
適附監生蔣超曾卒以嘉慶八年五月二十六日明年孤穗林奉
其喪還卜以年月日葬某鄉某原以兩宜人耐君敦樸力內行謹
於財好愁爲人有方幅不可干以私於文章尤善制舉業居家爲
舉業師遊從百十人吳之名善舉業無在君右者亦善鑒人嘗貽
余書京師才其所授業生潘世恩吳廷琛以謂此鄉閭英絕未爲
君知故亟以相報其後兩人先後取進士及第第一人雖余莫知
君何繇得之也生平靜退不問門以外而自諸生時見謂能文要
人爭求識面書幣造其庭不得已往謝爲草奏適中 上旨遂畱
不遣復尋被薦起家十餘年雖再進官未離幕府不身領事賈其

故所居屋以自資。上東巡有欲爲之地者，固謝以免。從大府往來，竹槍諸工防禦，教匪將護京兵，由豫入楚，所得皆平敘，無奇擢。友愛其弟禮璜，引以入官。今爲汲縣丞。始所與余皆爲諸生同里，間相好，如君不過六、七人。命酒高譚，慷慨所志皆甚遠。其後分散，彫落或僅僅取科第，或并不及取科第。其仕者或遂或不遂，忽忽人生一世，亦且無幾，何存矣！其遇窮無過余，然余茲五十，漂搖江海間，猶得名爲後死。往往諸君生死之計，轉或待余經畫。今又哭君之墓而銘之，烏虜豈不悲哉！銘曰：

別君星紀，凡再移中間，再見惟京師。訝我齒脫神貌，非若亦撫髀。爲酒悲芒芒，天地一逝機。修短隨化，吾何期。吾墓孰銘，子庶幾今。

君喪還庸豈知哭不憑棺赴逾時君孤執言徵我辭使我執筆橫
涕洟

右墓誌銘王芑孫撰

鄭環

漢世重太學太守或自置校官沿及齊梁有儒林參軍勸學從事
之日後始徧立庠學以文行兼優者充之顧世多輕視此職其人
大都既老得官汲汲以救貧爲務所以課士者制舉業外亦忽不
措意豈知宏風訓世政化之原似緩而實急也同郡鄭君年二十
四爲縣學生員五十七中本省舉人七十始選授揚州甘泉縣訓
導幼有至性受乳必跪嘗割股入藥療母疾居兩親喪毀瘠盡禮
教人以孝弟爲本讀書必徵之施設使不徒爲空言講貫之精一
時塾師無出其右遠近從游日眾束脩所入分贍戚鄰之貧者里
中兩遇旱饑營賑事甚力他如普濟堂敬節同仁寒衣小濟放生

諸會靡不悉心經理嘗客授浙江布政歸君景照所浙俗多火葬
作火葬說通禁之嘉興湖州偏災省例但借籽種君請無論鄉圖
宜按災給賑且曰救荒如救焚溺豈可因焚溺之少而不顧耶布
政感其言卒爲申達大吏行之君之舉於鄉出大興朱文正公門
每見輒條舉利病或正容進規乾隆六十年大挑舉人君鬢髮盡
白或疑年不實諸城劉文清公曰此不作誑語者予視學江左所
知遂以校官注選嘉慶元年與千叟宴 恩賚如例甘泉故有忠
義祠木主盡失搜剔舊志及應增入者詳請奉祀其於孝節皆表
章不遺又以各郡有恤嫠會揚州獨無與紳士議請於上官籌款
舉行願經費不足時予方輯揚州圖經君屢爲予說欲告當事更

籌集費予雖無能爲力而心則違之君遇事敢言勤懇之意形於辭色然貴人或有厭其煩同人并有疑其僞者卒之厭者亮其誠疑者息其謗而後知君之真固不可沒也君於經義多有譏述亦汎濫他書年雖耄日手一編罔倦其文與行如此使學校之地設官盡得如君師道有不立士風有不振哉君諱環字清如以嘉慶十一年十一月卒春秋七十有七子旦興乾隆庚子舉人旦勳及孫良弼皆國子監生門人左輔旣具狀初撫部彭齡作傳貴郎中徵銘其幽良弼又以表墓爲請懷玉與旦興爲同歲生君卒於官實懋含斂遂揭其大端俾天下之任此職者知所矜式焉

右墓表趙懷玉撰

按鄭君舉於鄉出朱文正公之門考公典江南鄉試在乾隆五十年

政進鄭先生以嘉慶十一年十一月二十一日卒於甘泉縣訓導
官署其冢孫國子監生良弼既述其行以請於有德而能言者而
先生之門人知縣左輔又自爲之狀故吏部郎中貴徵誌其墓安
徽巡撫初彭齡又摭大節而爲之傳則先生之美言善行亦庶乎
備矣然世臣辱知於先生者深所言富有當先生以經學名字內
爲宿儒然人稱先生爲經師則先生不樂卽世臣亦不以經學推
先生也先生之治經也尙調停漢宋之間又喜採異說然近世之
治經者數十人世臣蓋盡識之雖精猶不一大略以說經名高眩
鼓聾瞶而巧爲取利耳退覈其所爲則僻違怨誹與所學相反而
先生之持身接物必準諸禮廉節退讓至死稱道不亂此可以爲

躬行君子者矣先生之志在經世所學旣成而不得用則常與當路諷誦民間所疾苦於兵政海防屯田尤詳切然當路莫有能聽之者其偶有聽受則事屬微末而節目條理復不能稱先生之指是故當路之遇先生也雖貌禮口頌而其心則未有不倦且厭者先生審知之然有所聞見必詳疏以告不已世臣自弱冠邀遊見器於公卿蓋亦志先生之志詢今證古卒不得一見諸實事而其言又每驗諸公亦以爲悔然而繼言之復不見用積悔以成嫉者且比比也世臣於此蓋有戒心焉然先生每有欲言必與世臣商可否世臣或審勢而沮之則喞然怒曰天賦子以智勇蓋將有爲子安知當路者不有一時之明能行吾言以全活生靈而不負天

命耶爲一己之避忌遠謗遂忍爲默默非吾所以望子也先生之
操持堅定不從流俗也蓋如此良弼以嘉慶十二年四月十三日
扶先生柩歸葬世臣故揭先生之志俾良弼鐫諸石背使後人知
先生之可以爲百世師者在此而不在彼也先生諱環字夢揚又
字清如謹述

是日辰刻聞先生凶問急往唁入臥室見先生朝衣冠端坐持
筆疾書予退出至聽事問諸生先至者則曰先生以丑初疾革
浴畢斂以公服天始曙先生忽起索紙筆曰吾注易有四卦未
卒業是以回光續成之子遂與諸生坐候至酉先生擲筆長歎
一聲而瞑急昇上牀身已僵冷而卦注畢矣去來能自主如此

實生平所未聞見附記以告後世

右碑陰述包世臣撰

國朝文獻通考卷之...

三

--	--	--	--	--	--	--	--	--	--

蔣勵常

先生蔣氏名勵常字岳麓廣西全州人父振閭五歲時祖病思蔗
悵悵然行五里外得蔗園園人驚負歸而畀以蔗長好宋五子書
及兵法醫卜金川用兵時隨父官四川攝龍安府事及金川南路
西路糧站其廩食皆手自俵散役去他站來者至四千人有勳官
至站驕貴甚陰使悍役折其氣而徐出禮之遂帖然去大軍進至
噶拉依糧路險遠有放夾霸者土番也劫糧車於噶喇穆不及告
而自以兵役擊殺百餘人後遂不敢犯先是自南路糧站改西路
亦嘗以數騎遇賊百餘卽登高阜指畫坐笑語徐按轡行賊疑憚
未遽前度且出隘大呼從者曰驅遂馳去大吏聞之曰以子才參

吾軍事五品官可立致也辭不就舉乾隆五十一年舉人時州大旱貸錢居麥秋得雨施麥種於人明年又饑民剽掠爲變見州牧曰請無用兵而先發粟以振某往眾可立散遂以無事官融縣訓導去省遠士不樂鄉試乃汰文書錢例入官者以便貧士或以三百金賄獄事怒責之請除名於學使巡撫汪公重其名將改邊缺教官以擢知縣吏索賕不應遂引疾歸主清江書院十年士始苦其難繼感其恩終服其教嘗曰人錢帛多寡皆天定之凡吾所賜皆其所自有而假手於吾者也非損吾之有何以德爲或緩急有不及赴者輒悵惋大有所失蔣氏丁萬餘人散遠不相識乃建安陽倅琬之大宗祠修譜牒以禁族訟別婚媾而祭祀期會無寒

暑必親仕年八十餘每日猶徒步省墓當往來道有博戲者聞杖聲鏗然皆避去既卒門弟子百餘人以齒引奠於庭其居首者年亦七八十矣皤然老儒跪拜哭不勝其哀見者嘆爲盛事其來哭而不知名氏者日日有之有文集八卷曰岳麓齋皆敘述古儒先條教及訓誨子孫門弟子者也其子知名者數數致孫琦淳梅曾亮曰蔣先生蓋純孝人也方侍親從軍嘗機赴變子子守繩墨者固不出此及家居教士復古禮泛愛周急粹然一出於儒者之正豈境與人殊哉昔曾子論孝至於戰陳莅官居處朋友之際斷一樹殺一獸不以時不可以爲孝蓋孝子之道廣矣備矣精一行之無不貫吾乃於先生見之

右家傳梅曾亮撰

右家傳梅曾亮撰

談秦

談秦字階平江甯人乾隆五十一年舉人官南匯學訓導勤學精思博覽得梅氏算學之傳有測量周經正誤周髀經算四極南北游法增補武成朔閏譜召誥日月補歲月建異同辨次春秋歲次考三統術推一歲食限數交食一月終數推漢高九年六月晦孝文十一月晦孝文元年至七年大小餘孝文二年五年天正冬至靈帝光和元年大小餘四分術譜劉武帝五年天正冬至三統術補古算書細草十餘事冬至權度數略天官書節次年分辨分野辨圓壺周經積寶祖沖之補法辨黼內方非十尺辨操纒厄言正誤喪服傳溢說五服經帶數凡若干卷又有觀書雜說二十卷則

考論經史事也

右文獻徵存錄錢林撰

陳慶

君諱慶字樹青先世江州人宋史稱義門陳氏是也元時有諱理
定者官撫州路同知子孫遂家金谿爲著族君祖諱人鳳父諱際
輝皆不仕君由國史館效力議敘授福建南平縣嶮峽司巡檢
調同安縣石灣巡檢又調彰化縣貓霧巡檢林爽文之亂解餉渡
臺灣中流遇風溺焉天子以其死王事卹如陣亡例賜祭葬
入祀昭忠祠贈雲騎尉襲三世其家人求其屍不得舉衣冠招
魂葬之將勒石以誌甲寅三月其弟惠疇見文田京師因以銘辭
屬文田聞爽文滋事其故由長吏貪殘不能奉天子德意以教
養斯民致上下相猜積而成變君所至視民如子闢地多港汊須

浮梁吏胥輒藉詞伐人墓木君嚴設科禁豪吏憎服民苦差絲累
君以時徵調有制民稱便彰化有陳姓兄弟爭產君置酒諭曰吾
與若同姓當以吾家事勸若不聞有十三世同居旌門貸粟者乎
若等以產故致訟卽非復人理矣兄弟皆感泣去訟遂解其理民
皆此類惜位卑秩微所設施不能及遠然使官是土者皆似君又
安得有稱亂以干天討之事哉君以一巡檢能修其職撫其民卒
爲國以實其生雖未盡厥施抑已過人遠矣君好義期以必爲在
京師時閔鄉人之不克歸葬者倡議置義冢令人守視其鄉人或
以冤繫獄禍不測君聞之曰是兩世一身一不幸無遺種矣力爲
營救得脫金谿人至今稱之君生於乾隆戊午八月十四日卒於

乾隆丙午十二月二十九日年四十有九娶王氏無子以弟豫子榮祖爲後襲雲騎尉惠疇曰吾兄以身殉王事蒙天子恩卹及於三世亦可以無朽矣獨恨骸骨不得歸葬願爲銘以志墓魂有知尙來依此也文田不敢辭銘曰

其生也能其死也能忠委軀乎濁流返魂乎幽宮命之蹇恩則崇昌爾後宜無窮

右墓誌銘姚文田撰

164-604

MIN

曾日琇

西江有篤實君子曰曾日琇來宰上元與余爲忘形交通家往來事吾母尤敬母年九十餘時坐板輿赴君署飲酒觀劇已而遷任蘇州夫人來別與老妻泣下甲辰春余赴粵東過南昌訪君則頽然衰矣須扶曳乃行而家貧益甚又二年接訃知君考終嗚呼吾母亡十餘年矣每一見君使思吾母今君亦不可見而君之高義終不能忘常思作傳以永君苦不能悉君事迹恆悒悒於懷適其孫懋相過江甯細詢之才得其失官得官之顛末而其他則卽君年幼亦不能舉其辭也君以流外官爲漢陽尉膺卓薦遷福建莆田縣丞權臺灣縣事有黃教者以盜牛犯案君杖而遣之適莆人

林椿與縣役吳經媾一雙有隙遂誣控經與黃教謀反兵器悉貯經家君親往搜捕杳無蹤跡隨訊林椿盡吐實情遂以挾仇誣陷申牒大府未兩月黃教又盜牛懼捕聚眾三百人張旗爲亂巡撫鄂公大驚特劾君庇逆當誅會鄂公有他事爲將軍密奏上怒曰曾曰琇以縣丞署令事尙不可隱逆賊情汝爲巡撫乃聽內地人民爲賊擄去竟不奏耶其時君已擅動帑金募村民擒黃教斬之而鄂公亦已去任新撫來深知公冤然據實奏則從前承審諸大員俱干嚴譴乃授意勸君誣服君性仁慈不得已伏疏縱之罪新撫以縱逆虧帑擬絞具奏奉 上諭曾曰琇爲殺賊動帑非尋常侵蝕可比且其才似有可用著送部引 見君見 上叩頭謝

恩遂蒙 恩發江南以知縣用補上元令嗚呼公老吏也就罪科
罪不能預知日後之爲亂又仁人也不忍人而自忍拌罪己以救
同官此其心自分死矣孽矣萬無全理矣況以兩巡撫劾一縣丞
如風掃落葉耳而所縱釋者又叛迹昭然雖萬死固當卽至愚人
敢希意外之恩哉乃初參時 皇上不允再參時 皇上加褒
聖天子之聰明睿知千載難逢而君竟身逢其盛道路聞者皆控
揣不到爲之舞蹈流涕而況君之身受者乎君抵任後自言刀鋸
餘生萬念俱灰惟有勉爲循吏以報 主恩養廉外絲毫不受重
門洞開巨細必親爲政清而能和交友推心置腹愉愉如也制府
高文端公薦授蘇州管糧同知凡三年以老病辭官卒年七十有

八

贊曰余老且病遇人有傳志之託輒愁眉惟於君若有所不得已於懷而百計以求其事迹得君孫數言如獲奇珍急急書之然則君之為人亦可想矣

右傳袁枚撰

甘運源

道淵姓甘名運源號嘯巖又號十三山外史道淵其字也漢軍巨族曾祖諱文琨康熙閒建節滇南死吳逆難謚忠果傳至道淵家中落道淵與弟運瀚奮志下帷思以科第繼前業屢試不中遂侈然自放隱於詩酒二甘之名諫一時焉道淵性拘謹而疎慢睥睨一切與人無可否援之而止不論王公大夫與僕役下走與之飲卽飲與之博卽博人視道淵爲棄物道淵視眾人爲芻狗也性耽詩能書畫旁及篆隸八分詩學宋人遠追漢魏得其神而不效其體時李眉山陳石圃二先生方領袖詞林陶鑄後進見道淵詩許爲文壇健將朝夕觀摩學益進余嘗與道淵益亭上元作元宵聯

句一百韻漏下得四十韻道淵攜歸以六十韻卒之典重博雅傳
誦一時畫學宋人楚楚有致篆隸八分俱有古法尤善刻小印純
乎漢篆不屑作前明文三橋伎倆得者寶之口吃喜議論每一啟
口座客圍然猶憶冬夜與道淵論史事余謂古人作事有幸有不
幸張子房博浪一擊似匹夫市井所爲使不能助漢成帝業又隨
赤松子遊以避禍亦不過於俠客列傳內增一荆軻聶政耳又何
能功名煊赫如此其盛也道淵舉狄梁公受武后封屈身女朝雖
一語挽九廟之失其功甚偉儻其時五王之兵不競敬業之檄空
傳梁公能以隻手復唐祚乎兩論默合相視狂笑道淵愈吃愈笑
愈笑愈吃汗淚俱下戟髯怒飛座客俱爲傾倒其性情風致類如

此晚年無子遇益窮不得已而考職赴廣東象岡司巡檢任年七十有七卒於官余採其詩並其弟運瀚詩入 熙朝雅頌集以傳論曰道淵其東方曼倩流亞歟澄之不清激之不濁與世和光而矯矯不汙卒之以名士作下吏執手版拜上官憤憤以老天豈亦以遊戲待道淵耶噫奇矣

右傳鐵保撰

甘肅嚴運源襄平人爲忠果公文焜曾孫少隨父司馬公遊川楚滇黔西至衛藏故詩體渾厚適勁有唐人風味爲劉海峯先生弟子海峯甚賞識之與先恭王交最篤先生旣屢試不中益放浪形骸日酣飲酒肆中遇輿夫負販皆招與飲曰近日公卿皆若儕輩

耳余有何區別焉故人多忌之晚年始仕爲英德縣象岡司巡檢福文襄王聞其善給事欲招致之屬韓桂船司寇爲介紹先生復書曰源雖不肖豈可以筆墨爲羔雁也卒不赴召其耿介也若此在余邸時與韓旭亭先生最篤曰梁園賓客皆充數輩惟君可當其選其輕傲白眼之習至老猶如故也

甘肅巖先生幼師劉海峯書畫精絕詩文上宗七子殊有豪氣爲旗籍文士之冠然不甚工楷書有某大臣延其書寫奏牘先生以靈飛經法爲之某公大怒揮之門外曰甘某名望若爾乃其書法尙不如吾部曹胥吏之端楷也

右錄宗室昭棟撰

顧敏恆 侯雲濤族弟昉

顧敏恆字立方江蘇無錫人乾隆五十二年進士天才俊拔嘗游
貴池撰昭明太子廟碑錢塘袁枚見之拊掌曰此文令我懷疑十
年今得之矣任蘇州教授問字者履滿戶外著有笠舫詩藁古文
辨體等集弟敏愉國子生著靄雲草敬恂乾隆五十四年拔貢未
及 廷試卒於京邸著筠溪草敏恆兄弟四人並擅文學而俱齋
錄未成遽歿所遺詩曰幽蘭草敏恆兄弟四人並擅文學而俱齋
於年四川布政使楊揆合刻其彙爲辟疆園遺集同邑侯雲濤字
漢翔乾隆丙午舉人任全椒訓導以勘振爲民所愛戴在任三十
年勤於訓課著北樵吟草族弟昉乾隆五十九年舉人任五河縣

教諭修葺學宮歲祿奉委查振心力交盡卒於官祀名宦

右傳楊熙之撰

吳玉搢

山陽吳先生諱玉搢字山夫貢生官訓導著別雅五卷取字體之假借通用者依韻編之各注所出而爲之辨證於考古深爲有功惟是古人用字有同聲假借有轉音變異有別體重文同聲轉音均宜入之而此書挂漏甚夥然就所徵引足以通古籍之異同疏後學之疑滯猶可以考見漢魏以前聲音文字之槩是固小學之資糧藝林之津筏非俗儒剽竊之書所能彷彿也

右學案唐鑑輯

國朝耆獻類徵初編卷二百五十七補錄

僚佐九

丁杰

八九十年來吾郡教授以博雅著聞者必推前丁後馮馮卽柳東先生丁卽小正先生杰也歸安人少以清苦建志家貧不能得書日就書肆中讀自朝至晡以爲常肆主憫之爲具食不食也久之博學多通應鄉試以策問大戴禮所對獨精遂中式入都交朱竹君盧召弓戴東原程易疇諸君子學益進聚書益多通籍得縣令以親老乞爲儒官始來吾郡先生所藏書皆審定其句博稽他本同異以紙反覆細書下籤其中孫頤谷侍御志祖嘗戲之云君書

頗不易讀遇風紙輒四散不可復詮次奈何鄉先輩相傳先生最
寶愛其書每厚樞黏紙八九層爲面葉底葉見者輒笑曰此丁氏
藏書也康祺幼時見吾家鄰街有小西山房書肆者其主人丁姓
每與之諧價購書喜其樸訥兵後不復見矣嗣知小西山房卽小
疋先生集名而書肆主人姓又適合豈卽先生一家歟憾當時鄙
陋尤甚不及就詢先生遺著思之歉然

右紀聞陳康祺撰

國朝耆獻類徵初編卷二百五十八目錄

僚佐十

謝金鑾

王芑孫

李步蟾

王肇奎

張昌植

滕家圭

張永誠
吳鯨

凌廷堪

周際同

郝廷棟

鄧奇逢

康紹衣

袁禮城

徐大綸

楊三吾

華瑞璜

繆其素
鄒曾蔭

黃丹書

程瑤田

危人佐

魏邦魯

五十年月表谷名表

卷二四十五

國朝耆獻類徵初編卷二百五十八

通奉大夫前署江西巡撫江西布政使司布政使湘陰李桓輯
僚佐十

謝金鑾

君謝氏諱金鑾字巨廷一字退谷福州侯官人也考正乾隆二十四年舉人大挑一等試用武進縣丞改教諭卒君年十三而孤貧不能自給然未冠則喜讀宋儒書悅心性之說大興朱文正公督閩學補縣諸生踰壯舉五十三年鄉試嘉慶六年大挑二等用教職君交同里孝廉方正官崇布衣陳天文貢生陳庚煥皆有道君子相切劘壹志於忠信篤學其言學以四書爲綱五經爲輔而力

除空虛自守偏執冥行與夫泛枝濫葉揚秕簸糠之弊署邵武教諭有謝生者極貧而孝所親有婦不安其室偏其幼媳爲不善媳不從生議拔其媳歸良家婦遂誣控生學使至入讒者置生劣等眾盡譁請五庠之師白其冤於學使五庠之師噤不敢發君獨稟學使數千言卒直其獄補南靖學歷司嘉義南平再莅安溪安溪巽陽鄉以賽神起衅釀鬪殺士被羅織者眾匿莫敢出守持之急君請寬其株連諭使自投而後遣之爲耳目將掩執所名捕數人會令中怯事洩數人者遂不可得守歸咎於士將盡褫其衣巾君力爭不獲迺具上其事於學使且曰漳泉無獄不及士設按牒而罪之不出二年庠序且一空學使蒙古恩侍郎壯其言力主之事

乃已初海盜蔡牽擾臺灣陷鳳山嘉義令急延君問計君曰此閒
士民更林爽文之亂其守禦咸有成法召而謀之咄嗟可集也如
其言眾果至乃偕令周視四門指麾分守之夜三鼓而辦賊平一
縣安堵然君未嘗自言其勞總戎滿洲武隆阿詣縣問君賢單騎
徑造入門讀壁間教士條約曰通儒也一見如平生歡假館學廡
每飯必與偕同知僻志亮聘修臺灣縣志君講求利病尤致意於
政俗僻君歎曰有造海徼之書也巡道楊廷理建議闢臺灣山後
蛤仔難君考其始末條其利害爲紀略同里梁詹事採以具疏請
收其民土設官定制朝議從之及楊君奉命董其事凡所建
置經畫一一必手書報君今新設噶嗎蘭廳是也君痛泉漳狃於

四書三編卷之三十一
二
鬪殺劫掠之獄治之者恆禍及學官弟子乃作泉漳治法諭示所
以緝兇訓俗而歸其指於重士以爲教始誠司牧閩南者之藥石
晚漸不樂居官作教諭語畱贈安溪諸生其言皆懇惻適於用遵
疾請告諸生籲畱久之君竟去乃相與厚贖之歸歸數載卒二十
五年四月六日也嘉義諸生聞之自海外相與鳩貲飲葬祭君食
貧樂道一介不苟取於朋友死生不易行至獎孤寒表遺佚善護
氣類其誨人依於孝弟禮義負笈者踵接及養病於家猶饋問不
絕守令之賢者咸倚重君君盡言無私異趣者雖心憚君然亦諒
其無他腸相尊禮無閒非忠懇廉直孚於人何以及此嗚呼今之
師儒之官能以道得民者尠矣士之自廢廉隅者日趨污下而未

有止求如君者長善而救其失安可復得乎哉君所交若陳布衣
官孝廉余曩咸相與捧手願恨少不能相從講習與入適道之途
晚及陳貢生與君遊又不能朝夕刻勵急引爲修身之助比諸君
子皆已凋謝而余亦衰苶不足以自奮每感風俗人心之憂未嘗
不怒焉慨吾道之孤而莫之繫也嗚呼可勝悼哉君春秋六十有
四配林孺人前卒繼配林孺人生女二筵鄭氏生子四曰本曰善
曰來雨曰復生以道光二年立冬後四日庚子時加辛巳葬君於
西郭外梅亭天才山之陽銘曰
位卑而道高故其節不撓學苦而心怡故其教不勞如蘭在縑如
坯在陶其勸僚吏如其所以勸俊髦其衛庠序如其所以守城濠

喪我人師生徒號咷鄙薄懦頑孰滌膺臊嗟斯人之不作吾又焉
知蘭茝之爲蕭蒿

右墓誌銘陳壽祺撰

侯官謝先生諱金鑿字退谷舉人官教諭忠信篤敬身體力行平
時教人以四子書爲綱五經爲輔而力除空虛自守偏執冥行之
弊其復鄭六亭書曰夏閒接誦來函備承教益中秋復接手教謙
冲之懷溢於言表甚矣閣下之篤志於學也僕早歲蹉跎中年潦
倒世事鹿鹿因循無所成就方未冠時卽喜讀宋儒書悅心性之
語比長交陳恥齋先生與語昭合遂壹志於是如所謂言誠言敬
言主靜言慎獨存養求放心者以爲大本在是也而竭力求之實

則於古今事變日用常存之道一無所窺徒用力於空虛之中而不自知其躐等以至顛倒曠亂竟成心疾如是者凡十六七年終不受其實益年三十一無可如何始寬心讀書涉躐於詩書易周官禮記更數年乃大悟前此之非計其初自少年來居學齋與童子均其功課每日一本四書未嘗閒斷至參以經籍久之覺有實效日用行持閒自省得於四書者爲多蓋學者不志於聖賢則已苟志於聖賢未有能脫四書者論語一部此吾夫子之所以教人者在四書中尤爲切實計吾夫子生平之所以教人者一日忠信一日好學二者盡之矣蓋忠信則以日用實行爲憑而無虛空高遠之說好學則極倫常變態之跡而無信己執一之求故弟子大

書特書曰子以四教文行忠信言夫子之所教者如此而已又曰十室之邑必有忠信如某者焉不如某之好學然則好學之事詎不尤重歟僕之所敬慕閣下賦質忠信殊絕於人也茲誦來札幾有必察邇言沛然若決江河之意是閣下於學問已得其大要也斯道之望將有屬矣夫學以六經爲大端孔子之所謂文也學者以四子書爲綱以六經爲輔力講求焉有得於心以之治己有術以之治人有術是之謂經術爲其可施於實用而非訓詁鈔錄者比也此孔子所謂博學於文也 國家太平日久士子力學者多康熙閒士大夫喜言心性之學吾聞如李厚庵蔡梁村雷翠庭其著者也要其所執持以示後生者亦一時風氣之所趨耳然其時

忠信篤學者已有如胡東樵其人乾隆間經學大盛顧其閒分際亦自不同如顧復初任荆溪方望溪其所求者皆有濟於實用非明於古聞於今徒事章句訓解已也此數子者博通注疏而有所領悟折衷使學者可以修諸身而見諸用庶乎孔門之功臣矣後有作者則不然喜搜求古書以爲新博愈古愈廢之說則以爲愈佳將謂唐不如晉晉不如漢東漢不如西漢宋以下則鄙夷弗屑已矣其於聖人之經也不求其端不訊其末惟以鈔襲舊說爲尊古以論辨折衷爲武斷學雖博以語修己致用之方則無術焉此第謂之經學則可不足以語經術也若胡顧任方四家則可謂經術也已僕於古經誠無所窺然苟得餘年則將卒業於四氏之

書焉故凡僕之言經學當時之所棄也所以然者欲不謬於力行忠信之旨已矣閣下抱忠信之質有志於力行而以倫常爲急務夫急力行重倫常二者皆忠信之事也然而求諸孔子教人之旨則所尤重者學而所尤先者文蓋聖賢之學一倫常盡之閣下前書之言是也然倫常之理至切至近至平至易而卽至賾至隱至繁至艱不可以一時淺易之說槩諸古今亦不可以一己境遇之偏槩諸天下古今千簡萬牘聖賢千言萬語不能盡其情者凡此力行之事卽凡此倫常之事也故以倫常之故而有力行以力行之故而有學問博學於文者所以致其知以爲力行者也夫知者明於目也行者健於足也未有目無見而足能行者自古言學亦

未有以行先於知者一部大學功夫致知格物已居其大半誠意
爲生死關頭然意之不誠咎在知之未致其門徑昭然矣然其道
至廣而博故貴實而不貴浮貴切而不貴泛僕語 本朝經術必
以顧胡任方四子爲先者意在斯已大約士凡不喜讀書不事講
求而空言力行空言倫紀空言心性與夫存誠慎獨主靜存養者
不墮於空虛自守則必偏執其行語此失彼有體無用否則泛枝
濫葉揚秕簸糠或者等身著作鉛槧四馳或者巧解淺淺孤鐙自
守凡茲所事雖一生辛勤皆不足以入聖人之道何以驗之觀於
其行則弗信試之實用則茫然也吾輩向學已晚讀書已遲僕所
願與閣下共謀讀書之法者意在以四子書爲宗不以四子書爲

作文之具而以爲倫常日用所資切實以求則廣之自通六經約之無非實行稱此以往則近之可爲文行兼修之儒漸而積之必有體用合一之日此聖賢之正軌也若曰吾但以實行倫常爲要經學文學皆不足恃則所謂倫常日用者別有簡易之一途而六經不必存也豈理也哉與閣下交已十餘年中閒多以世故文字相往復未有一日之暇從容論學者茲以來書語及故陳其崖略唯高明有以教之其再復鄭六亭書曰曩者僕以來教有經術之言謬爲論說而獨有取於顧胡任方四家者蓋以四子之於讀經皆汲汲於倫常日用而非訓詁鈔錄者也然讀書之法又有當言者古來書惟易詩書爲孔子所手定與大學中庸論語孟子數者

爲極純粹耳自後諸儒著述則不能無偏弊之處卜子夏左邱明親受業於孔子其言尙有疵謬況其下者乎任荆溪之學易也苦志力求至於血氣散亂神思喪失昏不知人七日乃蘇此足見其由探索而有獲而少脫然自得之趣者也又此公生平讀書必欲融會眾家無所遺棄故洗心首卷圖說太繁而五十學易之解不無牽強此其所偏也若其卦爻注說獨能徵求象數使學者知聖人之立言字字有所根據而窮極事變無一不切於倫常日用此其所以爲難也昔程傳以理訓易朱子歸諸卜筮其旨尤該然易之爲書原本象數者也善說易者必當不離於象數惜乎古書淪亡難於引据任氏所徵皆不失其正大足爲本義之助故僕謂學

易者必有取乎此也讀洗心者於其首卷圖說且姑置之必言圖說則又當讀胡東樵易圖明辨勝於任氏多矣至於禮記一書雜取羣儒之著述各有篇段任氏以朱子有大學章句遂取禮記而竄易編次之甚至郊特牲一篇全逸題名散附於他段責以變亂古經之咎復何辭焉但任氏之意實師朱子儀禮經傳通解自爲成書彙分簡帙使修己力行之君子易於貫通焉至其解義則穿穴注疏自悟指歸上契前聖之心源所謂天理爛熟者豈依門傍戶者所可比哉學者觀其梳剔之明而得其會通之妙則亂絲之治條理井然還考原文昭然自在豈以任氏而棄古本哉春秋所以正倫常也左氏記其事實其功大矣至其義例則三傳皆私己

鬼胡氏又從而強辨之數千年來夫子本經不明於世至今日而
意理始可求也顧氏之功豈少哉胡東樵禹貢與梅定九天文並
稱絕學今與顧氏地理表合而讀之中原扼要形勢了然於胸豈
非致用之一大端與方望溪之釋周官輒謂王莽劉歆有所增竄
疑其所可疑而悟其所難悟微靈臬孰能之四君子之讀經皆聖
人致知格物之法大有功於倫常者也夫讀書之益人也如五穀
三牲之致其養焉然五穀有芒殼而三牲有皮毛善食者飽焉而
氣體以充精力以富芒殼皮毛不知其所以棄也任氏周易之病
僅在圖說序言今揭其所短而攻之而棄其所長是猶見皮毛而
惡三牲指芒殼而訾五穀也要之近世君子多言經學其能讀四

君子之書者少矣閣下以忠信爲本以倫常日用爲重能不致力於是哉前書繁蕪而意有未盡故復陳之其作退谷自警文曰退谷嘗讀易之繫辭矣其曰蓍之德圓而神卦之德方以智六爻之義易以貢聖人以此洗心退藏於密曰異哉以聖人之德如彼而其所以自處者如此故夫子曰假我數年卒以學易可以無大過矣意在斯乎意在斯乎是故康節先生稱老子得易之體張子房得易之用雖其言之駁而其旨可思矣要惟上達之事小子未之敢測則且痛自刻責書以自警也曰天下之理進常不足而退常有餘故進而見者不如退而藏進而言者不如退而默進而求諸人不如退而求諸己汝能見人之善胡不退而自修汝能見人之

惡胡不退而自省汝有誨人之言不如退而自誨汝有責人之事不如退而自責愛人不親汝則退而反其所愛治人不治汝則退而反其所治忿懣未可任汝盍退以平其氣是非未可定汝曷退以思其詳汝行既疏惟退可以寡悔汝言既易惟退可以寡尤汝自見其長盍退而察焉曰其實有之耶其益求所進也汝自悔其罪盍退而念焉曰其勿忘矣其奚以再蹈也吁嗟乎喜好歡忻惟退則見其所蔽功名富貴惟退則見其無聊責有所歸汝速退以自量道莫吾知汝姑退以自娛且夫虛而能容者莫若谷深而難測者谷也齊而斯應者谷也皎皎白駒在彼空谷其賢之所處乎先生之學處處鞭辟近裏而出謀發慮動徹機宜仁全義備壞者

使之復完墜者使之復振職雖司鐸而地方有事當道倚之黌舍
賴之卽眾庶亦未嘗不感而服從之德盛道通所謂動人以誠制
事以義者其先生之謂乎所著有蛤仔難紀略泉漳治法及文集

右學家唐鑑輯

王芑孫

芑孫至京師客於今大學士富陽董公者六年客於睿邸者又六年中間往來故梁文定公及今韓城諸城南昌內直諸公之家歲出關居熱河尋常在淀園私爲諸公代手其後充教習別居南城則又出而與館閣之士遊故雖官不挂朝籍而自乾隆五十年以後朝廷有典禮文章之士未嘗不操筆竊與其間

右淵雅堂集張維屏錄

鐵夫以詩聞於時性簡傲不肯從諛遇公卿若平交人以是病鐵夫狂吾謂鐵夫猶耳輦下人士以萬數其遊於公卿者大都借援聲勢務爲關說而鐵夫介然無所苟館穀之外不名一錢雖金盡

裘敝不自恤鐵夫嘗欲買田築室於其鄉之楞伽山又號楞伽山人云

右小峴文集張維屏錄

惕甫詩癯然以瘦戛然以清亦縝密以栗在京師與法時帆何蘭士張船山楊蓉裳諸君琴歌酒賦為南北時望所推又工書傲劉石庵相國具體而微配曹貞秀亦以翰墨聞

右湖海詩傳張維屏錄

按王先生字念豐號鐵夫一號惕甫江南長洲人乾隆五十三年

召試舉人官教諭有淵雅堂集

李步蟾

李步蟾字敬躋號桂苑天資英敏貫串羣籍工楷法受知學使史公夢琦以縣試第一入泮旋食餼乾隆己酉拔貢朝考後以州判發南河試用甲寅丁外艱服闋改發甘肅權靈州花馬池州同花馬池番民互市最易生事步蟾恩威並用諸番畏懷尋補秦州三岔鎮州判兼管軍糧鹽茶官此者向精贏餘肥己步蟾毫無霑潤民有李青天之目三岔城舊無書院步蟾倡捐勸建己巳因病告歸家居數載以德化其鄉嘗陰脫邨民无妄災彼此不相識也病痊回甘肅甲戌攝平羅令絕苞苴勤聽斷胥役有藉命誣引富室者痛繩以法書院傾圮捐俸倡修延名宿主講士民欲建生祠

步蟾力卻乃止去任日邑人餞者以千計權平涼府經歷太守楊某性嚴厲民有誤罹法網者將坐重辟步蟾屢爭之得輕比郡東有柳湖書院公餘輒爲諸生講藝郡人爲之語曰愛民若子敬士如賓不事敲扑最耐清貧蓋紀實也庚辰補三岔州判有繫囚冤不得白聞步蟾復任曰李青天來吾不死矣步蟾至廉其冤卽出之道光初元調補安西馬蓮井州判受代時民以新鞞易步蟾所著鞞畱懸三岔城門比莅安西上官委查敦煌金廠玉門墩塘餽贖一無所受乙酉以績最將遷官會疾作踰月卒年六十有八州民爲之罷市丁亥歸櫬士民焚香哭送數十里步蟾生平愛客樂施筮仕二十餘年不攜家累長子晉蘭至署輒遣之歸且屬其歲

籌百金來署助薪水其廉介如此著有臥雪軒詩略子晉蘭理問
徵蘭巡檢孫勳諸生熊諸生熙廩生

右龍門縣志張維屏錄

王肇奎

廣文王先生肇奎字文叔一字鶴嶼全椒人督學使者德公風取
補弟子員朱公筠試優等補廩膳生乾隆己酉科徐公立綱拔而
貢之京師應 廷試名第一有客請以千金謁當事必得京秩先
生日我嬖人子安辦此卽多金豈以賄進耶卒謝之嘉慶元年選
青陽教諭先生中形偉軀少髯耳垂與頰齊發聲如鐘幼儻有
遠志不屑爲章句儒賦性敏速讀書日十行下善書法工詩詞及
古今體文朱公筠招入四庫館書局暇則考析辨論學益精粹客
遊四方所至必交其賢豪及任廣文以篤學敦行爲士子率諸生
有執禮法者巽言曲喻必悛而後已從講學者歲數十人他邑不

遠數百里以文就質者踵相接豪於飲又好客官雖貧座上客日
恆滿雄豪伉爽其天性也兄弟極友愛兄卒遺孤宗初猶未授室
家本中人產喪葬後遭水旱薄田不足供餽粥老屋湫隘先生自
賃廡以居以租產讓宗初日減食米儲諸囊以爲納婦資時年凶
婚禮可從般也里有故家子貸百金於富室議不能決先生往爲
署券期至故家子窘欲死時積雪寒甚單衣至斡先生解衣衣之
促亟去歸自典衣鬻穀以償其慷慨急人之急往往如此青陽旱
檄同城官勘災予振先生所勘杜冒濫必嚴定戶口必寬吏胥毋
得上下其手閒有丁多家貧而例不能徧及者輒解囊自贖之權
聲滿道路他所有羣譟而逐其官吏者饑民聚議惜公之僅得爲

廣文也郡守荆公道乾欲聞大吏以優敘薦諸朝辭曰肇奎筋力漸衰不堪任繁劇教士或幸無曠職且九華山水心竊樂之願有以曲成其志後以輭腳疾亟引歸諸生攀留不聽去督學使者汪公廷珍亦寓書止之曰廣文無奔走之勞學校事可臥治之毋遽賦遂初重負諸生意會牘上大吏亦不許嘉慶十一年疾益劇堅辭得歸逾年卒子城優貢生充鑲藍旗教習亦能詩善書以孝聞

論曰吾鄉老輩流風照耀翰墨者惟郭賦梅先生與鶴嶼先生爲最嘉慶紀元賦梅先生不就孝廉方正之舉高情雅致惟以山水文史自娛鶴嶼先生則貧而好施急人患難吾師山尊學士屢稱

道之而以冷官終惜哉今世之知兩先生者知其書畫而已予不
及見兩先生而與兩先生之子交莫逆伯寅侍賦梅先生遊姑孰
最久小鶴則事先生青陽官舍病亟嘗刲股以活先生終身孺慕
不衰老客廣陵與予共晨夕者數載故得聞軼事著於篇嗚乎以
兩先生之明德而伯寅小鶴皆無子天道真不可知哉

右傳金望欣撰

張昌植

張昌植字孟拔湖南乾州廳人乾隆己酉拔貢性至孝 朝考後
卽以親老歸養不求仕進持身動依禮法從遊者多端慤之士家
故貧經苗變益甚日食常不給意訢如也辰沅道傅爾均田至廳
境廉其賢欲引之相助數就塾造請卒謝不見年七十選桑植教
諭諸生有豪暴者褫懲之詩文程課嚴於家塾縣初無鄉舉終昌
植任獲雋者三人告歸十六年卒年九十二

右傳李元度撰

日本書紀卷之八

15

滕家主 張永誠 吳鯨

滕家主湖南麻陽人乾隆己酉拔貢六十年苗叛大帥辟至軍督理精餉時值懸匱則傾產以助終事軍無飢譁奉檄招拊麻陽瀘溪難民數萬綏輯有方授嘉禾教諭興建學校士流德之弟家瓚軍功授五品職禦苗沒於陣兄家瑞弟家泰俱遇害並得卹廕時又有張永誠字存甫乾州廳歲貢生苗變節相福康安統七省兵莅辰州分道進攻久不克而總督畢沅巡撫姜晟則議招撫以散其黨先是永誠奉母避亂來辰姜晟廉其才檄率勇扼牀機坡戰比有功至是復以招撫屬之永誠卽手書諭門人洪啟望啟望故苗民然讀書明大義且素德永誠欲得一當以報之也於是深入

苗境轉相開諭招降二百餘砦及大軍已凱旋而逆酋某尙遠竄
永誠復以計擒斬之論功保知縣不就加通判銜後任湘陰訓導
永誠父蚤歿事母孝家貧授徒以養就館必近地日必再歸省方
奉母避亂辰州時母老病力負而走開關崎嶇歷十餘日始達足
腫流血見者哀之吳鯨字東湄桂陽州人乾隆乙卯舉人父國春
家中貲以山路阻險獨整修萬丈年六十猶自荷畚鍤督工作坐
是傾其家鯨貧而嗜學好酒談蕩醉歌聲出金石嘉慶中補醴陵
訓導卽絕酒講宋儒主敬之學日人師難爲傲不可長纂宋元明
講學諸語錄別正僞辨朱陸未就卒於官齋初鯨父以修路至破
產及鯨鄉舉以徒杠成文受知中高選人以爲善報鯨叔父國棟

貧無子亦躬修道途以利行者竟得子著有周易本象釋疑十二
卷竹埤樓詩集十卷

右傳李元度撰

日本書紀卷之六十四

十一

凌廷堪

凌君諱廷堪字次仲安徽歙縣人遠祖安唐顯慶中任歙州州判遂家於歙父文焜業賈於海州君生海州六歲而孤困苦窮巷中母王氏鬻簪珥就塾師龐記姓名而已去學賈不成年二十餘始復讀書嚮學能屬文懼時過難成也著辨志賦以見志乾隆四十六年遊揚州慕其鄉江慎修戴東原兩先生之學四十八年至京師始多交遊大興翁覃溪先生見君所撰述大嗟異始導之爲四書文應順天鄉試不中明年復遊揚州見元以學問相益君乃擬李白大鵬見希有鳥賦以見意五十一年復入都應試不中明年從翁先生於江西又明年客河南秋三應順天鄉試始中副榜南

歸五十四年應江南鄉試中式明年成進士出朱文正王文端二公之門蓋與洪君亮吉等皆以鴻博見拔者也 殿試三甲例授知縣君投牒吏部自改教授曰必如此吾乃可養母治經文端曰吾不强子改冷官子願之甚善文正題其技禮圖曰君才富江戴又曰遠利就冷官蓋甚重之既選甯國府學教授乃奉母暨兄嫂之官孝弟安貧謹身節用畢力著述君之學博覽強記識力精卓貫通羣經而尤深於禮經著禮經釋例十三卷君謂禮儀委曲繁重不得其經緯塗徑雖上哲亦苦其難苟得之中材可勉赴焉經緯塗徑之謂何例而已矣如鄉飲酒此飲食之禮也而有司徹祭畢飲酒其例亦與之同尸卽鄉飲酒之賓也侑卽鄉飲酒之介也

主人獻尸主人獻侑主人受尸酢卽鄉飲酒之主人獻賓主人獻介賓酢主人也主人酬尸奠而不舉卽鄉飲酒之主人酬賓奠而不舉也旅酬無算爵卽鄉飲酒之旅酬無算爵也此異中之同也有司徹獻尸獻侑及受尸酢有豆籩牢俎七滷肉滷燔從諸節鄉飲酒獻賓獻介及酢主人但薦與俎而已有司徹獻尸獻侑之禮主人主婦上賓凡三獻鄉飲酒但主人一獻而已有司徹獻尸侑畢復有獻長賓主人自酢及酬賓之儀鄉飲酒但獻眾賓而已有司徹旅酬使二人舉觶於尸侑以發端鄉飲酒但使一人舉觶於賓而已有司徹無算爵賓黨則用主酬賓之觶主人黨則用兄弟後生所舉之觶以發端鄉飲酒則但使二人舉觶於賓與介而已

此同中之異也推之於士冠禮冠畢醴賓以一獻之禮鄉飲酒鄉射明日息司正特牲饋食禮祭畢獻賓其例皆大約相同而鄉飲之同於鄉飲酒者更無論也又如聘禮之聘享覲此賓客之禮也而聘畢問卿而卿及士昏禮納采納徵之屬其例亦與之同問卿授束帛昏禮授雁卽享禮之授璧也問卿及昏禮納徵庭實用皮卽享禮之庭實用皮也昏禮使者禮畢主人禮賓卽聘禮之聘賓禮畢主國之君禮賓也面卿幣用束錦庭實用馬卽私覲之幣用束錦庭實用馬也聘賓面卿畢介面眾介面卽聘賓之私覲畢介覲眾介覲也此異中之同也聘用圭享用璧面卿及昏禮無授玉之事但用束帛及雁如享禮而已聘禮聘賓至昏禮使者至皆設

几筵問卿賓及廟門不几筵但擯者請命而已聘禮既享未覲之
際則禮賓問卿畢不饋但行面卿之禮而已聘禮禮賓侑醴以幣
昏禮禮賓但酌醴禮之而已聘享聘賓主國之君皆皮弁服有襲
裼之殊問卿聘賓主人但朝服昏禮使者主人但元端而已聘禮
受玉於中堂與東楹之間問卿則受幣於堂中西昏禮則受雁於
楹間而已此同中之異也推之於士相見禮及聘禮郊勞致館歸
養餼其例皆大約相同而聘禮之同於覲禮者更無論也是故鄉
飲酒鄉射燕禮大射不同也而其爲獻酢酬旅酬無算爵之例則
同也聘禮覲禮不同也而其爲郊勞執玉行享庭實之例則同也
特牲饋食少牢饋食不同也而其爲尸飯主人初獻主婦亞獻賓

長三獻祭畢飲酒之例則同也鄉射大射不同也而其爲司射誘射初射不釋獲再射釋獲飲不勝者三射以樂節射飲不勝者之例則同也不會通其例一以貫之祇厭其膠葛重複而已耳烏覩所謂經緯塗徑者哉於是區爲八類曰通例上下二卷曰飲食之例上中下三卷曰賓客之例一卷曰射例一卷曰變例一卷曰祭例上下二卷曰器服之例上下二卷曰雜例一卷共爲卷十三至於第十一篇自漢以來說者雖多由不明尊尊之旨故罕得經意乃爲封建尊尊服制考一篇附於變例之後不別立宮室之例者宋李氏如圭等已詳故也君又著燕樂考源元遺山年譜按禮堂集又著魏書音義未成君雒於文九慰七戒兩晉辨亡論十六國

名臣序贊諸篇上擬騷選鄉射五物考九拜解九祭解釋牲詩楚
茨考旅酬下爲上解諸篇皆說經之文發古人所未發其尤卓然
可傳者則有復禮三篇唐宋以來儒者所未有也復禮上曰夫人
之所受於天者性也性之所固有者善也所以復其善者學也所
以貫其學者禮也是故聖人之道一禮而已矣孟子曰契爲司徒
教以人倫父子有親君臣有義夫婦有別長幼有序朋友有信此
五者皆吾性之所固有者也聖人知其然也因父子之道而制爲
士冠之禮因君臣之道而制爲聘覲之禮因夫婦之道而制爲士
昏之禮因長幼之道而制爲鄉飲酒之禮因朋友之道而制爲士
相見之禮自元子以至於庶人少而習焉長而安焉禮之外別無

所謂學也夫性具於生初而情則緣性而有者也性本至中而情則不能無過不及之偏非禮以節之則何以復其性焉父子當親也君臣當義也夫婦當別也長幼當序也朋友當信也五者根於性者也所謂人倫也而其所以親之義之別之序之信之則必由乎情以達焉者也非禮以節之則過者或溢於情而不及者則漠焉遇之故曰喜怒哀樂之未發謂之中發而皆中節謂之和其中節也非自能中節也必有禮以節之故曰非禮何以復其性焉是故知父子之當親也則爲醴醮祝字之文以達焉其禮非士冠可賅也而於士冠焉始之知君臣之當義也則爲堂廉拜稽之文以達焉其禮非聘覲可賅也而於聘覲焉始之知夫婦之當別也則

爲筭次悅聲之文以達焉其禮非士昏可賅也而於士昏焉始之
知長幼之當序也則爲盥洗酬酢之文以達焉其禮非鄉飲酒可
賅也而於鄉飲酒焉始之知朋友之當信也則爲雉牖奠授之文
以達焉其禮非士相見可賅也而於士相見焉始之記曰禮儀三
百威儀三千其事蓋不僅父子君臣夫婦長幼朋友也卽其大者
而推之而百行舉不外乎是矣其篇亦不僅士冠聘覲士昏鄉飲
酒士相見也卽其存者而推之而五禮舉不外乎是矣良金之在
卅也非栗氏之模範不能爲量焉良材之在山也非輪人之規矩
不能爲車焉禮之於性也亦猶是而已矣如曰舍禮而可以復性
也是金之爲量不必待模範也材之爲車不必待規矩也如曰舍

禮而可以復性也必如釋氏之幽深微渺而後可若猶是聖人之道也則舍禮奚由哉蓋性至隱也而禮則見焉者也性至微也而禮則顯焉者也故曰莫見乎隱莫顯乎微故君子慎其獨也三代盛王之時上以禮爲教也下以禮爲學也君子學士冠之禮自三加以至於受醴而父子之親油然矣學聘覲之禮自受玉以至於親勞而君臣之義秩然矣學士昏之禮自親迎以至於徹饌成禮而夫婦之別判然矣學鄉飲酒之禮自始獻以至於無算爵而長幼之序井然矣學士相見之禮自初見執贄以至於既見還贄而朋友之信昭然矣蓋至天下無一人不囿於禮無一事不依於禮循循焉日以復其性於禮而不自知焉劉康公曰民受天地之中

以生所謂命也是以有動作禮義威儀之則以定命也故曰天命之謂性率性之謂道修道之謂教夫其所謂教者禮也卽父子有親君臣有義夫婦有別長幼有序朋友有信是也故曰學則三代共之皆所以明人倫也復禮中日記曰仁者人也親親爲大義者宜也尊賢爲大親親之殺尊賢之等禮所生也此仁與義不易之解也又曰君臣也父子也夫婦也昆弟也朋友之交也五者天下之達道也知仁勇三者天下之達德也此道與德不易之解也不必舍此而別求新說也夫人之所以爲人者仁而已矣且天屬之親親則親之從其本也故曰仁者人也親親爲大亦有非天屬之親而其人爲賢者則尊之從其宜也故曰義者宜也尊賢爲大以喪

服之制論之昆弟親也從父昆弟則次之從祖昆弟又次之故昆弟之服則疏衰裳齊期從父昆弟之服則大功布衰裳九月從祖昆弟之服則小功布衰裳五月所謂親親之殺也以鄉飲酒之制論之其實賢也其介則次之其眾賓又次之故獻賓則分階其俎用肩獻介則共階其俎用肫脰獻眾賓則其長升受有薦而無俎所謂尊賢之等也皆聖人所制之禮也故曰親親之殺尊賢之等禮所生也親親之殺仁中之義也尊賢之等義中之義也是故義因仁而後生禮因義而後生故曰君子義以爲質禮以行之孫以出之信以成之禮運曰禮也者義之實也協諸義而協則禮雖先王未之有可以義起也郊特牲曰父子親然後義生義生然後禮

作董子曰漸民以仁摩民以義節民以禮然則禮也者所以制仁
義之中也故至親可以拚義而大義亦可以滅親後儒不知往往
於仁外求義復於義外求禮是不識仁且不識義矣烏睹先王制
禮之大原哉是故以昆弟之服服從父昆弟從祖昆弟以獻賓之
禮獻介獻眾賓則謂之過以從祖昆弟從父昆弟之服服昆弟以
獻介獻眾賓之禮獻賓則謂之不及蓋聖人制之而執其中君子
行之而協於中庶幾無過不及之差焉夫聖人之制禮也本於君
臣父子夫婦昆弟朋友五者皆爲斯人所共由故曰道者所由適
於治之路也天下之達道是也若舍禮而別求所謂道者則杳渺
而不可憑矣而君子之行禮也本之知仁勇三者皆爲斯人所同

得故曰德者得也天下之達德是也若舍禮而別求所謂德者則
虛懸而無所薄矣蓋道無跡也必緣禮而著見而制禮者以之德
無象也必藉禮爲依歸而行禮者以之故曰苟不至德至道不凝
焉是故禮也者不獨大經大法悉本夫天命民彝而出之卽一器
數之微一儀節之細莫不各有精義彌綸於其間所謂物有本末
事有終始是也格物者格此也禮器一篇皆格物之學也若泛指
天下之物有終身不能盡識者矣蓋必先習其器數儀節然後知
禮之原於性所謂致知也知其原於性然後行之出於誠所謂誠
意也若舍禮而言誠意則正心不當在誠意後矣記曰自天子以
至於庶人壹是皆以修身爲本又曰非禮不動所以修身也又曰

修身以道修道以仁卽就仁義而申言之曰禮所生也是道實禮也然則修身爲本者禮而已矣蓋修身爲平天下之本而禮又爲修身之本也後儒置子思之言不問乃別求所謂仁義道德者於禮則視爲末務而臨時以一理衡量之則所言所行不失其中者鮮矣曲禮曰道德仁義非禮不成此之謂也復禮下曰聖人之道至平且易也論語記孔子之言備矣但恆言禮未嘗一言及理也記曰道之不行也我知之矣知者過之愚者不及也道之不明也我知之矣賢者過之不肖者不及也彼釋氏者流言心言性極於幽深微眇適成其爲賢知之過聖人之道不如是也其所以節心者禮焉爾不遠尋夫天地之先也其所以節性者亦禮焉爾不侈

談夫理氣之辨也是故冠昏飲射有事可循也揖讓升降有儀可
按也豆籩鼎俎有物可稽也使天下之人少而習焉長而安焉其
秀者有所憑而入於善頑者有所檢束而不敢爲惡上者陶淑而
底於成下者亦漸漬而可以勉而至聖人之道所以萬世不易者
此也聖人之道所以別於異端者亦此也後儒熟聞夫釋氏之言
心言性極其幽深微妙也往往怖之愧聖人之道以爲弗如於是
竊取其理氣之說而小變之以鑿聖人之遺言曰吾聖人固已有
此幽深微妙之一境也復從而闢之曰彼之以心爲性不如我之
以理爲性也嗚呼以是爲尊聖人之道而不知適所以小聖人也
以是爲闢異端而不知陰入於異端也誠如是也吾聖人之於彼

教僅如彼教性相之不同而已矣烏足大異乎彼教哉儒釋之互
援實始於此矣詩曰鳶飛戾天魚躍于淵說者以爲喻惡人遠去
民得其所卽中庸引而伸之亦不過謂聖人之德明著於天地而
已曷嘗有化機也子在川上曰逝者如斯夫不舍晝夜說者以爲
感歎時往不可復追卽孟子推而極之亦不過謂放乎四海有本
者如是而已曷嘗有悟境也蓋聖人之言淺求之其義顯然此所
以無過不及爲萬世不易之經也深求之流入於幽深微眇則爲
賢知之過以爭勝於異端而已矣何也聖人之道本乎禮而言者
也實有所見也異端之道外乎禮而言者也空無所依也子所雅
言詩書執禮顏淵問仁子曰克己復禮爲仁請問其目曰非禮勿

國朝詩經卷之三十一
三十一
視非禮勿聽非禮勿言非禮勿動顏淵曰夫子循循然善誘人博
我以文約我以禮聖人舍禮無以爲教也賢人舍禮無以爲學也
詩書博文也執禮約禮也孔子所雅言者也仁者行之盛也孔子
所罕言者也顏淵大賢具體而微其問仁與孔子告之爲仁者惟
禮焉爾仁不能舍禮但求諸禮也子貢曰夫子之文章可得而聞
也夫子之言性與天道不可得而聞也文章詩書執禮也性與天
道非不可得而聞卽具於詩書執禮之中不能託諸空言也夫仁
根於性而視聽言動則生於情者也聖人不求諸理而求諸禮蓋
求諸理必至於師心求諸禮始可以復性也顏淵見道之高堅前
後幾於杳渺而不可憑迨至博文約禮然後曰如有所立卓爾卽

立於禮之立也故曰不學禮無以立又曰不知禮無以立也其言之明顯如此後儒不察乃舍禮而論立縱極幽深微妙皆釋氏之學非聖學也顏子由學禮而後有所立於是馴而致之其心三月不違仁其所以不違者復其性也其所以復性者復於禮也故曰一日克己復禮天下歸仁焉夫論語聖人之遺書也說聖人之遺書必欲舍其所恆言之禮而事事附會於其所未言之理是果聖人之意耶後儒之學或出釋氏故謂其言之彌近理而大亂真不然聖學禮也不云理也其道正相反何近而亂真之有哉燕樂考原以隋沛公鄭澤五旦七調之說爲燕樂之本又參以段安節琵琶錄張叔夏詞原遼史樂志諸書考之琴與琵琶之弦音從遼史

四旦定四均二十八調四旦者華言四均琵琶四弦故有四均七
弦七調故有二十八調燕樂比雅樂高二律不用黃鐘濁聲用夾
鐘清聲蔡元定所謂燕樂用夾鐘爲律本也琵琶之七調卽三弦
與笛之七調是卽今之伶工字譜之合四乙上尺工凡六五乙仕
仄仁也宋燕樂本十五字今祇用此十三字矣二十八調之中今
祇用七商而七角七羽亦不用矣江君鄭堂謂其由燕樂通古樂
思通鬼神矣嘉慶十一年君以母喪去官兄嫂相繼歿哀且病十
三年元復任浙江巡撫君免喪來游杭州出所著各書相示元命
子常生從君學明年歸歛病卒年五十有三

右傳阮元撰

先生姓凌氏諱廷堪字仲子又字次仲先世自唐顯慶間有爲歙州判者始家於歙世居歙之雙溪祖諱易筠國學生祖妣許氏父諱文煇國學生以治生僑居海州之板浦場因元配戴氏無出復娶王氏生子二長廷堯次卽先生生有異稟觀書十行俱下幼孤貧賴兄營家計太夫人教之讀稍長工詩古文及宋元人詞曲年二十三遊揚州金樞亭博士兆燕目爲奇人憇思入都翁覃溪閣學方綱見其著述大異之勸習制藝令受業於其門時乾隆癸卯先生年二十有七矣遂以國子生應京兆試覃溪先生適爲主考官不報歸省客揚州時儀徵阮芸臺中丞元尙困童子試中相見遂訂交焉華翁光祖以女妻先生蓋相攸得之也旋復遊京天

津牛次元部曹坤與先生相友善卽厲之學齋日相切劘再應丙午京兆試又不報愈發憤攻苦遂中戊申京兆副車己酉本省鄉舉庚戌聯捷成進士癸丑補殿試歸班選用先生以太夫人將躋八旬改就教職尋選甯國府教授於乾隆六十年赴任嘉慶元年逢國慶典得馳贈祖父母 敕贈父母而生母王太夫人 敕封太孺人云先生之學無所不窺其於六書厯算以迄古今疆域之沿革職官之異同史傳之參錯外屬之源流靡不井然條貫卽累朝名人文章詩歌銘贊類皆隨舉琅琅成誦蓋當代未數數覩也自就官陵陽尤專功於禮學其教人必以禮謂古聖使人復往者學也所學卽禮也孔子言勇而無禮則亂直而無禮則絞

又曰好直不好學其蔽也絞好勇不好學其蔽也亂孟子曰上無
禮下無學故知所學者卽禮也顏淵問仁孔子告之者惟禮焉爾
顏子歎道之高堅前後迨博文約禮然後如有所立即立於禮之
立也子思言天命之謂性率性之謂道修道之謂教所教者因人
所當行而品節之卽禮也盡乎禮斯可以復性故所謂格物者物
卽禮也所謂慎獨者亦卽禮也禮有節文度數非空言理者可託
也此皆發前人未發之覆也先生謂儀禮一經悉體天命民彝之
極信非大聖人不能作以江氏慎修禮儀釋例僅有釋服一類復
取向所自著禮經釋名一書改名釋例區爲八類曰通例飲食之
例賓客之例射例變例祭例器服之例雜例以明同中之異異中

之同矻矻十餘年橐凡數易而後成焉禮經而外復潛心於樂謂
今世俗樂與古雅樂中隔唐人燕樂一關蔡季通鄭世子輩俱未
之知因著燕樂考原一書據隋書音樂志言燕樂出於龜茲蘇祇
婆之琵琶然當日鄭澤猶演爲八十四調而附會於十二管惟遼
史樂志直云燕樂不用黍律以琵琶弦叶之蓋以琵琶四弦第一
絃最大爲宮聲二絃爲商三弦爲角四弦最細爲羽而無徵聲故
燕樂亦止四均一均七調故止二十八調而二十八調實止十四
調以七羽合於七宮以七角合於七商也燕樂以夾鐘爲律本而
琵琶第一絃宮聲又燕樂之律本也以今樂準之如上字配宮聲
尺字配商聲工字配角聲凡字配變徵六字配徵聲五字配羽聲

乙字配變宮合字配下徵四字配下羽則今之用字譜而成調卽古樂之用五聲二變而成音先生自謂孤學獨鳴無師無友爲宋以來講樂家所未悟者也近世通人多精於書數之學若言禮樂而得其精者先生一人而已先生名播海宇識與不識靡不重其學行自座主德定圃尙書王文端公朱文正公外如錢辛楣宮詹王懷祖給事程魚門編修謝蘊山中丞孫淵如觀察汪容甫明經諸公不可悉數而得覃溪先生爲師芸臺先生爲友尤知己之最者余自乾隆丁未入都卽耳先生名後獲覲面隨各南旋嘉慶二年丁巳余在省垣投效值石君夫子再撫皖先生自甯郡來謁得其數晨夕者半月六年余補授宣城學幸與先生共事一方時相

過從聆益良多。踰年長子揚輝出都來。署卽命受業其門。先生嘗語余曰。我於時文半路出家。余笑謂半路出家。今竟作開山祖師矣。蓋先生中副車不日如之。何一節題文自後倣效其體者。輒多獲捷。故也。先生論古文。則以騷選爲正軌。詩則不分唐宋。但論正變。以元遺山爲宋後一大宗。又國朝排擊宋儒者。毛西河爲最。戴東原次之。而先生則謂二君之論宋儒。猶未能搜其根而擣其穴。云乙丑歲。王太夫人年九十卒。先生奉柩回歛。時甯郡魯子山太守銓爲先生同年來歲。敦請主講敬亭書院。獨來蕭齋鬱悶無聊。與余往來無少間。卽除日猶相對。至舉燭方散。外人頗謂先生盛氣不可犯。以非禮。余聚首六載。見其肫肫事慈闈。以孝待朋友。

以直接後進以誠真能以禮律身者夫豈阿其所好哉丁卯春當道又延爲徽郡紫陽書院山長初先生回歛程也園吏部振甲以別墅館之命其次子淇溥字麗仲從學戊辰歲芸臺先生延至杭州節署誨其少君故先生著作多載受業儀徵阮常生婺源戴揚輝同邑程淇溥等全校云嘉慶十四年四月先生自杭州回歛倏於六月初一日晚膳席閒偶一傾跌扶起遂不能語四更後痰涌而卒距生於乾隆二十二年丁丑八月二十日享年五十有三先是術者謂先生運行在甲不吉然乙丑春先生之兄卒於學署夏又丁太夫人憂而淑配華孺人於九月隨逝卽一僕亦死僅存側室張氏可謂劇矣乃迄今五年天復奪之算豈不悼哉昔漢鄭康

成夢孔子謂曰起起今年歲在辰明年歲在巳既寤知命當終其
年六月果卒先生一生服膺於鄭今歿亦以己巳六月豈真所謂
歲在龍蛇賢人災者耶先生歿於歛之旅腐囊喪事者程易田先
生舉君子廉程君麗中暨郡學博夏君朗齋鑿以先生無子胞兄
有子二人長嘉鈞字晉昭次嘉錦早卒因卽以嘉錦爲先生嗣又
卽以嘉鈞之次子名德繼嘉錦爲先生承重孫其弟子宣城張麋
生其錦字嬰伯從先生遊最久積學砥行克守師說賜卹卽徒步
往歛余亦命次子揚廷卹弔是時晉昭已卒名德自海州來奔喪
今年夏葬先生於歛之梅山晉昭比來余署聞其欲還居海州因
泣然告之曰立後者所以爲祭地計也矧君家自父以上墳墓皆

在歙今海州離此幾二千里每歲埽荆榛而供麥飯甯不疏且曠
乎余又厲書於歙之親友使勸止之而晉昭泣曰是固然矣但貧
無立錫難以驟遷惟每歲展墓亦如先君先叔在時可乎乃攜名
德與先生側室張氏并藏書數千卷去之海州娶伯懼先生著作
散佚將往海州校輯余極嘉之遂於初冬啟行檢理遺藁以歸編
成按禮堂文集三十六卷詩集十四卷梅邊吹笛譜二卷充渠新
書二卷元遺山年譜二卷燕樂考原六卷劄記若干卷其禮經釋
例十三卷芸臺先生業已刊播燕樂考原娶伯見在付梓予將鈔
其文集令揚輝校刊焉嗚呼今距先生之歿已年餘矣余羈於冷
甌揚輝亦以一官匏繫山右故歿不能撫其喪窆未及臨其穴眷

念宿草奚啻腹痛余固不足表揚先生但有難已於懷者爰略摭
始末以備他日史官之採擇云爾

右事略狀戴大昌撰

凌廷堪字次仲一字仲子歛人也父文煇字燦然自歛遷於海州
之板浦場遂家焉君十二歲卽棄書學賈偶在友人家見詞綜唐
詩別裁集攜歸就燈下讀遂能詩及長短句浙人張賓鶴見其詩
詞大奇之告之板浦場大使湯某某敬禮之邀君至揚州是時釐
使置詞曲館檢校詞曲中之字句違礙者從事雠校得脩脯以自
給君之精於南北曲而能分別宮調者基於此也久客邗江爲華
氏贊墀與黃明經文暘交明經勉君爲舉子業始學作八股文讀

五經是時年已二十五矣後游京師受業於翁覃谿學士乃究心
經史之學乾隆戊申順天副榜貢生己酉中式本省舉人庚戌成
進士銓授甯國府教授迎生母王至學署先意承志得親歡心母
偶不懌必長跪以請俟母笑乃起母沒哀毀骨立膏一日而妻亦
相繼殞謝子然一身居恆不樂至徽州依程君麗仲麗仲以師禮
事之阮侍郎芸臺服闋復爲浙江巡撫延之課子得未疾終於歛
君病時麗仲贈以紫團手煎湯藥其死也經紀其喪擬之古人其
范巨卿之流歟君無子應繼兄子嘉錦嘉錦先君卒嘉錦兄嘉錫
在海州聞訃以次子名德後嘉錦爲君之承重孫君讀書破萬卷
肆經遠於士禮披文摘句尋例析辭聞者冰釋至於聲音詰訓九

章八綫皆造其極而抉其奧於史則無史不習大事本末名臣行業談論時若瓶瀉水纖悉不誤地理沿革官制變置元史姓氏有詰之者從容應答如數家珍焉近時講學者喜講六書孜孜於一字一音苟問以三代制度五禮大端則茫然矣至於潛心讀史之人更不能多得也先進之中惟錢竹汀邵二雲兩先生友朋中則李君孝臣汪君容甫及君三人而已其於詩也不分唐宋門戶專論聲韻之協對偶之工詩餘亦不主一家而嚴於律今人之詞有一字不合者必指摘之雅善屬文尤工駢體得漢魏之醇粹有六朝之流美在胡穉威孔顛軒之上而世人不知也弟子中最著者儀徵阮君常生字壽昌一字小芸從君受士禮校刊禮經釋例十

三卷小芸好學深思不以才地矜物恂恂君子也宣城張君其錦
字娶伯廩曠生精研章句不墮師承聞君沒徒步至歎訪君遺書
無所得又北走海州於敗篋中攜拾殘彙假居僧寺輯錄以歸得
燕樂考原六卷元遺山年譜二卷充渠新書二卷校禮堂文集三
十六卷詩集十四卷梅邊吹笛譜二卷將謀剗剗可謂不負師門
矣嗟乎君冷宦無家白頭乏嗣雖死故鄉實同旅殯亦生人之極
哀也已然而懷方之禮付於戚生昌黎之文編頰李漢斯又不幸
中之幸也

右漢學師承記江藩撰

周際同

有鄉先生姓周氏字季可其卒也邑人士稱道勿衰謂宜從祀鄉賢因臚其生平行實呈請咨部部報曰可此道光八年事余時官京師及余歸里主講鶴山書院而瀘州訓導卽先生之哲嗣培培有弟曰垣曰圻友愛甚至固其天性之厚亦家教然也一日出金山周肖濂所作家傳示余余讀至禦賊一事不禁斂衽而起曰嗟乎此可以傳先生矣初教匪之亂由楚而秦而蜀起於嘉慶元年丙辰至戊午己未而愈熾蟻聚蜂屯強者鉅萬弱者亦數千人千椽一炬火光燭天所過處悉成煨燼老稚之死於鋒刃死於竄跌者骸骨相撐拄也當是時川東首受其禍川北次之銅梁爲重慶

屬邑而安居鄉之在銅梁如附庸然素無城郭且無兵先生以孝廉家居乃倡義築城竝募鄉勇若干且禦且守卒以無患嗟乎不遇盤根錯節焉別利器今夫人自束髮受書卽有志於功名而其所謂功名者稽古之榮而已平日之所簡練揣摩時藝外更無長物既已列膠庠登高第矣但能規行矩步無得罪於宗族鄉黨卽不失爲善士然一旦變故粹乘心膽俱碎有能畫一策奏一技者往往難之其或恢張自喜於古今成敗抵掌而談未嘗不娓娓可聽及事至亦復畏憚退縮如婦人女子極其力之所至苟庇其一身一家卽云天幸而欲其扶掖斯人出水火而衽席之則萬萬不可得先生一孝廉耳非習孫吳之術非有資育之勇亦非有民社

之責所謂城存與存城亡與亡者也顧乃於搶攘反側之餘大聲一呼風雲動色俾危者以安死者以生雖僅區區一隅而其有德於斯人者甚厚以此言功功莫偉焉以此言名名莫重焉夫能捍大難則祀之者古志也先生之從祀鄉賢也固宜先生家夙貧少時帶經而鋤盡力以養親其居喪也水漿不入口者三日人以此稱其孝兄際字無子先生以長子嗣之天以次子嗣之亦天復以三子嗣之卽今司訓瀘州者也弟際亨爲母太孺人所鍾愛先生授徒三十年服官十年凡錢穀出入悉以委之弟人以此稱其孝並稱其友飢者粥之病者藥之道塗之陷溺者津梁之人以此稱其惠捍衛里閭勞績最著當事欲官之而先生力卻之勞而不伐

人以此稱其讓大才槃槃屈之廣文座中人或疑其不事事矣先生講道校藝期於盡職人以此稱其誠凡此數端皆人之所難能而余願獨於禦賊一事鄭重乎其言之者竊以承平日久生齒日繁風俗亦日敝其中盛衰消息有氣機焉雖時和年豐正不無陰陽人事之患所貴乎吾儒者必有一視同仁之量有見微知著之識有思患預防之心有扶危定傾之具養之於無事之日而用之於有事之時甯可有才而不竟其用斷不可臨用而短於才如先生者夫固未竟其才也要已用之而效矣吾願世之奉先生爲圭臬者固在乎立身行己而尤在乎推擴之以出其才也當亦先生之志也周氏世爲安居鄉人明時有官至左江道者因張獻忠亂

遂家於黔先生之高祖以黔籍進士官新津縣知縣仍反安居曾
祖題石公庠生祖振西公貢生忠州訓導父宗善公以先生官
贈修職郎先生原名季同更名際同壬子科舉人敘永廳教諭道
光二年閏三月卒享年六十昔柳下季卻齊師書之三箴而死士
之壘沒世無敢樵採茲山之原先生之窀穸在焉並誌之以告來
者

右墓表李惺撰

郝廷棟

先生諱廷棟字柱臣號砥峰臨川其別號也世居山西沁州武鄉縣吃鰲頭村代有隱德祖諱生成鄉飲耆賓父諱雲祥邑貢生贈修職郎母氏武繼母氏李俱 贈孺人贈公四子長卽先生幼穎悟好讀書弱冠爲名諸生從李凝度太史游學益進歷任學使皆賞識之浙江茹古香先生督山西學時稱其經術湛深器識宏遠舉乾隆王子鄉薦益奮志躬行實踐之學以嘉慶戊辰大挑爲河曲司訓三年以母憂歸服闋起復榆次教諭道光甲申乞休遂不出越十年卒年六十有九先生至性過人事繼母孝贈公之歿也弱弟廷魁尙在襁褓李孺人日抱以泣幾喪明旋病脅痛公調

護竭力曲意承歡撫弱弟躬自課之至於成立孺人喜病亦瘥以是復康強者十餘年恬退不樂仕進官教諭時恭遇 覃恩推贈如例先生喜曰吾此來爲先人乞 封典耳浮沈廣文非吾志也遂解組去里居足不入城市日以詩書自娛邑宰欲見之不得舉鄉飲酒禮尊爲大賓生平學業由堅苦中出讀書不喜涉獵必細心體會期於躬行有得尤邃深周易薈萃數百家治易者之說而以朱子爲宗每謂啟蒙一編乃圖書之祕鑰與學者指點先後天卦爻陰陽五行象數順逆之故如掌中紋歷歷可見又謂聰明人須作遲鈍工夫伊川之質慤精深橫渠之苦心探索積之旣久乃有灑然通透處伊川教人以主敬入手而致知力行以終之然必

使人先見意趣興起其爲學之心張子則以禮教學者使先有所據守此先生修己教人之大旨也其爲文自六經以及史漢唐宋諸家無不約明其旨闡發其機神明變化如山之若斷若續而有峰巒如水之或起或伏而有波瀾讀之者但覺其如瓶瀉水滾滾而出莫名其妙蓋由堅苦而臻純熟特於文發其緒而其超然獨得者人不能窺今所行臨川文集其一斑也嚴厲自束雖閤室無惰容終日靜坐盛暑嚴寒處之若素學者侍立屏息不敢出聲然於諸生請業則娓娓指授隨其所叩各忻忻有得鼓舞之妙如春風嘘物暢其天機以故士敬而愛之其在河曲武鄉之士如子弟之思父兄其赴榆次河曲人思之如武鄉及歸武鄉榆次人思之

又如河曲夫人才出於學校教化本於師儒昔文中子教授河汾胡安定教授蘇湖其明驗也使司鐸者盡如先生其有裨於人心學術治道者豈古今果不相及哉余與先生門人苗君崑田黃君惺齋友善熟聞懿行特爲傳之若先生者可以風矣

贊曰先生以校官終然學業行誼可以風世間在榆次時邑宰與先生有舊一士爲縣符所攝中夜謁先生曰公能脫我於法當酬以千金先生斥之而不言自是榆次之士相勵改行無敢涉訟者有巡檢張某罷官不能歸先生傾囊助之不少吝自奉刻苦人所不堪先生元配孀人早卒繼配李治家勤儉甘齋粥以成先生之志子二長殿恩謹篤能治家次承恩邑廩生公卒後逾月以哀毀

死皆有先生風門人黃惺齋出宰安溪臨行先生誨之曰縣令爲
親民之官作孽易造福亦易泉南素稱難治汝其慎之嗚呼卽此
可以知先生矣

右傳李炳奎撰

圖書集成
彙編
考索典
卷之二

七

--	--	--	--	--	--	--	--	--	--

鄧奇逢

鄧奇逢字稼軒湖南祁陽人鴻博獻章之子以優貢充正藍旗官
學教習乾隆五十九年任長沙府學訓導遷江西南南城縣丞

耆舊傳稼軒名父之子官訓導時秦小峴侍郎方按察湖南善化
訓導則孫石谿也嘗同遊嶽麓題名北海碑陰

右湖南文徵羅汝懷錄

康紹衣

緩齋康公諱紹衣字聞言世居邵陽城內北街明萬厯己未進士
歷任戶部雲南司主事諱姬鼎其曾祖也祖諱體謙康熙庚戌進
士有來青閣制藝行世父諱啟疆監生例銓州同知不果就公生
於康熙五十九年十二月初九日乾隆五十九年以歲貢生授三
原縣訓導六年俸滿予告旋里越一年卒則嘉慶六年二月初七
日也壽八十有四公之少也產業無幾雖因仍舊家門戶而先世
畱貽久已蕩廢不存兼又早失所怙與母甯氏熒熒相依有第二
人無甚生計可營度日蓋不勝拮据沈潛好讀書寒暑罔懈無師
資刻苦自勵有從叔某課子於家頗有學公每伺其講論去而竊

聽隱之弗敢使知遇先達輒虚心求教必窮極其說而後已中年遊長安武功孫酉峯檢討主關中書院講席諄諄稱許謂其學業深邃直邁時賢而上撫憲陳榕門先生亦嘗踰格嘉獎之於時譽聲鵲起無遠近人若士皆知有康某者但舉其行第不待稱名也願遇合不偶小試屢列高等拔前茅而困於棘闈累薦弗售蓋公之讀書義理必期信心凡所講探微測隱不屑屑人云亦云爲文章以天崇大家爲宗嶠刻峻峭恥蹈時蹊故往往抱知希之感而要亦終不敢易其絃轍正如陳臨川所謂專車沈香雖不見售斷不甘析而爲薪以菲其價者也其司訓三原也甫莅任謁文廟見兩廡賢儒主有奉功令當去而仍留當入而未補或舊有業已損

失見在仍復錯亂者心頗不愜卽搜得闕里文獻通考及雍正年間從祀賢儒姓名印冊一一釐定補缺遺者四十三黜濫存者十出無考者五證姓名錯謬者六規模頓覺整飭學憲知之嘉許再三卽諭通省儒學皆依此畱心以更正之有某生者因公事與差役忤至於搆難差役唆諸本官官拘生將懲治公毅然不以爲可力與之爭事乃解士林無弗欣悅其他教誨殷勤俾遊其宇者如坐春風則尤不可悉述云生平抗直自任是非所係不少假借不知者咸疑其不可近其實與之言學問論事理則津津疊疊無甚崖岸不平之處此余自少相與晉接迄今數十年一一得之親見者非有誣也配魏氏生於雍正二年五月二十六日得年五十二

歲於乾隆四十五年五月十九日卒今存者繼配楊氏也子重光
公仲弟諱照乘子爲公嗣方今遵例入國學事甫就而公卒矣痛
哉銘曰

學充而富官薄而清何窮何達隨遇能貞以延世澤以續家聲在
爾子孫承繼尙當藉其餘云

右墓誌銘康濟撰

袁禮城

袁君讓木與余居同邑然自年二十餘聞君名僅一識而嗣後君游京師舉鄉試吏闈中未通音問者三十餘年歲之正月蘇君可之謂予曰袁君見子文大愛賞以爲今之歸熙甫亟欲與子定交而病足不能行願先得子文盡讀之翼日君卽遣其子來繼以所著古文辭來時予方苦肝疾期以疾愈謁君越數日而君復遣其弟之子來則君已遘危疾急欲一見予予力疾往而君顧辭不見則家人以君病方亟不宜見生人也而君遂於二月二十二日逝矣悲夫子遂不獲復見君也君本以文士名乾隆乙巳 純皇帝臨雍講學君方以貢在京師集漢書獻賦六章列名第二旋考方

略館膳錄乙卯 恩科舉順天鄉試已而就館職所當得者選福建浦城縣縣丞嘉慶四年署福鼎縣事方是時中原教匪滋熾而福建則有會匪洋匪之擾福鼎故濱海前明戚繼光禦倭於此設礮臺已圯君至則修之俄而洋匪至燬其舟無算而會匪董希勝王步由等潛竄未獲大府置不聞君力爭之會御史有言得名捕希勝等君遂與遊擊任重窮追希勝等獲之於處州山中而閩地以南大府方論君功而吏部遽以縣丞不得署知縣勒君歸本任八年三月調補上杭縣縣丞駐峯市峯市上接江西下通兩粵奸盜接踵君至設眺樓置巡警邑有被劫者率兵追襲獲賊首於廣之潮州其餘以次就擒上杭地苦貧有棄尸原野而不葬者

君與邑人議施棺槨置義冢爲永久計始浦城以兩女銅婢成俗
君嚴禁之又作誡求錄以勸其仁心爲質類聞此雙峯書院者蕪
廢已久君始修之延師教士以興起斯文爲己事大府知君治行
方以知縣薦而君以文士困簿書非所屑意閒出其才又格成例
不克大展厥效乃喟然曰宦海風波何如尋我本分事哉遂決計
歸養君父諱勝棊前卒 贈如君官母薛氏生母張氏皆 封孺
人君素有孝行歸田後方欲養母教子與邑中學士以講求文行
爲務故雖鄙陋如予而向慕之如此乃不數月而遽卒不獲遂其
志焉余窮於世久十赴鄉舉無一知者知者戚好中首毛洋溟先
達中首管輅山後乃得錢魯斯左申甫畢莘農湯隨安莊遠甫張

國朝三原縣志卷之三十一
五
舉文及族子仲倫而已。韞山洋溟莘農舉文之亡且十餘年。魯斯
隨安達甫於三四年中相繼亡。其存者惟仲甫。方宦千里外。仲倫
方客五百里外。屈指知我。遂無一人。今甫得君而君又遽逝。豈余
之窮足以累諸君子。而諸君子之交予。足以自累。有如望溪所謂
與不祥之氣相感召者耶。然君雖位卑不克。大竟其志。其所施設
亦足自見。不待以空文與居窮者相剜切也。君諱禮城。字儀九。更
字厚吾。讓木其號也。生於乾隆十七年二月初三日。卒於嘉慶二
十年二月二十二日。年六十四。歲以三月十四日葬於祖塋之兆。
子四人。啟周。啟敬。皆前卒。次啟黼。啟恩。孫二人。惠觀。應觀。女三人。

銘曰

曰壽則君六十有四曰貴則君久試吏事曰文則君樹名壇幟在
世俗觀之洵足自喜而窺君之指詎曰可已而竟已矣

右墓誌銘吳士模撰

--	--	--	--	--	--	--	--	--	--	--

116

徐大綸

徐香莊名大綸浙江人乾隆六十年官鎮筵五寨司巡檢時紅苗焚掠乾鳳永三廳明鎮軍以輕進陷軍苗知草城虛攻益急香莊奮挺大呼募敢死士百餘人殲苗甚眾暇則團練鄉兵爲守禦計苗不敢近呼爲徐三將軍蓋香莊行三故云嘉慶二年以平苗功賞六品服故中丞傅公時爲鳳凰廳同知香莊隸其下與辦善後事宜是冬一少以勞疾卒次日將殮香莊忽大聲作北音曰奉神命傳傳同知傳至又作山西音曰忠義吾所佑徐大綸有活生靈功爲請於帝得不死呼傳至前以指畫掌作百餘字且曰善視若吾去也香莊病遽起當時譁傳以爲異事余聞之慨然曰天下之

駭人聽聞者莫如已死復生之事天下之惑人心意者謂有起死
回生之神聖賢弗道也天之生人有若輕視其生而速之以一死
者有必重惜其死而不使以一死謝其責者其權歸之造化要之
皆命也紅苗逆命香莊戰守之功偉矣官非武弁秩居末吏軀不
滿七尺年未及強時使其可死卽死於鋒鏑聞耳乃藉手以奏成
功而遽促其歸大暮也斷不其然嗟乎人生不過百十寒暑則終
死耳香莊之死而不死抑香莊之命係於天而不當於中道齋志
以死也小明之詩曰靖共爾位正直是與神之聽之式穀以女又
曰靖共爾位好是正直神之聽之介爾景福則在位而正直之人
必爲神之所佑香莊之瀕死而神必救之宜也然則神果有言乎

夫神之相人冥冥爾漠漠爾何待於言然觀經傳中曰帝謂曰鬼神來告曰神其怨汝詈汝神道設教自古已然茲之操西北音者又何必不然也士君子有修身立命之學而天壽不貳焉香莊知不以之死而之生者爲倖獲神庥其必有所以自立者矣聞香莊之之死而之生者毋徒傳爲異事其必思所以命自我立者矣後之覽者其亦有感於茲文也夫

右書事鄧枝麟撰

按嗣得李氏元度所撰徐公傳附鄧公文炳見是編條佐十二

楊三吾

武進有躬行潛德之君子曰楊貫夫先生其顛誠奇孝惟恐人知故鄉黨之人勿及詳長復浮沈於九品之末僚莫得藉手以稍稍建白然見者無不感孚其真意而肅然敬之方先生年甫成童父兄既皆客遺貧或至斷炊而母吳太孺人疾亟又乏僮僕先生蹠蹠憂泣求醫稱藥以逮束薪斗米悉自乞貸於人衣薄雪寒兩脛凍且潰時唯仲姊在室吾先宜人先生之仲姊也與長嫂莊同侍母凡唾壺茗椀臥起痾癢扶抱抑搔不能以斯須離一日待先生久不至其室旁舍不數武先祠在焉先宜人固嘗泣禱於祠忽入見先生拜於地袒而持血刃以一掌撫其胷暈已絕血縷縷蒲團

皆滿大驚力挾之坐掬鑪灰掩之裹以布而重甦更無痛楚再引視其肱新創未合肉色猶殷然後知已剗臂於三日之前而將剖肝以復進也於是相持大慟其後數十年暑月不解衣癩痕隱隱而約先宜人勿使宣先宜人因私以告嫂並訓不肖子亦及之而予事先生久終不敢昌言恐傷孝子之心也先生壯從伯兄客遊閩海聞受今太宰大興朱公知時方官觀察愛其清篤且有吏才勸納粟得吏目借補鹽山尉十八年調大興又三年遷古北口外豐甯巡檢旋又量移赤峯數月卒春秋六十一先生職級雖卑不以雜流自處遇事思有所濟物而盡心焉其在鹽山日歲稔流殍奉檄散振有司沿文生意先生謂 聖主已行之命安忍懷欺饑

民待哺之心何堪失望力爭之不可得令及兩校官任三路以西
路荒僻屬先生限以所持金毋許過三路者五日畢金有餘獨先
生半月徧金又不足令大忤適臺使者閱振過闕食毗數萬迎馬
首而訴曰尉仁人也奈權不屬東北南不幸無二尉雖有惠澤與
無同使者怒令居閒求解卒僅益西路金嗚呼先生之憂民而民
戴之亦足以徵其所守矣書受弱冠謁於鹽山見先生謹於祀先
雞鳴卽起盤匱悉手自洗濯屆考妣私忌尤必悽愴終日思樂思
嗜涕泗霑襟或得兄姊貽書往往讀不竟幅而哭雖頑鈍不順之
子居處與習未有不油然而動其孝弟之心嗟乎觀人者不於變而
於常不於暫而於久蓋自臥冰割脇令甲例不予旌而世之好名

希寵之徒靡所容僞則夫畸至之行迫於片念之愚學士大儒遂不復以毀肌輕命相苛責是故先生孺子之慕老而不衰未嘗以一剗邀重也有取重乎此剗之外者也先生喜爲小詩每作箋牘百函無倦色於擣菹博奕一無所與行必擇行口必擇言惟以少遭苦艱天倫多故居常戚戚寡權諱三吾字魯傳小名含飴貫夫晚所自號云子敬熙溫原有文

論曰南豐趙希乾以母病剗心不得則截其腸穀道遂閉而糞穢從胷閒出甯都魏叔子爲之傳以傳之先生所爲略似幸未若此其甚耳吾意先生方少識未定不暇詳審幾殞生安知不隱悔於後也語曰非是母不生是子信夫太孺人事舅之孝遠過姜妻殆

天將以風勵羣倫而復生先生者以報之歟

右傳徐書受撰

華瑞潢 繆其泰 鄒曾蔭

華瑞潢字秋槎江蘇無錫人官象山天台臨海等縣擢同知署台州知府所至有惠政去官後僑居西湖二十餘年大吏咸重其才恆參機務吉中丞慶勦賊甯波值大風賊舸驟至瑞潢立鵝首手刃一賊賊遽發礮礮攫於桅離頂數寸瑞潢屹不動嘗請於阮中丞元再濬西湖水得瀦蓄浙人德之卒祀象山名宦祠同邑繆其泰官指揮性豪邁偕兪御史冑堂劉編修嗣緒徐主事煥建錫金會館於都門以居鄉會試士初謀作邑館費鉅萬計其泰貸金書券而鳩助於邑之仕中外者事以成後官山西平陽通判以廉能稱鄒曾蔭字勛齋工部侍郎奕孝子官朝邑主簿適甘肅逆回不

靖兵過境供億旁午令悉倚之民得不擾補南鄭巡檢屢獲咽喉匪
以父憂歸

右傳楊熙之撰

黃丹書

同縣黃先生丹書初名廷綬字虛舟自署書畫或諧聲作芋洲少聰慧應縣試冠軍學使者不錄明年府縣兩試又連第一始補生員壯舉於鄉以前優貢選官廣文爲詩直抵宋人堂奧吟多腹藁數十年不失一字今海內所傳嶺南四家詩鈔先生其一也家居日文學品望最爲當道推重客構訟事慮不直欲得先生一言於令尹許重酬先生輒欣然諾之衣冠肩輿入縣談良久出客已迓於門問濟否則佯訝曰何事也客曰此何如事竟忘之耶先生亦徐自咎曰此何如事竟爾忘之眞老悖不可恃矣客不悅而退其風趣多類此先仲父三峯府君與先生爲畫友甚暱所

居臥遊山房先生所署也予甫數歲從族兄儕石師學師亦玉畫
先生至輒作旬日畱二人者燈下談藝恆達旦先生爲先君子言
此事而不舉客名二十年來先生歸道山久新通志已爲立傳獨
載不及此章先生尋常不冝語人知者遂少矣是不可不記

右書事梁廷枏撰

程瑤田

程先生諱瑤田字易疇歙縣人與休甯戴震同邑金榜俱學於婺源慎修江氏先生質魯讀書百遍或不能成誦然好深沈之思平居雞鳴而起然燈達旦夜分就寢數十年如一日其學長於涵泳經文得其真解不屑屑依傍傳注所著通藝錄十九種附錄七種義理訓詁制度名物聲律象數之學無所不備其尤精者儀禮喪服總麻章末長殤中殤降一等四句鄭氏以爲傳文不杖期章惟子不報傳文公妾以及士妾爲其父母傳文鄭氏以爲失誤大功章大夫之妾爲君之庶子女子子嫁者未嫁者爲世父母叔父母姑姊妹舊讀以大夫之妾爲建首下一二爲字貫之鄭氏謂女子別

起貫下斥傳文爲不辭先生皆一一援據經史疏通證明以規鄭氏之失成儀禮喪服足徵考工記諸言磬句磬折鄭君度直矩解之致與前後經文不合先生謂磬折不明由於倨句不明欲明倨句先辨矩字矩有直者有曲者倨句之云折其直矩而爲曲矩今木石工所用之曲尺是其遺製又曰車人爲耒曰倨句磬折韡人爲皋陶曰倨句磬折匠人行奠水曰磬折以參伍此三磬折不見倨句之度者同乎磬氏之倨句一矩有半爲磬折也所以車人之事爲倨句起例於半矩數至一矩有半謂之磬折下卽接車人爲耒一條弦其折體之六尺六寸以定其弦之中步爲六尺以爲凡命曰磬折者之定衡二經相連義取互足成磬折古義自來言九

穀者梁稷不分鄭氏注三禮及爲詩箋獨不詳稷之形狀漢人言
稷者多冒粟之名先生則據說文禾嘉穀也粟嘉穀實也米粟實
也梁米名也稷齊也五穀之長證梁卽今之小米連粟者曰禾實
曰粟粟實曰米米曰梁此穀古人貴之故謂之嘉穀稷卽今之高
梁其種最先故曰五穀之長成九穀考皆前人所未言其他禹貢
三江考溝洫疆理小記宗法小記諸篇皆據經文推闡以明鄭注
之確其不苟同亦不苟異如此九應鄉試乾隆庚寅 恩科始登
賢書年六十四選嘉定教諭以身率教廉潔自持告歸之日錢宮
詹大昕贈詩曰本是經人師原無溫飽志王光祿鳴盛贈詩云官
惟當湖陸師則新安程一百五十載卓然兩先生其推敬可知矣

嘉慶元年 制科舉孝廉方正平生以著述爲事年老目盲猶口授孫等成琴音記詩歌書法無一不妙劉學博大樾謂近體詩頗似宋人七絕偏眞山谷著書勢五事梁侍講同書謂發前人所未發晚年遭長子喪已逾期年九十壽誕以心喪未除不受賀其守禮如此

右別傳夏斨撰

危人佐

危人佐字星五湖南黔陽人性聰穎弱冠補弟子員屢薦不遇乃入貲以吏目分發浙江委署開化借補烏程縣典史嘉慶元年補授海甯州吏目委查煙戶悉心糾察獲何相餘黨題補會稽縣丞大吏重其勤謹有爲代理歸安縣事居官利濟爲心士民愛之有德政屏類紀實蹟語意懇摯可想見其入人之深

右傳易燮堯撰

魏邦魯

魏邦魯湖南邵陽人嘉慶初官江蘇巡檢歷署荆溪張渚海州惠澤有治聲在張渚馭服棚民建義倉社學在惠澤擒治鹽梟歲災施粥藥事具荆溪海州兩志性廉介筦蘇錢局凡五年一毫無所私大吏皆禮重焉少在京從澈浦嚴如煜受奇門六壬故策多奇中道光十年遷寶山主簿卒官寶山城瀕海嘗步塘上周囑寔曰此絕地也可城者其羅店乎臨歿語子源曰貧不克歸葬可卽家於吳然寶山則不可夜起望城中皆死氣也時方承平後十餘年寶山陷於夷寇人始服其先見云

右傳李元度撰

圖書集成彙編

卷一百一十四

國朝耆獻類徵初編卷二百五十九目錄

僚佐十一

鄭兼才

沈寶麟

陸元吉

楊兆煜

劉台斗

張鼎五

楊道純

楊先鐸

胡嵩齡
黃本騏

王璵

陳容禮

沈欽霖

陳世昌

張家桀

鄧大猷

聶愈達
何學奎

林伯桐

聞星杰

蒲忭

鄭世俊

葉文麟

鄺欣

劉方璿

弟方瑚
陳禧

劉文簪

李沆訓
吳萬餘

沈欽韓

徐晝堂

國朝耆獻類徵初編卷二百五十九目錄

一

國朝三月美有不移
卷二五三二

國朝耆獻類徵初編卷二百五十九

通奉大夫前署江西巡撫江西布政使司布政使湘陰李桓輯
僚佐十一

鄭兼才

君鄭氏諱兼才字文化一字六亭永春德化縣南鄉人也年十五
補縣學諸生踰壯師事閩縣考功孟先生於鰲峯書院學使陸耳
山院副拔君貢太學今山陽汪瑟庵尙書爲國子祭酒器之考充
正藍旗官學教習游京師九載嘉慶三年銓閩清教諭歸舉鄉試
第一主司則今會稽莫寶齋萬載辛筠谷兩侍郎也輦下聞之嘖
嘖誦得人君學有本原敦厚而廉直自以職在教學毅然以潔修

庠序闡揚幽隱扶植人倫整齊風俗爲己任歷安溪建甯再至臺灣凡文廟殿閣明倫堂東西齋廡及名宦鄉賢忠義孝悌節孝祠莫不勸施興作雖勞勩不憚請獎其好義尤力者或專銜詳報祀典所不備則審稽先烈潛德請補之其勇於爲義若飢渴之於飲食然臺灣自逆賊朱一貴叛後不軌相繼跳梁死事文武弁兵無慮千人有奇久而案牘滯且漏君請於巡道遵前詔建昭忠祠謹據議卹案冊及東瀛紀事一一區而釐之神牌名氏皆君手書以爲義在捐軀而罵賊者雖賊獲可旌情由召戮而偷生者雖衣冠必絀其激揚清濁凜然於名義之不可假公論之不可遁至明以厲也君雖爲師儒官常急鄉國利病有可言於當事則大聲疾

呼救之如恐不及蹶然忘其位之卑而身之爲眾忌也其上巡道
慶公書力陳臺城浚濠不可上總督汪公論吏治民風械鬪辨誣
三書瑟菴尙書許其志在天下非徒護桑梓而已可謂深知君矣
君之始至臺灣海盜犯鹿耳門鎮將以下備禦要隘檄君守郡大
西門晝夜巡稽出入奸無所容賊平以軍功擢除江西長甯令辭
不就當事重之在安溪與侯官謝退谷同寮交最篤謝退谷者宿
學重氣節喜經濟余嘗與君目爲兩賢校官者也旣君舉退谷修
臺灣縣志而君左右之志成稱善本後臺郡紳士議修郡志請太
守必得謝退谷鄭六亭二人而後可太守爲請於方伯調君來而
謝君已風疾告歸君赴公車踰二年乃復至事遂不果然君卒刊

補謝君之書而海外文獻始備君之去安溪建甯士皆奉君祠位
初去臺灣眾爭送之北郊香案旗鼓填塞街市數里不絕君口不
言貧居官刻苦歲不能致數金以遺其子其子憚父嚴不敢郵一
紙告乏然族親有急當調卹未嘗不人人給所欲也善制藝嘗十
一赴會試屢躋無愠色嘉慶末舉卓異道光元年方伯今巡撫金
匱孫公聞君名檄州縣舉君孝廉方正薦之大府方伯遷安徽大
府不果行而君以二年秋逝矣嗚呼惜哉余少與君受業孟考功
之門及在京師與里閭顧不常聚然心折其賢蓋久聞其卒豈勝
悲耶嗚呼師儒之官至今日而敝矣父師少師之教旣不行於左
右塾而瓠葉兔首饗射之禮又無以風示州邑儼然廟令長之末

旅進退與丞掾佐史伍罷癯者供課殿而已強者或昧雉其弟子
員弟子員或終其身不敢奉調則悍然以違抗爲諸生罪噫是可
傷已如君與謝教諭咸學校之干城儒林之圭臬其所爲皆他人
所不能爲安得復起九原使斯道猶得以一髮而挽千鈞哉雖然
君之言與行事彰彰在人耳目誦君之文論君之世者毋亦有激
厲而奮興者乎余日望之矣君所著有宜居集愈瘖錄等若干卷
宜居者謂校官居卑居貧職易稱也愈瘖者謂時以言事自效冀
求愈夫生而不瘖者之不幸淪於瘖也春秋六十有五配李孺人
先君卒將以某年月日葬某地其孤自其邑來先期請銘銘曰
膠庠道敝津梁疇遵鼓篋何賴章縫曷親觥觥鄭君克盡厥職慈

惠之師好是正直明扶紀綱幽釐禮式樂公社祀乃在儒林謂非
遺愛悅懌青衿海水羣飛赤嵌徼外金湯一心扞城功最抱奇濟
物俊才槃槃奈何高節卒辭長官 新詔徵賢網羅鷗鷺奈何阨
命竟凋飛翰風花升沈豈君憂喜見蔑之心用道作砥君身雖歸
君志不死吁嗟九泉誰爲知己

右墓誌銘陳壽祺撰

沈寶麟

道光二十一年湯溪縣教諭嘉興沈君紱齋謁告將歸湯溪人重君學行爭挽留主講九峯書院君去湯溪亦無以爲家不得已應其請乃增設規條於制義外課經解策論詩賦且爲講經及小學書君嘗主秦州書院亦若此其勞無異爲校官時數年以疾卒道光二十五年正月九日也年六十有五其年四月次子敷桂以縣學生祝光烈所爲事略及君所刻勸設祠倉議減釀備荒說施衣集存信錄湯溪縣節婦譜孝子譜示泰吉於杭州屬爲家狀祝生敘述翔寶君所施設皆可師法乃不敢以不文辭謹詮次之曰君諱寶麟字孔珍紱齋其自號也曾祖諱近仁江蘇儀徵開官清河

必避民墓人咸德之祖諱增爲錢塘桑弢甫先生高第弟子乾隆甲子舉人中乙丑會試明通榜甘肅崇信縣知縣考諱振鵬乾隆庚子進士直隸豐潤縣知縣兩世皆有惠政豐潤公生子二君其長也年十八舉嘉慶戊午順天鄉試道光丙戌大挑一等改就教職其同志友金衍宗岱峯語泰吉曰紱齋累世循吏其爲人精勤亦有治縣才乃辭避不爲與我同何也然爲校官必若紱齋者始稱職爾戊子選授湯溪是時我從兄械雲壽爲武義縣教諭平湖方圳子春佐之兩人皆持躬謹教士勤於是金華士論僉謂錢方沈爲嘉興三夫子云我兄及子春皆遜謝曰紱齋非可幾也君初至湯溪卽修灑掃職殿庭無積塵雨則周省視有漏痕則旁皇若

無所措曰我室完而廟屋敝漏我何衣食於此繕完乃卽安邑人聞之皆感奮相率新兩廡及名宦鄉賢忠孝節義四祠並及先農神祇壇君倡之也尊經閣藏書殘闕者借鈔購補多精整撰文廟祀事考上稽 大清通禮諸書以正湯溪沿習之誤兩廡位次及釋奠儀節器數考定惟謹前期必變食及祭必潔必虔其辭職也自謂精力衰恐跪起或失儀爲大不敬云君治己甚嚴接人甚和待士甚恕當官理案牘纖微皆稽例有問者輒縷舉曲折無遺例所不可者以義斷之眾莫能奪武生葉某爲富家訟審其枉釋不問富家控之府檄縣移學褫葉某衿君請集兩造讞之縣不可府又檄如初同僚曰拂知府意且得罪君曰忤知府不過奪我官我

國朝通志卷之九十一
終不以一官故枉人罪府縣凡七檄而葉某卒不褫廩生某病狂
其父得錢於待廩者爲某請給衣頂君廉知之執不可曰爾子疾
愈必悔之因請叱之曰利乃能移人父子情乎我必不可無何某
疾瘳其父亦悔悟縣賦地丁銀民舊折錢以納有定數會銀直昂
縣將增納民錢君勸止之其長泰州書院時知州議增院租以裕
士止之不可則曰書院者將教士以學道愛人爲他日臨民用可
先示以剝民自裕乎必欲增吾請去議乃罷君生平辨別義利侃
侃不苟同類如此乙未夏大旱奉檄勸分人皆曰沈夫子至吾邑
八年口不言錢今者爲一邑民命計吾儕可不力由是樂輸者眾
凡飢民之簿籍錢粟之斂發期日之疏數縣尹屬君總其成鉤覈

籌畫民困得蘇而君自禱雨至施振憂勞幾半載遂得嗽上氣疾
鬢髮斑斑矣有益於民生者猶力疾勸行不稍怠邑士益信從之
勸設祠倉議諸書皆次第行之而有效者也其書已刊行君敘例
極詳故不具往歲癸未浙西大水自秦州急歸省父墓著省墓日
記述所見水利廢壞及野殞漂流有足爲世鑒者外舅崔公分巡
河南南汝光道時爲撰南汝光水利志十卷蓋自其少時卽究心
郡國利弊期有濟於世行之湯溪者一二端爾所蘊未盡展而湯
溪人已厚被其惠稱頌之不衰祝生述其父言爲諸生六十年所
事學師甚眾未有若沈夫子者卽縣志列明以來官師數十人不
過一二人若夫子耳其言良信然君晚歲讀儒先書自治益力每

歎曰吾自省生平內疚實多也所爲詩古文詞必期實踐不苟爲
高論嘗研究荀爽易爲圖說未竟藏於家娶山西崔氏乾隆甲辰
進士河南南汝光道景儀女中歲以疾盲相敬數十年子三對薇
敷桂應梅皆庠生弟慶齡力學早世應梅爲之後

右行狀錢泰吉撰

陸元吉

視亭陸君以嘉慶戊寅卒於江甯訓導任其後五年 今天子紀元之二載歲次壬午其孤子鼎亨領鄉薦撤公車之費爲下土之資卜葬有日矣略述事實乞余銘幽之文余與視亭爲文字交自少至壯相見則惟商學問疑義相析與劉峻所謂勢利交者不侔也銘其何忍辭君諱元吉視亭其字也少穎悟九歲能屬文比長從里中醒齋王先生遊先生故光祿沈公所賞識者余兄弟亦受業焉君年十九補博士弟子旋食餼蜚聲黌序間每試藝出則傳鈔紙貴戊午登賢書經義甚夥懶不收拾有慙患付梓者笑而不富性至孝父古愚公遘疾數年侍奉不避穢污家故貧時稱貸以

國朝言行錄卷之三十三
供甘旨親串鑿其誠無弗應者卒亦無負券事父母歿忌日愀然
不樂每歲時祭享皆孺人手自烹飪必豐必潔迨生妣徐太孺人
歿祭時拜跪處近淚無乾土也嘗於州守于公席懷鮮荔枝二枚
以遺母公廉得之繪陸郎懷荔圖賦詩紀事一時傳爲佳話太孺
人歿祕諸篋底知其意者不復請觀譬之王哀顧歡之刪蓼莪也
君持身謹躬躬如畏然遇親故於道拱立揖讓惟謹于公會語余
曰睟面盎背望而知爲有道之士陸生是也與人交不翕翕熱然
篤氣誼急有無雖典質弗恤教弟子恂恂善誘課文不多點竄而
塗抹衷於一是俾自覺悟故及門多英俊之士子昔奉教於錢竹
汀先生始涉歷經史爲考據之學而君殊不謂然曰諸葛氏略觀

大意彭澤令不求甚解此讀書法也安用零星考據爲余無以難也少時抱負不凡卒淪落不偶屢試春官不第竟以廣文終卒之日幾無以爲殮同官呂教授經紀其喪鼎亨得奉母扶柩歸吁可哀也已憶君甫婚時余兄弟四人同舉阮修錢不卅年而田荆萎謝而君又先我逝矣余能無慨於中乎君始祖諱宣明鄉貢生嘉靖時糾眾禦倭煮粥賑飢人感其德所居新安鎮後改稱陸公市曾祖諱燾蘇州府庠生祖諱棻州廩生 贈文林郎廣西博白縣知縣載州志文學傳父諱煥例贈修職郎妣李氏生妣徐氏例贈孺人君戊午科舉人戊辰大挑二等授江甯府儒學訓導配曾氏例封孺人子二長震亨早故次卽鼎亨女二一適崑邑廩生許伯

龍一適同里監生錢金堂道光二年十二月十二日卜葬於城北
新阡銘曰

孝乎惟孝百行之始養志養親黽勉甘旨仲氏負米茅容具饌樹
靜風號捧檄淚泣寒氈一片講學雞籠經師人師仰雷次宗辭真
無愧我非阿好爰備史宬以昭公道

右墓誌銘畢憲曾撰

楊兆煜

君諱兆煜字熙崖先世自華陰遷洪洞至明有官指揮者占籍臨清入國朝遷東昌爲聊城人曾祖永禧早卒配唐氏以節撫所嗣孤曰帝錫者於君爲祖娶閻生君考如蘭候選州吏目娶趙恭人以子及孫貴贈如其官吏曰君生二子曰兆俊者早卒君其仲也嘉慶三年舉於鄉戊辰大挑得卽墨縣教諭未久以母年高念鄉里卽去官奉母歸君少有高識遠韻於富貴利達不矯矯立異趣亦無皇皇求必得意至佳山水泉石攀陟幽勝盡意乃返人以爲勝流高致塵世事不可得而撓也然官卽墨時標樹師道不以枝官自嫌人亦樂親不相迂怪其平居事可不可不爲面從至

所勇行不以避名便私生平無雜交惟深友一二人自少至老未嘗有增減毫髮疏數母積病十餘年君年亦且六十扶掖左右歡笑雜兒戲狀母忘疾之久亦不覺子年之衰以是知君樂名教非頽然自放者也君家居奉母時子以增官貴州令有政聲且擢郡守矣及驟遷至安襄鄖荆道而君除母喪始就養於襄陽道光十八年六月十九日卒於署君至襄陽雖未久然其地多漢唐名賢及詩人棲隱迹君散衣曳杖日游其閒所謂孟亭者尤樂而好之爲新其亭及孟公像贊也襄之人樂其游焉不以其子官是土爲嫌君亦不以此自異於是又知君能解毀表去崖岸超然毀譽之外者也可謂敦行超俗之君子矣君娶和恭人早卒舅姑雖垂老

念其賢猶涕泣生子以增繼娶趙恭人生子以坊視以增如已出以增壬午進士官安襄鄖荆道以坊候選訓導女一適同邑拔貢生李宗泰孫三人紹哲紹和紹穆女孫五人曾孫男女一人以某年月日葬君於某縣某鄉某原兩墓人皆耐君長子爲曾亮同年生以狀寄且請銘乃系以辭曰

消外滑本行修仕則懦勇探幽沃其德于振猷襄之陽可車舟優老福古俊遊冷然風莫孰畱保真宅茲林邱

右墓誌銘梅曾亮撰

同軍三ノ月廿二日未
タニニニニニ

十

劉台斗

劉君名台斗字建臨星槎其號也先世繇蘇州遷寶應曾祖諱中從康熙戊子舉人石埭縣教諭祖家昇康熙甲午副榜父世蕃貢生靖江縣訓導兄台拱字端臨爲世名儒君少而敏悟由本縣學生中乾隆丙午科舉人嘉慶己未會試成進士官工部營繕司主事君傳經學於其父兄尤究心於水利凡治河得失漕輸利弊無不洞知其源流通籍後持服家居講求尤確服闋兩江總督鐵公河帥徐公奏畱南河協塞減壩工竣得功奉旨以同知用會黃河南溢入射陽湖眾議有欲因其勢改建新河由射陽入海者君作黃河南趨議千餘言駁之上之總督曰今歲黃河漫溢自陳家

鋪逸下漫口數百丈正河涸成平陸大溜由射陽湖一帶入海將
有南趨之勢蓋地勢北高南下若順其就下之性則舍舊圖新似
亦因勢利導之機也然竊見新河有難成者五有不可不慮者四
夫見在之漫口數百丈之口也而口門以下愈遠愈闊至四五十
里六七十里不等河面太闊無以束水水寬則流緩流緩則沙停
此難成者一也見行溜勢奔騰四注數十里之地或東或西十數
日之間忽深忽淺河無一定之形溜無一定之勢此難成者二也
且漫口向南而大溜先向西南轉趨東北若因之成河則是折一
大灣迎溜必生險工對灣仍致淤阻下壅上潰未見其暢流歸海
此難成者三也且改新河必須築一南隄又須於清黃交界之處

中間隔一橫隄乃數十里中汪洋一片人力既無可施取土更無所出此難成者四也凡言湖者皆潴水之區非行水之道也若射陽湖有出水之口則滔滔下注久當涸出五壩之水不當停積中泓矣謂之爲湖其形必如盂如釜外仰內凹故水滿則隘水平則停蓋盈科而溢出海灘非暢流而直趨海口也見在河流南注勢似湍激者以瀕湖一帶地勢較河身爲低河面較地勢又低故此時似暢究之湖外之海灘仍反高卽非如海口得建瓴之勢也河將入海必束之使高於海面故能敵逆上之海潮以衝突入海若今之射陽湖口則河流之趨湖雖由高入低而由湖趨海之路反由低入高以低就高數年之後必淤阻此難成者五也更有不可

不慮者夫五壩減下之水減入下河者也往時五壩一開雖無黃
流之阻尙且淹漫數縣之地停蓄數月之久必須閉壩而後就涸
未有壩未閉而先行涸出者若分射陽湖以爲黃水之道則清水
去路爲黃水所奪減壩之水全積下河不能容納此可慮者一也
運河閘洞之水亦歸入下河者也一爲黃流所阻去路日高水無
所歸以內地爲壑此可慮者二也淮南之鹽場東西財賦之藪也
沿海場垣瀕於鹽阜今若偏近黃流淡水內侵產鹽必少清水內
壅場垣必淹此可慮者三也至於黃河本有南趨之勢阜甯地勢
高於鹽城鹽城地勢高於興化愈南則愈低今若導之使南再有
漫溢則就下之勢必入興鹽一入興鹽則不能入海而南入於江

是河與江合江淮河漢四瀆合流是古今一大變遷也杞人之憂
又不止淮揚二郡之生靈東南一帶之財賦矣於是南新河之議
弗果行君又上書曰山盱五壩減出之水歸入下河者以高郵各
壩爲口以壩下引河爲喉以興鹽各路湖蕩爲腹以串場河各閘
爲尾閘以范隄外各港口爲歸墟必須節節疏通使水不中渟層
層關鎖使水不旁溢方能引水歸海而保護田廬數年來各邑受
淹之故以壩下引河淺窄而兩岸十餘里外卽無隄形是以減下
之水不能下注先已旁流此高郵受災之緣由也壩水注之興鹽
渟蓄湖蕩湖蕩雖能受水而不能消水旁無隄防下無去路盈科
而進者仍復泛溢四出在湖蕩之上者誤以湖蕩爲歸墟在湖蕩

國朝通志卷之二十一
二五
之下者止知曲防壑鄰幸游波之不及而壅極必潰雖少緩須臾亦復同歸於盡此興鹽各邑被水之緣由也場河淺故上游之水不能驟洩海口高故場河之水不能驟出加以壩面寬而閘面窄來源多而去路少猶以斗米注升欲其暢流不得矣此范隄內外被水之緣由也誠使壩下之引河加掘寬深堅築隄防引歸湖蕩則高郵之田可保矣湖蕩之旁圈築圍圩約攔水勢仍畱去路導入場河總使水有下注之路而無旁溢之門則興鹽一帶之田可保矣再於場河挑深酌添范隄閘座並挑通閘外港口則范隄內外之民竈可無虞矣惟是場河以外形如釜邊場河以內形如釜底以釜底洩入釜邊必須擡高水面方成建瓴若以挑河之土堅

築兩岸之隄則地勢雖內低外仰而水面仍內高外下也如此則有溝有防表裏相應誠一勞永逸之計也總督聽其言而未能行丁卯簡發江西以同知補用試吳城吳城民多板屋而居值火災燔燒千餘家君至爲設水龍六坊各一梯衝鉤鏃及貯水之器各數百坊立役夫二十人以時習其激躍轉輸之事官給以食均勤情爲賞罰又多掘井以備綆缶立教萬算役夫以外民有擔水一石與算一官給以價以是吳城不復火巡撫金公下其法於通省令做行之在任二年善政最著補瑞州銅鼓營同知寶缺以病乞歸吳城民持鏡一匳水一盃拜於舟前曰象我公之明且清也送者數千人率相泣別去癸酉補原官奉檄總運事遂以勞頓卒卒

之前日謂家人曰吾死無他恨惟吾兄未祀鄉賢以此耿耿爾吾兄者端臨君也君未第時卽勇於爲義嘗與邑令孫君源潮勸建畫川書院修節孝祠戚烈婦祠治宋涇河引漕河水入城以溉民田治城北之劉家潭築隄以捍水患在官時則平歛人兄弟二商之訟表前明士人葉景恩死難之烈歸新建主簿某停滯之喪它如拯漂溺置義冢立質劑禁游手具載於君之家譜及事略弗具書君有功於河書其河議之有裨時用者所著有下河水利說一

卷

論曰君駁新河改道之說深切著明後之人欲知射陽海口情形者曷覽之君下河築隄之議本於靳文襄之書文襄建此議爲吾

鄉喬侍讀等所阻然靳公規畫工程丈尺經費具載於君水利說
中昔阻其如此者今欲求其如此而不得矣

右傳阮元撰

張鼎五

張君諱鼎五字薌塍世居浙之蕭山曾祖朝琮直隸通永道祖文
瑞山東青州府海防同知考學斯廣東主簿主簿君兄弟三人長
偉山次滌三皆不仕滌三以子湘崖官汀州知府故 贈官如其
子主簿君官粵際不一施遽卒君時才五歲耳依母童安人萬里
返葬孤貧赤立斬焉自修久之乃遊楚依從兄黃陂令湘崖湘崖
由楚徙豫三遷而官汀州知府君壹從焉居亡何荆梁教匪遽起
蹂躪三省兵餉糜萬萬 朝廷議民有輸金縣官得除爲吏嘉慶
四年君由是官山東署沂水縣丞補單縣典史單故多豪右素慢
易尉君抑桀扶危峻拒干謁傷恤獄囚痛與糞除漉其污溼而時

其凍餓後三十年君退歸囚有流紹興者途遇君匍伏叩頭君錯愕囚曰某單縣人也清獄之惠不敢忘宦單十年歎曰尉所得爲者吾旣爲之矣吾所欲爲者豈尉謂哉聞竟移病歸而山東舊僚酷慕君累書招致乃復薄遊齊魯傳客淮泗之間至七十二歲始杜門不出又一紀乃考終云君於孝友若趨利然初喪父童安人撫之積劬僅存內外無倚寒飢力學夙興母爨汲君負薪恐傷母手盡拔芒刺然後之塾或竟日無所得炊母子對泣已而互慰汀州君以事牽連被劾君營護奔告凡四晝夜行千餘里卒脫汀州君於是人人翕然服君之內行也道光壬寅十月四日卒配陳安人祇順敦儉見者師效子男子三人長錫戊浙江鄉試舉人次百

揆以一甲進士通籍爲翰林院編修次百衝殤女子三人長適某
官某次適某官某次適某孫某某百揆之舉於鄉與余同年相善
也以某年月日葬君某縣某原來徵銘銘曰

析枅作桷蒿作梁大小易位今古傷有嘉一尉仁且彊皓首卑栖
不得驪身之乖時遭厥子慎終卜臧魂藏此我最其行垂孔軌萬
千億年無壞毀

右墓誌銘曾國藩撰

四庫全書

卷一百一十五

一

楊道純

楊道純字聖功河南偃師縣人也四歲喪父母哀毀幾死鄰里感嘆爲廢食十歲就塾日誦數千言塾師厭之不令讀道純棄去十五歲學織從破籠中得東萊博議一卷愛之置諸機且織且讀里人有爲按察司吏者援之同行習辦告數月遂精科比法願諸吏所爲多舞知奇請它比其下中又僕邀不足數因復自謝不竟吏嘉慶四年 仁宗睿皇帝親政開言路庶人皆得上書道純入京上整飭積弊策洋洋萬言指斥中外無所避 睿皇帝嘉之賞未入流銜交直隸總督委用道純於是得官矣道純感 上恩益思自效砥節首公劬勞鞅掌需次一載奮不顧身數諍大府過失或

論便宜以相難極我侃侃不自知其若何官也補南樂縣典史
知縣易文炳異視之有所平亭輒寄道純道純輸膈事文炳文炳
恨得道純晚未幾張標之事起張標者河南劇盜橫行劫近畿道
純聞之中夜旁徨嘅嘆又聞邲寶逆賊踵川楚 詔下勦撫而軍
興以來空言進勦戶部轉輸至萬萬大帥擁兵避寇中外無有爲
皇上言者小臣圖報正在今日遂草開誠布公先撫後勦一疏歷
詆諸臣無狀干總督上之總督劾其狂妄請革職治罪 睿皇帝
不許布政司惡其慙故爲摧挫居眾叱誰何道純懍忭不肖屈則
錄其胥吏簿責之幾以得閒推問累旬卒無可撓而南樂縣民間
典史且得罪老弱數百人環督轅狀其攻苦且至道純頌繫所問

安否及聞其還任歡聲震天擁之去南樂故與清豐接有馬頰河
久湮雨則平地水兩境民各爲曲防構訟數十年不決道純行縣
商清豐糾眾相度導以醜渠法不費官錢而水患悉除溉兩縣田
千餘頃道純身長八尺餘魁岸雅步黑而津目瞬瞬芒角四射爲
人亮直有膽視天下事無所不當爲爲知縣言民要害一夕免徭
役費萬金民益德道純道純亦深感知縣次骨典史舊有餐錢賦
於民道純悉革去隨身衣食仰給於官其子來省父肩襍被行二
千里三日卽遣歸予餽餅數斤組袍一襲而已知縣嘗過道純廨
傷其布被食淡爲昆弟語錫之金道純不受曰典史法錢已立無
所事金且裁奇羨而納明府金是割名操贏也於義不可當是時

睿皇帝方誅和坤以六計弊吏治胥飾區霧蒸蒸日上而潢池羣盜時塵 宸衷道純以爲此外蠹也不足患患在內蠹內蠹清則外蠹自散今羣臣握觚大臣恐諛上蒙 聖主下誤良民民益從賊亂何由身於是搃掣繫歛慨柱石之乏材念況施之未報聲情激壯咋其座人凡任南樂縣典史五年而骯髒之氣終不少衰十年六月有盜入縣避宅武生家既去知縣聞捕武生以迹盜武生不承控知縣誣良總督參革知縣職道純勃然曰是我去官效死之秋也上疏揭總督欺罔數大事儿三千餘言自甘凌遲處死奉旨交軍機王大臣審問會有言小臣侮上風不可長者遂下刑部道純到部抗辨久之認誣賊 睿皇帝不忍誅發伊犁充當苦差

故事伊犁官犯省釋者例由刑部令布敘原起謂之簡明事由將軍據之以請道純見文中互異且與上諭歧析律貳端弊在奸吏因陳刑部書辦竊權巧法者七事上將軍將軍辭之道純寓書於其子赴京不獲奏逾月刑部已自行檢舉矣道純以嘉慶十七年七月八日卒於伊犁年六十一十八年正月革職衛千總張超羣攜其柩歸葬其先人墓側移其子婦於固始縣撫恤之超羣固始人以誑誤發伊犁與道純善

贊曰道純質美未學人也遭值睿皇帝殊恩破格而終不能以自全惜夫夫位卑言高令甲所禁道純恃聖人在上鼓其愚慧曉曉再三此息夫躬所謂不曉政事者也天恩高厚宥其殊死

雖唐虞之諫鼓善旌方茲猶爲編矣

右傳蔣湘南撰

楊先鐸

胡嵩齡

黃本駟

楊先鐸字木庵湖南湘陰人嘉慶庚申舉人官桃源教諭構精舍講學署中擢永順府教授以老辭不赴先鐸工書尤以能詩名侍郎程恩澤視學貴州過龍陽驛舍見先鐸壁閒詩極爲獎許名益著著有惺齋詩十三卷孫本震請生亦能詩時有胡嵩齡原名大魁字貫斗保靖人嘉慶癸酉舉人任晃州廳訓導有學行敦尙風槩少從同里尤樹學及樹死家甚貧母老病無所倚嵩齡於是積諸生語曰師死母無以養將奈何眾皆曰惟君策之嵩齡曰吾以一日之長其所學差先於諸君今請代師課授而以束脩歸其家何如眾皆曰善如是者三年尤氏用少自給客京師友人有旅死

者嵩齡爲歸其喪往返且萬里在晃州增置學舍宣解經義廳故僻陋數年文風大起母喪歸廬墓終身不復仕卒祀鄉賢祠子興仁浙江巡撫黃本騏號花耘甯鄉人少孤母劉氏教督綦嚴母怒輒跪受訶撻竟事怡然遊幕四方恪遵母訓作詩佩之與弟本驥刻意砥行同以所學著名湖湘聞尤工詩嘉慶戊辰舉人授城步訓導尋卒

右傳李元度撰

王璵

君姓王氏名璵字銳九別字魯峯先世自濟源遷寶豐君祖天祿
遷魯山考明玉年二十餘歿以君仕 贈順甯知事配張孺人早
歿繼配溫孺人實生君數歲而孤孺人守志撫孤鄉里以苦節稱
君稍長傭書以養習申韓家言魯山令王君肇基調南陽延君佐
幕務歸投牒爲刑曹吏期滿考授正九品職以母老不謁選躬耕
養母者二十年母歿治喪中禮服闋得順甯府知事長官才君署
縣事歲大旱請借穀順甯離省千八百里待報則民餒遂開倉先
賑之長官怒君擅發君申辨得請明年貧民不能償者五百餘石
君變產代納育賢書院久廢君捐俸修葺聘貢士杜棠主講席文

學興起請於上撥官地二頃以資膏火改署雲州州有新墾地歲
歉徵租民大困君爲詳免州不產瓜瓜時斂民錢市於他縣遂爲
例君復免之普洱府威遠極邊地夷民雜處其俗好人而怒獸號
難治長官皆曰無險王知事者遂調威遠甫抵任而黑獠叛巡撫
江公蘭會提督某公發兵剿捕之軍裝資長夫力前募者多不給
值民間雇役多逃避君無剋減久之民信爭爲長夫運裝速於是
有牛肩山土地塘之捷邦右甯靖善後之虎練八百土練二千皆
隸君撫循得兵心而民不擾波月那磨投誠頭目刁廷桂黃金武
具嚮化結事平以功授縣丞職署恩樂縣威遠民攀轅而送者千
餘人縣東門臨大沙河渡者多溺橋久圯君席橐中先出資爲倡

費二千緡而橋成民德之邊俸滿以州判用君任事不避艱險荒
崖叢箐間積勞致疾回里長官莫不惜之今大學士費公官
雲南布政使時前直隸總督宮保顏公檢官迤南道時皆曰王知
事誠實之心人不能及昔班孟堅傳循吏合西漢二百餘年庶得
六人探其本則曰以經術飾吏治君起家不由縫掖而歷著循聲
如是是可表也君生於雍正癸丑年某月日歿於嘉慶庚申年某
月日春秋六十有八葬於縣西某鄉子一人光鼎魯山縣學生孫
二人景洙景泗葬後之八年余始爲文表之表曰
古之仕也以澤民今也不然自束髮受學授之於其師聞之於其
親皆以爲榮其身而利及其子孫然而問刑名不知問錢穀不知

一曰有事則替黃而遠巡君之居官也遠追黃霸而近比况鍾固
固受道而邊徼抱功不藉於帖括而直摭其心胸吾表其墓無虛
詞使儒名而市行者聞而愧之則其膏澤也庶可下及於蚩蚩

古真表熊寶泰撰

陳容禮

質庵叔祖容禮以父英德令沁齋公謫戍伊犁遂棄妻子隨侍以
往跬步不離者十餘載嘗密請於將軍松文清公願以身代俾父
得生入玉門公憐其誠據情入奏雖未奉 俞旨而孝子名布於
域外矣父歿徒跣萬里扶柩歸葬廬墓三年後官江蘇通守松文
清公入掌鈞軸書聯贈之曰攬勝寰中九萬里承歡塞外十三年
蓋紀實也

右筆記陳其元撰

匡字... 卷二

三

沈欽霖

誥授朝議大夫署臺灣府海防南路理番同知事沈君欽霖以道光十二年秋臺地逆匪張丙等作亂君與守郡城是時福省聞警巡撫兼署總督魏公元烺調陸路提督馬公濟勝帶兵進剿十戰皆捷欽差福州將軍瑚公松額同制府程公祖洛渡臺搜捕餘匪籌辦善後機宜論守城功君得列上薦奉 旨賞戴花翎卽以知府歸部儘先選用十三年秋余由廣東南韶連兵備道調補臺灣兵備道十月舟抵安平接見君驚喜交集蓋君余在內閣時舊友也初君以嘉慶辛酉成進士官中書撰文詞下筆數千言大學士諸公咸倚重庚午典試湖南所得多知名士因失察家丁滋事革

職大學士諸公奏請效力會典館書告成開復原官甫到閣行走旋委署侍讀與余同直情浹洽嘗論作詩賦謂詩尙煩構思不知賦何用思索爲故閣中同寅無不推尊君之能文者道光二年派充 實錄館詳校官議敘一等四年八月除授福建福州府平潭同知六年五月署邵武府清軍同知九年三月署興化府知府旣卸篆調署臺灣府海防同知君於平潭同知任內乙酉戊子兩科皆監試文闈福省官知與不知咸目君爲溫文爾雅儒者也及任臺防猝聞張逆等之亂起嘉義不動聲色密檄飛飭所屬番弁選精壯屯丁三百入保逆黨率眾窺伺郡垣君督番兵會同文武迎敵奮力擊賊生擒林龍陳電等寸磔於市使賊不敢越嘉義以南

嗚呼何其壯也臺地固稱積亂難治之區自康熙開朱一貴倡亂以後叛者十四次士大夫之官斯土者難矣然使作吏者盡如君或能先事預防不至於亂卽亂能如君之精詳明決亦可卽時殲滅勿煩勞內地大兵悲夫張丙之初起藉口於搶米嘉義令邵用之不知其叛謀被殺死臺灣府呂志恆前往賊已聚至萬人父老孳轅泣畱不聽戰死斗六汛縣丞方振聲竹城破並妻張氏焚死幼女亦從死幕友沈志勇父子家丁江永惠等皆從死武弁自副將而下死者十餘人惟總兵劉公廷斌兵敗幸不死保嘉義城亦以憂憤病死君嘗謂余曰方事之殷也有死之心無生之志今出萬死一生之中賴 國家威德妖寇盪平臺地沿海諸省之保障

非勵精圖治無以久安余方壯君之言而君以積勞已齋志以歿
矣君精於吏治任平潭時立書院治埔田士民皆悅署興化府時
木蘭陂工程甫竣開挖涵洞以資灌溉培築土埂以保農田署臺
防時裁減口費體恤商艱方議改船政謂宜使漁船配穀蒙制軍
嘉獎而君已卒余皆略而不詳者士不遇盤根錯節不別利器所
以著君生平之大節也君諱欽霖字仲亨一字芝堂先世自前明
太常寺少卿諱漢遷居於吳江縣城南之水西莊遂著籍焉曾祖
諱重祖諱焯本生祖諱阜上皆 馳贈奉政大夫內閣中書曾祖
妣陸氏祖妣陸氏本生祖妣朱氏皆 馳贈宜人考諱宗德乾隆
乙酉舉人歷任靖江上海縣學教諭 教授文林郎晉 贈奉政

大夫內閣中書妣趙氏繼妣趙氏皆 敕授孺人晉 封宜人配
范恭人生三子長祖原早亡次慶原次庚原先君卒孫男四人桂
芬桐封柏年捐官生於乾隆己丑年九月十六日午時卒於道光
癸巳年十二月十九日子時壽享六十有五歲慶原治君之喪將
歸葬於吳江祖塋之側來乞銘余在內閣知君久銘之余宜銘曰
君生於吳官於閩卒於臺君之卒也適余其來臺地郡城賴君守
臺地善後待君裁天胡不少畱盡君之才嗚呼非斯人之哀而誰
哀

右墓誌銘劉鴻翱撰

皇朝年表卷之八

三

陳世昌

歲辛酉余方留京邸其年各省舉鄉試闈墨至都下盛傳以湖南第一名爲最且聞其人敦古誼肫肫孝友人也於時海內操觚家莫不知有解元陳君者君諱世昌字卜五號藝蓀先世由荊州遷武陵曾祖祖父某母某氏皆 贈如例君生二歲而孤與一弟兩妹俱育於叔祖母胡稍長受業同里王春野先生之門好學異於眾年十四補弟子員旋食餼歲科試輒冠軍嘉慶五年選拔試諸生臨點呼君名不至督學吳稷堂先生坐以俟使學官促之再四辭之以叔祖母疾篤督學歎曰此之謂優明年考取優貢第一卽於是科領鄉解比入都公卿聞其名爭延請課子弟經其指授多

取科第如摘髭十年考授國子監學正十七年推升博士補儲濟
倉監督二十五年選授山西蒲州府同知時瓜爾佳公成格爲巡
撫與道府諸人皆雅重君知其廉明冑任事委以積案之疑難者
不兩月審結七百餘起塵牘爲之一空復捐廉俸勸書院以育士
訓著監掣兩次委修城工費省而工堅屹然有金墉之望焉當君
官國子監時文名在天下僉謂宜取上第一時鉅公卿主會試皆
欲得君爲榜目重而君卷故虎氣騰上無次不薦或已入高選危
得復失比榜發則相顧錯愕往往失君者卽平日誦欲得君者也
文章憎命達信矣夫其在晉省官聲尤著百姓服而懷之甚至鄰
蒲境如陝豫之民有事亦投狀於蒲欲得陳公一質訊卻之不得

以好語慰遺之再三猶徘徊不肯去其得民心如此會歲旱永樂
鎮尤嘆君步行祈雨遭疾卒臨卒前手編所著親雅堂詩文若干
卷復致書其姑丈唐竹谷以徵選湖南詩文爲言且寄以刻賞若
自知其將不起云君生於乾隆四十二年八月二十日卒於道光
三年十二月初十日年四十有八歸葬本邑西關外烏龍港配戴
宜人子二長慶基娶糜生蕭某女次慧基配庶吉士羅瑛女女二
適某某孫某幼銘曰

鼎之山岫岫沅之水舒舒代產名宦鍾名儒吁嗟藝蓀兮其用未
竟而志不踰此山此水常厥居

右墓誌銘陶澍撰

民國二十九年六月廿七日

四

張家集

蓉裳之喪至自新化其友鄧顯鶴走長沙同黃本驥虎癡會哭於臨湘門外舟次遂以其喪權厝南郭洪恩寺側踰月虎癡以書召顯鶴來卜期會葬且徵銘曰是其生篤嗜于文死非子言不受且其孤幼不能具狀非子言不信余泣然曰是余之責也夫按湘潭張氏有二族皆世有達官蓉裳之先居襄陽其著籍爲湘潭人自國初始湘人呼爲新張新張之名著天下尤多文學士蓉裳少負異才美姿儀善談論年未冠所爲豎體詩已千餘首然少孤不自持暴得狂名禮法方謹士或非之戒勿近蓉裳弗屑也中年後痛悔所爲束修砥節一軌於道詩亦盡汰少作嚴冷幽邃務造於

微妙而後止余交蓉裳晚蓋已非復昔日之蓉裳矣然蓉裳不自諱時時爲人述少時嵬屑事以爲戒聞者不察或指昔日之蓉裳以相詬病蓉裳亦弗辨也張氏盛時蓉裳方在齟齬比長蓋少替矣然一門羣從爲守令丞佐者尙十數人蓉裳貧甚嘗傭書自給既舉嘉慶六年湖南鄉試諸張或稍稍招致之至則齟齬去無居一年者又屢困禮部試益發憤不樂近人所親亦漠然秦越遇之故蓉裳學日益遠才日益斂行日益卓而窮亦日益甚道光六年年五十矣謁選得知縣以余言乞改官除新化縣教諭始至時上官類多當代宏達君子好稱許天下士僚貳亦時髦習蓉裳故樂而安之凡在新化七年其雅知蓉裳者既先後受代去或卒官蓉

裳恆墨墨不自得又新之人方以事牽連學官弟子在繫吏按之急罄裳亦惴惴不安其位蓉裳素病肺咯痰日斗許遇勞則篤至是益委頓以道光十四年二月辛丑卒於寶慶旅寓春秋五十有八吾兄雲渠實在郡爲經理其喪以一舟送歸新化受舍荒郊叢樵殯不成禮寡妻弱子孳然無依斯眞人生之極哀也已蓉裳工琴自言生平清談第一琴第二詩第三然鄞縣沈栗仲道寬序其詩以蓉裳與歐陽礪東紹洛及顯鶴並言不稱其琴也其詩八卷余爲校刊甫竣而蓉裳遽卒尤可哀也蓉裳諱家渠字靜安蓉裳之字特著曾祖埴拔貢生 贈川東道祖九鍵明通進士隆平縣知縣父世潛廩膳生元配胡氏生一女嫁桐城文學許光黼繼室

謝氏生五子聲豫聲壯聲孚聲翼頤頤甫周歲女子一適長沙
吳氏以其年某月日耐葬湘潭縣上四都鶴塘隴廩膳君及其母
侯太孺人墓兆葬裝先宅在湘潭者久鬻於人無可歸虎癡復與
余從子瑛代爲買宅長沙又將以其奉入之餘權子母爲孤嫠經
久計而其喪之至自新化也子琳實左右之蓋朋友之所得爲者
止此而已嗚呼蓉裳老得一令以余言輒棄去如涕唾不復顧何
其決也然居恆自傷年命不永與余書勤未嘗一日忘諸孤蓋不
僅悽然身世之託矣今乃僅以一銘塞後死之責也悲夫銘曰
嗚呼蓉裳誰之不如人皆集於苑已獨集於枯邪嗚呼蓉裳誰非
吾徒人方歌以粵已必避而趨邪豈好修之爲累抑吾道之易孤

胡內嗛於天屬復外躓於里閭亮時命之如斯而又何憂乎眾維
邪嗚呼蓉裳疇昔之諾我不敢渝百世之論我不敢諛銘以志之
冀後之君子有讀其詩而流連往復感慨唏噓者因以徵余言之
不誣邪

右墓誌銘鄧顯鶴撰

百五十五

ノ三十三

三十三

鄧大猷

字愈達

何學奎

鄧大猷字彥輔湖南澧浦人嘉慶辛酉舉人詩古文詞力追先正
選授乾州廳訓導地樸民愿大猷常進之几席諄誨如父兄乾人
嚮學文風爲之一變卒後數十年猶思慕弗置著有石門詩文集
時有聶愈達龍山人由拔貢官辰溪教諭以父病痺卽棄官歸養
家貧投徒以資藥膳父病十九年愈達朝夕自館歸視之手湯藥
以進疾劇醫者言所遺矢如臭則可生愈達卽取溷器傾而嗅之
當是時愈達館於縣義學距家近故便於往還他郡縣有以多金
聘者皆辭不往恐違父也父歿哀悼不自勝在館值經傳語相觸
卽涕泣不止門人竊視其書多淚痕漬溼者有女弟適駱氏蚤寡

國朝志序卷之二十一
三
力貧自守愈達拊育其二子如己生後皆成立愈達歿後邑人請
入祀鄉賢中格不果行何學奎字文亭道州人歲貢生權桂東攸
縣學旋補黔陽教諭黔故邊隘地在任十二年文風蒸蒸日上盛修
俎豆復古蹟濟寒儒捐金不吝七十解組刻苦如秀才時同州何
凌漢爲撰書墓表稱爲篤行君子識者以爲知言

右傳李元度撰

林伯桐

林伯桐字桐君號月亭廣東番禺人嘉慶六年舉人官德慶州學正有脩本堂集

君辛酉舉於鄉道光甲辰選授德慶州學正卒於官年七十君事親孝父歿不復上公車與兩弟友愛待人無論尊卑貴賤皆敬且和生平於學無所不窺尤篤志經學研經宗漢儒而踐履則服膺朱子十三經注疏皆手自丹鉛廿四史及諸子諸集凡目所經者皆能舉其大要見人則抑然退讓有若無實若虛於君見之鄉里事有義當出者必出前後兩制府阮公鄧公皆敬禮之阮公延爲學海堂學長鄧公延課其二子君抱道自重當言則言絕不干預

外事然君之不可及不僅在是也君世系見於黃香石舍人所撰墓誌其著述見於金芭堂孝廉所撰家傳

松心文鈔

吾黨有績學篤行君子曰林月亭先生考桂圃先生嘗構寢廟以祀四親顏曰桂圃家塾先生敬以持已誠以待人言行悉以朱子為法教授生徒百餘人擢科第者甚眾而能敦內行勉實學者往往不乏又深得先生之傳者也配李孺人先卒子世懋諸生孫男二人道光丁未孟夏其弟伯棠茂才奉先生柩葬於白雲山雨花臺之原

粵嶽山人文集

先生考桂圃公歿先生蔬食不入內室者二年先生為學官諸生

貧而能文者或贈以赴科之費

遺事

修本堂遺書已刊者毛詩通考三十卷毛詩識小三十卷史記叢
測一卷供冀小言二卷古諺箋十一卷冠昏喪祭儀考十二卷公
車見聞錄四卷修本堂彙四卷月亭詩鈔二卷未刻者易象釋例
十二卷易象雅訓十二卷毛詩傳例二卷春秋左傳風俗二十卷
三禮注疏考異二十卷史學叢測三十卷古音勸學三十卷兩粵
水經注四卷粵風四卷日用通考十四卷修本堂文集四卷修本
堂外集四卷修本堂駢體文鈔二卷禺陽山館詩鈔十二卷
室集

右詩人徵略張維屏錄

聞星杰

乾隆三十一年 上命王大臣以身言差天下舉人之久次吏部者一等試知縣二等試學正教諭訓導著爲令曰大挑更數年一舉行至嘉慶六年而聞君星杰與焉先是海內殷繁 朝廷至行省臺皆法令具備知縣但據案行文書而坐擁脂膏不肖者遂以爲囊橐其賢者不日遷去或十年卽建旌節於是舉人皆願爲一等聞君儒者不以爲然當推排位廷中以十人爲班主者援筆曰第七可一等卽有宣聞君名者聞君久之曰星杰第八耳於是改置二等聞君出語人曰以冒得官雖三公吾不爲也十年授甯都州學正十一年十二月初九日壬午卒於官年五十有五陽湖惲

敬聞之曰聞君蓋能不安進者於法宜銘按狀君諱星杰字羽儀世爲袁州萬載人年二十七充府學生三十七補廩膳生三十八鄉試中式會祖歸從九品銜祖達國子監生父望光府學生妣易太孺人生母王太孺人配王孺人子三宗恕宗旭宗彌弼縣學生

銘曰

青原沈沈石隙隙中有幽宮白日揜三公何盈君何歉以禮爲室廉爲門彼貴苟得非吾倫子孫勿忘視斯文

右墓誌銘惲敬撰

蒲忭

村諱忭字快亭姓蒲氏系出趙宗正卿叔獻後家世西川曾祖
贈徵仕郎仲選始北遷遂爲江蘇淮安府清河縣人祖正蔚國子
監生 贈徵仕郎考奇勳考職州判官揚州府甘泉縣管河主簿
贈文林郎妣談氏孫氏並 贈孺人君性孝友幼失怙貧無產
兄弟六人食指繁甚賴君以贍君授徒四方歷主講席凡三十年
歲入館穀甚豐而無私蓄奉母孫太孺人康娛樂壽八十六歲乃
終兄弟怡怡無閒言教兄弟子皆成學其內行消篤如此生平敦
氣誼重然諾尙義爲人謀必忠不避嫌怨樂道人善凡一藝之長
一句之工皆稱揚不去口尤能面規人過喜賓客好施與屢致千

金輒散去不治生產浩如也少工詩壯歲遊歷南北得江山師友
之助氣益豪詣益進兼工制義經指授者多獲雋以去決科第往
往奇中蓋以詩文名者四十年可謂有本有文矣君豐軀幹美鬚
髯厚自期許又善談諧每議論上下古今聽者神聳早補博士弟
子員得舉後挫抑名場至嘉慶七年始成進士注選知縣十三年
就官蘇州府教授吳郡學宮閣麗率多遊人君至則嚴門禁灑掃
肅清請於大府重修大成殿在官七年誨諸生以文行吳中士大
夫咸重之學舍爲宋錢氏南園故址君榜所居曰南園吏隱廣蒔
花木暇輒招集諸生論文考藝觴詠流連意氣豪宕不知其爲冷
官也歲甲戌以吏部檄取謁選知縣中途疾作僅愈而歸制府以

君能文善教士請於 上得 旨復原官余亦甚喜其遂初而不
意未及一年而遽逝也卒以嘉慶二十年三月四日春秋六十有
五配李氏 封孺人有壺德女二壻進士高唐營守備張金彪舉
人揀選知縣毛松齡無子君以子行僅四人乃立兄歲貢生懋次
子廷芳之子毓清爲孫毓清年才十二能讀書君之卒也廷芳實
經紀其喪遵遺命以是年七月二十五日葬於揚州平山堂西司
徒廟左而以書狀乞余文表其阡且言君生平詩文不自收拾存
藁無多將索諸知交彙刊以廣其傳庶幾能嗣君志者矣余與君
杵臼交知君最深謹具狀爲表系以銘銘曰
大功同財古也有志胡今之人兮一體之誼而秦越相視髣也絕

倫匪直也文

右墓誌銘汪廷珍撰

鄭世俊

鄭世俊字企園湖南長沙人嘉慶壬戌進士知來賓縣調永瀘重葺紫瀾書院士風丕變遷知西隆州地廣俗悍輒多拒捕世俊設法捕治奸民巢穴一空調賓州因治大獄與上官力爭所全活甚眾民感甚輦重金爲壽卻之惟諭以早完國課甫五月而數十年積欠悉償還百色同知署思恩知府府轄土司每承襲官吏多要索世俊悉除之曰安邊須藉土官力土官貪非公家利也府署多怪歷任官不敢居世俊率眷屬居之獨無恙去任怪如故以母年八十乞養歸卒年七十六弟世任歷官貴西道

右傳李元度撰

皇朝通志卷之八十一

三

葉文麟

予與葉文學枚同僑居金陵君弟槐以死事陝西 賜贈蔭屬子
爲傳時負米往還江浙未有以應久之君父刺史又卒官復持家
狀乞志墓雖不文不可辭按狀君姓葉名文麟字聖植號星槎先
世祖某隨宋南渡居浙東若邪邨遂爲會稽人父某移家錢塘生
三子君最長少穎異善讀書工楷法入都以兵部則例館議敘選
授江蘇呂城司巡檢會巡撫陳文恭公宏謀過境有夫役陵人於
途君縛而杖之巡撫目爲強項吏旋以獲盜十七案申部記功丁
母艱歸浙江乾隆某年 高宗純皇帝南巡督撫奏畱君檄濬三
江口水利相度地勢凡不便民者悉請大府改道服闋由嘉定南

翔司巡檢調淮安稅大使卓異加一級淮安城外市河久淤君勸議請依五里津帖之例挑濬不動帑而工速成民田資其灌溉會河漫入淮君悉心賑給嚴懲竊盜民以安業以父年八十有八捐擢府通判博捧檄之喜旋丁母艱歸葬浙中服闋分發安徽奏畱江南署江甯北捕通判修治行宮及諸名勝獨以節省浮糜稱予加級是年題署淮安通判議濬城河建滾水壩開文渠溝修橋梁道路安東縣以民便河爲壑大河旣淤縣卽受水君以疏濬請於守出良田億萬餘畝鹽艘往來尤便之桃源縣知縣以徵稽料涉訟君攝縣平其事總督莅淮饑民索食甚眾勢洶洶以君得民心檄攝山陽縣議調劑君請郡守升堂曉諭之眾乃安帖因議賑

粥出貲五百兩與邑人立條約收放民皆樂輸復以其有餘散錢米全活甚眾補徐州府通判署江甯南捕通判復辦 巡幸工程賜大緞荷包旋署江甯府江防同知調攝通州直隸州知州沿海有放火搶劫積案沙地千餘人訟莫決君廉得起釁始末罪其土豪之爭地者案遂結州治十月不雨前官未報災倉儲復不足君曰吾先宰山陽亦如是因謀之眾眾知君公廉相率出錢賑粥君請運穀萬斛由海道購薪葦數百艘令分路開倉日賑人二萬餘最後發倉平糶三月民既蘇時又患疫傳染殆徧君爲文牒神驅除瘟疫之厲病者多愈期年受代攀轅泣送者百五六十里時巡撫某與君不相得因移前數任公過劾君降級君回浙省墓置

祭田令昆弟守之構別墅於金陵寓其孥蒔花種竹脩然自得會
大學士總督孫文靖公士毅訪公註誤事不實遂入 告起官降
選陝西布政司經歷權孝義川撫民同知孝義川在終南要隘之
處設官未久流民爭據曠土開墾禾熟時輒相侵奪君勘定界址
議六年以內勿更佃勿加租限滿聽田主自便申上大府並飭五
狼廳鎮安縣一帶做行之眾感德造生祠君爲改祀先賢之有功
德者六十年川匪擾及關中君嚴立保甲團練鄉勇隨提帥勦賊
於興安雪夜襲破賊營事 聞蒙 御筆記注 今上紀元之明
年補授興安府通判兼攝孝義川同知事賊據鎮安縣光頭山君
往斷其糧道賊惶遽夜遁二年賊復擾至孝義時官兵甚少環山

無城君設樓櫓拒之會仲子槐以縣丞效力軍營自大營帶兵入
援夾擊破賊事 聞得 旨嘉獎其後二年槐以奉檄赴洋縣防
堵遇賊力戰死事君兩攝富平縣值軍書旁午馬上治公牘盡瘁
民事擿南湖書院延名師課士捐置膏火士多獲雋民有女爲妖
所黷爲牒城隍神病以愈因聽民作新廟君以餘力修補破敗休
息教化一時望君如歲焉臨潼旱災民苦差徭罷市值官兵過境
大吏惶急以君往莅事下車卽獲澍雨爲革除糜費撫輯回民邑
人安堵尋署乾州直隸州知州臨潼士民詣方伯乞畱乾州人爭
曰奈何奪我公其得民如此州驛馬不足常貨之民間君自捐良
馬補之歲需芻豆購以時價民不苦擾以勦賊時墜馬傷疾作卒

於嘉慶七年四月戊午春秋七十有五君篤於親故以餘祿周恤
貧急或爲婚葬教督其子弟持家有善政好撰集格言勸世妻鄭
宜人先君十三年卒事舅姑至孝方淮安城爲巨浸時宜人居高
樓樓下水激牆崩民或具舟載宜人宜人計一身渡無復以舟濟
鄰人者乃命舟具載鄰人畢始登舟雖倉卒不忘仁恕如此以某
月某日合葬某原子三人長枚欽天監肄業國子生次槐縣丞
贈雲騎尉世職入祀昭忠祠次梅候選知縣女子子四人孫三人
長養福襲雲騎尉次養祿養壽銘曰
君善書臨鍾王君作吏模範黃理溝洫發困倉德綏黎威伏羌瘵
厥躬蘇民殃妻臨難爲貞妻子執戈成國殤官未達民之望死不

朽葬者藏銘樂石同旂常

右墓誌銘孫星衍撰

鄒欣

君諱欣字向榮姓鄒氏族出自陳畱唐時鄒昶爲揚州刺史始家於揚傳至穆當宋南渡時徙越穆孫文紹爲翰林學士生四子其三曰元亨爲諸暨州學正因家焉後十八世至秦熙秦熙生三接三接生士錦是爲君之父君少遊涪安方文輶之門深於時文然不得一遇至年八十始授永嘉縣訓導猶時爲文以式諸生兵備道李公鑿宣重之禮遇甚優越二年君卒於官李公親祭弔卹其家君爲人澹靜年四十鰥居不復娶然勇於就義遇事奮往不避僮仆設書塾以教子姪捐田宗祠以資族之應舉者乾隆辛未大旱乙亥歲饑嘉慶庚申辛酉連年大水君皆倡邑人散給糜粥有

振卹之舉湖州閔生以醫術來居縣城父子三人流落不能歸君館之飲食與其歲餘資贈之使歸族人壻家山東挈一妾一子之閩中途復寄孥於友君聞之命家人迎歸善養之而教其子讀書越八年壻歸君已就官永嘉矣知其空乏復寄給路費使以孥返山東學官俸祿才自給有餘輒以遺親屬困乏者家無畱資君娶洪氏繼娶張氏子二長某次某女一人孫五君卒於嘉慶八年十月四日以十年十月二十九日葬於金田之原距今蓋六年矣孫坻從余遊以君事狀請爲墓上之文因著其梗槩焉

右墓表張士元撰

劉方璿 弟方瑚
陳楷

劉方璿字芸莊湖南零陵人乾隆丁酉拔貢年五十八乃登鄉榜
事親敬謹父煩講理學身率其教通經學尤窳於易雖舟車旅次
亦省誦一爻一象不解思之累日月往往夢與神質語著易說刊
板後屢易之歷主郡屬各書院胥以易爲教及解學官歸年已八
十逢人猶壘壘言易爲學官時同官某病卒奉臺檄令兼署俸入
悉以資之某喪得歸年九十無疾卒又著有易悟六卷弟方瑚字
遜田己酉拔貢考取鑲黃旗教習選知縣改溆浦教諭旋升衡州
教授時年已八十餘艱起拜大吏皆不以禮相繩生平溺苦經史
幼侍父讀塾中父命返家取羹供午餐及至羹未熟卽密入藏書

室家人不知也日晡不至父歸覓之則方閉門擁羣書坐讀一日
食角黍佐以糖霜且讀且食竟以角黍蘸硯中人見墨汁漬口頰
哂之始知其誤其勤學類如此同邑陳精少以淹博著尤長於易
垂老兩目眇昏猶日集生徒講解不倦人咸以書宿奉之後官湘
潭訓導著有雲莊詩集二卷

右傳李元度撰

按劉芸莊先生中乾隆己酉副榜嘉慶甲子舉人官桂東教諭

劉文簪 李沆訓 吳萬餘

劉文簪字侶纓湖南辰谿人嘉慶九年以歲貢任寶慶府訓導訓士以躬行爲本有夏生兄弟以重案互控訟延十餘載未結文簪到任奉檄審結兩造悅服居家敦睦宗族賙恤親故年七十五卒少後有李沆訓字伊卿沅陵人嘉慶癸酉拔貢任安化教諭爲總督裕泰所知擢黃州府教授博洽工詩文與甯鄉黃本驥湘潭張家桀新化鄧顯鶴齊名稱湖南四才子詩湖源漢魏甄孕盛唐卓然成一家言書法超雋識者爭珍弄之嘉慶二十一年續修通志分司編輯著有酉腴山館詩集吳萬餘字竹村綏甯人由歲貢爲安仁訓導幼穎慧博通經史爲文以性理爲宗不務詞華主講崇

甯漢章漢南書院於貧而力學者資以膏火成就甚盛邑有修建
傾貲成其事爲訓導時安仁先農壇久圯萬餘以耕藉爲鉅典所
關乃釀金新之他義行多類此年八十歐陽厚均壽以文識者謂
其無溢美焉

右傳李元度撰

沈欽韓

君諱欽韓字文起號小宛其族望出吳興遷蘇州木瀆鎮至君已六世曾祖彬妣仲氏祖載熙縣學生妣錢氏考培宗 贈修職郎妣馬氏 贈封孺人君秉資極敏爲學甚勤嘗暑夕苦蚊置足於囊校書至漏三下家貧借書於人計日以歸輒寫其要遂淹通經史旁及諸子百家古今別集彙集類書雜記故君學自詩賦古文詞外尤長於訓詁攷證其所爲制舉文沈博怪瑋常人不能解年逾三十始爲縣學生嘉慶十二年舉於鄉又屢躋春官道光二年選授安徽甯國縣訓導十年丁母艱次年十二月二十日卒於家年五十七君以漢書顏氏注淺陋章懷後書注雜集眾手故有

粹駁劉氏注司馬八志文頗宏富而少統貫爲兩漢書疏證七十
四卷卷率彙書四十葉葉率八九百言共二百萬餘言又以左傳
杜注多舛爲左傳補注十二卷別爲考異十卷又以裴氏三國志
注專在補其事蹟而典章名物闕焉爲補訓故八卷釋地理八卷
又爲水經注疏證四十卷而古今郡縣之廢置山川之沿革皆具
又爲韓昌黎集補注四十卷王荆公詩補注若干卷文集注若干
卷又注范石湖集若干卷皆深明唐宋兩朝典章故實故多能得
作者之志凡君所注先寫於書上下左右幾無閒隙乃錄爲初彙
久之增刪復錄爲再彙每一書成輒三四易彙他若陳祥道禮書
王施查三家蘇詩注王昶金石萃編隨手糾謬積成卷帙凡君著

述幾四五百萬言又節錄太平御覽雲笈七籤法苑珠林爲若干
卷較原書十存二三而菁英悉萃焉其幼學堂詩集十七卷文集
八卷皆極華贍屠君孟昭爲之刊行君好接引才士而賦性剛褊
有劉四罵人之癖世亦以此少之予得交君晚讀君著述乃大驚
服聞君之沒也家無餘財不克葬者十年嘗與寶山毛君生甫語
及之爲慨然而歎曰天下有讀破萬卷著書滿家之士而忍其不
歸於土乎會毛君之友上海郁君秦峯好古有行義聞之助以葬
資乃共謀以君著作遺槩歸於郁氏庶幾能刻而傳焉君娶王氏
三子長箕衍不勝喪後君一月卒次瓜衍天衍於是始卜地於木
瀆之福壽山葬以道光二十年二月十六日銘曰

茫茫今古冊籍羣分誰其健者強識博聞劬書嗜炙惟我沈君研
經抉奧攷史解紛既華既實發爲高文穿石務漸泊絲戒焚名山
事業擔荷惟勤學豐遇齋天道奚云靈山之麓我銘其墳

右墓誌銘王鑿撰

君字文起號小宛其族望吳興分吳江遷郡城再遷木瀆爲吳縣
人至君六世君深眉鉅目仰鼻而短脰面麻黑碩腹下垂行步蹇
連語言澀啞年逾三十乃得以縣學生員就嘉慶丁卯江甯布政
使司試領薦赴春官又輒躓丁母大挑入二等道光壬午選授安
徽甯國縣學訓導庚寅九月奉馬孺人諱歸里次年十二月廿日
卒於家配同邑王氏子三箕衍不勝喪後君一月以壬辰正月廿

日歿有孫懋官次瓜衍天衍皆業儒君質亞生知而力同困學幼
侍父貽贈君習爲詩稍長自程誦讀家極貧書值千錢輒無力購
致假之藏書家莫肯出全部得數冊持歸計日繳換然必求要領
寫爲要刪淹通羣經尤長禮與春秋擘擘諸史尤熟於志旁及百
家故記官書野乘古今專集彙集類鈔割記究其條緒悉歸於統
既弱冠念漢書至深至博顏注既淺陋復多盜竊范氏後書雖簡
略而義存實錄章懷雜集眾手故有粹駁劉氏注司馬入志文殊
宏富然頗無統貫尤疏於地理乃覃思廿年遠搜故籍爲兩漢書
疏證七十四卷卷率彙書四十葉葉率八九百言共二百餘萬言
於以正謬補闕盡之矣凡以植國之體端由制度漢世雖近古然

離秦立法爲後世濫觴君故上推姬周下比有明詳哉乎其言之
損益悉陳得失備見使來學有所依據以當後王取法者旣成寓
東於余曰此書發蒙啟覆鉤稽貫串然親見其成書或加省覽會
莫能終一卷覆瓿之歎何待來茲良玉不削必有泣血以相明者
非足下而誰蓋君之自信而遂以信余也余與君皆業荀子嘗推
論爲國以禮之指以爲孔子悼時人悖亂廢禮當使天下嬰毒禍
無可旣極乃見意於春秋以誥萬世君因謂左氏親承聖訓博驗
寶書依經立傳全付託之重而公穀家攻之欲顯復晦杜氏注出
雖得列學官然多人以邪說陰敗禮教其橐左氏也逾於明攻余
涉左氏淺聞君言未深喻也及君郵示補注十二卷正杜氏之大

失其有略陋並爲補綴別爲攷異十卷以闢百家淆亂則信乎從
訟左規杜之後而加詳審者也君又以裴氏注三國志意在補其
褫脫光耀沈落而郡縣鎮戍之僅見一時名物訓詁之不類後世
者皆闕故爲補訓詁八卷釋地理八卷又以地理之學古書唯存
酈氏水經注近人戴東原校定其倒置羨脫趙誠夫爲之刊誤其
書乃漸可讀戴氏短在憑臆趙氏蔽於輕信至於古書之有足互
證與近今志乘之目驗可據者二家又皆蒐討未逮也故爲水經
注疏證四十卷然後郡縣之廢置沿革山川之高深變遷流合派
分昔通今塞皆如提挈在手指掌可談矣又以一代鉅公詩文非
曉然其朝章事實則不能得作者用心之所至韓退之王介甫兩

國朝書目類傳卷之二十一
集於唐宋各立其極而宋人注韓集空疏臆測宋人注王集止及其詩雖云贍博其於人物制度闕略尙多故補注韓集及王詩而別拗王氏文注注其四十四卷又注范石湖集以著南宋之事然後唐宋五六百年之鉅製短章義皆可通君深造真積樂逢其原陳祥道禮書王施查三家蘇詩注王昶金石萃編疵謬觸目隨手糾正各成卷帙凡君著述無慮四五百萬言皆出稽古心得求是於實無一語任意矜眩望誤來學者雖云注釋實可單行唯未習算術常自引以爲憾君手繕古書至夥唯所節錄太平御覽雲笈七籤法苑珠林共若干卷較原書十存二三而菁華悉萃手彙尙存其幼學堂詩集十七卷文集八卷已版行君詩始則導源魏晉

晚乃頽然自放然而屬詞比事必有所處嗜爲俳文才多而不受其患深究三史行文離合之故以故氣骨騫舉脈絡微至其聲窅然而沈其色黝然而幽爲自來駢儷家所未有後更爲散文健入震出盡破唐宋壁壘而自合矩矱一可爲後世法君性至和易不以所業驕人有問者必就其端緒原始要終反覆推尋使皆洞澈唯小小頗事口腹遊處有不暇擇者漸來久要之責又遇僕隸過谿刻相與造蜚語肆謗訕嘗一至秦中遊裝稍潤有華服數事交遊復其倚撫之雖非大失唯余亦不能爲君曲諱也余生平言學推君論文則晉卿庚寅夏自刪定舊作爲三十卷初寫出而晉卿物化今年秋攜橐本訪君於木瀆入門則君奄在殯宮矣嗚呼哀

哉原夫居下以思往其言有文始於詩盛於春秋秦漢作者遞相祖述幸得垂諭方來莫不珍同鴻寶功力羸絀殆難強名李唐以還著述滋廣衡其得失乃有可言杜氏撰集通典蔚爲政書之首然前承劉秩後錄國故搜討尙易宋世不刊之書唯涑水資治通鑑然亦借助羣材非一人心力所及章氏考索馬氏通考則俱以獨力成大業然依類探纂事有循持而舛誤亦復時見近世學者首推亭林顧氏迹其成書郡國利病宅京記不過摺拾之勤筆域志雖未見要亦其類也唐韻正五書功同鑄金而學止一孔唯日知錄閱深簡切足副其守先待後之志而前十卷仍屬帖括末技顧宛溪胡朏明齊次風覃精水地優義居多顧復初窮究春秋分

合著績專家成名於斯爲盛與君並世則錢曉微實能窮探羣籍
刊落疎通大都精當然片詞碎義其細已甚君博聞兼綜同符顧
錢以言識大雖略後亭林而精則過之又文采鴻曜非二君自完
邊幅者比學問之道務多則龐雜無紀而非所以語於吾沈君也
君名故籍甚而萋斐尤盛余薄植無可指數困蹟更甚於君疏附
禦侮非其任矣竊述所知爲狀寫付瓜衍天衍錄副二本一以告
君一編君集之末使君學大昌之後知君所謂真知之者唯包慎
伯之言之非妄歎也謹狀

右行狀包世臣撰

匡章及子伯樂名不著

三

徐畫堂

徐畫堂字少韓湖南湘潭人父文壇敦行能詩畫堂能楷書工制
藝弱冠膺選貢旋舉嘉慶丁卯鄉試任安鄉訓導學使謝階樹引
與唱和久之卒於任弟楚瑛癸酉舉人從弟嶽瑛辛巳舉人任鳳
凰廳訓導保知縣並有聲

右傳李元度撰

K820.49

514319

文科教師研究所圖書室

2

國史學研究會
卷一百五十六
三

164-842



21101000161406